

32

Wilkinson


1657



Ex Bibliotheca  
majori Coll. Rom.  
Societ. Jesu

52.5.6  
52  
C  
4  
2

1.





VNA FIDES,  
VNIVS  
ECCLESIAE ROMANAE  
CONTRA  
INDIFFERENTES  
HVIVS SÆCVLI,

*Tribus libris facili methodo  
asserta*



A

P. HONORATO FABRI  
SOCIETATIS IESV  
Theologo.

Cum facultate Superiorum,  
& Privilegio Cæsareo.

DILINGÆ,

Formis Academicis:

Apud Ignatium Mayer.

Anno Domini M. DC. LVII.

100

THE  
OFFICE OF THE  
SECRETARY OF THE  
NAVY  
WASHINGTON, D. C.

DEPARTMENT OF THE NAVY  
OFFICE OF THE SECRETARY  
WASHINGTON, D. C.

NAVY DEPARTMENT  
WASHINGTON, D. C.

NAVY DEPARTMENT  
WASHINGTON, D. C.

NAVY DEPARTMENT  
WASHINGTON, D. C.

NAVY DEPARTMENT  
WASHINGTON, D. C.

NAVY DEPARTMENT  
WASHINGTON, D. C.

NAVY DEPARTMENT  
WASHINGTON, D. C.


*EMINENTISSIMO,*  
*ILLVSTRISSIMO ET REVERENDISSIMO*  
*Domino, Domino*

**IOANNI PHILIPPO**  
**S. SEDIS MOGVNTINÆ**  
**ARCHIEPISCOPO,**  
**S. R. I.**

**PER GERMANIAM**  
**ARCHICANCELLARIO,**  
**PRINCIPI ELECTORI,**

*Nec non*  
**EPISCOPO HERBIPOLENSI,**  
**ET**  
**ORIENTALIS FRANCIAE**  
**D V C I, &c.**

*Domino meo Clementissimo.*

 Rit fortè, quod mirum **TRI**  
**B I** accidat, Elector Eminen-  
tissime, adesse hominem, ut  
facie, ita & nomine **TRI** prorsus igno-  
( 2                      tum,

## E P I S T O L A

tum, qui ex abrupto T E interpellat, & hoc opusculum, quantulumcunque sit, Clarissimo Tvo Nomini, T E incon-  
sulto, inscribere non vereatur. Cui ve-  
rò potius, quàm T I B I, veteri more,  
hanc meam lucubrationem inscribe-  
rem, nemo mihi occurrit. Adiapho-  
ros huius temporis, quibus perinde est,  
quam demùm religionem teneant, ag-  
gredior. Per omnes Prouincias, quas  
Catholicæ fidei desertores infederunt,  
serpere hanc pestem, in aliquibus etiam  
altas radices egisse audio. Germaniam  
quoque, quâ vix vlla quondam Gens  
visa fuit Catholicæ Ecclesiæ addictior,  
eandem opinionem inuasisse vehemē-  
ter doleo. Sed inuasit tantum, non-  
dum oppressit. Obuiam eundum est  
serpenti malo. Quis verò id T E rectiùs  
fece-

## DEDICATORIA.

fecerit, Eminentissime Princeps, cuius  
& summa est in Germania Authoritas,  
& perspecta omnibus antiqua Fides  
TVA & Religio.

Cùm igitur in TE, non illustris mo-  
dò generis Nobilitas, longa rerum ge-  
starum experientia, ac gerendarum pe-  
ritia, singularia in Rempublicam me-  
rita, altissimus vtriusque dignitatis gra-  
dus, indoles rebus arduis & maximis  
nata & apta, aliáque id genus: verùm  
etiam integerrima erga Deum fides ac  
Religio, nec non auitæ pietatis inde-  
fessus cultus, & ardentissimum studium  
mirabiliter eniteant: quid mirum, si  
non exiguum à tanto splendore radium  
hæc mea lucubratio mutuetur; quæ  
cùm per se ipsa obscurior sit, adeò be-  
nignæ lucis appulsu, ex suis tenebris

## E P I S T O L A

emergat, & à clarissimo illo Germaniæ sole, aliquid boni luminis hæc vmbra-tilis exercitatio excipiat? Solem appello, qui tantam vim Christiani & politici luminis diffundis, spargisque vbertim in omnes Germanicæ sphæræ circulos, vt vastissimi illius corporis, quasi mens vëgeta, & assistens animus esse videaris. Nempe quidquid in Comitibus, sani consilii; in periculis, opportuni remedij; in dissidiis, congruentis temperamenti affulsit, T v æ industriæ fuit, ac prudentiæ. Si quid in nodis difficile, soluis; implicatum in negotiis, expedis; in machinis tectum, aperis; in animis durum, mollis; in rebus perditum ac desperatum, seruas & restituis. Id tamen præ cæteris ad rem nostram facit, quòd ardentissimo religionis ac fidei

## DEDICATORIA.

fidei propagandæ studio ductus, nihil non moliris, vt errantes in salutis viam reuoces ; nullisque laboribus, nullis sumptibus, industriæ nulli parcis, vt Hæreticos in pristinum optimæ Parentis, à qua ipsi descuerunt, Ecclesiæ gremium reducas. In quo sanè boni & optimi Pastoris partes agis, qui tantâ curâ, tantoque animi ardore ac studio gregi Dominico inuigilas: quò fit, vt non Elector modò, sed à Deo electus sis, ad ea pro Ecclesia & Catholica fide agenda, quæ & Catholicos in antiquæ fidei officio contineant, & sectarios ad meliorem frugem adducant. Faxit Deus, vt Tuis votis reliqui obsecudent, eúmque tandem TVORVM laborum ac sollicitudinis fructum referas, quem vnà mecum opti-

## EPISTOLA DEDICAT.

mi quique TIBI ex animo adprecantur. Vale hîc feliciter, & illic æternum viue Princeps Eminentissime, Romæ. 1. Iunij. 1656.


Eminentiaæ Tvæ

*Humillimus in Christo,  
Servus*

HONORATVS FABRI S. I.



# Lectori.

 *Liquam Instituti mei rationem tibi exponere, opera pretium esse putavi, Ingenue Lector, cum precipua quedam effugia, quibus Adiaphori simpliciorum animos in fraudem inducunt, à doctissimo viro in certa capita digesta atque distincta, huc Romam missa fuissent, eaque precludendi prouincia ab iis, à quorum nutu & voluntate tota mea vita ratio pendet, mihi credita & commissa; nouam saltem responsionis methodum, ac viam inire decreui, ne si antiquam inirem, iam actum agerem, cum hac ab aliis iam ferè ad nauseam tractata & trita fuerint. Ita-*

) ( 5                      que

Ad Lectorem.

*que hunc mihi ordinem seruandum  
prescribo , ut totum opus in tres li-  
bros distinctum sit , in quorum pri-  
mo , Data quadam & concessa ab  
aduersariis premittam : In secun-  
do , aliquot Propositiones , quæ ad  
rem hanc faciunt , ex datis premis-  
sis deducam , eamque potissimum , quæ  
totius rei cardo est , homines scilicet  
in Ecclesia duntaxat Romana sal-  
uari posse , quod multis rationibus  
euincam : In tertio demum præclu-  
dam Aduersariorum effugia , ac di-  
luam argumenta.*

*Quòd autem ea , quæ primo libro  
tradimus , ab Adiaphoris dentur ,  
ex ipsorum effugiis perspicuum est :  
Hic enim contra laxiores , seu mol-  
liores*

Ad Lectorem.

liores adiaphoros non ago , sed contra illos , qui strictioris sunt generis , à quibus illi duntaxat in fidei societatem admittuntur , qui Symbolum Apostolicum tenent , in eo sensu , quem quatuor prima Concilia œcumenica tradiderunt : ac proinde ipsi Catholicos , Lutheranos , Caluinistas , & Græcos schismaticos , fidelium loco habent , & ex iis , Ecclesiam Christi componunt ; ac volunt ea , in quibus inter se illi dissentiunt , ad fidei substantiam non pertinere. Cur verò effugiorum nomine , Aduersariorum argumenta refellam , optima ratio non deest ; nempe huiusmodi homines cum aliam à Catholicâ sectam profiteantur , nec Catholico-

rum

Ad Lectorem,

*rum argumenta soluere possint, quibus fidei nostræ veritas demonstratur, id effugij nacti sunt, ut concederent ultro, Catholicorum fidem optimam esse, sed pariter minimè damnandam Protestantium aut Calvinistarum religionem: ac perinde esse, siue hanc, siue illam homines amplecterentur, cum una ab aliâ in substantialibus, ut aiunt, minimè differat. Hinc illa adiaphoria, quam ut confirmarent, prædicta argumenta commenti sunt, quæ haud abs re effugia in tertio libro à me vocantur.*

*Prætereà cogitaueram Data illa, quasi principia, citra ullam probationem supponere; amicorum tamen*

*con-*

Ad Lectorem.

consilium secus tulit, quibus è re  
esse visum est, ut fidei nostræ ac reli-  
gionis principia in breuem quasi sum-  
mam contraherem, eaque breuibus  
quidem, solidis tamen rationum  
momentis munirem. Quod ut non-  
nullis saltem magis acceptum esset,  
omisi rationes huc usq; ab aliis alla-  
tas, & ingeniosè excogitatas, non  
quòd eas magni non faciam, sed quòd  
ee apud auctores videri possint, qui  
rem hanc ex professo tractarunt: ego  
meas duntaxat adduco, ut nonnullis  
facерem satis, quibus illa non parùm  
arrident: quòd ad me spectat, rem iis  
confici puto; erunt haud dubiè, qui se-  
cus sentiant, quibus sanè liberum e-  
rit, ut vel illa principia citra proba-  
tio-

Ad Lectorem.

tionem supponant, vel auctores illos consulant, qui hac de re ex professo egerunt, apud quos alias rationes inuenient, quas hîc describere facile fuisset, nisi meis duntaxat armis, non alienis pugnare constituissem.

Cur verò hæc data, seu principia præmittam, facile perspiciet, quisquis ratiociniÿ artis peritus est; illa enim solida doctrina nō est, quæ iactis prius fundamentis non nititur, sine quibus adificium stare nō potest. Et licet Adversarij hæc data ultrò admittant, non deerunt tamen, qui vel dubitent, quibus etiam hanc operam meam utilem esse velim: neque res ista ab iis principiis abstrahi, ut vocant, vel seiungi potest, ex quibus omnino deduci-

Ad Lectorem.

ducitur. Illa autem satis plenè & efficaciter probantur; quamquam obiter & non fusè: sic demonstratio Geometrica paucis nonnunquam versibus comprehenditur; nec video ullum, ex iis argumentis, quibus prima saltem data probantur, quod mihi evidens & efficax non sit. Si quis ea minùs probet, quamquam multi probarunt, iique magni nominis, auctores consulat, qui alia proferunt. Nec est, quòd quisquam timeat, inde nouam scrupulorum, ut vocant, & controuersiarum occasionem præberi. Cui enim? non iis, qui hæc data citra probationem admittunt, ut patet; qui cum de iis iam certi sint, noua adminicula non quarant: non  
iis,

Ad Lectorem.

*iis, qui ea negant, qui ad summum in  
suo errore persistent; igitur nihil inde  
incommodi, sed aliquid commodi o-  
riri potest. Erunt fortè, qui rem hanc  
fusè, ac ex professo à me tractari &  
explanari vellent; sed profectò hu-  
ius instituti non fuit; alios auctores  
consultant, apud quos pleniorẽ tra-  
ctationem inuenient, si fortè hac cõ-  
tracta non faciat satis. Et verò si  
nihil unquam, nisi ex professo, at-  
tingeretur, nullus ferè liber in publi-  
cam lucem prodiret; quàm multa e-  
nim ab aliis auctoribus obiter per-  
stringuntur, quorum longiorem ex-  
plicationem aliò remittunt: cur igi-  
tur eodem iure uti non liceat, quod  
aliis omnibus commune est; præfer-  
tim,*



Ad Lectorem.

*tim cum brevis illa rationum summa nonnullis satis arrideat. Præterea nonnulli voluissent, ut propositiones, quas in secundo libro exposui, ad pauciora capita reuocarentur, cum aliqua ab aliis satis distinguere non possint; sed profectò, nullam inutilem, nullam superfluum esse video; immò nullam non necessariam, cum minimâ quapiam sublatâ, hiatus manifestus appareat. Idem dico de iis rationibus, quibus decima propositio probata est, quarum qualibet ab aliis distincta est: nec obstat, unam in alia includi; sic enim sæpius accidit, ut una propositio per aliam iam aliunde probatam demonstretur,*

)( )( tur,

Ad Lectorem.

tur, quod vel ipsis Geometris satis familiare est.

Non deerunt etiam, qui hac paulò nitidius & distinctius concipi desiderarent; sed ut dicam, quod res est, modò responsiones sufficiant quoad substantiam, eiusque sint roboris, ut Aduersariorum argumenta dissoluant, id satis esse videtur; quod sanè potissimum est. Hinc datâ operâ, omnia ornamenta resecta esse volui; puta styli & orationis nitorem; nec enim difficile fuisset, aliquid magis tersum ac nitidum cudere; sed rem istam, polemicam nitor ille non decet. Adhibui tamen dicendi genus planum & perspicuum, non quidem fœdatum barbarie, sed calamistris minimè

## Ad Lectorem.

*mè ornatum , dedique operam , ut  
verba rebus , non res verbis & di-  
ctioni seruirent. Porro distinxì re-  
sponſiones in ſuos numeros ; nihil o-  
miſi , quod non diluerim , eodem or-  
dine , quo propoſitum fuit. Vno ver-  
bo , effugia illa fideliter exſcripſi , nec  
ullam aut ſubticui , aut diſſimulaui  
difficultatem , ſed aperto Marte  
congreſſus ſum , ac ingenuè diſſilauì  
popularia illa argumenta , quibus a-  
liquid aura , apud indoctos præſer-  
tim , Aduerſarij aucupantur.*

*Duo reſtant , quæ fortè in hoc o-  
puſculo deſiderares , erudite Lector ;  
primum eſt , ut Scripturæ & Patrum  
loca , in margine ſaltem citata adſcri-  
berentur : alterum , ne tam crebra eſſet*

## Ad Lectorem.

*variarum rerum repetitio. Primum tamen fieri vix potuit ; aut certè si potuit , non debuit ; cùm enim hac tractatio ex Scripturæ & Patrum locis tota fere contexta sit , paucas duntaxat citationes intertexui , ne si omnes attexerem , reliquum opus quodammodò obrueretur , & nihil nisi citatio esset : doctis scribo , quibus citationes inutiles essent , indoctis etiam parùm utiles sunt. Quod spectat ad alterum , si nonnulla fortè obiter repetij , id , quæso , Aduersariis imputa , qui eadem sæpe obtrudunt : & verò ausim dicere , hanc scriptio- nis methodum repetitionibus minùs obnoxiam esse , ut nemo non videt. Denique non video , aliquid à me  
ite-*

Ad Lectorem.

*iterum adductum esse, quod ad rem  
non faciat, ac necessarium esse non  
videatur. Sed ne diutius te morer,  
totius operis synopsis tibi subnecto,  
quam ubi lustraueris, si è re tua sit,  
in hanc meam lucubrationem oculos  
& animum conuerteres. Vale.*





# SYNOPSIS OPERIS.

## *LIBER PRIMVS.*

### CONTINET DATA.

- |   | Pag. |
|---|------|
| <b>D</b> atum I. DEVS est.  | 8.   |
| II. Deus est Conditor & Moderator orbis, à quo Iusti præmia, Rei verò pœnas expectare debent.                                     | 14.  |
| III. Homo liber est ad bene aut malè agendum, & anima illius immortalis.  | 18.  |
| IV. Deus est summo cultu colendus, amandus, timendus, eius legibus parendum, & quidquid post mortem nos manet, ab eo expectandum. | 25.  |
| V. Ille cultus à Deo præscribi hominibus debuit, & leges ab eodem promulgari.   | 28.  |
| VI. Deus hominem ad finem supernaturalem, æternam scilicet Beatitudinem, creauit.   | 31.  |
| VII. Ge-  |      |

- VII. Gemini fuere naturæ status , integræ  
& corruptæ , in triplici lege , naturæ  
scilicet, scriptâ, & gratiæ. 34.
- VIII. Diuina oracula verbo Dei dicto, scri-  
pto, & tradito continentur. 40.
- IX. Vt vnus est Deus , ita vnus est Chri-  
stus. 44.
- X. Vnus est Spiritus veritatis, vna Fides, vna  
Lex, vna Religio. 49.
- XI. Vna est duntaxat Ecclesia. 55.
- XII. Vna est fidei nostræ regula , propria &  
vltima. 59.
- XIII. Sacra Scriptura , in controuersis  
ad fidem pertinentibus , non est Iu-  
dex. 64.
- XIV. In iisdem controuersis internus cu-  
iusque spiritus Iudex non est. 70.
- XV. In propria causa nemo Iudex est. 76.
- XVI. Auctoritas Iudicis legitima esse, idque  
partibus constare debet. 79.
- XVII. In Ecclesia, suprema , absoluta, &  
vsque ad extremum duratura potestas  
est iudicandi , ligandi, soluendi, &c. 82.

XVIII. Romana Ecclesia est vera Ecclesia,  
atque in ea homines saluari possunt.

90.

## LIBER SECVNDVS.

### PROPOSITIONES EX PRÆ- MISSIS DATIS CONTI- NET.

- I. **P**ROpositio. Vbi error est, vera Ecclesia  
non est. 100.
- II. Vbi diuersa est fides, eadem Ecclesia  
non est. 105.
- III. Protestantes & alij sectarij ab Ecclesia  
Romana descuerunt. 108.
- IV. Ecclesiæ Romanæ fides à fide Protestan-  
tium, Calvinistarum, aliorumque se-  
ctariorum omnino differt. 110.
- V. Ecclesia Romana fidem, & dogmata  
non mutat. 114.
- VI. Ecclesia Romana errare non potest. 120.
- VII. Vna Ecclesia Romana vera & legiti-  
ma duntaxat est Ecclesia. 123.

VIII. Ec-



- VIII. Ecclesia Romana fidem à Christo  
traditam sola retinuit. 126.
- IX. In Ecclesia Romana, vera morum re-  
gula, verique religionis ritus seruan-  
tur. 129.
- X. In Ecclesia duntaxat Romana homines  
saluari possunt. 133.

*Hac propositio multis rationibus  
probatur.*

- I. **R**atio. Ex eo ducitur, quòd sine vera  
fide nemo saluus esse possit. 134.
- II. Ex eo ducitur, quòd vna sit salutis via,  
137.
- III. Ex eo ducitur, quòd vna tantum Chri-  
stiana lex sit. 140.
- IV. Ex eo ducitur, quòd vnus tantum sit  
spiritus veritatis. 142.
- V. Ex eo ducitur, quòd vnus sit salutis no-  
stræ auctor Christus. 145.
- VI. Ex eo ducitur, quòd vna sit vita cha-  
ritatis diffusæ in cordibus nostris.  
148.

# S Y N O P S I S

- VII.** Ex eo ducitur, quòd nulla fides Romanis, & Protestantibus communis sit. 151.
- VIII.** Ex eo ducitur, quòd defectionum auctores tales non fuerint, vt iis fides habenda sit. 153.
- IX.** Ex eo ducitur, quòd nemo fere vnquam mero salutis studio ductus ab Ecclesia Romana descuerit. 157.
- X.** Ex eo ducitur, quòd pauci sint, quos ignorantia inuincibilis, vt vocant, excuset. 160.
- XI.** Ducitur ex Sacramentorum necessitate, pro Adultis. 163.
- XII.** Ducitur ex Imitatione Christi. 166.
- XIII.** Ducitur ex præcepto Pœnitentiæ. 170.
- XIV.** Ducitur ex præcepto Humilitatis. 173.
- XV.** Ducitur ex præcepto correctionis fraternæ. 176.
- XVI.** Ducitur ex præcepto vitandi scandalæ. 179.
- XVII.** Ex eo ducitur, quòd sectarij non minus à Catholicis & Romanis segregati

gati sint, quàm olim Samaritani à Iudæis. 182.

XVIII. Ex eo ducitur, quòd ij omnes, qui ab Ecclesia Romana hæc genus desciverunt, pro hæreticis habiti fuerint. 184.

XIX. Ex eo ducitur, quòd claves regni cælorum Petro duntaxat datæ fuerint. 187.

XX. Ex eo ducitur, quòd fides auditum, hic prædicantem, & hic legitimam missionem supponat. 190.

## LIBER TERTIUS.

### CONTINET EFFUGIA, EAQUE PRÆCLUSA.

I. Effugium. Petitur à Symbolo Apostolico communi. 196.

II. Ducitur ex eo, quòd Ecclesia novos articulos fidei condere non possit. 200.

III. Ducitur ex ignorantia inuincibili Lutheranorum & Calvinistarum. 207.

IV. Du-

# SYNOPSIS

- IV. Ducitur ex flagitiosis Cleri moribus,  
qui schismati occasionem præbuerunt. 211.
- V. Ducitur ex ea nonnullorum Catho-  
licorum sententia, Gentibus scilicet  
notitiam naturalem de Deo sufficere. 222.
- VI. Ducitur ex eo, quòd errores partium ita  
sint comparati, vt ea propter Deus ne-  
minem excludat. 228.
- VII. Ducitur ex modestia Saluiani Massi-  
liensis, qui de Gothorum damnatione  
dubitauit. 230.
- VIII. Ducitur ex facie veteris Ecclesiæ,  
quæ retento communi symbolo, va-  
rios ritus & opiniones permittebat. 236.
- IX. Ducitur ex schismate orto in Ecclesia  
Corinthiaca. 244.
- X. Ducitur ex simultate ac dissensione Pe-  
trum inter & Paulum. 250.
- XI. Ducitur ex eo, quòd Ecclesia non pos-  
sit ea, quæ Christus libera esse voluit, vt  
necessaria proponere. 256.
- XII. Ducitur ex eo, quòd Cypriani, Opta-  
ti, &

ti, & Augustini sententiæ de vnitatē  
Ecclesiæ paulò duriores sint. 264.

XIII. Ducitur ex vero sensu illius commu-  
nis effati, excidere eos omnes æternā  
salute, qui extra Ecclesię vnitatem con-  
stituti sunt. 270.

XIV. Ducitur ex eo, quòd Græcorum erro-  
res nullius momenti sint. 279.

XV. Ducitur ex eo, quòd Protestantium  
non dissimilis sit ratio. 289.

XVI. Ducitur ex beato ex hac vitā exitu,  
quò demùm tota Christiana Religio  
speçrat. 298.

XVII. Ducitur ex eo, quòd falsò aliqui pu-  
tent, admissā partium tolerantia, Ec-  
clesiam saluam esse non posse. 300.

XVIII. Ducitur ex communi templo Ec-  
clesiæ Iudaicæ, quamquam in varias  
sectas distinctæ. 306.

XIX. Ducitur ex dissensionibus recentio-  
rum Iudæorum, quæ tamen vnitatem  
religionis non dissoluunt. 313.

XX. Ducitur ex eo, quòd difficile sit, ex  
vulgi animo opiniones euellere, quas  
cum

# SYNOPSIS

cum lacte materno imbiberunt. 319.

**XXI.** Ducitur ex eo, quòd pleraque capita nunc controuersa, aliquando impune aut ignorata, aut libera fuerint.

326.

**XXII.** Ducitur ex insigni fidelium paucitate.

343.

**XXIII.** Ducitur ex eo, quòd prudentiores Theologi statuunt, Protestantes propter infidelitatem minimè damnatum in.

351.

**XXIV.** Ducitur ex conuersione Barbarorum ad fidem Protestantium, aut Calvinistarum.

360.

**XXV.** Ducitur ex eo, quòd Protestantes materialiter duntaxat errent, itèmq; ex hominum imbecillitate.

369.

**XXVI.** Ducitur ex Ingeniorum diuersitate, quæ variat secundum nationes, Clima-  
ta, &c.

376.

**XXVII.** Ducitur ex eo, quòd restringenda sint ea, quæ ad salutem sunt necessaria, & maior libertas concedenda.

381.

**XXVIII.** Ducitur ex eo, quòd à primariis Eccle-

## OPERIS.

Ecclesiis, quasi à matrice, subortæ contentiones propagatæ sint. 386.

XXIX. Ducitur ex ea libertate, quæ fuit in lege naturæ. 390.

XXX. Ducitur ex eo, quòd omnia ita sint comparata, ut abstinendum sit à rigidis censuris. 400.

Conclusio Parænetica. 402.



**Imprimatur, si videbitur R<sup>mo</sup> Patri  
Magistro Sac. Palat. Apostolici.**


*M. A. Oddus, Episcopus Iera-  
politanus Vicesgerens.*

*Imprimatur.*

**F. Georgius Rainoldi Magister, & R<sup>mi</sup>  
Patris Sac. Apost. Palat, Magistri so-  
cius, Ord. Prædicat.**

**PRO-**





## PROOEMIUM.

**I**N tanta sectarum & religionum (ut vocant) diaphoria, plerique sunt in religione adiaphori, vel indifferentes, qui cum Deum, scilicet summum Bonum, ultimumque Hominum finem in medio ac centro rerum collocent, perinde esse dicunt, quacumque tandem via & linea ad centrum illud perveniat: arcta quidem via est, quae ad Beatam vitam ducit, quaque itur ad Astra, illa tamen multiplex & varia; nec credibile est, inquit, Dei erga hominum genus amorem in eas redactum esse angustias, ut uno duntaxat ductu se se, ac suas opes in nos diffundat.

Neg. in omnibus adiaphori conveniunt; sunt enim, qui Hominem in id duntaxat, ad salutem obtinendam, incumbere volunt, ut inditum rationis lumen consulat, cuius reuera ductu sciri potest, unum esse orbis Conditorem ac Moderatorem Deum, summo colendum cultu, à quo boni praeiis, mali poenis afficiendi sint; haec ferè ab omnibus gentibus cognosci, licet multis superstitionum involucris tegantur, & legum varietate varias reli-

gionum species praeferant : multa praedenter à summis quibusdam viris adinuenta esse , ad populum in officio continendum , & singulari quadam rituum consensione , nouo imperio adstringendum : huiusmodi hominum magnus hisce temporibus est numerus ; qui non Christianos modò , sed etiam Turcas, Iudeos, atque adeò ipsos Gentiles, ut vocant, in religionis societatem admittunt ; modò enim vita cum recta ratione consentiat , de ritibus, inquirunt , parùm curandum est.

Alij verò iis duntaxat unitatem fidei concedunt, qui credunt, IESVM esse Christum ac Filium Dei, cum id potissimum in sacris Literis ab omnibus exigatur : alij denique, contra quos hic ago, ne omnes hereticos in religionis communionem cooptent, iis duntaxat dant locum, qui Symbolum Apostolicum admittunt , quo scilicet rerum credendarum summa continetur, idque in eo sensu, quem prima quatuor Concilia Decumenica docuerunt : quo fit, ut Romani, Calvinistae, Lutherani, ipsique adeò Graeci Ecclesiam Catholicam constituent : quidquid praeterea in controuersiam cadit , tanti non esse, ut ideo fidei unitas abrumpatur.

Hac sententia multorum est, quos propter indifferentiam illam, vel ἀδιαφορίαν in religione, iure adiaphoros appellamus, quorum praecipui duces,

res, vel antesignani, Cassander, De Dominis, & Georgius Calixtus extiterunt.

Sed, ut verum dicam, dum sectas inter se se conciliare, & tot in materia fidei dissidia componere pro viribus nituntur, singularem sectam constituunt, & noua excitant dissidia; ceteros in fidei societatem asciscunt, dum ipsi à vera fide discedunt: agnoscunt quidem in Ecclesia Romana res sacras optimè constitutas, & fidem intaminatam esse, prohibiti tamen variis de causis, ne deserta, quam sequuntur, parte, aliam, quam pro meliore habent, amplectantur; ut vel inde conscientia stimulos aliquantulum retundant, prafatam Religionem indifferentiam comminiscuntur.

Et verò ingentem horum esse numerum, in Britannia, Belgio, Germania, Gallia, quisquis dubitat, rem perspicuam ignorat: in Germania quidem, ab hæresis ortu, vix vnquam tanta fuit animorum inclinatio, atque nunc cernimus; hunc morosa coniux, illum opima prædia, istum parentum obseruantia, alium Principis indignatio, plurimos demum metus sinistra fama, aut alia huiusmodi deterrent: hinc, ut aliquid solatiij, aut certè spei affulgeat, sibi persuadere conantur, de omnibus bene sperandum esse, modò Symbolum Apostolicum admittant; reliquas disceptationes sapientissimo

*rerum moderatori Deo adeò cura non esse, cum ab insita hominum ingenii prurigne proficiantur: immò, quod caput est, pacem inter partes & concordiam moliuntur; quòque illam faciliùs consequi valeant, passim dictitant, cuncta ad amussim expendenda non esse; dandum aliquid hominum ingenio & infirmitati, & cuique parti aliquid de suo remittendum, aut sua cuilibet potiùs permittenda; veterum Συγκατάβασις mirificè laudant, eamque omnibus ad imitandum proponunt.*

*Hi quamvis fortasse mitiùs, longè tamen periculosiùs errant, quibus præfata religionum indifferentia valde probatur, ut vel eò promptiùs ad honores & dignitates promoucantur, vel optata libertatis obtentu rempublicam turbent, vel amicitias, aut fœdus cum aliter de religione sentientibus ineant: caterùm parùm interest, quibus rationibus hanc, vel illam sententiam defendant, cum sententiæ ferè omnes indifferentes sint; quamquam pro illa opinionum adiaphoria multis rationes ad vulgi captum accommodatas primarij eiusdem defensores excogitarunt, quibus magnatum animos sibi conciliant; præsertim cum singularem animi moderationem, & immensæ Christi Servatoris nostri erga hominum genus charitatis commendationem præferant.*

*Sed*

*Sed ut ad rem veniam; fateor ultrò, eo potissimum sine hanc prouinciam à me susceptam, & hoc opusculum scriptum fuisse, ut rationes illas refellam, & cuncta effugia praeludam, quibus instructi & muniti ad iaphori Catholicorum tela & argumenta retundere solent; illa ego in certa capita distinguam, & singulis suam responsionem subnectam; nempe illa rerum distincta series gratam lucem legentibus offert, quæ scilicet eundem ordinem seruant in mente, quem in charta, in qua exarata sunt, ab auctoris ordinatione acceperant.*

*Totum opusculum in tres libros distinxì, quorum primus ea continet, quæ ab iis ultrò dantur, & conceduntur; in secundo libro, ex iis datis multa deducam, quæ ad præsentem disputationem pertinent; in tertio denique, ex priùs deductis ac demonstratis, aduersariorum effugia faciliè praeludam. Porro licèt ea, ut data assumam, quæ ab ipsis dantur, ea tamen breuiter exponam, & firmis, quantum uis breuibus, argumentis euincam, rationi prorsus danda esse; in secundo verò libro, licèt multa deducenda sint ex iis, quæ in primo supponuntur & præmittuntur, id tamen præsertim enitar, ut vel hoc unum demonstrem, in Ecclesia scilicet Romana homines saluari duntaxat posse;*

*Et cum sit præcipuum operis caput, multis illud rationibus prosequar.*

*Faxit Deus, ut hæc opera nostra ad rem Catholicam, diuinumque cultum promouendum nonnihil conferre possit, ac euentus meis multorumque votis respondeat: hoc unum attestor, me non alio, quam veritatis studio teneri, Et eterne felicitatis, in qua tum mihi tum aliis procuranda, cum sanguine vitam haud agrè profunderem; igitur non odio, sed charitate instructus; non aculeis, sed argumentis accedo; errores, non errantes peto Et configo; effugia præcludo, ut in viam salutis erronei illi desleant; unam monstro viam, quam nisi homines ineant, saluari profecto non possunt.*



LIBER



# LIBER I.



**I**n hoc primo Libro ea iacimus fundamenta, quibus tota huius operis moles innititur; in iis sanè multum diùque desudandum non esset, cum ab ipsis adiaphoris admittantur, ut patet ex illorum effugiis, quæ *Lib. 3.* refellam; immò, licèt ab ipsis nonnulla ex iis non darentur, præsertim ultimo loco posita, nec enim de primis dubium cuiquam esse potest, easatis firmis ac validis rationibus instructa & munita præmitto: ut tamen aliis etiam, qui secus sentiunt, fiat satis, quodlibet Datum ita supponam, ut suis quoque rationum momentis & præsidiiis firmatum maneat; quod licèt ex professo, ut aiunt, non præstem, cum præsentis instituti non sit, nihil tamen omittam, quod ad perspicuam huiusmodi Datorum veritatem pertineat, quam reuerà eo loco, & situ, vultùque statuam, ut ab omnibus, nisi sponte sibi oculos mentis eruant, facile videri & agnosci queat; ut autem nihil quod necessarium sit omittere, ita nihil quod superfluum esse videatur, adducere decreui: sed omissa longiore præfatione, ad rem venio.

## DATVM PRIMVM.

*Deus est.*

I. **D**EVM existere, non homines modò, sed brutæ animantes, resque omnes creatæ, quæ sensibus nostris subiiciuntur, mutæ licet, innumeris tamen vocibus prædicant; & si homines tacuerint, lapides ipsi clamabunt; nulla natio, nulla gens quantumvis ferina barbarie à recto rationis usu deflectens, Deum ignorat, sed supplici adoratione veretur, in prosperis laudat, in periculis aduersisque, illius opem implorat; hinc homo erectos tollit ad sidera vultus; & natiuo quodam instinctu, in Deum, licet ignotum, fertur, eumque videre, nec non eius consuetudine frui appetit; quid plura, licet impius in corde suo, nullum esse Deum, id est, nullum esse suorum criminum vindicem & punitorem percipiat, vox enim cordis desiderium est; mens tamen sibi persuadere non potest, quod ipsi cordi in votis esset; & probè scit, eum esse, quem timet, quamvis eundem existere nollet: hoc dant vtrò adiaphori, nec enim pro atheis se gerunt, id tamen quantum nostri huius instituti ratio postulat, aut sanè permittit, breuiter demonstro.

II. Primo loco demonstrationem illam adduco, quæ licet communis esse videatur, nullū tamen dubio locum relinquit, modò rectè & citra verborum ambiguitatem exponatur: quidquid enim existit, vel existit per se essentialiter, vt aiunt, atq; adeò necessa-

riò



riò, nec ab vlla causa procedit; vel contingenter, & ab alio ortum ducit; si quid porro per se necessario est, Deus est, vt patet ex terminis; cùm Diuini esse ratio in eo posita sit, quòd sit ens necessario ac essentialiter existens; si verò contingenter est, ab alio est; igitur præter id, quòd ab alio est, illud quoque existit, quòd à se ac per se, non ab alio est, voco Deum: nec valet futilis illa distinctio, qua nonnulli præfati argumenti rem eludere conantur; quòd scilicet à sensu distributivo, vt vocant, ad collecti-uum consequentia nulla sit; vnde omnes creaturas esse ab alio distributiue vltro concedunt; esse ab alio collectiue, negant: hæc inquam distinctio futilis est; nam vt rectè in analytica obseruaui, quotiescunque aliquod prædicatum vtriusque sensus patiens est, & inter vtrumque, sub eo prædicato, necessaria connexio est; haud dubiè, ex vno sensu, alius rectè concluditur; nempe consequentiæ vis necessariam illam connexionem supponit: atqui fieri non potest, vt multa sint ab alio distributiue, aut sigillatim, nisi etiam collectiue, aut coniunctim ab alio sint; igitur cùm res omnes creatæ ab alio sint sigillatim, easdem ab alio esse coniunctim, necesse est.

III. Aliud argumentum est, quod licet nouum sit, mihi tamen Geometrica certitudine pollere videtur, illud autem in hunc modum compono; quòd ego existam, mihi euidens est; dum enim aliquod principium Geometricum mente complector, mihi euidens est, illud à me cognosci; igitur, quòd idem

Δ      ε

est,

est, me cognoscere; igitur & existere; igitur est mihi euidens, quòd existam nunc, idque contingenter, quia nec semper, nec ubique existo; igitur possum nò existere; igitur contingenter existo; igitur, quod idem est, ab aliò; igitur mihi euidens est, esse illud aliud, à quo existo; voco Deum: nempe quælibet res creata intelligendi facultate pollens, idem ratiocinium adhibere potest; igitur præter multitudinem rerum illarum, quæ præ cæteris intelligentiam animo concipiunt, quæque superiorem agnoscunt, eadem intelligendi facultate præditam, hanc ipsam, quæ per se ipsam, non ab alia sit, existere, necesse est, atque adeò unicam & singularem, ut infra ostendam.

I V. Quisquis infinitum actu, ut vocant, creatum scilicet, negat, vel inde concludit, Deum existere; nec enim generationum series in infinitum ducitur; nec mundus ab æterno conditus est; igitur ad aliquod primum principium pervenitur, à quo mundus creatus sit; quòd autem infinitum actu dari non possit, puto à me demonstratum fuisse in Metaphysica, quod hîc duntaxat indico. Aliud argumentum, quod à suprema perfectionis regula ducitur, optimum est; cum enim dato quolibet finita perfectione prædito, dari aliquid possit perfectius; hoc certè perfectione infinita & omnimoda instructum esse oportet; alioquin, si finita, quolibet finito maius esse non posset, contra suppositionem, quæ reuerà per se nota est; si enim finitum est, maius esse potest, atque adeò perfectius; igitur dato quolibet

bet perfecto finito aliud perfectius dari potest ; igitur extra finitorum multitudinem, aliud esse necesse est, quod infinita perfectione polleat, voco Deum.

V. In Physica nihil ferè est , quod Dei existentiam non probet : impetum admittendum esse, tract. de motu locali, lib. 1. demonstraui ; ille autem impressus mobili diu permanet ; igitur ab aliqua causa conseruatur ; non ab ea, à qua ortum duxit, quæ cum sit à mobili disiuncta, nihil amplius in ipsum deriuat ; non ab aëre ambiente, qui cum motui resistat, impetum destruit potiùs, quàm seruat ; igitur ab alia vbique locorum præsentè ; voco Deum. Deinde cum impetus destruat, ne frustra sit, hoc enim commune est destructionum naturalium principium, illum certè supremum naturæ legislatorem esse oportet, à quo illud naturæ decretum profectum sit ; & quod re ipsa destruat, hoc est, seruare desinat : præterea cum impetus mobili impressus motum exigit, id est, nouum locum, nouam vocationem, vel nouam actionem ; igitur ab aliquo exigit, quod probè sciat, rerum omnium appetitum atque indolem, vt iis scilicet faciat satis ; igitur ab eo omne mobile dependet ; voco Deum. Denique in motu accelerato & retardato debet esse aliquid, quod varias vocationum & durationum, vel actionum classes componat : hæc breuiter indico, quæ tamen ex meis principiis metaphysicis necessariò consequuntur.

VI. Addo alia multa. 1. Nihil est quod determinare possit effectus physicos quoad indiuiduum,

vt vocant, præter causam primam; vt enim hunc impetum calamo imprimo, dum hæc scribo, ita certè alium penitus similem indere possem; cur non hunc, sed illum; nec enim hæc optio in mea potestate posita est. 2. Motus elementares, grauium scilicet & leuium, item compressorum & tensorum, item caelestes & magnetici eò spectant, vt illorum operâ, aliquis finis obtineatur; igitur ad eum finem ab aliqua causa destinantur, quod reuerà vni causæ primæ competit. 3. Prima corporum moles, quantitas, extensio, varia quippe est corporum densitas, ab aliqua causa definita est, vt scilicet tantæ perfectionis esset, non verò maioris, aut minoris; est enim prima regula. 4. Prima plantarum & animalium rudimenta & primigenia semina primum reuerà opificem supponunt. 5. Animæ rationalis creatio, eiusdem cum corpore arctissima coniunctio, summum illum Parentem agnoscit: sed quid in his hæreo; nam dicere auisim, nullum prorsus effectum physicum esse, qui Deum existere non persuadeat.

VII. Itaque quòd Deus sit, quisquis rerum naturam meditatatur, nescire non potest; si autem est, vnus est; quia perfectissimus est; si enim perfectissimus non est, aliqua perfectione caret; igitur suprema regula perfectionis non est; & dari aliquid perfectius potest; vtrumque diuinæ naturæ aduersatur; nam si habet perfectionem limitatam, igitur ab aliquo determinatam; non à se; si enim suam perfectionem determinat, maxima & infinita est; cur enim vna finita, potius quàm alia;

alia; vnica verò infinita est; igitur determinata; igitur ab alio, scilicet à causa; nempe causa, quæ producit effectum, eius perfectionem determinat, quia determinat eius esse; sed Deus à se est, non verò à causa. Deinde cur potius hanc, quàm aliam; cur tot gradus, non plures, si à nullo terminetur: igitur vel totam habet, vel nullam; quòd nullam habeat, dici non potest; ergo totam habet, & in omni genere: v. g. si consideremus perfectionem durationis, de Deo dici non potest, quòd aliquo illius gradu careat; v. g. quòd sit nunc, non antè; per quid enim determinatus esset, vt nunc, non verò antè esset; hic potius, quàm illic; vnum potius quàm aliud posset, aut sciret; igitur cùm omnis perfectio limitata ab aliquo limiteretur, vel quòd idem est, determinetur, & cùm Deus à nullo sit, certè vt à nullo suum esse accipit, ita à nullo illius esse determinatur; igitur nec eius perfectio; igitur perfectissimus est, & nulla caret perfectione.

VIII. Hoc posito, vnum esse constat; quia si duo essent, quilibet careret perfectione alterius; & duo simul maiorem perfectionis cumulum contingerent, quàm quilibet eorum seorsim; nec enim vnus duobus æquiualeat: præterea si vnus non est, infiniti sunt; cùm enim à nulla causa determinentur, cur duo potius, quàm tres, aut quatuor essent: infiniti autem esse non possunt: quia infinitum dari non potest, saltem in numero, vt suo loco demonstraui-  
mus; igitur omnium perfectio coniunctim, perfectionem singulorum seorsim infinitè superat, igitur  
hæc

hæc ab illa infinitè distat; ergo finita est; contra suppositionem. Itaque & Deus est, & vnus est; pari modo omnia eius attributa demonstrantur; v. g. æternus est; si enim aliquando non esset, per se ipsum non esset; immensus, immobilis, immortalis, infinitus, substantia, viuens, intelligens, summum bonum; sed frustra in his hæreo, quæ non modò ab iis, quibuscum agimus, vtrò dantur, verùm etiam ab aliis, quos in fidei societatem adiaphori nullatenus admittunt.

## DATVM SECVNDVM.

*Deus est Conditor & Moderator orbis, à quo Iusti  
Præmia, Rei verò Pœnas expectare  
debent.*

I. **V**Niuerſitatis corpus à se ipſo non eſſe, perſpicuum eſt; eiùſque conditorem ac creatorem Deum, nō adiaphori modò, verùm etiam cuiusvis religionis aut ſuperſtitionis homines agnoſcunt: & verò cū ſolus Deus per ſe ipſum ſit, quidquid Deus non eſt, à ſe ipſo eſſe non poteſt; in hoc ſublunaris mundi trāctu, elementorū compagem in mixtis; ſingularem eorundem plexum in plantis & brutis animantibus habemus; hominum genus principem locum tenet, cui reliqua ſeruiunt; cuncta hæc ab illo ſupremo auctore ortum ducunt; de globis cæleſtibus idem prorfus cenſendum eſt, cū à ſemetiſſis eſſe nequeant: licet enim Epicurei ex atomorū caſu quopiam coëuntium plexu, mundum

dum vniuersum coaluisse existiment, quod quàm sit ab omni ratione alienum, nemo non videt, hoc tamen non facit, quin vltro fateantur, prædictas atomos Deos non esse, sed ab aliquo principio, quamquam ab æterno, vt ipsi aiunt, ortum duxisse; quod reuerà qui neget, neminem esse puto, modò vel ipsos terminos mente capiat.

II. Quòd Deus conditum à se mundum suâ sapientiâ moderetur ac regat, vel per seipsum, vel adhibita Angelorum operâ, aduersarij vltro concedunt; nisi enim res à se conditas deinde conseruet, in primum nihilum reducuntur; nisi cum causis secundis, vt vocant, in eisdem effectus concurrat, nihil prorsus ab iis effici potest; cum effectus illi aliarum rerum creatarum conditionis participes sint, qua scilicet à Deo dependent; nisi demum institutum initio ordinem sapientissimus moderator conseruaret, iam dudum omnia tumultuario excidio periissent: hinc Deus omnia in omnibus operatur; omnes in ipso viuimus, mouemur, & sumus; rem quamlibet ad suum finem dirigit, hisque rebus instruit, quæ ad obtinendum finem necessaria sunt; hinc cum otiosis otiaur, illic agit cum operosis; hinc creat, illinc destruit; omnium denique innato appetitui (exigentiam Scholastici, non Latini vocant) acquiescit.

III. Nec est, quòd aliquis rem indignam Deo esse putet, mundum regere, & res quantumuis infirmas curare; quisquis ita sentit, cum bona venia dixerim, rem hanc non capit; quasi verò quidquam  
fine

sine Dei concursu fieri possit, & Deus incautus vti-  
quam; vel imprudens concurrat; nunquam agit  
Deus sine fine sibi proposito; ut diuinam Potentiam  
voluntas dirigit atque applicat, ita voluntati sapien-  
tissimus intellectus præluceat; igitur nihil vnquam  
Dei manus exequitur, quod diuina mens præmedi-  
tata non fuerit; hæc illa est Dei providentia, qua re-  
gitur orbis, cum nec inscio Deo quidquam fiat, ne-  
que nolente, aut saltem non permittente; hinc sin-  
gula refert ad eum finem, cui destinantur; hinc cum  
nihil non sciat, illos modos, illas rationes adhibet,  
quibus suum semper finem consequatur. Sed frustra  
hic pugno, ubi nullus aduersarius obstitit.

IV. Quod Deus Homines pro rectè factis præ-  
mio afficiat, & pro turpiter gestis puniat, omnium  
ferè populorum ac gentium memoriâ tenemus; in  
id omnes communi quadam notione consentiunt;  
hinc conscientiæ stimulis agimur, dum aliquid faci-  
mus, quod cum recta ratione minimè consentiat;  
contrà verò, post rem bene gestam, singulari volu-  
ptatis sensu perfundimur: nec est, quod aliquis exi-  
stimet, hæc à parentibus, vel magistris doceri, &  
communes esse notiones, non naturâ quidem, sed  
ipso usu, & prima quasi educatione comparatar;  
nam in iis, quæ per se mala sunt & turpia, secus acci-  
dit, licet enim aliunde non didicerimus, eorum ta-  
men nos pudet, & lucem fugimus, dum hæc agi-  
mus; atque erubescimus, si quis in flagranti deli-  
cto nos deprehendat.

V. Itaque cum homines rectè aut turpiter agere  
possint,



possint, ac rectè agere teneantur, ab illo supremo rerum moderatore in officio contineri debent; lex naturæ suum Iudicem postulat, qui eius consulat integritati, & obseruationi inuigilet; si enim lex est, reuerà obstringit, & obligationem affert; omnis autem obligatio creditorem supponit & exactorem; & si fortè negligatur, Iudicem. Præterea cùm rectè facta laude ac præmio digna sint, & malè gesta pœnis; is haud dubiè esse debet, qui singulos pro meritis excipiat; porro hic ex hominum genere esse non potest; multi enim sunt, qui aliis hominibus minimè subiiciuntur; denique cum esse oportet Iudicem, qui causas omnes apprimè teneat; atqui cùm nostrarum actionum honestas aut turpitudine ab animo potissimum, & interiore voluntatis motu deriuetur, quis hæc amabo, præter Deum, qui corda & renes scrutatur, consequi & attingere possit?

Vl. Denique cùm inter cætera, quæ Deo competunt attributa, & diuinas proprietates, Iustitia ultimo loco non sit, eius partes sunt, dignam rectè factis mercedem, & meritis criminibus pœnas reponere; frustra enim Deus iustus esset, nisi hoc Iustitiæ specimen edat; frustra hunc supremum vindicem appellarent, quotquot à potentioribus iniquè ac per vim oppressi, aliud inter homines tribunal non habent, ad quod ipsi confugere valeant; hoc sibi Deus munus assumit, hanc prouinciam suscipit, vt Sanctorum & amicorum suorum sanguinem iniuste fusum vindicet. Nec fieri potest, vt Deus, qui infinità pollet iustitiâ, crimen impunè relinquat,

B

aut

aut rem præclarè gestam sine debita laude ac mercede esse permittat: igitur esset, quod multiconqueri possent, & sanctis naturæ legibus minùs consultum esset, nisi eiusdem naturæ auctor illarum indemnitati, reorum poenâ, bonorùmque remuneratione, consulisset: sed hæc pressius inculcanda non sunt, cum aduersarij minimè refragentur.

## DATVM TERTIVM.

*Homo liber est ad bene aut malè agendum, & anima illius immortalis.*

**Q** Visquis hominum, libertatis expertem & mentis impotem hominem facit, inter brutas animantes eum collocat, ac proinde de hominum genere malè meritis, ab eorum societate segregandus esset, & ad molam amandandus, ut eidem cum iumentis operæ vacaret, qui se iumentum esse vltro fatetur: ut homines impune peccare videantur, se ad non peccandum, liberos non esse dictitant; quamquam id liberè dicunt; dicunt, inquam, nam quòd ita sentiant, adduci non possum, ut credam; quis enim est, qui se oculis captum esse dicat, dum ista liberis oculis lustrat? quis, dum ipse aliquid sensu percipit, se omni sensu orbaturum esse queratur? nisi fortè mentè captus sit: igitur tam percipio, me liberum esse, quàm me sentire, libertatis vsus æquè ac sensuum perspicuus est; vterque æquè mihi notus est, & tam scio, me liberè agere, dum liberè ago, quàm sentire, dum sentio.

II. Ne

II. Negabis fortè, in mea potestate esse hæc scribere; sed reuerà hæc minimè scriberem, nisi scribendi facultate pollerem; aut certè dum scribo, si negas me posse non scribere, illico sustineo calamū; & dū reuerà non scribo, me posse non scribere, luculenter demonstro; quod nisi euident & manifestū sit, quid euident esse possit, nescio. Hinc qui vel somno, vel ebrietate, vel delirio tenentur, si quid, quod cum recta ratione minùs consentiat, admittāt; vel inde se volunt excusatos, quòd tunc temporis liberè non essent; eundem libertatis defectum excusare solent, qui per inaduertentiā, vel subitanē alicuius perturbationis motum delinquant: quid plura, ita à naturā comparati sumus, vt liberas actiones nostras à necessariis, & per vim extortis probè distinguamus, & pectus nostrum patratorem scelerum consciū sit. Equidem aliquando accidit, vt conscientia callum obducatur, & ab immenso criminum pondere obruatur; non tamen omnem penitus sensum ac timorē excutit: & quamuis improbi dicant, se animi conscientiam minimè curare, nec vllum pondus, neq; vim vllam, nec angorem pati: iis sanè nulla fides habenda est; hoc quidem simulant vultu, sed reuerà cordis fibræ palpitant, & magno cruciatu torquentur. Et verò, vt rectè monet Latinæ Eloquentiæ Princeps, graue esset conscientia pondus sine vlla virtutis & vitiorum diuina ratione; itaque si conscientia est, aliquam virtutis & vitij rationem esse necesse est; nisi autem insit, rectè aut malè

agendi libera facultas, nihil profectò est, quod latius di, aut vitio verti queat.

III. Sed vis ipsa humani ratiocinii, homini libertatem adstruit; quod reuerà ex Principiis physicis luculenter deducimus; nempe in eo ratiocinium positum est, quòd aliquid distinctè innotescat, quod prius confusè & indistinctè cognoscebatur; quod vel ipsos Tyrones minimè latet, qui vix analytice Logiceam primoribus labris delibarent, v.g. Huic propositioni, *Sol lucet*, hæc altera est consequens, *dies ergo est*; & istud antecedens, *homo est animal*, consequitur hæc conclusio, *Petrus ergo est animal*; ex quibus sanè videre est, consequens in antecedente includi, vt aiunt, & contineri; igitur attingi & cognosci, sed confusè, vt dixi; nempe si cognosco solem lucere, cognosco diem esse; si cognosco, hominem esse animal, cognosco, Petrum esse animal, sed confusè, quod deinde expresse & electè in conclusione deduco. Igitur ratiocinandi potentiam vim supponit, quâ quis aliquid distinctè cognoscere possit ex eodem confusè cognito; igitur & illam quoque vim, quâ sese ad id determinare queat; quâ vnum præ cæteris eligat, cum in eodem antecedente multa confusè attingantur; si enim vnum duntaxat esset, distinctum reuerà esset; igitur vbi ratiocinium est, ibi libertas est; & vicissim, vbi libertas, scilicet inter homines, ibi ratiocinium: hinc vbi quis à recto ratiocinio deflectit, hunc suum compotem esse negamus; igitur humani ratiocinii radix libertas est, & vt hominem ratiocinari perspi-

spicuum, ita liberum esse, manifestum est.

IV. Inde autem animam hominis immortalem esse deduco; nec est, quod mirum cuiquam accidat, libertatem à me adstructam esse, antequam animæ immortalitatem adstruerem; nempe nisi supponatur esse libertas, nullum sanè mihi argumentum esse videtur, quod prædictam immortalitatem efficaciter euincat: equidem ex eo, quod sit incorporea, immortalem animam esse rectè concludis; sed quo tandem argumento incorpoream esse probabis? an fortè quia mente ac cogitatione, incorporea comprehendit? quænam porro? Deum, inquires, Angelos, ipsum ens incorporeū; sed quo tandem modo hæc percipis? an fortè per propria simulacra, vel aliena? cogitas Angelum, an sub specie ac forma hominis? cogito, inquires, substantiam spirituales; quid rei tibi fingis, cum substantiam spirituales concipis? nunquid ad instar corporeæ, cui aliquot proprietates detrahis; pondus scilicet impenetrabilis, & diuiduæ rationem? sic nigrum ideo fortè videmus, quia minùs album. Sed hæc mittamus; animæ immortalitas non adeò levis momenti est, ut tam incertis & creperis fundamentis firmanda & fulcienda sit.

V. Nonnemo fortè diceret, per sensum quidem à nobis cognosci de rebus, quod sint; propter quid verò sint, capere sensus non potest; nam sublimioris intelligentiæ res est; fateor vltro, nec vllus, opinor, inficias ibit; sed quæso te, quonam pacto de re aliqua cognoscis, propter quid sit, hoc est, ratiociniij ac demonstrationis operâ illam ad suas causas redu-

eis?

B 3



cis? An fortè quisquam id præstare queat, qui ratiocinandi facultate non polleat? minimè verò; nullus autem est ratiocinij vsus, nisi libertatis opera accedat; igitur vix ac ne vix quidem animam hominis immortalem esse ostendas, nisi eam ratiocinandi facultate pollere persuadeas; quod faciliè obtinebis, si vel vnum theorema geometricum demonstres; nempe quod demonstro, mihi euidens est; igitur & euidens à me demonstrari; igitur euidens me ratiocinari, cum demonstratio perfectum ratiocinij genus sit; sed nullum est ratiocinium, nisi cum libertate coniunctum. Igitur vt ostenderem, animam hominis immortalem esse, eidem priùs libertas adstruenda fuit; quod reuerà fit, tum quia per se ipsum quisque id probat, ac perspicuè, dum liberè agit, se liberum esse percipit; tum quia ratiocinij vsu euidenter cognoscit, se ratiocinari; ac proinde liberum esse; cum nullum ratiocinium absque libertate esse queat, vt suprà breuiter quidem, luculenter tamen ostensum est.

VI. Itaque ex eo, quòd homo liber sit, animam immortalem esse, rectè deduco; scilicet esse aliquod principium prædicta vi discretionis & electionis præditum; principium, inquam, multarum operationum, quæ à sensu minimè procedunt; nec enim sensus confusè aliquod obiectum percipiens, ea facultate pollet, qua sese, citra aliam affectionem impressam, determinare valeat, ad illud ipsum distinctè sentiendum; longè sanè maximum commodum esset, & probè consultum iis, qui vel oculorum, vel aurium,

aurium, vel cuiuslibet sensus vitio laborant : sed de his fusè suo loco à nobis actum est. Adde, quòd ij, qui vel somno vel delirio, vel ebrietate correpti sunt, æquè ac alij liberè agerent; cùm reuerà æquè sentiāt, igitur prædicta facultas, quā sese homo determinat, circa varia sensu percepta, vel circa idem, quā, inquam, positis omnibus ad agendum requisitis, ut aiunt, in sua potestate positum habet, agere, vel non agere; velle, aut nolle; prosequi, vel pedem referre; ad sensum minimè pertinet, qui circa affectionem impressam agere duntaxat potest; (quid enim aliud est sentire?) igitur aliud principium esse necesse est, quod prædicta facultate polleat, quæ licet supponat ea, quæ sensu percipiuntur, eius tamen usus vel actio, sensus non est; nempe eligere alterum ex propositis, idque ad libitum, ita ut ex prædicta electione sequatur talis motus, ad quem sensus non determinat, sed potius ad oppositum, reuerà sentire non est, nec à sensu agi, nec operatio organica est; nam omnis operatio organica vel est sensus, vel motus appetitûs ab ipso sensu ortum ducens; igitur alterius principij, intelligendi facultate pollentis; quis enim eligat, velit, ac sese ad id determinee, quod ipsemet ignorat? igitur datur aliquod principium operationis inorganicæ; igitur incorporeum; nempe corporeum & organicum in homine idem sunt; igitur quod sine organo agere possit; quis enim demonstret, non posse, cùm inorganicum esse constet? Nec obstat, quòd aliquam organicam actionem supponat, quandiu scilicet cum organo con-

iunctum est; quia in hoc statu, à sensu duntaxat ea, quæ cognoscit, accipit; hinc vulgò aiunt, nihil esse in intellectu, quod prius non fuerit in sensu; atque adeò intelligentem speculari phantasmata.

VII. Sed hæc profectò alium locum, & longior rem disputationem postulant, quæ huius nostri instituti non est; sit satis, breuiter ostendisse, in homine, præter sensum, dari aliud principium inorganicum & incorporeum, ac proinde corruptioni nullatenus obnoxium, sed incorruptibile & immortale; nempe cum etiam seorsim ab organo seiunctum otiosum non sit, sed operetur; eius enim actio organica non est, alioquin organicum esset; reuerà frustra non est: igitur est, quod à Deo conseruetur, nec quidquam à Deo eius destructionem exigit, ut patet. Multa autem quisque in se observat, quæ prædictas actiones inorganicas euincunt: quidquid enim liberè agimus, ab aliqua determinatione & electione, quæ reuerà circa organum non est, ortum ducit; sic dum motus appetitus compescimus, & continemus, per oppositos scilicet motus; hi reuerà motus ab alio, quàm sensu, principio procedunt, nec enim sensus secum ipse pugnat; & licet hi quoque motus oppositi aliquem sensus usum supponant, is tamen cum nec ab obiecto sit, ut patet, nec à sensu ipso, qui se ipsum non determinat, ab alio, eoque coniuncto principio procedit: sic in omni ratiocinio idem principium, prædicta facultate polens, agnoscimus, quàm vnum aliquid distinctè cognoscimus, ex eodem confusè cognito, hoc est, quàm se



seſe principium illud determinet, ad diſtinctè co-  
gnoſcendum id, quod iam conſuſè cognoscit: ſed in  
his nimius ſum, præſertim cùm pro dignitate hoc  
loco diſcuti nō poſſit, & ab aduerſariis vltro dentur.

## DATVM QVARTVM.

*Deus eſt ſummo cultu colendus, amandus, timen-  
dus, eius legibus parendum, & quidquid poſt  
mortem nos manet, ab eo expe-  
ctandum.*

**Q**UOD Deus ſummo cultu dignus ſit, perſpi-  
cuum eſt; ſummus enim cultus ad ſum-  
mam dignitatem, præſtantiam, excellen-  
tiam pertinet; hæc autem ſumma in Deo eſt, quia  
inſinita; rationi verò conſentaneum eſt, eum ſupre-  
mo rerum omnium Conditori ac Moderatori cul-  
tum ab hominibus deferri, ac exhiberi, quo ipſe di-  
gnus eſt, quémque ideo à nobis ſuprema illius digni-  
tas exigit; ſi autem dignus eſt, eum reuerà cultum  
denegare nequimus, ſine graui delicto, munere ſci-  
licet noſtro minimè perfuncti; ad id enim præſtan-  
dum tenemur, quod innato rationis lumine ac du-  
ctu, faciendum eſſe cognoscimus; igitur nullum  
dubium eſt, quin Deus ſummo illo cultu colendus  
ſit.

I I. Porro ille cultus id omne complectitur, quod  
aliquatenus conducit ad exhibendam noſtram erga  
Deum obſervantiam, ſubiectionem, obedientiam,

B 5                      fidem,

fidem, pietatem, amoris, nec non timoris affectum; item ad attestandum, Deum summo illo cultu dignum esse, propter infinitam illam, quâ pollet, excellentiam ac dignitatem, pro cuius honore, vitam cum sanguine profundamus; hinc ad id significandum, illa omnia exhibemus honoris, laudibus, gratulationis, adorationis officia & obsequia, quæ ad hunc finem obtinendum apta vel idonea esse cognoscimus: igitur ut hæc Deo accepta sunt, quia cum Deus de sua præstantia & excelâtate gaudet, haud dubiè de cultu illo non gaudere nequit, qui ad illam spectat; ita hæc eadem exhibenda Deo & deferenda sunt, quia debita.

III. Quod Deus summo amore dignus sit, omnes sciunt; quia summus amor ad summam bonitatem spectat; immò amari dulcissimum est, quo naturæ ratione prædita mirificè gaudet; laudibus etiam eum prosequi debemus, à quo res omnes præclare gestæ sunt; nihil enim facit, quod summis laudibus dignum non sit; cum verò iustus sit, quis eum ire non timeat, supremum scilicet humanarum actionum Iudicem & criminum punitorem? quis enim aliquid, vel leue etiam admittat, indignum præsentem Deo? quis naturæ fragilitatis confcius delinquere non timeat, ac proinde diuini vindicis iram asperare, cui scilicet incumbit, ut rectè facta præmiis, ita pœnis delicta prosequi?

IV. Hinc si Deus Leges ferat, iis omnino parendum est; si quid vetet, fagiendum; si quid iubeat, exequendum; si beneficia conferat, agenda gratias;

tiæ; si quid inferat pœnæ, æquanimiter tolerandum; si re quapiam indigemus, ab eo summis precibus flagitanda; si annuat, gratulandum; si renuat, acquiescendum est; & si quid à nobis admittatur, quod cum recta ratione non consentiat, quod vel proximo graue, vel Deo ingratum sit, venia exoranda, culpa lacrymis eluenda est. Cuncta hæc ut à nemine in dubium reuocantur, ita ab aduersariis vltro dantur; à nemine, inquam, si fortè nonnullos excipias Epicuri de grege, qui humana diis cordi & curæ esse negant; sed cum huiusmodi hominibus, qui ratione relicta, sensum duntaxat consulunt, rationibus & argumentis agendum non est; alium postulant agendi modum, qui brutis animantibus, non hominibus ratione præditis competat; quamquam si eo, quo par est, modo sensum ipsum consulerent, hoc etiam duce, ad rationis arcem facilè peruenirent: sed hos mittamus.

V. Si quid demum post mortem nos manet, ab ipso Deo expectandum est: quòd post mortem aliquid nos maneant, cum anima rationalis immortalis sit, certo certius est; quòd illud à Deo duntaxat expectandum sit, etiam perspicuum est; à quo enim, nisi ab eo, qui probè cognoscit & iudicat, quid cuique rependendum sit; hinc spes nostra in Deo ponenda est, & quidquid post vitam speramus, ab eo precibus exposcendum; placandumque Numen scelere violatum; cuncta hæc, quisquis Deum existere nō negat, ac sibi animam immortalem inditam esse, vel ipso sensu percipit, haud inuitus admittit.

DATVM

## DATVM QVINTVM.

*Ille cultus à Deo præscribi hominibus debuit, & Leges ab eodem promulgari.*

**N** Vdi hominis ortus multarum rerum, quæ ad diuinum cultum pertinent, ignarum illum relinquit: hinc tot erroribus obnoxius est, tot superstitionibus addictus, tot ritibus ac religionum formis varius; itaque cum aliquis religionis cultus inter homines esse deberet ( Deum enim summa cultu colendum esse, iam constat ) & cum propter hominum ignorantiam, religioni parum consultum esset, Dei fuit, illum modum præscribere, quem teneri vellet; eam religionis formam indicare, quæ magis grata esset; illam fidei rationem docere, quam omnes amplecti deberent; quod reuerà nisi factum fuisset, religioni, ut dixi, malè consultum esset, in qua nihil certum, nihilque indubitatum homines haberent.

II. Neque hoc aduersarij negant, quod cum recta ratione ita consentit, ut ij de Deo malè sentiant, qui rerum humanarum ignarum & incuriosum esse volunt; quasi verò quidquam Deo magis cordi esse debeat, quàm augusta religionis res, quæ diuinum honorem promouet, Dei laudes celebrat, Deumque mundo manifestum facit. Præterea cum Deus homines ad rectè viuendum creauit, quidni eos rectæ vitæ institutum doceat, viamque vel leni saltem digito monstret, quâ ad finem illum, ad quem destinant.

stinantur,perueniant? Deus brutis animantibus eos instinctus indiderit, quibus ducuntur, ad ea commoda sibi procuranda, quæ salus illarum & conseruatio postulant; hominem verò ratione præditum, imparatum, ac rerum illarum imperitum reliquerit? quæ illi adeò necessariae sunt, vt finem suum obtineat; quis hoc dicat? quis hoc credat?

III. Deus orbi à se condito eam curam negare non debuit, quam Paterfamilias Domui à se institutæ, Princeps subiugato Regno, constructæ ciuitati Dynasta quilibet impertiretur: nulla enim sine legibus hominum communitas, nulla societas stare potest; ea quippe est hominum, ad malè agendum procliuitas, vt sæpe ac sæpius delinquant, nisi legibus contineantur; esset, quod ab æterna illa sapientia nonnihil conditus homo desideraret, si finem quidem illum, ad quem creatus est, vel leui digito monstraret, viam tamen, quâ ad eum finem perueniri potest, minimè indicaret: quasi verò à nobis aliquid exigit, quod nobis compertum non sit; aliquid expectet, cuius certiores non fecerit; multa imperet, & nulla præcepta extent. De Deo meliora sentienda sunt; nec in ipso ferendum, quod in Homine, mediocri sapientia instructo, tolerandum non esset.

IV. Eius profectò est, naturam hominum iis omnibus instruere, sine quibus destinatum illi finem assequi non possunt: creauit hominem Deus; quidni eundem dirigat? rationis lumine instruat; quidni eorum, quæ ratio postulat, eidem copiam faciat?

faciat ? Portum salutis eminens ostendit ; quidni  
 viam aperiat ? ab eo religiosè coli vult ; quidni fa-  
 cri cultûs modum doceat ? vt rectè viuat, ab eo exi-  
 git ; quidni saltem rationem illam indicet , in qua  
 recta vita posita sit ? denique imperat , ne quid ad-  
 mittat , quod diuinæ voluntati aduersetur ; quidni  
 ergo Leges illas condant atque promulget ; quibus  
 standum est , eâque significet ; quæ à diuinæ volun-  
 tatis amantibus desiderat ?

V. Saluti hominum diuina bonitas consulit ,  
 quæ Hominem saluari voluit ; rationis primùm lu-  
 mine donauit , vt bonum à malo discernere ; tum  
 verò quia sæpe ratio caligat , & à sensu in errorem  
 inducitur , & multa sunt , in quibus perplexi & du-  
 bij homines extitissent ; illa vitæ ratio nobis ab eo  
 præscripta est , ille religionis cultus institutus , le-  
 ges illæ latæ & promulgatæ ; illa demùm omnia  
 liberaliter ab eo concessa , quæ ad nostrum finem  
 obtinendum necessaria esse videbantur ; neque per  
 illum stat , quò minùs finem illum assequamur , quo  
 si fortè excidimus , nostræ id malitiæ , non illius in-  
 curiæ tribuendum est. Ille igitur cultus , ille reli-  
 gionis modus , illa vitæ ratio , Leges illæ ac Præcepta  
 nobis à Deo præscripta sunt , quæ à nobis serua-  
 ri par est , si morem Deo gerere , ac proin-  
 de saluari velimus.

## DATVM SEXTVM.

*Deus Hominem ad finem supernaturalem, eternam scilicet Beatitudinem, creauit.*

I. **T**Am sublimem & excelsum finem Deus nobis obtinendum proposuit, vt cum nostris viribus eum assequi nequeamus, inde finem illum supernaturalem meritò vocemus; ea quippe est æterna beatitudo, quam certa Dei possessio coronat, & immensa voluptatis torrens perfundit, vt in facultate nostra positum non sit, eam, nostris scilicet viribus imparē, obtinere; imbecillitas nostra eò non assurgit, neque id in præmium ac mercedem exigere possumus, quod merita nostra longissimè ac infinitè superat; nec quisquam est inter aduersarios, qui refragetur.

II. Et verò, modus aliquis excogitari non potest, quo suis homo viribus fretus, ad Dei thronum ascendat, Deum oculo mentis clarissimè videat, coronam gloriæ, vt vocant, & brauium immortalitatis, mortalis ipse reportet; miserrimi hominis conditio imbecillitati suæ relicta ad tantam dignitatem extollī non potest; humanus oculus tanta luce perstringitur; angustum pectus diuinitatis oceanum non capit; quid plura, à Deo expectamus ea subsidia, & auxilia, quibus ad promissa nobis præmia peruenire valeamus; igitur ille finis vires quidem humanas, non tamen hominis vota & appetitum superat, atque adeò supernaturalis est.

III. Quòd

III. Quòd autem ad illum finem Deus Hominem destinavit, ultro concedunt adiaphori; cum scilicet aliquem nobis proposuerit, ne inter res creatas homo duntaxat esset, qui ad suum finem minime tenderet; quis enim eò tendat, quò tendere nescit? res aliæ creatæ innatò quodam motu & appetitu in suos fines feruntur; at homo ratione præditus & libertate pollens; liberè finem suum prosequi debuit; quod ut fieret, is finis illi proponendus erat, quem reuerà Deus proposuit: quis enim credat, aliquid à supremo illo moderatore Deo fieri debuisse, quod ab eo factum non fuerit; & verò haud iure homini vitio verteretur, quòd ab eo fine recederet, si finem illum ignoraret; in quem ferri deberet; ignoraret autem, si propositus non esset; hinc illi hominem delinquentem omni eximunt culpa; qui rerum illarum ignarum faciunt, quæ vel faciendæ, vel fugiendæ essent; illiusque præsertim finis, ad quem ab auctore suo destinatus est.

IV. Itaque cum eum finem Deus nobis haud dubiè proposuerit (nec enim ea omisit, quæ facere debuit) nullus alius, præter æternam beatitudinè, quæ in clarissima Dei visione posita est, nobis innotuit; illa est corona, quam ex hoc rerum mortalium conflictu, victores egressi expectamus; illa merces nostris laboribus promissa; illud præmium nobis propositum; hoc ipsum traditione quadam omnium temporum ac memoriâ tenemus; nec in sacris modò codicibus hoc legimus, verum etiam in omnibus ferè omnium linguarum, gentium, sectarumque libris;



bris; is fuit omnium hominum sensus, si paucos excipias, qui cum vel Deum existere, vel animam hominis immortalem esse negarent, nullum certè finem post mortem obtinendum esse putarunt. Sed præmia negare visi sunt, quæ sibi debita non esse, probè tenebant, ut debitas sceleribus pœnas effugerent; sed res eorum iudicio non stetit, & quem remunerantem habere noluerunt, modò vindicem ac punitorem sentiunt.

V. Communis igitur fuit omnium populorum & nationum consensus, bonos æternis post mortem præmiis, improbos verò pœnis affici: aliud natura non docuit; hoc instinctu & innato quodam appetitu tenemus, qui reuerà frustra nobis inditus esset, si alius post mortem finis nos maneret. Igitur cum eum nobis finem Deus proposuerit, quem prosequi debemus, & cum æternam duntaxat beatitudinem appetamus & prosequamur, nec alius nobis finis innotuerit, alius profectò esse non potest; alioquin quadam naturæ fraude in errorem induceremur, utpote qui insito à natura instinctu, eum finem prosequeremur, quem ideo consequi nullatenus possemus, quòd & viribus nostris superior esset, & ad eum minimè destinati essemus.

VI. Equidem vires nostras superat, ut iam suprà dictum est; nempe quidquid agimus, haud impar viribus nostris, ut finitum & limitatum est, ita ad mercedem quodam pacto infinitam minimè assurgit: actionis humanæ honestas, seu bonitas, ut vocant, tanti nō est, & meritum, quod in eam quadrat,

C

diui.

diuinum præmium minimè postulat. Cùm tamen Deus mercedis ac præmij nomine æternam gloriam nobis proponat, non modò illum finem nobis propositum, supernaturalem esse necesse est, cùm limitatam nostræ naturæ facultatem infinitè superet; verùm etiam eandem naturam nostram ad eum dignitatis gradum euectam esse, in quo, diuina gratia opitulante, ita se gerat, diuino scilicet pacto supposito, vt præmium omne infra illius merita sit, nisi quod æterna beatitudine comprehenditur, & clara Dei visione completur.

## DATVM SEPTIMVM.

*Gemini fuere natura status, integra & corrupta,  
in triplici lege, natura scilicet, scripta,  
& gratie.*

**L** Integram naturam aliquando extitisse, ex sacra historia habemus; Deus enim, cui salus nostra curæ est, vt tales essemus, quales esse debemus, nos scire voluit, quales fuerimus: vt hominem suæ conditionis ac miserrimi statûs, in quo nunc est, pudeat, fecit, vt cognosceret illius gloriam, vnde initio exciderat: hoc enim scire, hominis intererat, ne fortè diuino rigori tribueret, quidquid in poenam primæ defectionis, miseriarum sentit; vt sibi imputet, quod patitur, ac diuinæ misericordiæ se vel inde obstrictum esse intelligat, quòd longè maiora non patiatur.

II. Et

II. Et verò Deus hominem in eo statu, in quo nunc est, minimè creavit; alioquin cum tantus esset operis creati defectus, in ipsum auctorem refundetur. Quòd nascamur iræ, non amoris filij, diuini sanè instituti non est; si enim ira est, iniuria est; nempe ira omnis in auctorem iniuriæ fertur; igitur irato Deo iniuria, ab homine scilicet, illata fuit; quisquis autem infert iniuriam, iam existere supponitur; quod enim nusquam est, quidquam præstare non potest; aliquis igitur, isque primus homo esse debuit, qui filius iræ natus non sit, & in vno tandem sistimus, vnde generis primordia nostri, ne in infinitum progrediamur. Nec est, quòd quisquam timeat, ne in hoc, Ian senio puræ naturæ statum neganti suffragemur, qui à statu naturæ corruptæ omnino differt, vt in confesso est apud omnes; hic enim includit peccatum, cuius Deus auctor esse nequit; vnde licet à Deo primus homo creari potuerit sine iustitia originali, Deique gratiâ & amore, non tamen cum peccato creati potuit; neque hoc 55. propositioni Baijdamnatæ vllatenus repugnat.

III. Ille igitur fuit naturæ integræ, nondum scilicet peccati vitio infectæ atque corruptæ status, in quo primus omnium Parens à Deo conditus est; hæc illa fuit iustitia originalis, vt vocant, hæc prima hominis stola, ac beata conditio, quæ secum homini tot iura & prærogatiuas afferebat; nempe homo Deo charus erat, Angelis ferè par, contra mali Dæmonis insultus probè munitus, animo rerum omniū scientiâ & diuinâ gratiâ, ac reliquâ virtutum supel-

C 2

lecti-

lectile instructo, corpore verò perfectæ habitudinis, sine vitio ac nœuo gaudebat. In eo perfectæ libertas, summa quies animi, nulli passionum aut perturbationum tumultus, diuinæ gratiæ radius vbertim sanè affulgebat, diuina identidem colloquia recreabant: quid plura? cuncta suppetebant ad beatam vitam in terris degendam, ac cælestem deinde longè beatiorē obtinendam; licet enim terrestris tractus incolæ esset, cælestis tamen ciuitatis municeps erat.

IV. Sed homo cùm in honore esset, ab eo desciiuit, admissoque peccato, eam naturæ integritatem amisit, quam cum diuina gratia acceperat: hinc naturæ corruptæ status; hinc Dei hostis factus, qui eidem prius in deliciis erat; stolâ primâ spoliatus, ac cælesti municipio excidens; Angelis horrore, dæmonibus ludibrio fuit: hinc mortis addictus, ac mortalibus ærumnis obnoxius. Libertas agendi relicta quidem est, sed longè debilior euasit, fomite peccati accenso, irritata concupiscentia, passionum motibus tumultuantibus, obductis ignorantie errorumque tenebris: quid plura? in summas animi & corporis angustias peccatum hominem redegit, in quibus spe salutis omni caruisset, nisi diuinæ misericordiæ radius affulisset.

V. Ut autem generis nobilitas, multiplici iure multisque instructa prærogatiuis, à parentibus in filios, à maioribus in posteros traducitur; ita prorsus, stante præsertim diuino pacto, si Adamus stetisset, & in eo, in quo collocatus fuerat, naturæ integræ gradu perseverasset, eandem integram iisdem dotibus

ac prærogatiuis instructam in totum hominum genus deriuasset; eadem enim est Parentum & liberorum conditio, idem nobilitatis insigne ac decus. Quia verò patrati, per obsequij desertionem, scelestis reus, ex prædicto gradu deiectus est, eamque contraxit infamiae notam, quam peccatum conciliat, quid mirum, si eius posteris eadem iniusta est? ac proinde illi iustitiae originalis expertes, nascantur iræ filij, ac rei, aeternae addicti poenae, non sensus, ut vocant, sed damni; hæc illa est originalis macula, quam à primo parente traductam contraximus omnes, quæque sacro Baptismi fonte eluitur.

VI. Cùm verò Deus suas Leges tulerit, promulgauitque, quibus adstricti homines tenerentur; triplex fuit diuinæ Legis status, naturæ scilicet & gratiæ, inter quas lex scripta, ut vocant, quasi vtriusque nexûs collocatur. Naturæ lex illa est, quæ nullis tabulis consignata, quasi per manus à maioribus ad posteros traducebatur; fieri enim non potest, quin ij primorum temporum homines, quorum sacra historia meminit, singularem ritum seruarēt in diuino cultu, iisque legibus tenerentur, quibus rectè facta à turpiter gestis distinguerentur. Inde fortè naturæ lex dicta, quod vel ipso naturæ ac rationis ductu, mortalium animis impressa esset; Legislator erat, eiusdem naturæ conditor Deus, parentes ipsi liberis iam à maioribus accepta relinquebant, quasi hæc traditio promulgationis loco esset; lumen denique rationis oculo mentis affulgens impressos à natura characteres ita collustrat, ut legi faciliè possint. Deus

identidem nonnullos suis dignabatur colloquiis, ut mentem suam hominibus aperiret, aut aliquem novum ritum induceret, aut aliquid prohiberet, vel fieri iuberet, aut aliquod dubium discuteret, vel aliquorum salutem prouideret. Ab exemplis abstinco, quæ frustra essent; certum enim est omni tempore, ac ævo, aliquos à Deo institutos fuisse, qui ab aliis de ritibus sacris, de rebus fidei atque salutis consulerentur.

VII. Lex scripta Legi naturæ successit, pro qua Deus Moyſis operam adhibuit; atque adeò Lex illa, quæ rationis duntaxat penicillo, in virgine charta mentis, hætenus descripta fuerat, Dei digito in marmore insculpta fuit: hæc fuit eiusdem Legis magis expressa promulgatio; quidquid enim Decalogo continetur, id totum Lex naturæ complectebatur; huic singulares quosdam ritus pro re sacra & politica Deus annexuit, qui religionem Iudaicam ab aliis distinguerent. Scripta autem dicitur, quòd omnia ferè literis consignata essent: dixi ferè omnia; nam multa communibus quibusdam traditionibus continebantur, quarum Christus Dominus in Evangelica historia mentionem fecit: vtrum verò ritus Iudaicos sequi omnes tenerentur, discutere huius loci non est.

VIII. Denique Lex gratiæ à Christo instituta est; & Ecclesia, in qua modò fideles sunt, fundata, quam in spiritu charitatis regit, suo sanguine pascit, suam gratiam recreat, sua carne saginat; in qua diuersos Hierarchiæ gradus & ordines distinxit, sub vno supremo capite, ut infra euincam. Diuersa ministeria  
consti.

constituit, tum ad diuini verbi prædicationem, tum ad Sacramentorum ac Sacramentalium, vt vocant, administrationem; tum ad varium Ecclesiasticæ iurisdictionis vsum; in qua demum totius saltem Ecclesiæ consensu, errari non potest, propter infallibile ( sic enim vocant ) & nunquam fallens Spiritûs sancti adiutorium. Lex autem gratiæ dicitur, tum quia vberiore gratiam de fontibus Saluatoris haurimus, tum quia ab eo rigore ritûs Iudaici immunes per Christum facti sumus, & in libertatem filiorum Dei vindicati.

IX. Itaque vt sine diuino cultu, Deus homines esse non sinit, quem ab ipso præscribi oportet, easque Leges ferri ac promulgari, quibus homines continendi sunt, vt sibi propositum æternæ beatitudinis finem prosequantur; ita variis modis cum iisdem hominibus egit. In Lege naturæ, privatis quibusdam hominibus sui spiritûs copiam faciebat, à quibus alij deinde rescirent, quid ab iis exigeret; aut sanè quænam illa essent, quorum eos monitos vellet: cæterum nullam iis legem scripto tradidit, sufficere ratus, iis temporibus, quibus homines diu viverent, continuatam primorum dogmatum à maioribus ad posteros transmissorum consequutionem. In Lege scripta sacros ministros instituit, penes quos erat, de rebus ad diuinum cultum pertinentibus iudicare; nam super Cathedram Moyse sederunt Scribæ & Pharisei, quorum dictis & decretis, non moribus & factis cæteri stare debebant; in hoc rerum statu identidem Prophetæ diuino spiritu afflati in-

medium prodibant, eaque mundo prædicebant, quæ certò futura Deus ipsis nuntiârat. Summus verò Pontifex Iudaici ritus erroris omnis expers erat, quod illi à Deo promissum esse legimus: & nonnunquam vaticinia edebat, fatidico instinctu concitus; sic Caiphas cum esset Pontifex anni illius, vaticinatus est. Denique in Lege gratiæ, diuinus spiritus verior fuit; nempe & priuatis quibusdam hominibus mentem vaticinam tribuit, & Ecclesiam omnis erroris immunem esse voluit, cum visibili capite, hoc est, Romano Pontifice, ut infra euincam, quem cæteri omnes consulerent, utpote qui fallere non posset, dum scilicet Christi vicem agens eiusdem oues pascit & regit: itaque Lex gratiæ reliquis haud dubiè antecellit, cum iis omnibus prærogatiuis & privilegiis coniunctim gaudeat, quibus aliæ scorsim duntaxat gaudebant.

## DATVM OCTAVVM.

*Diuina oracula verbo Dei dicto, scripto, tradito continentur.*

I. **V**erbum dictum est, quod à Deo, vel ab Angelo, Dei vicem agente, auditur; sic Deus Abrahamo, Adamo, Noëmo, Moyse, ac Prophetis locutus est: in omni autem Legis statu, hoc diuini verbi genus habemus; in Lege naturæ, ut dixi, sæpe ac sæpius cum sanctissimis illis Patriarchis egit; in Lege scripta longè plures extiterunt, ad quos Deus verba fecerit; in Lege gratiæ ipsum Dei verbum



hum auditum est, nobisque Deus in Filio loquutus est: omitto Prophetas, quos etiam Lex gratiæ initio habuit. Verbum scriptum Legi naturæ, aut defuit, aut saltem nullum monumentum authenticum extat; in Lege scripta, multi reuerà sunt sacri Codices, quibus diuina oracula continentur; Lex gratiæ suos etiam habet, eosque maioris momenti.

II. Singuli porro triplicis Legis status diuinum quoque verbum traditionibus creditum atque mandatum habuerunt; prima quidem, in qua maiores suis posteris ea, quæ de re sacra & diuino cultu à Parentibus acceperant, magnâ curâ tradebant; hinc diuinum verbum, & sacra disciplina, eaque omnia, quæ ad religionem pertinebant, quasi per manus tradebãtur. In Lege Moysaica, traditiones non deerant, cum Christus id potissimum Pharisæis exprobraret, quod diuinas ac sinceras traditiones adulterassent; immò non nisi traditione, sacrum illum ritum tenebant, qui foeminis, ad maculam originalem eluendam, adhiberi solebat; quis enim neget, aliquod huiusmodi remedium extitisse? In Lege demum gratiæ traditiones admittendæ sunt; multa enim fecit Christus ac dixit, quæ nullo Volumine comprehendì possunt, vt Ioannes oculatus testis expressè attestatur: hinc Ecclesia suas traditiones seruat, Christi & Apostolorum ore acceptas, & nudis verbis iam inde ad nos transmissas; quis enim de sacra historia id neget, quod de omni disciplina Liuius asserit, quæ per manus à maioribus posteris traditur?

III. Et verò nihil causæ est, cur scripto potius,  
C 5 quàm

quàm tradito Dei verbo fides habeatur, cum verumque æquè Dei sit. Sed dubitas, inquires, de tradito; ego etiam de scripto: si enim vnũ dubitationi locum relinquit, aliud certè huius vitij expers non est. Sed inquires, traditiones vitari facilè, necnon adulterari queunt; quasi verò sacer textus deprauationis immunis sit, cuius sanè multa exempla suppetunt, quæ cum huius instituti non sint, prudens omitto; immò scriptis mandata longè faciliùs adulterantur, quàm communi traditioni, id est, omnium hominum memoriæ credita; quamquam vtrumque deprauari potest, verbum scilicet scriptum, & traditum, & vtrumque certam regulam fallere nesciam desiderat, cuius operâ verum ac legitimum à spurio & adulterino discernatur, sine qua neutrum eâ valet auctoritate, quam diuinæ fidei firmitas postulare.

IV. Quisquis autem sacrum duntaxat textum admittit, omnesque traditiones reiicit, vel hoc ipso sibi contradicit; nempe id duntaxat diuinâ fide tenendum esse, quod in sacris Libris scriptum est; hoc ipsum in iis nusquam legitur; ergo vel hoc ipsum non scripto, sed traditione tenes: si autem hoc traditione accepimus, alia quoque esse possunt, nudo verbo, non scripto iam inde à Christo ad nos transmissa. At si plura sunt, inquires, nudo verbo tradita, quis modus est veras traditiones à falsis distinguendi, cum multæ quoque fabulæ per manus tradantur? idem quæro à te de sacro textu; tam enim scripto, quàm dicto falli possumus. Non dubitas, quin sacri Codices, quos apud te habes, legitimi sint; re-  
 cte;

et; at si quis dubitaret, quid amabò reponeres? an fortè communi traditione constare, illos veros ac germanos esse? at si quis de huius traditionis veritate dubium moueat? certè vel alius modus, alia ratio erit, quâ spuria traditiones à legitimis discerni queant, aut sacer textus, quo tua fides nititur, valde notabitur.

V. Hinc ausim dicere, verbum traditum non maioris quidem auctoritatis, sed potioris conditionis esse, quàm scriptum; nempe traditione quadam tenemus, vulgatam illam, ut vocant, editionem veram & legitimam esse; & licèt Florentinum & Tridentinum statuerint, tot & non plures sacri textûs Codices; hos, & non alios esse admittendos; hoc tamen ex antiqua Ecclesiæ traditione didicerant. Immo quòd sit in Ecclesia quædam regula fidei fallere nesciens, licèt ex sacris paginis habeamus, id tamen ex communi quadam traditione firmiùs tenemus, quæ sacri textûs germanum sensum retinet, quem alioquin flectere & detorquere homines facillè possunt; multi enim diuina verba aliorsum, atq; scripta sunt, accipere solent; hinc Augustinus Euangelio non crederet, nisi Ecclesiastica traditionis auctoritate niteretur: & Chrysostomus rectè monet, nihil amplius quærendum esse, vbi ad traditionem peruentum est. Itaque dogmata, quæ in Ecclesia prædicantur, quædam habemus scripto mandata, ut rectè monet Basilius, quædam verò ex Apostolorum traditione ad nos transmissa, & Doctor Gentium Paulus ad traditiones à se relictas seu verbo, seu scripto seruan.

seruandas fideles omnes hortatur: quid plura? sapientia diuina fuit, ita suas hominibus Leges promulgare, vt aliquæ literarum monumentis mandata, aliæ nudo verbo à maioribus nobis tradita essent; immò nonnulli auctores inter canonicos habentur, vnum Lucam appello, vt ceteros omittam, qui licet Euangelicam historiam scripserit, testis tamen oculatus non fuit; sed ea, quæ scripsit, ab aliis sibi tradita audiuit; vt vel ipsa traditio etiam verbo scripto ad instar parentis esset.

## DATVM NONVM.

*Vt vnus est Deus, ita vnus est Christus.*

I. **C**ùm Adamus ex primo illo integræ naturæ statu, admissio peccato, excidisset, & posterius omnes in communem ruinam secum traxisset, vt ex sacra historia tenemus; non modo propriis viribus primum illum finem, ad quem homines destinati sunt, consequi non poterant, quem nec in ipsa natura integra obtinere, iisdem scilicet viribus, potuissent: verum etiam omni adiutorio, ac subsidio, quo ex illo communi naufragio emergent, ac euaderent, eos Deus iure meritoque priuare potuisset; cum enim iræ filij essent, contractâ scilicet originali maculâ, & transmissâ in eos paternâ infamiâ, vt Deus eos iustè damnare, æternæ scilicet beatitudinis iacturâ, ita suis viribus relictos, omni supernaturali adiutorio iustè priuare poterat.

II. Quod enim Adami culpa, illata Deo iniuria fuerit,

fuerit, perspicuum est; quisquis legem Principis violat, & præceptis non obtemperat, ipsum reuera offendit ac lædit; cum id iure Princeps à subditis exigat, ut pareant; si ergo imperium detrectant, sibi Principis offensionem concitant, cuiusque gratia excidunt, nec non pro delicto, iusta poena infligi potest: delicti autem gravitas offensa gravitatem adæquat; & hæc offensa dignitate censetur; quis enim neget, graviorem offensam esse, si quis Principi alapam impingat, quam si lixæ cuipiam, aut caloni impingeret? Cum igitur diuina maiestas humanas dignitates infinite superet, dubium certè non est, quin offensio Dei, quam, quisquis peccat, sibi concitat, omnes alias, quibus homines offendimus, infinite superet; hoc est, talis sit, ut nulla alia, inferioris scilicet ordinis, illam adæquet; licet enim peccatum etiam mortale, ut vocant, omnino & absolute infinitum non sit, id tamen est, cuius gravitatem nulla noxa, quæ aduersus Deum non sit, quantumvis multiplicata, aut repetita, vllatenus adæquet, nedum superet; nempe quantumlibet finita multiplices, nunquam infinitum adæquant: offensa igitur Dei, quam omne peccatum importat, omnium grauissima est, & omnes alias, si quæ sunt, ab offensa Dei seiunctæ, infinito prorsus intervallo post se relinquit.

III. Cum autem certam & limitatam poenam, seu satisfactionem cuiuslibet iniuriæ homini illatæ vindictio exigat (ius enim violatum iniuria est) & quilibet eo iure gaudeat, ne ab alio lædatur; si ergo læditur, contra ius est, iniuria igitur est. Ius porro vio-

violatum reparari, & in integrum restitui debet; id enim iustitia postulat, quâ scilicet ius alterius adæquatur; itaque cum de illata iniuria homo satisfacere teneatur, limitata verò satisfactio humanæ ac limitatæ iniuriæ respondeat; divina demum offensio humanas omnes offensiones infinitè superet, inde sanè fit, ac perspicuum est, satisfactionem illam, quâ Deo, pro accepta iniuria satisfacimus, talem esse, ut humanam omnem satisfactionem superet. Ab homine igitur, suis viribus relicto, offenso Deo fieri satis non potest, nec illatæ Deo iniuriæ digna exsolui poena; itaque nisi noua cælitus accederent subsidia, homo primæ Parentis culpæ contagio tactus, in eo miseriarum baratro sepultus ita iacuiisset, ut nec resurgere vnquam, nec quidquam, quod Deo gratum esset, agere potuisset; sed peccati & cacodæmonis vinculis adstrictus, miser, nudus atque reiectus, diuinæ iræ scopus, & odij; vno verbo, bonis omnibus spoliatus, malis omnibus oppressus atque obrutus mansisset.

IV. Equidem Deus absolutâ & illimitatâ potentia vsus, liberè homini condonare, eundemque non præmiis quidem, aut mercedis nomine, cælesti ciuitate donare potuisset; quis hoc neget? Deo tamen secus visum est, quod & rationi magis consentaneum, ipsique homini longè honorificentius est. Nempe homini haud immeritò exprobrare, vel obiicere quispiam potuisset, cum nullis suis meritis, ad sublimem illum dignitatis gradum euectum fuisse; illâ coronâ indignum esse, quæ strenuè duntaxat se gerenti.

rentibus meritò debetur; laudi & gloriæ eidem non esse, quòd Deus illum ad tantam gloriam promouisset; hoc totum esse omnipotentis Dei, qui peccata citra ullam satisfactionem condonasset, & sine meritis, æterna donasset beatitate; indignum denique illo gradu & honore videri, ad quem gratuitò promotus esset: hæc & alia hominibus exprobrari possent, si Deus, citra satisfactionem, offensam iis vltro condonasset.

V. Itaque Dei sapientiæ fuit, iustitiæ suæ & gloriæ nostræ consulere; eúmque modum & rationem illam excogitare, quâ & homines bearet, & Iustitiæ suæ satisfaceret. Homo per se ipsum satisfacere non poterat; quia quidquid præstat, finiti valoris & meriti est; Deus ipse sibi satisfacere nequit, cùm satisfactio alteri exhibeatur; homo tamen esse debuit, qui pro hominibus satisfaceret; Deum etiam esse par fuit, cuius satisfactio & merita infinita essent. Igitur hominem Deum, qui pro aliis hominibus, soli Deo, ea offerret merita, quorum intuitu, licet homines saluaret, æternisq; præmiis afficeret, nihil supra meriti sortem rependeret: immò etsi quidquid ad salutem hominum spectat, vltro concedit, ac liberaliter impertitur, haud tamen præfata merita, id præmij genus adæquat. Igitur ex communi quadam traditione (neque hoc ad iaphori negant) ex sacra historia. & ex omnium Patrum, immò & nationum ferè omnium monumentis habemus; hominem lapsum è seruitute redemptum fuisse, Deúmque hominem factum, vt redemptionis huius præ-  
tium

tium solueret. Credimus, inquam, Vnigenitum æterni Patris Filium, ab eodem missum Patre, ab eo quippe mittitur, à quo procedit, humanam naturam assumpsisse, ac suæ diuinæ personæ mirabili nexu, quæ hypostaticum vocant, deuinxisse, in vnum scilicet Christum, qui suis nos exemplis & verbis docuit, ac se ipsum, pro nostra salute, æterno Patri obtulit. Christi ergo diuinitatem, quam tot euincunt miracula, tot Prophetæ prænuntiabant, tot historici celebrarunt, tot gentes & populi agnoscunt, hoc loco suppono, qui hominum genus in libertatem vindicauit, viam nobis salutis aperuit, & ea nobis merita donauit, quibus cælestem gloriam, mercedis ac præmij nomine, consequi valeamus.

VI. Vnus autem Christus est, nec vllus multorum vnquam meminit, qui frustra essent; vnus enim perfectò sufficit, cuius infinitis meritis, etiam plures terrarum orbes, si essent, saluari omnino potuissent: nempe inexhaustum illius ærarium est; quantumvis inde ad redemptionis nostræ pretium sumatur, infinitus adhuc thesaurus est. Cur igitur redemptores ac reparatores nostros multiplicamus, si vnus plusquam satis est? cur Monarchiam sine ratione turbamus? cur superflua & inutilia gratis accersimus? Vnus igitur nobis Reparator, vnus Redemptor, vnus Iesus, vnus Christus, quæ vt salutis nostræ auctorem agnoscimus, ita vni duntaxat illi salutem acceptam referre debemus; & vt saltem vnus nobis ad hominum salutem procurandam obtinendamque necessarius est, ita plures superflui essent: id enim naturæ repugnat,



repugnat, quæ plures causas totales, vt Philosophi vocant, ad eundem effectum nunquam adhibet. Vno verbo, vnum Christum esse, ex communi traditione, & innumeris ferè scriptorum monumentis, ac certa fide tenemus; cum enim necessarius nobis esset, cum infinita Dei misericordia nobis deesse nollet, nec iniustitia delicta hominum, illatasque iniurias gratuitò remittere, vnum quidem salutis auctorem ac reparatorem extitisse rectè concludimus; plures autem fuisse, nemo nisi gratis assereret. Loquimur autem de reparatore principali & propriè dicto.

## DATVM DECIMVM.

*Vnus est Spiritus veritatis, vna Fides, vna Lex,  
vna Religio.*

I. **V**T vnus finis est, ad quem Deus homines destinauit; ita vnus spiritus, cuius impulsu, ad eundem finem homines tendunt; cuncti sanè ex eodem Deo Patre profecti, ab eodem Domino Iesu Christo è seruitute redempti, eiusdem Spiritus sancti halitu agimur, regimur, sustinemur; ex quo corpus vnum totius Ecclesiæ compactum conflatumque est, vno Patre, vno capite, spiritu quoque vno, sed pluribus tanquam membris distinctum atque ornatum. Et verò vt Beatitatem, ac summum bonum, in quo noster finis positus est, scilicet ipsum Deum, consequamur & complectamur, Dei nos esse oportet, filios scilicet, atque amicos; quis enim hæres potiore iure, quàm filius, na-  
D turâ,

turâ, vel adoptione? Qui autem filij Dei sunt, ij spiritu Dei aguntur; similes enim sunt ac diuinæ per gratiam consortes naturæ; eodem igitur cum Dei spiritu ducuntur; at spiritus Dei vnus est, cum Deus ipse vnus sit.

II. Præterea vna veritas est, mendacium verò multiplex; de re qualibet verè dicitur, quòd ea sit, qualis reuerà ipsa est; id autem vnum est; quòd autem alia sit, falsum est; & vt innumera sunt alia, quæ falsò affingi possunt, ita mendacium multiplex, & veritas vna est: vnus igitur spiritus veritatis, cuius impulsu & ductu, homines reguntur, vt ad suum finem perueniant. Et verò si varij ac diuersi spiritus essent, Ecclesia vnum corpus ex capite & membris, Christo scilicet & fidelibus compactum non esset; nam eiusdem corporis eadem ac vna est anima, vnus idemque spiritus; monstrum igitur bicorpor esset, sub vno capite; quomodo igitur cor vnum & anima vna credentium erat? Præterea diuersi spiritus, diuersis motibus nos agerent; sed motibus contrariis moueri non possumus: si enim me vnus eò ferat, vnde alius retrahit, quid faciam miser in partes distractus? si vnus asserat id, quod alius negat, & hic suadeat, quod alius dissuadet, vtri fides adhibenda? Esset haud dubiè, quod in huiusmodi anxietatis angustias reductus, aliquid lucis à Patre luminum desideraret; hinc Christus, cuius verbis standum est, ( illa enim spiritus & vita sunt ) vnum duntaxat spiritum veritatis, vnum Paraclitum misit; nec multo-  
rum

rum meminit, cum vnus tantum sit; neque hoc adia-  
phori negant.

III. Si autem vnus spiritus veritatis, atq; adeo  
vna veritas est, vna etiam fides est; nempe fides in  
diuinam veritatem fertur; in ea scilicet, quæ Deus  
scit, ac dicit; Deus enim verax est, qui nec falli, nec  
fallere queat. Non falli, quia quidquid verum est,  
probè scit: non fallere, quia ea duntaxat nuntiat, &  
dicit, quæ ipse scit; cum igitur vera solummodo  
sciat, eadem quoque dicit; vna igitur fides est, cum  
vna tantummodo veritas sit. Et verò cum eandem  
beatitudinem sperare ac prosequi debeamus, vna  
certè nobis spes est; fides autem spei nostræ firmis-  
simum est fundamentum: eiusdem porro ædificij  
idem fundamentum est; vt igitur vna spes, ita vna  
fides est. Præterea vna eademque fidei ratio, quam  
motium vocant; diuina scilicet veritas, atque au-  
thoritas loquentis Dei fallere nescij; hinc eadem  
credimus, cum Deus eadem nuntiarit; si enim di-  
uersa credimus, igitur vel aliquid credimus, quod  
nobis minimè nuntiauit; atque adeo alio motiuo  
ducimur, quàm quod à diuina auctoritate & verita-  
te ducitur. Si autè aliud motium est, alia fides est;  
vel fidem aliqua in re eidem detrectamus, atq; adeo  
fidem negamus, cuius rationem ac motium de-  
struimus, diuinam scilicet auctoritatem & verita-  
tem; quæ cum vna sit, diuidi & à se ipsa diuelli ac  
seungi nequit; igitur vel in omnibus tenenda est,  
aut certè in nullo tenetur. Hinc, qui peccat in vno,  
fit omnium reus; & quisquis vnum quid, quod cre-

dendum esset, credere recusat, nihil penitus credit, eâ scilicet fide, quâ credendum est, diuinæ scilicet auctoritatis studio, quam si vel in vno negat, eam parui facit; ergo eâ mentis firmitate illam minimè amplectitur, quam diuina fides, quæ certissima est, postularet; hinc infidelis est; igitur fidem amisit; si amisit. certè non habet. Quòd autem cum infidelitate fides stare non possit, per se notum est; ut enim peccatum lethale diuinam gratiam & charitatem destruit, ita vel minimus infidelitatis actus diuinæ fidei lumen extinguit.

I V. Præterea Deus nunquam loquitur, nisi ut fidem à nobis exigat; quisquis enim loquitur, sibi credi vult, & dictis fidem haberi; quod Deo, qui nunquam fallit, potiori iure competit; igitur vel integram & plenam fidem exigit, vel nullam; & cum omnibus loquatur, eadem omnibus credenda proponit: loquatur, inquam, vel per se ipsum, vel per alios, quibus incumbit ea cæteris nuntiare, quæ ipsi à Deo acceperunt; igitur eadem omnium vera fides est; si eadem, igitur vna. Illud autem præsertim incommodi ex multiplici fide ortum duceret, quòd nemo certus esset, cuinam ex iis sibi adhærendum esset; quòd enim hæc vni, illa verò alteri Deus imponat, quis amabò hominum rescire posset? igitur ut fides certa sit, vna esse debet. Si demum diuersa fides esset, inde haud dubiè multa dissidia & contentiones orirentur; qui autem diuersa sentiunt, Christianæ charitatis vinculo teneri vix possunt; ac nisi charitatis coagulo corporis Ecclesiæ membra  
conglu-

conglutinentur, vbi membrorum vnio non est, corporis vnitas esse nequit. Ex his igitur manifestum est, fidem vnā esse, vnus scilicet Dei loquentis auctoritate nixam, quā fideles ab infidelibus discernuntur; licet enim fideles inter variæ sint opiniones, de iis tamen esse constat, quæ ad rem diuinæ fidei non pertinent, de quibus, prout cuique videtur, sentire liberum est.

V. Vna fides, vnā legem parit; lex enim supremi est Legislatoris, vel illius vicem gerentis voluntas, rationis ductu concepta & promulgata. Deus autem legem ferre non potest, nisi loquatur, & mentem suam ac voluntatem aperiat; atqui fides eorum est, quæ nobis à Deo nuntiantur; igitur diuinā legem eāque præcepta, quæ Dei iussu exequimur, certā fide tenemus, à Deo scilicet profecta esse. Accedit, quod diuina lex in sacris Codicibus continetur; sed ibidem diuinæ fidei habemus oracula; si ergo vna fides est, quæ omnia Dei oracula complectitur, vna quoque lex erit, quæ iisdem continetur. Vt enim vna est fides, quia vna est diuina veritas; ita vna lex, quia vna est diuina voluntas; nec minùs contra legem peccat, qui minimum præceptum Dei violat, quàm contra fidem, qui minimo Dei verbo fidem abrogat. Denique si varia variis præcepta Deus imponeret, & diuersas diuersis traderet leges, maxima quiuis anxietate laboraret, incertus scilicet, quam legem amplecti deberet; huic sanè incommodo diuina sapientia occurrere debuit, alioquin mortalium salutem minùs consultum esset.

VI. Vna autem fides & vna lex vnā religionem constituunt ; cū religio hoc loco illa omnia complectatur , quæ ad rem sacram & diuinum cultum pertinent. Lex autem ea dirigit ac moderatur, lumine fidei duce ; nempe ille verus Dei cultus est, quem Deus ipse nobis præscripsit ; si præscripsit, haud dubiè significauit & nuntiavit. Res autem sacra omnis ad diuinum Dei cultum spectat, vt perspicuum est ; cū igitur diuinus cultus legibus à Deo latis, ac diuinis oraculis nitatur ( nihil enim Deus præscribit sine lege ; nihil significat sine oraculo ) inde sanè concluditur, ex vna fide & lege, vnum Dei cultum, verum scilicet, atque adeò vnā religionem consequi. Sit enim multiplex, si fieri potest, religio ; vera scilicet, igitur multiplex Dei cultus ; igitur diuersa fides & diuersa lex ; id est, diuersus cultus præscriptus ; præscribi autem non potest, nisi nuntietur ac promulgetur. Itaque cū vna lex & vna duntaxat fides sit, ac proinde vnus Dei cultus, vnā tantū religionem esse, necesse est, quæ scilicet res omnes sacras complectitur ; vnā, inquam, cum multiplici ritu, qui vnitatem fidei non soluit, sed supponit ; neque hoc aduersarij negant. Nec est, quòd ex variis religiosorum Ordinum institutis, religionum quoque varietatem deducas ; nempe illi omnes, quamuis diuersi ordinis ac instituti sint, eandem fidem ac legem profitentur, ea scilicet Christi consilia sequuti, quæ licet omnes minimè sequantur ( nec enim consilium obligat, sed præceptum ) nemo tamen est, qui consilia esse non dicat,

cat. Porro diuersa habitûs, cibi, cantûs, ac exterioris vitæ ratio religionis substantiam non mutat, sed eandem supponit, & varia tantùm adnectit ornamenta: itaque vna quidem est religio, eâque Catholica, diuersa tamen religionis instituta, diuersique Ordines; sicuti in Hierarchia, diuersi gradus.

## DATVM VNDECIMVM.

*Vna est duntaxat Ecclesia.*

I. **E**cclesiæ nomine, intelligo congregationem fidelium, id est, eandem Christi fidem profitentium; corpus scilicet quoddam mysticum & politicum, ex suis membris & capite constans; corpus, inquam, visibile; nec enim Ecclesia congregatio spirituum est, sed hominum: quidquid sit, Ecclesiam voco, congregationem illam hominum, veram fidem, legem ac religionem profitentium; ac dico, vnâ duntaxat esse, quod adia phori, contra quos ago, non diffitentur; vna enim est diuini Sponsi dilecta, vnica sponsa, vna columba, & Sunamitis, vna regina in vestitu deaurato, circumdata varietate.

II. Et verò cum vna solummodò fides sit, vna est duntaxat vnâ fidem profitentium congregatio; nempe vnitas fidei eiusdem corporis vnitatem constituit; quisquis enim veram fidem profitetur, ad prædictam congregationem pertinet, quæ illorum est, qui veram fidem sequuntur; vera autem fides,

vna est, vt suprà ostendi. Porro hæc fides huius corporis politici quædam forma est; & cùm forma dei esse rei, id est, constituat rem, certè si vna forma est, vna res est, ac vnum esse; esse, inquam, corporis mystici, seu politici, suis membris distinctum. Licèt autem huius corporis perfectio postulet, vt omnia membra Christianæ charitatis fibulâ inter se copulentur, non tamen charitatis diuinæ defectus corpus illud dissoluit, cuius membra societate & communione fidei copulantur: alioquin vel minima peccati lethalis noxa ab Ecclesia segregaret; quod reuerà dici nō potest; nam peccatores etiam in fidei societatem admittimus, cuius vinculo inter se connexi, Ecclesiæ corpus componunt.

III. Porro licèt multæ Ecclesiæ esse dicantur, sic Lugdunensis olim ad Ecclesias Asiæ scripserat; immò Ioannes Apostolus multarum Ecclesiarum in Apocalypsi meminit, hoc tamen non facit, quin vna sancta sit & Catholica Ecclesia, vt in fidei Symbolo, quod Adiaphori vltro admittunt, præfertur; illa autem diuersitas, loci est, non fidei; gentis & nationis, non legis ac religionis. Vt enim multæ ciuitates Regionem vnâ, vel vnum Imperium componunt, ita multæ priuatæ Ecclesiæ vnâ Ecclesiam constituunt, in qua sanè Romanum inter & Græcum Catholicum nullum discrimen intercedit, in iis scilicet, quæ ad essentiam fidei ac religionis pertinent; quòd autem diuersa lingua sit, vnâ fidei mentem vel animam non tollit; diuersa liturgia ac diuersus

can-



cantus, vestes etiam sacrae diuersae, eiusdem legis unitatem non solvunt.

IV. Immò, ut fides multiplex esse non potest, ita nec multae Ecclesiae esse queunt; sint enim, si fieri potest; igitur vel eadem fides multis Ecclesiis communis est, vel diuersa diuersis competit: non primum; quia si eadem fides, idem est fidelium genus, atque adeò eadem fidelium congregatio, communio, societas (haec enim idem sonant) eadem igitur Ecclesia: non secundum; quia una duntaxat est fides, ut ex dato decimo perspicuum fit; igitur quòd multae sint Ecclesiae, dici nequit; & ea est fidei, legis, religionis & Ecclesiae connexio, ut ex fidei unitate, legis ac religionis unitas, & ex fidei, legis, & religionis unitate, Ecclesiae unitas consequatur.

V. Præterea cum in Ecclesia nostram salutem procurare debeamus, ut enim ante conditam Ecclesiam, salus ex Iudæis erat, ita in condita Ecclesia saluari duntaxat possumus; nempe sine fide impossibile est placere Deo, & accedentem ad Deum oportet credere, ut lib. sequenti luculenter ostendam. Si multiplex Ecclesia est, fieri non potest, ut eam distinguam, in qua Deus me saluari vult; quòd autem multarum Ecclesiarum membrum esse non valeam, certo certius est; licet enim quis plurium civitatum iure donari possit, & pro ciue iure municipij haberi; vnus tamen ciuis duntaxat est; id est, in una duntaxat natus, aliis verò adscriptus, per moralem quandam adoptionem. Sic vnus tantum patris re ipsa filius est, adoptivus autem multorum; equidem mul-

tas personas gerere possumus, multas dignitates sustinere, multisque gaudere iuribus; at vnum duntaxat vitę institutum amplecti valeamus, vt perspicuum est; ne intra simul & extra eandem Ecclesiam simus, quod reuerà dici non potest. Nec est, quòd dicas, liberum cuiquam, hanc vel illam partem sequi, huic vel alteri societati adscribi; nam cum illę differant, quòd Deus mihi liberum reliquerit, diuersa sentire, quis amabò dicat? quasi verò mihi liberum sit, credere Deum agi diuersis opinionibus, & modò in hanc, modò in illam ire, ac diuersa & repugnantia loqui? absit. Igitur vel non differunt, scilicet in dogmatis fidei, ac proinde vnā constituunt Ecclesiam, aut reuerà si differunt, vna solummodò vera est, cuius membra & filij esse debemus.

VI. Deinde Christum Ecclesię caput esse, omnes fatentur; vna igitur est Ecclesia; scilicet vnum corpus mysticum & politicum, cuius Christus caput est. Si enim plura corpora, cum vno capite essent, monstrum esset; monstra autem præter naturam sunt, nec ea sibi naturę auctor in finem proponit, sed ex mero casu, vel causarum vitio sunt; plura quidem membra communi capite gaudent, sed ex iis, vnum & idem corpus conflat. Vnus demum est spiritus veritatis, quo Ecclesię corpus agitur & viuit, vna vita igitur, mens vna, anima vna, vnum vitę principium; igitur vnum corpus, & vnum viuens; vna denique cælestis Ecclesia; vna Dei ciuitas; vna Hierusalem; sed quæ cælestis est, terrestribus aliquando fuit; quæ modò triumphat in cælis, eandem

dem in terris militauit. Cùm igitur triumphans vna sit, militantem vnam esse, necesse est; sic vna est Dei domus, & in vnum corpus baptizamur: vnus Christi panis sumus, vnum boni Pastoris ouile; vnum, inquam, corpus, vno Christi spiritu vegetatum & alitum; cuius membra diuersis facultatibus instructa sunt, ita inter se distinctis, vt in diuisis singulorum actionibus, vna omnium communis salus procuretur: quòd si membrum vnum aliquod aliorum sibi membrorum functiones vsurpare contendat, iam est confusio in corpore, & ordinis & societatis fit perturbatio.

## DATVM DVODECIMVM.

*Vna est fidei nostræ regula, propria  
& ultima.*

I. **V**T rectum ab obliquo discerni possit, regulâ opus est, cui si quid consentiat & congruat, rectum esse concluditur; vt autem congruere ac consentire cognoscamus, applicatio quædam, seu comparatio instituenda est. Sic artifices regulam suis operibus admovent; murarij, muris; lignarij, tabulis, &c. nempe cùm regula recta supponatur, si quid deinde cum regulâ conueniat & consentiat, id omnino rectum esse concluditur. Cùm autem non rarò inter homines de rebus fidei controuersia intercedat, immò multis dubium de quopiam articulo suboriri queat; haud dubiè vt lires omnes componi, ac dubia dissolui possint, aliqua  
certa

certa regula esse debuit, ad cuius applicationem, seu probationem, certa ab incertis, recta ab obliquis, distinguere ac discernere valeamus.

II. Quid sit autem rectum, facile intelligi ac definiri potest: Lineam rectam Geometrae definiunt illam esse, quæ à puncto ad punctum brevissimè inducitur, seu quæ nunquam à termino declinat, seu deflectit, nempe lineæ termini sunt puncta; igitur à puncto profecta ad punctum tendit; illa igitur, quæ à puncto ad punctum re ipsa, citra ullam deflexionem vel inclinationem tendit, recta est; quidquid enim aliorsum deflectit, ab aliquo deflectat, necesse est, à suo scilicet termino & fine. Sic actio recta est, quæ agens ad suum finem tendit; homo rectus est, qui rectè agit; hinc rectum pro iusto, aliquando usurpatur, quòd scilicet adæquationem inducat, adæquato alterius iure; hinc ratio illa recti, quam scholastici rectitudinem vocant, actionis humanæ honestas seu bonitas est, in eo duntaxat posita, quòd homo sic agens ad debitum finem tendat; ut enim propter finem est, ita propter finem agit; id est, agendo ad finem suum tendit.

III. Nec deest regula, quæ rectas actiones à non rectis discernat, ipsa scilicet ratio; hinc actio illa recta esse dicitur, quæ cum ratione consentit; ratione autem verè iudicatur, talis actio recta; censeturque talis esse, quæ homo ad suum finem tendat, & id agat, quod naturæ suæ instituto competit. Porro ipsa ratio, per se ipsa recta est, nec aliâ indiget regulâ, ut cum illa conferri, seu comparari possit; nec datur ratio-

Rationis ratio, seu regulæ regula, quæ recta esse supponitur, ne detur processus in infinitum; hinc regula rectum quidem non facit, sed probat atq; discernit, & in cognitionem recti hominem ducit; nec ideo rectum est, quia cùm regula consentit, sed ideo consentit, quia rectum est.

IV. Datur igitur aliqua fidei regula, quam homines adhibere possunt; alioquin pessimè eis consultum esset, & in his cælestium & diuinarum rerum tenebris, nulla lux penitus affulgeret, ad discernendum verum à falso; inter tot errores, tuta via non esset, nec certus trames pateret; nullum iter sine periculo, nulla semita sine lapsu. Itaque cùm natura homini ad dirigendas actiones illas, quæ ad finem illum conducunt, quem suis viribus consequi potest, certam regulam dederit, scilicet rationis lumen, quo duce, modò non declinet, nunquam errabit; certè ad finem illum supernaturalem, ad quẽ euectus est, certâ regulâ indiget; cùm enim in rebus supernaturalis gradus humana ratio caliget & cæcutiat, diuinæ fidei lumen inditum est, quod alterius imbecillitatem suppleat; cuius accessione homo instructus, illa omnia cognoscat, quæ ad finem illius supernaturalem pertinent. Hinc quòd actionibus naturalibus, rationis lumen est, supernaturalibus lumen fidei hoc ipsum erit; id tamen discriminis intercedit, quòd ratio sibi regula sit, nec enim rationis ratio datur; at verò res fidei, quæ obscura est, anxium animum tenet, nisi ex certæ regulæ usu constet atque probetur.

V. Diuinæ actum fidei certum esse, necesse est; ac proinde omnem excludere formidinem; iis enim, quæ auctoritate diuina nituntur firmiter assentiamur, nullo dubio titubantes, nulla vacillantes formidine, aliqua regula necessaria est, cuius operâ res diuinas ab aliis, quæ incertæ sunt, discernamus. Equidem attestanti aliquid Deo fidem minime detractare possumus, sed diuinum oraculû nobis ab eo proponi debet, qui errori vel hallucinationi obnoxius non sit; alioquin mihi perspectum non erit, quod sermo Dei sit. Igitur ne suo adminiculo diuina fides careat, certâ regulâ instructam esse oportet, cuius diuinæ fidei oracula à vanis & humanis commentis probè distinguantur, ac proinde certi simus, falli non posse, dum iis, quæ Dei nomine nobis significantur, firmissimum assensum præbemus, quo reuerà subsidio nisi mens nostra instructa sit, fieri non potest, quin aliquod dubium admittat, & leui saltem formidini præbeat locum.

VI. Ratio regendi homines prædictam regulam postulat; cum enim quælibet respublica rectè administrata eos iudices constituat, qui subortas lites componant, & causas decident omnes; Ecclesia peioris conditionis esse non debuit, in qua haud dubiè iudices illi constituti sunt, quos in dubiis ac controuersis fidei consulamus. Quis enim id iuris sibi arroget, nisi cælitus illi datum sit? nempe quod fallere, aut falli non possit, homo à se ipso non habet; à Deo igitur fallere nescio, qui aliquorum animos sui spiritûs halitu ita perfundit, ac diuinæ veritatis radio

dio illustrat, ut eos fallere non possint, quos Dei nomine affantur, ut iis divina nuntient oracula. Ecclesiasticæ igitur administrationis ratio id necessario postulat, ut certa sit divinæ fidei regula, quâ constet, quid tenendum sit, quid certò credendum, quid cuique liberum relinquatur: præsertim cum nulla lex citra promulgationem obliget, nec fidei articulus citra sufficientem propositionem, vel significationem; quæ certè nec fieri, nec admitti potest, nisi ab eo fiat, qui auctoritate polleat, ut perspicuum est.

VII. Nec modò aliqua est regula fidei, sed unica dumtaxat propria & ultima est; nam si plures sunt, vel alteri vna consentit, vel aduersatur: si consentit, eadem cum illa est; plures igitur non sunt; aut certè si plures sunt omnino similes, reuerà frustra sunt; cum unica totum id præstet, quod à multis obtineri posset. Adde, quòd illa multiplicitas haud dubiè formalis non esset, sed materialis, ut aiunt, scholastici; sic plures eiusdem scripturæ Codices, plures scripturas non continent, sed vnam. Si verò secundum dicatur, haud dubiè si altera recta est, altera legitima non est, utpote quæ cum recta non consentit, ut ex ipsis terminis constat. Sed ut rem hanc paulò pressius inculcem, si hæc regula à libero cuiuspiam voluntatis usu pendet, vel huic voluntati res omnes fidei subiacent, vel illarum pars; hoc secundum dici nequit, alioquin daretur regula regulæ; quonam enim pacto aliter sciri posset, quid cuilibet voluntati subiaceret; igitur tota rerum ad  
fidem

fidem pertinentium vniuersitas præfatæ voluntati subsunt; duabus autem omnino subesse, nihil est, quod possit; sicut eiusdem rei integrum dominium, ut vocant, penes duos simul esse nequit. Si verò plures simul, atque vnà fidei controuersias definire queunt, iam non plures illi regulas, sed vnā duntaxat constituunt, integram scilicet & absolutam; vnica igitur est fidei regula; plures enim non modò superflue sunt, atque adeò frustra (frustra autem Deus aut natura nihil facit) verum etiam, quod ego existimo, impossibiles.

## DATVM DECIMVM TERTIVM.

*Sacra Scriptura, in controuersijs ad fidem pertinentibus, non est Iudex.*

I. **H**Æresiarchæ in Catholicos, præsertimque in Romanos Pontifices, & Romanæ doctores Ecclesiæ acriter hætenus inuecti sunt, quòd in re diuinæ fidei, multos errores admittant, & mores antiquos mutarint: hoc ipsum Catholici negant; hi defensores, illi verò actores sunt: ut lis dirimatur, Iudice opus est. Quod autem dissensiones, Christianos inter extinguendæ sint, ratio monet, & Paulus clamat, ut idem omnes sapiant & dicant, maneantque in vnitæte fidei, legis, spiritûs & charitatis; tollenda igitur diffidia, & causæ fidei terminandæ; porro motam litem Iudicis duntaxat sententia terminat; Iudice igitur opus est, quem appelle-



pellemus, & consulamus, cuius verbis & decretis standum sit, alioquin lites æternæ forent.

II. Sacer Bibliorum textus legis loco est, non verò Iudicis; Legis, inquam, à supremo Legislatore Deo latæ; hic nobis diuinorum decretorum ac iudiciorum est Codex, responsum æternæ sapientiæ digestum, tabulæ Dei digito sculptæ, nouellæ legis gratiæ, authentica diuinæ fidei, ac æternæ veritatis testimonia. Legem video, testem audio; sed vbi iudex? vbi verò lex est, auctoritatem illam ac potestatem esse oportet, cuius sit, non modò legem condere, verùm etiam procurare, vt lex seruetur, & si quid in legis textu dubij suboriat, legitimam eiusdem interpretationem firmare. Quòd enim sacer textus diuersæ explicationis & sensûs patiens sit, dubitare non licet; immò omnes hætenus hæretici sacras paginas pro sua causa citant; & non rarò accidit, vt pars vtrique litigantium eundem pro se legis textum afferat. Lex igitur Iudex esse non potest, cùm de ipsa lege non rarò litigetur, & sacer textus multarum sit dissensionum ac controuersiarum causa, seu materies.

III. Et verò primis illis temporibus legis naturæ, vt vocant, malè omnino cōsultum esset, quibus nulla scriptura fuit, sed mera diuinorum oraculorum à maioribus ad posteros, non scripto, sed verbo traditorum transmissio. Præterea quòd scriptis duntaxat standum sit, in sacris paginis non lego, in quibus tamen habemus, si quid dubij & controuersie in lege moueatur, sacerdotem consulendum esse, qui

quod dubium soluat, & causam iudicet: immò in Moyſis Cathedra Scribas & Pharifæos federe Chriſtus, quantum huic hominum generi valdè infeſtus, vltro fatetur, quorum dictis, non verò factis ſtandum ſit. Multa demum in ſacro textu leguntur, quæ niſi rectè intelligantur, deſtructioni potiùs, quàm ædificationi ſeruiunt; à ſanguine & ſuffocatis abſtinere, Sabbatum feſtuo cultu agere, aliâque id genus facere iubemur; quæ tamen Eccleſia non ſeruat: alium igitur Iudicem eſſe oportet, qui verum huiusmodi præceptorum uſum, modum, & finem exponat.

I V. Accedit, quòd multa loca difficilia ſunt, ut de Pauli Epiſtolis Petrus expreſſè teſtatur; Ariani Filium Patre minorem eſſe aſſerunt, cum hæc verba in ſacris paginis legant, *Pater maior me eſt*. Alij abſtinentiam à carnibus dampnant, propter hunc ſacri textus locum. *Manducate, quæ apponuntur vobis*; nonnulli Deiparam Virginem eſſe negant, dum his verbis inſiſtunt, *Et non cognoscebat eam, donec peperit Filium ſuum primogenitum*. Alia innumera omitto, quæ niſi ab auctoritate habente, & fallere neſcio exponantur; in ſacris paginis nihil certi, aut fixi habebimus, ſed multas errandi occaſiones. Verbum Dei gladius eſt, quo vir ſtrenuus ſi utatur, rebus fortiter pro Rege & Patria geſtis famulatur; ſi rabie & furore actus, parricidiorum inſtrumentum eſt.

V. Prætereà dum ſacrum textum pro fidei & controuerſiarum iudice adſtruis, unde habes, quæ ſote, tot libros Canonicos eſſe? Proteſtantes Tobiam, Iace-

Iacobi Epistolam, aliósq; multos non admittunt, aliis contenti; sed cur his, non illis? cur alios inter apocryphos reíicis? quo tandem oraculo id habes? Comuni, inquires, traditione accepimus; sed hæc traditio nisi certa auctoritate nitatur, errori obnoxia est, ac proinde quod ab ea pendet, integrum non erit, sed errori obnoxium. Hinc illud nunquam satis laudatum Augustini dictum: Euangelio non crederem, nisi Ecclesiæ auctoritas me moueret. Dices fortè, à Conciliis generalibus definitum esse, vt ij Codices, pro Canonicis habeantur; rectè; igitur à Conciliis generalibus sacro textui auctoritas accedit; vel, vt sic loquar, canonizatio & authentica ratio: Concilium igitur iudicat de verbo Dei, tum scripto, tum etiam tradito; igitur Sacra Scriptura iudex non est, cum alterius iudicio ac sententiæ subiciatur.

VI. Adde, quòd textus sacer diuerso idiomate scriptus fuit; Hebraico, Græco, Latino; si autem iudex est in Controuersijs fidei, cum iis profectò malè agetur; qui linguas illas minimè intelligunt; immò Christiani nominis hostes consulendi essent, Iudæi scilicet, & Schismatici, utpote linguarum illarum peritissimi, vt varios versionum ac expositionum nodos nobis edisserant; qua autem fide, æquè rerum æstimatores viderint; quasi verò fides nostra Rabinorum dicto & iudicio stare debeat? præterquam quòd autographum deest, nec vsquam reperitur; quod tamen, si scriptis standum est, producendum & consulendum esset, perinde atque publicum

instrumentum ; nec enim de apographo mihi constat ; quasi verò ignoti amanuensis fides , nostræ fidei fundamentum esse possit ? Adde varias interpretum versiones , qui cùm errare potuerint , inde constat , Scripturam , quam ab iis accepimus , fidei iudicem non esse . Si enim hanc , vel illam versionem obtrudis pro legitima , quid quæso repones , si pro legitima non admittam ? quo tandem argumento id euinces ? an fortè doctrinam , peritiam , diligentiam interpretis laudabis ? sed homo fuit , ac proinde errare potuit , nisi diuino Spiritu afflatus fuerit ; quod quia incertum est , incerta etiam eius fides manet .

VII. Equidem sacræ paginæ consulendæ sunt , & Christus Dominus scripturas scrutari iubet , quas & ipse non semel citauit ; Petrus , Paulus & Stephanus magistrum imitati , ad faciendam dictorum fidem , ea selectis & apposis sacri textûs locis firmarunt . Id certè optimum factum est , excitamus , vt sacras leges & testimonia , non verò vt iudices ; iis nos institui-  
mur , inde ad refellendos errores argumenta ducimus , spem nostram alimus atq. fouemus . Quid plura ? sacras paginas non modò admittimus , sed legimus , veneramur , osculamur ; in iis enim habemus decreta , promissa , statuta , & leges Dei ; sed illas accipimus à magistratu viuente , à quo publicantur , promulgantur , proponuntur , exponuntur , idque eiusdem Spiritus operâ , quâ conditæ sunt ; quod reuerà nisi fiat , nuda litera sine prædicto spiritu occidit ; quis enim tot nodos soluere , tot linguas ac ver-  
siones

siones callere, tot ænigmata explicare, tot tropos, metaphoras, allegorias intelligere; tot demum controuersias & lites decidere valeat, nisi legitimus aliquis iudex sit, qui omnis erroris expertus, de iis sententiam ferre possit?

VIII. Itaque Christiana respublica præter sacros codices, in quibus diuina oracula & statuta continentur, Iudicem aliquem habet, cuius auctoritas eiusdem legis promulgationem antecessit; legis enim promulgatio promulgantis auctoritatem supponit, quâ nisi polleat, iis legibus homines adstringi non possunt, cum legitima publicatio quasi neruus legis censeatur; & si quando accidat, nonnihil in sacro textu obscurius esse, aut dubiam alicuius loci interpretationem, eiusdem auctoritatis est, quæ prius legem condidit, eandem interpretari, eodem scilicet spiritu, quo condita est; hoc autem ad Iudicem spectat. Sacra igitur Scriptura iudex non est, alioquin suus iudex esset, cum in iudicium sæpe vocetur, quod nemo sapiens dixerit. Itaque Scriptura non est Iudex, 1. quia Iudicis est ita sententiam ferre, ut deinde partibus innotescat, quod Scripturæ non competit. 2. in Scriptura duo sunt, litera & sensus, illa occidit, hic obscurus est. 3. multa in controuersiam cadunt, quorum Scriptura non meminit. 4. quia de ipsa Scriptura non raro disceptatio est. 5. quia nunquam usus obtinuit, siue in Veteri, siue in Noua Lege, ut Scriptura Iudex esset. 6. in Iudiciis politicis & ciuilibus, lex scripta iudex non est, sed magistratus.

IX. Quod autem de verbo scripto hætenus dictum est, in traditionibus locum etiam habet; cum enim fabulæ quoque à maioribus ad posteros transmittantur, ut veras à falsis, diuinas scilicet ab humanis distinguere valeamus, alio iudice opus est, qui eodem instructus spiritu, ac omnis erroris immunis, eos errare non sinat, à quibus consulitur. Præterea cum traditiones sacris libris commissæ non sint, aliquem esse oportet, qui earum curam gerat, easque intactas & integras seruet, alioquin facile mutari possent; quid enim quæso est, quod tempus non mutet, nisi ab æterno illo spiritu à temporis iniuriis vindicetur?

## DATVM DECIMVMQVARTVM.

*In iisdem Controversiis internus cuiusq; Spiritus Index non est.*

I. **I**Nterni spiritûs nomine, illius assertores intelligunt interiorem quandam testificationem, quam quisque in se experitur, quaque, si Superis placet, inducitur ad verum à falso discernendum; hunc nonnulli in dubiis & cōtrouersiis fidei iudicem perperam esse contendunt; nam cum iudex in materia diuinæ fidei erroris expertus esse debeat, & cum omni spiritui credendum non sit, sed singuli spiritus probandi; haud dubiè restat, ut interior ille spiritus fidei controuersias terminare non valeat. Dicis enim, mi homo, te diuino spiritu agi: quamdiu

diu nullum errorem effutis, piè crediderim, non tamen certus sum; neque tu ipse certus es, alioquin cum eodem iure quilibet alius hunc sibi adstruere possit, qui tamen contraria sentit, vtri credendum sit, non video: mihi, inquires, qui vero Dei spiritu ducor; at ille idem de se testatur; cur tibi potiùs, quàm illi fides habenda est?

II. Dices fortè tuum sacris paginis firmari, quis enim diuinis oraculis insistit, spiritu Dei agitur; nempe oues Christi vocem illius audiunt. Sed ô bone, ille quoque pro Christi oue se gerit, séque illius vocem audire testatur; vtri ergo credendum? Scriptura interioris illius spiritus, qui te agit, iudex esse non potest, quia de ipsa scriptura sæpe ac sæpius cōtrouersia est. Nec tuus spiritus Scripturæ iudex esse poterit, quo enim iure, quod mihi quoq; nō competat, qui à te contraria sentio? idem autem Spiritus veritatis contraria non adstruit, vna enim veritas est; igitur alio iudice opus, qui nostram hanc litem diiudicet; & vitiosus omnino circulus est, in quo scilicet impij ambulant, dum Scripturam probant per interiorem spiritum, & hunc, per Scripturam iudicant.

III. Prætereà si spiritu illo interiore instruimur, frustra doctores consulimus, & disputationes instituimus; frustra concilia congregantur; frustra Petrus oues & agnos Christi pascere, & fratres suos in fide confirmare iubetur. Nam vel electi sunt, vel reprobī: si electi, Dei spiritu aguntur fallere nescio; alia igitur testificatione non indigent: si reprobi,

cùm illo spiritu destituantur, æterni Patris vocẽ audire non possunt. Deinde vel ille spiritus nunquam fallit, vel aliquando errat; si primũ, cur tot dissidiat cur idem omnes non sentiunt & dicunt? cur tot diuinæ fidei adminicula accersuntur, cùm errori locus esse non possit? si verò secundum, quis amabò vnquam certus erit? erras fortè, cùm maximè ab errore discedere putas. Dices, nunquam eos falli ab interiore spiritu, qui scripturis adhærent: Hoc ipsum est, quod hæretici omnes plenis concrepant buccis; num vides, de ipsa Scriptura, non minorem esse controuersiam, quàm de interiore spiritu? quid ergo dubium, per dubium probas? ignotum, per ignotum? quasi verò Lutherani & Calvinistæ in scripturis conueniant.

IV. Sed oues Christi eius vocem audiunt: rectè; Christi vocem audit, qui Ecclesiam & Pastores à Christo relictos audit, nempe qui vos audit, me audit. Sic etiam docemur à Domino, sumusque, vt Ioannes loquitur, docibiles Dei, quibus scilicet Deus non in Prophetis, sed in Filio locutus est, qui non modò exterius voce nos docet, sed interiùs adiuuat, vt credamus, & faciamus, quæ suggerit. Quod autem idem Euangelista monet, necesse non esse, vt aliquis nos doceat, sed vnctionem eius, qui docet nos, sufficere; interiorem illum spiritum non modò non adstruit, sed destruit; nempe id vnum duntaxat ab iis, quos in Christi fide instituerat, exigit, vt in ea doctrina manerent, quàm interioris operæ gratiæ, quam vnctio illa significat, ab Apostolis accepe-



ceperunt; cū nouis doctrinis opus non esset, quas Pseudo-Apostoli disseminabant; hinc eos ibidem hortatur, vt in eo permaneant, quod ab initio audierant. Quid porro hæc ad interiorem illum spiritum, non video; non negamus tamen Spiritum sanctum, per gratiam in cordibus nostris habitare; nosque suis motionibus & impulsibus ad bene agendum excitare, impellere, trahere, &c.

V. Multæ aliæ rationes congeri à me possunt, vt probem, interiorem illū spiritum regulam, aut iudicem in cōtrouersis fidei definiendis, nullatenus esse.

1. Fides ipsa vna est omnibus fidelibus communis; igitur regula fidei vnica; illud Datum decimum fuit, hoc duodecimum; sed spiritus interior multiplex est, vt constat; regula igitur fidei non est, & multò minùs iudex; regula enim seu mensura adæquat id, cuius regula est.

2. Fidei regula certa esse debet, errorique minimè obnoxia, quod certè haberi non potest, nisi Spiritus veritatis assistat, & insit; sed hæc Spiritus sancti opera singulis fidelibus promissa non est, sed Ecclesiæ & Pastoribus; quisquis enim hoc adstruit, id probet. Scio afferri ad hunc finem nonnulla sacri textûs loca, sed iam passim diffolata sunt, & de ipsis tecum litigo; consule igitur alium iudicem; immò cū libros Canonicos ab Apocryphis discernas, id sanè interiori spiritui minimè tribues.

3. Præterea ille interior spiritus hæreses hæcenus & schismata peperit, & dissensionum causa fuit, cū vix duos inuenias, qui in illo conueniant; fidei igitur regula & fundamentum esse non potest.

4. Ex

eo fit, nullum fore terminum illarum Controuersiarum, quæ ad fidem pertinent; nempe tu spiritum veritatis tibi arrogas, nunquam assentiar; nisi ergo aliquis iudex priuatis omnium iudiciis præsit, qui litem decîdat, æternam fore necesse est. Deinde si priuatus ille spiritus in re fidei iudex est, nullus esset hæreticus, & nulla hæresis; quidquid enim mens interiùs suggeret, pro Spiritûs sancti oraculo habebitur, quod absurdum est. Denique, ille interior spiritus mille & mille illusionum erroribus aditum aperit, Angelus enim Sathanæ induit personam Angeli lucis.

VI. Hoc tamen non obstat, quin interior ille spiritus nos moueat, & charitatem in cordibus nostris diffundat; illæ autem motiones iisdem cordibus impressæ, & afflati halitus recognosci ac recenseri debent, probarique instituto examine. Hinc Deus in sacris paginis nos monet, vt spiritus probemus, aut si quisque per se ipsum discernere nequeat, Ecclesiam Pastoresque nostros consulamus, qui cùm nos pascere & regere debeant, quasi rationem animarum nostrarum Deo reddituri, quid mirum, si dubia & difficultates nostras dissoluant, adhibitâ scilicet diuinarum institutionum, seu scripto seu nudo verbo traditarum operâ; aut certè si in ipsa scriptura aliquis dubio locus sit, vel in ipsa traditione, litem ipsi virtute sancti Spiritûs assistentis definiant; in quo certè errare non possunt, vt paulò post euincam: porro interpretatio priuata sacri textûs, cuiuslibet doctoris

toris est; at verò canonica, iudicis errare nescij. Igitur vt tandem concludam, spiritus ille interior in Controuersijs fidei iudex esse non potest, nec regula, nec fundamentum; alioquin fides nostra certa non esset; immò ausim dicere, nihil ferè esse, quod maiore & diligentiore examine indigeat, cum ab illo homines in errorem nullo negotio induci possint; igitur cum nec res certò definiat, nec legitima auctoritate nitatur, & sæpe sibi contradicat, diuinæ veritatis ac fidei nostræ regula esse non potest.

VII. Equidem singulari Dei beneficio & priuilegio factum est, vt nonnulli eiusdem Spiritus sancti illapsu controuersias & nodos ad diuinam fidem pertinentes illico soluerint; sed pauci, quos æquus amauit Iupiter; hæc communem hominum morem superant, & rarò contingunt, cum Deus illustri & singulari sanctimoniâ homines huius honoris gratiâ dignetur. Denique ita Deus constituisse poterat, vt singulos interior spiritus abundè doceret, & instrueret; si enim vni hoc munus concessit, omnibus concedere posset; quod autem res ipsa aliter se habeat, vel ex eo patet, quòd interior spiritus vnus, alterius spiritui aduersetur, cum tamen vnus idemque sit spiritus veritatis, & semper secum ipse consentiat.

## DATVM DECIMVM QVINTVM.

*In propria causa nemo Iudex est.*

I. **D**E re maximi momenti agitur, æterna scilicet cuiuspiam salute, quâ si semel excidat, restituendi rem nulla spes affulget; in qua si semel erretur, irreparabilis error est: maxima igitur cautione opus est, & maxima diligentia adhibenda, ne in errorem inducamur. Nullus hic pertinaciæ, nullus factioni locus sit; summa res est, alea minimè committenda, sed maturè consideranda ac ponderanda, non temerè, nec tumultuosè tractanda; pro qua, nihil amicis, nihil parentibus, nihil temporì dandum, sed præ illâ cætera, floccifacienda; quid enim homini prodest, si vniuersum mundum lucretur cum animæ suæ detrimento?

II. Contendo tecum, Adiaphore, non contentionis, vt vincam; sed charitatis studio, vt tuæ salutis consulam, & te lucrifaciam Christo. Contendo, inquam, extra Romanam Ecclesiam te saluari non posse; contrarium asseris, ac tuam defendis religionum indifferentiam; en causam & litem; quis tandem arbiter erit? quo iudicio standum? In hac causa, quæ ad te pertinet, iudex non exis; tibi fortè suspectus sum: præterea cum homines simus, falli & fallere possumus; nulla tamen causa sine iudice; hæc porro, in qua tua salus vertitur, incorruptum postulat, & fallere nescium. Officiosus monitor in-

sto,

sto, priuatus tamen, audire si renuis, testes accerso; si peruicax manes, rem ad Ecclesiam deferro, inde rectum iudicium expecta, & canonicam sententiam, & si Ecclesiam non audieris, Ethnici & Publicani loco mihi eris.

III. Iudex in propria causa esse non potes: si parentes actoris iure defensori suspecti sunt, & defensoris, actori, ac proinde repudiari iure ac reiici possunt; multò magis ipse iudex in propria causa suspectus erit. Hinc si quid fortè litis Principem inter & subditum intercedat, Princeps alterius subditi iudicio vltro se subiicit, quod certè in omni republica rectè administrata locum habet: in suis quisque rebus cæcutire solet; cum enim nostri amantiores simus, hæc perturbatio rationi tenebras offundit; hinc minùs rectè de nobis rebùsque nostris iudicamus. Hinc si fortè medicus decumbit, alterius medici curæ se credit; & si quid virij oculo insit, alterius oculi adhibes operam; oculus enim cætera quidem, at se ipsùm non videt.

IV. Præterea iudicandi actus auctoritatem & iurisdictionem in Iudice supponit; quod reuerà qui neget, neminem arbitror esse, cum per se ipsùm notum sit; at nemo sibi subditus est, vel suæ auctoritati subiicitur; hæc enim respectum, vt vocant, & habitudinem ad alium habent. Denique si cuius in propria causa iudici esse licet; in causa, inquam, salutis; frustra œcumenica concilia conuocantur, frustra tot libris & sacris commentariis vtriusque linguæ Patres Ecclesiam illustrarunt; frustra Paulus

Apo.

Apostolus de hominum salute adeò sollicitus erat; hæc & alia multa omnino frustra essent, si quilibet in propria causa iudex esset.

V. Et verò de prædio non iudicas, de anima iudicares? pro rebus caducis alterius iudicis sententiæ subiiceris, pro æternis subiici recusas? quisquis potestati resistit, Deo resistit; doctores Deus instituit, ut te doceant; pastores, ut pascant; magistros ac moderatores, ut regant; tui iuris non es, sed Dei; ac proinde iis subiici debes, quos tibi Deus præfectos esse voluit; hos duces sequere in via salutis; consule in dubiis; licet fides nostra diuina sit, eam tamen ab hominibus nobis tradi & exponi iussit. Homines humano modo regi vult; ab aliis scilicet hominibus, quibus suas ipse vices commisit; quosque omnis erroris immunes reddidit, ne si fortè illi errarent, Deus ipse, cuius vices gerunt, errare diceretur; hinc Deum audit, qui doctores ab eo ad id muneris institutos audit; & quisquis hos spernit, Deum spernere censetur.

VI. Itaque cum nemo Iudex sit in propria causa; & cum aliquo iudice opus sit, in causa ista grauissima, errori scilicet minimè obnoxio, iam tui muneris est, & officij, iudicem illum consulere, quem cum in illo interiore spiritu non inuenias, nec in sacris Codicibus, nec in ipsis traditionibus, nec in te ipso, nec in mortalium quopiam, qui priuata duntaxat auctoritate polleat; hoc vnum restat, ut Ecclesiam consulas, in qua certam & vltimam fidei regulam, diuinæ veritatis firmam columnam & fundamentum,

tum, omnium denique, quæ ad rem hanc pertinent, controuersiarum, omnis erroris immunem Iudicem inuenias: sed de his infra fusiùs agam.

## DATVM DECIMVM SEXTVM.

*Auctoritas Iudicis legitima esse, idque partibus constare debet.*

I. **I**udicium, actus iuridicus est; & nemo iudex esse potest, qui publicam personam non sustineat, cuius anima & forma auctoritas est; hinc quisquis iudicandi auctoritate caret, iudicis munere fungi non potest: quod adeò perspicuum est, ut nullus dubio locus supersit; si enim te vtrò ingeris, quis te constituit iudicem? quo iure litigantes tuæ sententiæ ac iudicio acquiescent? si iure omni ac iurisdictione cares, consilio quidem alios iuuare poteris, non tamen latâ sententiâ motas componere lites; auctoritas igitur in Iudice necessaria est, eaque legitima, nisi enim legitima sit, nulla est, ut patet.

II. Auctoritas autem ad iudicandum in rebus fidei, non humana, sed diuina res est; tum quia iudex in Controuersiis fidei erroris immunis esse debet; quæ sanè immunitas vel prærogatiua homini non competit, qui à natura ita comparatus est, ut errori obnoxius sit; nempe omnis homo mendax; humana igitur illa auctoritas non est, quæ hoc priuilegio gaudet, sed diuina; à Deo igitur deriuata in homi-

nes atq; profecta. Hinc ridebis sæculares illos Principes, qui rebus sacris profanas manus admouere non dubitant, nouos in re fidei canones condere, priscis abrogatis, conciliis præesse, ritus inducere, Sacramenta mutare; ac multò magis doctores illos, qui id sibi iuris arrogant, vt Controuersias fidei definire, ac diuina oracula populo exponere valeant. Quo iure id facis, mi homo? qua auctoritate? quis hoc tibi munus credidit? Deus, inquires; vbi signa & testes? vbi patentes literæ? Spiritu Dei agi me sentio, etiam iurato non crederem; illa igitur auctoritas definiendi causas fidei à Deo est; atque ab eo in eos deriuata, quibus ea cura incumbit.

III. Porro litigantibus hæc Iudicis auctoritas perspecta sit; alioquin perinde se habet, quatenus ad illos spectat, atque si nulla esset; nec enim eius dictis, aut decretis stabunt, quem iudicandi facultate instructum esse ignorant; quatenus, inquam, ad illos spectat. Nempe non propterea illa iudicandi potestate priuatur, licet nonnulli eam minimè concedant, vel ignorantia vitio, vel pertinacia studio; quia tamen illis inutilis est, cum eam eã vti nolint, perinde illis est, atque si non esset; cum nullum ex eã fructum referant; non tamen stat per Iudicem, sententiam ferre paratum, sed per eum, qui Iudicem repudiat, ne suos errores dimittere cogatur.

IV. Prætereà ille in re fidei certus esse non potest, qui nullam fidei certam regulam, nullum in Controuersis certum Iudicem agnoscit. Quòd autem diuina fides certa sit, perspicuum est, cum per eam



eam diuinis oraculis firmiter assentiamur. Igitur nō modò certum, & fallere nescium iudicem esse oportet, verum etiam nobis compertum esse, necesse est, quisnam ille sit; vt scilicet eum adire, & consulere valeamus; immò mediocris & probabilis duntaxat coniectura non sufficit, cum de illo illiusque auctoritate, certi esse debeamus, alioquin fides nostra perpetuò vacillabit.

V. Vnde porro constet illa auctoritas, & iudex, cui cælitus attributa est, vt sine vitioso circulo ostendatur, vñum suppono, quod certissimum est, & ex suprà dictis perspicuum diuinæ sapientiæ ac providentiæ fuisse, certam fidei regulam, ac certum controuersiarum iudicem statuere, quem homines, ad æternam beatitudinem destinati consulere possint; alioquin frustra Deus ab iis certam fidem, ac firmam mentis adhesionem & subiectionem exigeret: nec modò illum statuere, verum etiam certis & probatis signis designare ac distinguere debuit; quid enim iuaret, iudicem illum constitutum esse, quem homines non cognoscerent?

VI. Quòd autem Deus aliquem constituerit, ac suis characteribus designarit, ex diuinis oraculis constare debuit; tum scripto, tum nudo verbo traditis, & ad nos vsq; transmissis; loquitur enim Deus, vt sua nobis decreta significet. Præter scriptum verbum, traditum etiam esse oportuit; nempe ex comuni traditione sacros codices & libros canonicos accepimus, quā etiam tenemus, certum & fallere nescium, in causis fidei & morum iudicem à Deo

creatum fuisse : sed profectò nutaret etiam traditio,  
 & vix certam ab incerta distinguere homines pos-  
 sent, nisi Spiritus sancti adiutorium ita præsens Ec-  
 clesiae adesset, ut illa in re fidei errare non posset, ac  
 proinde certum omnisque erroris expertus, de con-  
 trouersis, de libris canonicis, de ipsis quoque tra-  
 ditionibus, iudicium ferre posset, quo deinde homi-  
 nes starent : sed hoc cap. sequenti discutio.

## DATVM DECIMVM SEPTIMVM.

*In Ecclesia, suprema, absoluta, & vsque ad extre-  
 mum duratur a potestas est iudicandi, ligan-  
 di, soluendi, &c.*

I. **E**cclēsiā in terris à Christo relictā esse,  
 congregationem scilicet fidelium, eiusdem  
 fidei vinculo coniunctorum, nemo Chri-  
 stianus negat; certam item fidei regulam esse, ac  
 certum, & ab eodem Christo institutum designa-  
 tumque iudicem, pro iis controuersis, quæ ad fi-  
 dem & mores pertinent, definiendis, qui legitima,  
 errorisque immuni auctoritate polleat, ex datis præ-  
 missis perspicuum est; vnde, ni fallor, concludi po-  
 test, prædictam auctoritatem & iudicandi potesta-  
 tem, in Ecclesia duntaxat esse; si enim est, ut reue-  
 ra esse non negas, in Ecclesia duntaxat est. Dices  
 fortè Spiritum sanctum esse iudicem fidei; rectè, is  
 enim Spiritus veritatis, qui nec falli, nec fallere po-  
 test; sed cum non per se ipsum immediatè, ut aiunt,  
 sed adhibito alicuius ministerio sententiam ferat, ac  
 di.

diuina declaret, aperiâtque oracula, illum certè, cuius operâ vtitur, non Angelum, quod hominum rectio non postulat, sed hominem intra Ecclesiam esse oportet; quis enim ab infidelibus regulam fidei accipiat? igitur in Ecclesia prædicta facultas & potestas est.

II. Porro illa vel singulis fidelibus seorsim inest, quod ex suprâ dictis falsum esse constat; vel omnibus coniunctim; vel alicui, qui caput est; vel nonnullis coniunctim, quatenus totam Ecclesiam representant, geruntque omnium vices. Tota Ecclesia errare non potest; alioquin illa potestate careret, quæ cum errore coniuncta esse nequit, & portæ inferi aduersus eam præualerent; tota verò Ecclesia omnes fideles complectitur. Cum igitur fieri non possit, ut omnes Christi fideles controuersias fidei coniunctim definiant, cum in vnum cogi non valeant, igitur nonnullis ea facultas inest, nobilioribus scilicet membris, quæ aliis præsunt; Ecclesia enim corpus quoddam est, cuius Christus caput, & Petrus eius Vicarius, & alij pastores nobiliorum membrorum loco sunt. Quis autem neget, inter eiusdem corporis membra, eam graduum & functionum diuersitatem intercedere, ut nobiliora regant & præsent, inferiora verò seruiant atque regantur?

III. Ridiculum vel solum dictu est, quod pedes caput consulat, iisque regendi munere cedat; Christus ita Ecclesiam suam instituit, ut Petrum & Apostolos ut præcipuas illius partes elegerit: *Non vos me elegistis, inquit, sed ego elegi vos, ut eatis & fructum*

*afferatis*; in ministerio scilicet Euangelij, & diuinorum mysteriorum administratione; facta iis potestate remittendi peccata, ligandi, soluendique; Petro præsertim, clauibus regni cælorum eidem collatis, datoque præcepto pascendi oues & agnos, ac fideles & fratres potissimum id fide confirmandi. Hos, inquam, pastores instituit, ac eosdem arcanorum suorum participes fecit, vt deinde à Christo excepta, reliquis exponerent, quorum curam iisdem ita credidit, vt animarum nostrarum rationem essent reddituri.

IV. Hinc si quis inter fideles peccare, præsertimque à recto fidei tramite, cum aliquo scandalo, deflectere videtur, deferendum esse ad Ecclesiam iubet. *Dic Ecclesia*, inquit, &: *Si Ecclesiam non audierit, sit tibi sicut Ethnicus, & Publicanus.* Ecclesiæ certè nomine, omnes fideles hoc loco non veniunt; alioquin ridiculum & impossibile præceptum esset; pastores igitur, qui aliorum curam gerunt, & totam Ecclesiam repræsentant. *Dic Ecclesiæ*, Præsulibus scilicet, ac Præsidentibus, vt ait Chrysostomus, qui teste Augustino totam Ecclesiam exhibent, & quibus iudicandi ac regendi potestas facta est; hinc si quid fortè dubij suboriat,ur, consule Ecclesiam: sic olim Antiocheni legatos Hierosolymam miserunt, qui eorum nomine, Apostolos de religione consularent. *Dic Ecclesiæ*, non Ecclesiis; vna enim est Ecclesia, & hic singularis illius character est; vnum corpus, sub vno capite; vnum ouile, sub vno pastore; vnum regnum, sub vno rege, aut rectore; vnica

spon-

Sponsa, vni sponso ac dilecto suo coniuncta; vna domus sub vno Patrefamilias. Quid plura? in sacris litteris diuersis nominibus illustratur, atque inde Patres templum, nauem, exercitum, ciuitatem, arcem appellant; sacerdotem igitur hoc templum; nauclerum, nauis; ducem, exercitus; magistratum, ciuitas; & arx, præsidem desiderant.

V. Hæc autem Ecclesia columna est & firmamentum veritatis; igitur errori minimè subiacet; alioquin veritas ipsa errore fulciretur, quod dici nō potest. Ecclesiam verò hoc loco Paulus pro domo Dei, in qua Episcopus Timotheus conuersabatur, accipit, pro sacro scilicet Pastorum ac Præfulum cœtu. Ecclesia quoq; Regnum Christi est, quod suis Apostolis disposuit, & cuius administrationem eisdem contulit; eam scilicet, quam ab æterno Patre acceperat Regnum, inquam, simul & Regina, quæ adstitit à dextris Sponsi, quàmque indissolubili casti coniugis nexu in æternum sibi sponsauit; columba illa vnica, sine macula & ruga; vno verbo, Christus Apostolis suis veritatis Spiritum promisit, & dedit; quem mittam vobis à Patre, quique vos omnia, ad rem fidei pertinentia docebit; stetit pactis, ac deinde repleti sunt omnes Spiritu sancto.

VI. Præterea vbi sunt duo vel tres congregati in nomine meo, ibi sum in medio eorum; in nomine Christi congregati sunt, qui vices illius gerunt, potestate sibi ab eo facta, quique pro eo, legatione funguntur, homines Deo reconcilians in ædificationem Corporis Christi; igitur in medio eorum

Christus est, per Spiritum suum, cuius ductu, Ecclesia errare non potest, in definiendis fidei controuersis, & regulis morum tradendis; hinc omnibus diebus vobiscum sum, vsque ad consummationem sæculi: quin verò ille pactis steterit, qui etiam, si vellet, fallere non potest. Quid porro est in medio pastorum, ac rectorum Ecclesiæ esse, nisi eisdem hac prærogatiua instruere, ut errare nequeant; quis enim vos audit, me audit; dum igitur ipsi loquuntur, ipse Christus loqui consuetur, Christus autem errare non potest.

VII. Itaque in Ecclesia est auctoritas iudicandæ ac decidendi res fidei, errori minimè obnoxia, alioquin si in iis Ecclesia erraret, sponsa Christi sine ruga & macula non esset; illa Dei domus nutanti fundamento fulciretur; Christus promissis suis non stare; Spiritus veritatis aliquando abesset; Portæ inferi aduersus eam præualerent; illa Dei ciuitas sine magistratu, mera Babylon esset; regnum illud in se diuisum; templum illud sine sacerdote legem excelsi conseruante; corpus illud sine anima, fides nostra sine regula: quis de Deo talia sentiat, quæ mortalium imprudentissimo vix in mentem venirent?

VIII. Nec vllus circulus timendus est, dum Ecclesiam per Scripturam, & hanc, per Ecclesiam confirmamus; nam qui de Scriptura non dubitat, in ea legit, quæ auctoritatem Ecclesiæ prorsus euincunt; illi autem, quibuscum ago, Scripturam admittunt; qui verò Ecclesiæ auctoritatem agnoscit, inde librorum sacrorum comprobationem deducit;

hinc

hinc si alterutrum supponitur, circulus perfectò non est. Ecclesia porro auctoritatem sacris libris conciliat ex traditione, quâ tenet, hos reuerà libros legitimos & canonicos esse; porro ipsas quoque traditiones veras à fictis & ascititiis Ecclesia discernit, eo scilicet spiritu veritatis instructa, quo falsum à vero discernitur; vnde si quis non scripturam modò, sed traditiones omnes, atque adeò Ecclesiæ auctoritatem pernegaret, aliis perfectò rationum momentis, ab errore vindicandus esset, ductis scilicet ex præmissis datis: sed de iis agendi hîc perfectò locus non est. Illud autem cæteris præmitti posset, à Deo scilicet aliquam fidei regulam relictam, ac certum controuersiarum iudicem, in re fidei, mortalibus datum esse; alioqui rei sacræ, quod certè illius sapientiæ est, minùs rectè consultum esset.

IX. Porro illa auctoritas suprema est, cum nullam superiorem in terris agnoscat, nec ab eius sententia appellatur; nempe cum Christus sit supremus Iudex & Princeps, Rex scilicet Regum, & Dominus Dominantium, cui omnis potestas à Patre data est, tum in cælis, tum in terris; & cum potestas Christi, Ecclesiæ potestas sit, cuius Christus caput est, & sponsus; haud dubiè tribunal Ecclesiæ, tribunal Christi est. Hinc ab Ecclesia ad Christum appellatio non datur; nec enim ab eodem Iudice ad eundem appellatur, vt patet: hinc rideas illum, quem aliqui adhibent agendi modum, qui à Pontifice minùs certiore facto, vel, vt ipsi loquuntur, minùs informato, ad eundem meliùs edoctum,

vel informatum appellare solent; vel à Pontifice ad concilium, aut à concilio legitimo, ad Pontificem; nempe vt Ecclesia vna est, ita vna auctoritas, vna potestas, vnum tribunal est.

X. Eadem auctoritas absoluta est, ad omnes scilicet diuinæ fidei causas; nempe quidquid solueris, aut ligaueris, erit solutum aut ligatum; & quacunque dixerint vobis, seruate. *Quidquid & quacunque*, omnia complectuntur, & nihil excipiunt: præterea si aliquid exciperetur, ad fidem & mores perti- nens, quod Ecclesiæ iudicio subiectum non esset, in eo fides nostra nutaret, vt patet; cum certâ regulâ ac certo fundamento careret: deinde nihil prorsus assignari potest, quod Deus ab Ecclesiæ potestate exemerit, ex iis scilicet, quæ ad res sacras & diu- num cultum pertinent. Sed, inquires, Ecclesia no- uos fidei articulos condere non potest; quid tum? nihil tamen est, quod ab Ecclesia declarari non pos- sit, ad fidem scilicet pertinere, vel non pertinere: sed cum hoc vnum sit ex aduersariorum effugiis, tertio libro de illo dicendi locus erit.

XI. Hæc demum auctoritas ad finem sæculi per- manebit; nempe vobiscum sum vsque ad consum- mationem sæculi; & sponsabo te mihi in sempiter- num, nec portæ inferi vllò vnquam tempore ad- uersus Ecclesiam præualebunt; quod tamen acci- deret, si aliquando Ecclesia prædicta auctoritate careret; Christus denique Apostolos misit, vt fructum afferant, & fructus illorum maneat. Præ- terea eadem ratio, quâ probamus, Ecclesiam illa po-  
testa-



testate modò pollere, pro omni tempore militat, & si aliquando Deus illam reuocaret, non iam Deo dilecta ciuitas, sed mera Babylon esset. Porro illa potestas successionis iure ab Apostolis in eorum successores traducta est, vt ex dictis perspicuum fit; alioquin post mortem Apostolorum nulla esset amplius Ecclesia, nullum Christi regnum, nulla sponsa: & verò nullus hactenus hæreticus negauit, quin Ecclesiã Apostoli post se reliquerint. Sed, inquiunt, vitium deinde contraxit, & in mediis persecutionibus extincta est: at si in successores Apostolorum præfata potestas traducta est, quid ni ab his in alios deinde, atque alios, ad nostra vsque tempora, & hinc ad sæculi finem; cùm eadem Christi verba id probent? Vel enim solis duntaxat Apostolis concessa est, aut si in eorum successores traducta, quamdiu profectò successores erunt, tamdiu Ecclesia erit, & in Ecclesia plena potestas atque facultas decidendi fidei causas: datur igitur in Ecclesia prædicta auctoritas, eaque suprema & absoluta ad extremum vsque duratura.

## DATVM DECIMVM OCTAVVM.

*Romana Ecclesia est vera Ecclesia, atque in ea  
homines saluari possunt.*

I. **E**cclēsiā Romanā verā esse Ecclesiā,  
atque ad eā in illa quemlibet saluari posse;  
Adiaphori nostri non negant. Et verò cū  
illa vera & legitima Ecclesia sit, in qua est suprema  
& absoluta auctoritas iudicandi, ligandi, solvendi,  
aduersus quam portæ inferi non præualebunt; illa  
inquam, quæ columna & fundamentum est fidei, illa  
Christi sponsa dilecta, illa Dei domus & templum,  
illa militans Hierusalem, illa quam consulere atque  
adire iubemur, *dic Ecclesia*; illa supra firmam Pe-  
trā ædificata, illud Christi Regnum, quod Chri-  
sto Pater æternus, & Christus Apostolis eorūque  
successoribus disposuit; illa ciuitas supra montem  
posita, quæ abscondi, vel latere nequit, illud Chri-  
sti corpus, in cuius ædificationem, consummatio-  
nem, & ministerium pastores & doctores instituit;  
illa, inquam, vera est Ecclesia, quæ unitate fidei, &  
morum sanctimoniā pollet, erroris nescia, impu-  
gnata quidem, sed nunquam expugnata, vna, san-  
cta, Catholica & Apostolica.

II. Nemo est, qui nesciat, has veræ Ecclesiæ no-  
tas esse; quæ reuera vel nulla est, vel talis est; quod  
autem Romana talis sit, facile demonstratū est; nem-  
pe successionis iure, omnes illas dotes adeptā, quibus  
vera à spuria distinguitur, pro spuria haberi non po-  
test,

rest. Quòd autem facultas illa ac iudicandi potestas erroris immunis, quæ singularis character est illius Ecclesiæ, cui spiritus veritatis errare nescius semper assistit, successionis duntaxat iure acquiratur, quis amabò est, qui neget? cùm immediatè (ut aiunt) à Christo, Petro attributa fuerit; qui, ut Augustinus ait, solus inter Apostolos meruit audire: *Tu es Petrus, & super hanc Petram ædificabo Ecclesiam meam.* Dignus certè, qui ædificandis in Domino Dei populis, lapis esset ad fundamentum, columna ad sustentaculum, clavis ad regnum: felix Ecclesiæ fundamentum, ut ait Hilarius, dignaque ædificatione illius petra, quæ inferni leges, & Tartari portas, & omnia mortis claustra dissolueret; immò ut vnus Deus est, ait Cyprianus, vnus Christus, vna Ecclesia; ita vna Cathedra veritatis, supra firmam petram fundata.

III. Sed, inquires, illa potestas data est Ecclesiæ, quisquis enim Ecclesiam non audierit, sit tibi sicut Ethnicus & Publicanus. Quis neget, Ecclesiam hac potestate pollere, in pastoribus suis, præsertimque in visibili Ecclesiæ capite Petro, in quo tota Ecclesia continetur, ut populus in Principe? hinc, qui vos audit, me audit: & Apostoli eorūque Successores totam Ecclesiam repræsentant. Eadem est Ecclesiæ & Petri auctoritas; immò in Petro Ecclesiæ concessa; nempe, ut cum Cypriano dicebam, Cathedra veritatis, id est, infallibilis iudicandi facultas, in Petra & Petro fundata; hinc meritò totius Ecclesiæ fundamentum est. Itaque Ecclesia illa vera est, quæ Ca-

thedram veritatis obtinuit; illa porro supra Petrum fundata est; atque adeò vera Ecclesia, super hanc Petram ædificata; illa igitur Ecclesia vera est, quæ hanc Petram pro suo fundamento agnoscit; illud Christi regnum est, cuius Petrus Princeps est; illud germanum corpus, cuius Petrus visibile caput; illud ouile, cuius Petrus pastor; illa navis, cuius Petrus nauclerus. Quid plura? illa vera Ecclesia, quæ Apostolos quidem omnes, sed principem Apostolorum Petrum agnoscit.

IV. Quòd autem Romana Ecclesia illa sit, quæ Petrum eiusque successores Romanos Pontifices, supremorum Rectorum loco semper habuit, certo certius est. Nempe inde Romana dicitur, quòd Romanos Episcopos agnoscat, ac sese illorum ditioni subiiciat: hinc Calvinistæ Papistas nos appellant, quòd D. Papæ, Romano scilicet Pontifici vltro subditi simus. Romana igitur Ecclesia vera est Ecclesia, quæ scilicet in Petro extincta non fuit, alioquin ciuitas parùm munita fuisset, & Portæ inferi aduersus illam præualuissent. Petri ergo Successores illius curam gesserunt, Ecclesia, inquam, prædicta facultate prædita, nec enim Ecclesia stare potest, ut columna & firmamentum fidei & veritatis, nisi præfata auctoritate polleat, & à spiritu veritatis regatur, in Romano scilicet Pontifice, aliisque sub eo pastoribus, in quos illa infallibilis auctoritas, successionis iure, traducta est: cum iis Christus est, ad consummationem vsque sæculi, per Spiritum sanctum, cuius ductu gregem Dominicum regunt; Re-

gni

gni Christi non erit finis; cum tamen Petrus vitæ functus, finem habuerit; Regnum verò Christi Ecclesia est, quam suis Apostolis eorūque Successoribus commisit. Iure igitur pari, cum nullam limitationem, nec exceptionem esse legamus; quasi verò Christus iis duntaxat, qui Petro ætate pares fuerunt, regnum cælorum patere voluerit, non verò aliis, qui succedentibus annis vixerunt: quod reuera cum dici non possit, clauēs regni cælorum post mortem Petri in potestate alicuius relictæ sunt. Ecclesiæ, inquit; rectè: pastorum scilicet, qui Ecclesiam regunt & ædificant; Successorum igitur Petri, aliorūque Apostolorum: sed qui Ecclesiam Romanam regit, successor Petri est, igitur clauēs regni cælorum penes illum sunt; Romana igitur Ecclesia vera est Ecclesia.

V. Quòd Petrus Romanus Episcopus fuerit, vniuersa clamat antiquitas, Patres omnes, Græci præsertim, quorum maximè intererat, nemine prorsus refragante, testantur; tabulæ fastorum euincunt; lapides ipsi & rudera, muta licèt, vociferantur. Extat etiamnum & prostat Romanorum Pontificum nunquam interrupta series, quam nec ipse Calvinus negare ausus est, ne toti antiquitati contradiceret; & verò quisquis negaret, Petrum Romanum Episcopum fuisse, eodem iure, Augustum Cæsarem Romanorum Imperatorem fuisse, negare posset. Quæstio facti est, testes producimus, omni exceptione maiores; Græcos præsertim, atque adeò minimè suspectos; vnus Athanasius sufficeret, qui Felicem Romanum

num Pontificem, legitimum Petri successorem, quo Ecclesiæ columnæ nituntur, appellat: Eusebius accedat, qui non modò Petrum Principem Apostolorum, sed primum Romanorum Pontificem fuisse, suis historiarum monumentis mandavit: Cyprianum autem non omitam, qui cum ad Cornelium Papam scriberet, eius sedem, Petri Cathedram vocat, & Ecclesiam principalem, unde vnitas sacerdotalis exorta est; subnectit demum, Romanos eos esse, quorum fides Apostolo prædicante, laudata est, ad quos perfidia non possit habere accessum. Si Romæ Cathedra Petri est, igitur auctoritas atque potestas, igitur & Claves regni cælorum: si Ecclesia Romana principalis est; igitur vera est, cum aliarum mater sit; quidquid enim in aliis boni spiritus inest, ab ea profectum est. Si denique ad eam nullus error, nullus perfidiæ accessus patet, vera igitur est, cum erroris omnis expers sit; hæc enim singularis Ecclesiæ Catholicæ nota, & singularis character est.

VI. Præterea illa est vera Ecclesia, quæ suæ fidei ac religionis, nullo negotio rationem reddit; scit enim, à quo didicerit; inuocat nomen Domini, in quem credit, & quem audiuit; fides enim ex auditu, auditus autem per verbum Dei; quod sanè legitimam loquentis, ac prædicantis missionem & auctoritatem supponit. Petrus à Christo accepit, Linus à Petro, Cletus à Lino, atque ita deinceps singuli successores à suis prædecessoribus acceperunt; hinc scimus, à quo nostræ fidei oracula & religionis mysteria didicerimus. Nec quisquam est, etiam in-

ret sectarios, qui neget, penes Romanam Ecclesiam, prædictum ius successionis mansisse; quis enim attributam illi auctoritatem, præter Deum, qui ultro concessit, auferat? unde autem constat, à Deo ereptam esse? Neque Calvinus inficias iuit; qui vult Romanum Pontificem, quem Antichristum vocat, in Dei templo sedere: si Dei templum est, igitur domus & Ecclesia Dei; neque hoc Ecclesiæ Catholicæ nomen Romanæ inuidet, vt ex multis locis apud eum colligi potest.

VII. Sed, inquiunt, in multis errauit Romana Ecclesia; si vera Ecclesia erat, quod vel hæreticorum pertinacissimus ultro fateretur, priusquam erraret, inde manifestum fit, non errasse; cum erroris expers esset. Si enim errauit, igitur errori obnoxia erat; igitur auctoritate illa infallibili non pollebat. Igitur non erat vera Ecclesia, quæ est columna & firmamentum fidei, & regitur à spiritu veritatis, nec aduersus eam portæ inferi præualere possunt. Igitur vel nunquam fuit, vel semper est: quod nunquam fuerit, nemo concedet; si autem fuit, errare profectò non potuit; igitur non errauit. Præterea quisquis errasse contendis, accusatoris partes agis; tibi ergo, quod adstruis, probandum incumbit; mihi verò duntaxat negandum; accusas, defendo; errorem imponis, pernego: vtri porro credendum? tibi ne, an mihi? neutri sanè, ante sententiâ iudicis. Quis porro iudex? an spiritus interior instinctus? an quilibet in propria causa? minimè gentium: *dic Ecclesia*; consule legitimos pastores, qui hæredita-

rio & successionis iure iudicandi facultatem ab Apostolis acceperunt.

VIII. Sed in quo tandem Ecclesia Romana erravit? an forrè aliquod hæreticum dogma credendum proponit? agedum; Corpus Christi reuerà esse in Sacramento asserit; hoc hæreticum vocat, Catholicum esse contendo; Scripturæ verba mysticè intelligis, ego ad literam, ut aiunt. En litem, & dubium in Lege; quis porro consulendus, nisi Petrus, ac Petri successor, qui clauem scientiæ à Christo accepit? cui scilicet & Spiritui sancto ita visum est, fratres in fide suos confirmare iussus, & oues Christi pascere. Calvinus Christi Corpus inesse negat; Petrus asserit; ille est error obnoxius, hic spiritu veritatis instructus, & Christi virtute munitus; ille purgatorium, ut vocant, imaginum & Sanctorum cultum, Pœnitentiæ Sacramentum, Petri primatum, aliâque id genus reiicit; hæc eadem Petri successor adstruit, auctoritate à Christo accepta, & quasi per manus tradita; cum tamen ille priuata duntaxat auctoritate nitatur, cui certè indubitata fides habenda non est; vtri, amabò, credendum? in possessione sumus; quò iurè Calvinus ex ea nos exturbat? quo nomine, qua auctoritate, quibus tabulis? Sacro textu, inquires; sed cuius est, sacrum textum interpretari, eiusdem nodos & dubia soluere, immò legitimum à spurio, Catholicum ab apocrypho discernere, nisi Ecclesiæ Romanæ? vnde, quæso, sacrum textum accepistis? quis, amabò, illius custos est? in possessione sumus; res inter nostras sacrum

textum



textum recensemus, in quas iniquè inuolastis.

IX. Quòd ad mores spectat, ego sanè contendo, nihil vnquam ab Ecclesia Romana, publica auctoritate edictum, approbatum, & omnibus fidelibus propositum fuisse, quod à recta ratione, & morum honestate alienum esset. Fateor vltro, in ordine Ecclesiastico nonnullos esse, qui eà morum sanctimonià & integritate non pollent, quam illud vitæ genus postulat; sed quid tum? quæcunque dixerint vobis, seruate & facite, at secundùm eorum opera nolite facere. An fortè maiorem Romanæ Ecclesiæ morum corruptionem exprobrabitis, quàm Synagogæ, vltimis illis temporibus, quibus tamen salus adhuc ex Iudæis erat; & super Cathedram Moysi, Scribas & Phariseos sedisse constat, & iudice Christo, eorum dictis & iudiciis standum? Itaque vt singulorum sacerdotum mores non probo, nempe homines sunt, peccatis obnoxij, ita omni asseueratione affirmo, nihil vnquam in materia fidei, & morum sancitum fuisse, quod integrum & castum non esset. Optandum quidem erat, vt omnes Ecclesiastici optimis moribus essent; & dolendum est, quòd aliqui in tam sublimi vitæ gradu adeò supini esse videantur, non tamen eorum exemplo malè agendum, nec ab Apostolico collegio discedendum, vel eo nomine, quòd vnum proditorem habuerit.

X. Iam vltima vltimi huius Dati pars ex dictis perspicuum est; quòd scilicet in Ecclesia Romana quilibet saluari queat; cùm enim vera Ecclesia sit, in ea via salutis est; nempe vbi veritas, ibi via & vita;

G

quia

quia ibi Christus est, in medio eorum, qui in eius nomine congregati sunt; Christus autem via, vita & veritas est; quisquis autem nomen Domini inuocauerit, saluus erit; inuocamus verò, quem credimus; hæc est porro vita æterna, ut in Deum & Christum credamus. Vbi ergo vera fides est, salus esse potest; fides enim viam salutis aperit & monstrat; cum igitur in Ecclesia Romana sit vera fides, in ea quoque est salutis via; via, inquam, quæ ducit ad vitam; in ea ergo saluari quilibet potest; omnes tamen non saluantur, quia multi, licet veram Christi fidem habeant, Christi tamen legibus non parent, nec eâ sunt vitæ sanctimoniâ, quam vera fides postularet. Per Ecclesiam tamen non stat, quæ optimæ parentis ad instar, rectis præceptis filios instituit, docetque, quid faciendum, quid fugiendum sit; monet, arguit, increpat, multat, & variis pœnis in officio continere procurat; at fieri non potest, quin aliqui non quidem à fide, sed ab honestis moribus deflectant, ac proinde à cælesti gloria excludantur; hoc tamen non facit, quin diuina opitulante gratia, quilibet in Ecclesia Romana saluari queat.



LIBER



## LIBER II.



**I**N hoc secundo libro nonnullas Propositiones deducimus, quæ necessariae connexionis vi, ex præmissis Datis, & quasi iactis principiis consequuntur. Et ne rem hanc in longum protrahamus, in decem Propositiones contrahimus, quibus quasi totidem gradibus, ad finem nobis propositum perueniemus, in eo scilicet positum, ut ostendamus, in Ecclesia duntaxat Romana homines saluari posse; hæc autem erit decima & vltima Propositio, quæ quia præcipuus huius operis cardo est, multis eam rationibus, ad plenissimæ probationis cumulum, demonstrabimus. Supponam autem illa omnia, quæ lib. I. discussi, & Data illa, seu principia eodem ordine & loco citabo, quo posita sunt; si quis fortè non meminerit, Datorum Indicem, quem etiam præmissi, consulat.

## PROPOSITIO PRIMA.

*Vbi error est, vera Ecclesia non est.*

I. **E**cclēsiā supremā & absolutā iudicandā res fidei potestate gaudere, superiore libro abundē ostensum est, Dato scilicet **xvii.** eam autem legitimam esse, Dato **xvi.** demonstratum fuit, ac proinde infallibilem omnisque erroris immunem: cū enim Dei nomine, qui homines per Ecclesiam regit, administretur & exerceatur, si erraret Ecclesia, quæ Dei vices agit, dum quæstiones fidei decīdit, erroris vitium ipsi Deo imputaretur. Præterea si errare posset Ecclesia, portæ inferi aduersus eam prævalerent, quod diuinæ auctoritati repugnat; Christus errores suis prædicare censeretur; nam qui vos audit, me audit; & Ecclesiam audiendam esse præcepit; quisquis enim Ecclesiam non audierit, sit tibi sicut Ethnicus & Publicanus. Petrus quoque Dominicum gregem pascere iubetur; non pasceret autem, sed interimeret, si fortē in errorem induceret; error enim, venenum, non verō cibus est; fratres quoque in fide confirmare iussus; fides autem in errorem minimē fertur, sed in veritatem diuino testimonio confirmatam: Ecclesia demum columna & firmamentum est veritatis; sed vbi error admittitur, veritas corruit.

II. Vna est etiam diuinæ fidei regula, per Datū **xii.** eaque penes Ecclesiam, vt constat, penes quam

quam est iudicandi potestas, per Dat. xvii. nec enim sacra Scriptura in decidendis fidei controuersis iudex est, per Dat. xiii. nec interior spiritus, per Dat. xiv. nec singuli fideles seorsim, in propria causa, per Dat. xv. Si autem regula fidei est penes Ecclesiam, hæc profectò errare nequit; si enim regula est, recta est; cum autem error à recta ratione ac veritate deflectat, à qua nisi deflecteret ac declinaret, error non esset. Ex his, meo iudicio, conficitur, Ecclesiam errare non posse; est enim vna, sancta & Catholica, vt ex Symbolo fidei ab ipsis adiaphoris admissio perspicuum est: Vna autem esse non potest, sine vnitatem fidei, vt suprà dictum est; nec sancta, nisi veram fidem teneat, sine qua placere Deo impossibile est; nec Catholica, sine fide vniuersali, quæ omnia vera dogmata complectatur. Si autem aliquo erroris vitio laborat, in aliquo dogmate peccat, nec in omnibus vera est; diuersa quoque fides esset; nec enim error in vnitatem fidei admitti potest; igitur nec vna, nec Catholica esset Ecclesia.

III. Omnes sancti Patres vno consensu id clamant; columna orbis est Ecclesia, ait Chrys. & fideles supra Petram fundati, vt vult Theodoret. stabiles & immobiles permanent; sed quisquis errat, labitur. Columna, inquam, Ecclesia dicitur, in qua sola, veritas stat firmata, quæ sola sustinet ædificium, vt addit Hieronymus; igitur non inclinabitur in sæculum sæculi, vt asserit Augustinus, quia prædestinata est columna & firmamentum veritatis. Et verò cum spiritum veritatis acceperit, qui omnem

veritatem docet, si aliquando erraret Ecclesia, illa  
haud dubiè veritas lateret; aliquam igitur verita-  
tem prædictus spiritus non docuisset; etsi enim ex  
parte in hac vita cognoscimus, ut ait Paulus, non  
manca tamen, sed integra veritas in parva cognitio-  
ne nobis refulsit, ut Cyrill, optimè deducit.

I V. Prætereà, si vel in vno dogmate Ecclesia er-  
rare posset, de nullo penitus certa esset; nam de  
quolibet dubium esse posset, vtrum in eo erraret.  
Nec est, quòd aliqui dicant, errare posse in iis, quæ  
in sacris paginis non continentur, nam de ipsis quo-  
que sacris codicibus dubitare posset, deque illorum  
numero; item de cuiuslibet loci vero & legitimo  
sensu. Prætereà multa sunt dogmata, non scri-  
pto, sed nudo verbo tradita, quæ, ut firmiter credat  
Ecclesia, certa sit oportet, errori se in iis obnoxiam  
non esse. Est autem vna verè aurea sacrorum dog-  
matum catena, quorum vnum vni probè cohæret,  
ut ait Nazianzenus, & si vel vnum retraxeris, ut  
rectè monet Ambrosius, retraxisti salutem tuam;  
nam etiam hæretici habere sibi Christum videntur;  
nemo enim Christi nomen negat, sed negat Chri-  
stum, qui non omnia, quæ Christi sunt, confitetur.  
Quòd demum Ecclesia eò venire non possit, ut ni-  
hil certa fide teneat, vel ex ipsis terminis patet; tunc  
enim nulla esset fides, igitur nulla Ecclesia, quæ est  
fidelium congregatio; sed Ecclesia permanebit vs-  
que ad consummationem sæculi.

V. Hæc autem Ecclesiæ infallibilitas (sic enim  
vocare liceat) ex eo præsertim ortum duxit, quòd  
spiri-

spiritu Christi, qui est veritas, ac semper eidem Ecclesie assistit, iuxta diuinam promissionem regatur; pactis verò Christum non stetisse, nefas est dicere. Immo cum Christus sit Ecclesie caput (est enim Corpus Christi Ecclesia) & cum à capite ij spiritus ortum ducant, qui reliquo corporis trunco sensus ac motus vim subministrant; quid mirum, si Ecclesia Christi spiritu & ab ipso procedente regatur, & totam vim virtutemque suam ab eo accipiat? Hinc sanè si erraret Ecclesia, Christus ipse errare diceretur; equidem singula trunci membra seorsim considerata, quatenus à capite regi se non sinunt, in errorem aliquando impingunt: sed totum corpus, id est, tota Ecclesia errare non potest, alioquin erroris vitium capiti haud abs re imputaretur.

VI. Porro quòd Christus primum Ecclesie caput extiterit, quis amabò neget? nempe ipse suam ædificauit Ecclesiam, quæ deinde ab Apostolis aucta & propagata est. Negabis fortè à Christo Ecclesiam ædificatam fuisse; igitur pactis & promissis non stetit; dixerat enim: *Et super hanc Petram ædificabo Ecclesiam meam*: sed nunquid ministros instituit, noua Sacramenta, nouum sacrificium & sacerdotium, nouum testamentum, nouas leges? nunquid nouam facultatem soluendi, ligandi, remittendi peccata, pascendique suas oues tradidit? Quid porro aliud ad fundandam & ædificandam Ecclesiam desideretur, non video; habuit autem Christum Ecclesia, secundum præsentiam carnis paucis diebus, ut ait Augustinus, & in ea versatus est; igitur Christus Ec-

eclesiam fundauit; & quidquid contra huiusmodi assertionem adduci posset, facile dilui ac dissolui potest; cum vtrò demus, eandem ab Apostolis, post Christum, auctam & amplificatam fuisse, ritibus suis instructam, leges promulgatas, Hierarchiam institutam, sacros Codices scriptos & traditos, verbum Dei explicatum, &c. Christus igitur primum caput visibile fuit; nunc autem etiam caput, sed inuisibile; *Omnibus enim diebus vobiscum sum*, inquit, *vsque ad consummationem seculi*; substituit tamen in locum suum caput visibile, Petrum scilicet, eiusque successores, suo scilicet spiritu instructos, & vicaria potestate; vnde perspicuum fit, errare non posse, alioquin, vt iam dixi, Christus errare censeretur.

VII. Itaque Ecclesia errare non potest, cum à Christo gubernetur, non modò per internam spiritum, sed per externam directionem, operâ Vicarij adhibitam; hic enim humanus est gubernandi modus, vt patet ex dictis, cum interior spiritus nostræ fidei regula esse non possit. Si autem Ecclesia errare non potest; vbi igitur error est? Ecclesia non est; quod mihi probandum erat: sit enim, si fieri potest; igitur Ecclesia erraret, quod fieri non posse hucusque luculenter ostendimus; cum sit eadem Ecclesia; alioquin destructa esset, quod promissioni Christi repugnat; nunquam enim aduersus campam inferi præualebunt. Eadem, inquam, non quidem ratione membrorum, quæ pereunt, sed ratione totius, atque adeò eiusdem formæ, quæ dat esse rei; hæc autem est fides & spiritus veritatis, qui

cam



eam regit : quemadmodum ex corpore animales innumerae partes sensim sine sensu auolant, & aliae in earum locum succedunt, hoc tamen non facit, quia idem censeatur ; ita in corpore Ecclesiae idem fieri videmus ; decedunt enim aliquae partes , aliae vero accedunt , ac proinde idem corpus manere dicendum est.

## PROPOSITIO SECVNDA.

*Vbi diuersa est fides, eadem Ecclesia non est.*

I. **H**Æc propositio citra aliam probationem facile admitti posset ; cum enim Ecclesia sit fidelium congregatio, vbi diuersa est fides, diuersos fideles esse necesse est ; nam vt fides fidelem facit , ita diuersa fides diuersum fidelem. Forma est, quæ dat esse rei, vt loquuntur Philosophi ; igitur diuersa forma diuersum esse ; fides autem forma est, quâ quis fidelis est ; diuersa igitur fides diuersum fidelem facit ; si verò diuersi fideles sunt, diuersus est fidelium cœtus ; diuersa igitur Ecclesia : hæc ratio, meo iudicio, rem conficit.

II. Non desunt alia rationum capita, quibus eadem veritas confirmatur, quæ facile ex præmissis Datis deduci queunt, quare breuitati consulens, indico potius, quàm expono. Primò quidem Ecclesia vnum corpus est, cuius fideles membra sunt, & Christus caput : si vnum corpus, igitur vna forma & anima vna ; vnitas enim totius ab anima est, igitur

vna fides, quæ hoc totum constituit. Si ergo diuersa est fides, diuersa forma est, diuersum igitur esse, & diuersum corpus, atque adeò diuersa Ecclesia: igitur vbi diuersa est fides, eadem Ecclesia non est.

III. Vnus est spiritus veritatis, vna fides, vna lex, vna religio, vt in Dato x. luculenter ostensum est, ex his autem vnitatem Ecclesiæ in Dato xi. deduximus: vt verò ex vnitatem fidei, vnitatem Ecclesiæ rectè colligitur, ita ex diuersitate fidei, diuersitas Ecclesiæ consequitur. Præterea si eadem fides non est, mutua charitas non est; consensio enim voluntatum, quam charitas conciliat, consensione animorum nititur; quisquis enim aliud ab alio sentit in re fidei, mutua charitatis vinculo cum eo coniungi non potest, quàm diu fidei & religionis discrimen intercedit; cum ipsa charitas fidei & religionis vnitatem supponat, nam per charitatem proximum diligimus in Deo, vt scilicet eadem fibulâ inter nos, & cum Deo coniuncti simus: at quisquis veram fidem non habet cum Deo, à cuius veritate dissentit, coniunctus esse non potest. Igitur si eadem fides non est, mutua charitatis nexus desideratur; sed omnium fidelium cor vnum esse oportet, animamque vnâ; si autem vnum cor non est, animamque vna, vna Ecclesia non est, vt patet.

IV. Nec est, quòd aliquis dicat, fieri posse, vt eiusdem Ecclesiæ membra in multis saltem, si non in omnibus conueniant; ac proinde diuersam eiusdem Ecclesiæ fidem esse; nam licet multa credamus, vna  
tamen

tamen & indiuidua credendi ratio est; multiplex quidem est diuinæ fidei obiectum ( sic enim vocant ) vnum tamen & singulare eiusdem fidei motiuum. Hinc quisquis vel vnum articulum sufficienter propositum credere recusat, nihil penitus credit, licet multa sibi credere videatur: cum enim omnes articuli fidei diuinâ Dei attestantis auctoritate æquè nitantur, quisquis aliqua in re eidem sese nō submittit, certè talem esse non putat, quæ ad firmum assensum moueat. Præterea si errat in vno, infidelis est; diuinam igitur fidem non habet; igitur nihil prorsus diuina fide tenere potest.

V. Deinde si diuersa fides est, cum vna duntaxat vera sit, & legitima, quidquid ab ea discrepat, integrum non est, sed spurium & vanum: vbi autem vera fides non est, vera Ecclesia esse non potest, quæ scilicet veram fidem supponit; est enim fidelium, id est, veram fidem protestantium congregatio. Igitur cum vna duntaxat vera fides sit, atque adeò vna duntaxat Ecclesia, vbi alia fides est, alia quoque Ecclesia est, id est, vbi nulla vera fides, ibi nulla vera Ecclesia. Quis enim eos, qui vera fide carent, in societatem veræ fidei admittat? quasi verò fide carere possint, qui eiusdem fidei vinculo deuincti sunt; quis hoc dicat? quis hoc capiat?

VI. Vbi ergo diuersa est fides, eadem Ecclesia non est, sed diuersa, immò nulla, vt constat ex dictis nec video, quid verius aut magis perspicuum esse possit. Hinc qui peccat in vno, factus est omnium reus; qui errat in vno, in omnibus errat; quia fidem  
dem

dem amisit, sine qua nihil, ut par est, credere potest, quod rectè Augustinus Manichæis exprobrat, qui in Evangelio, inquit, creditis, quæ vultis, & in eodem non creditis, quæ non vultis, vobis ipsis, non Evangelio creditis. Cur enim vnum, non aliud credis? an fortè vnum maiorem, quàm aliud meretur fidem? minimè verò; cum vna eadèmq; reuelantis auctoritas vtrinq; fidei robur ac firmitatem conciliet. Itaque quisquis vnum, non verò aliud credit, non Dei loquentis auctoritate, sed sua credentis libera voluntate nititur; ac sibi, non Evangelio credit: vera igitur fide non pollet, illa quippe vera est fides, quæ diuina auctoritate & veritate nititur; vbi autem nulla est fides, nulla quoque Ecclesia est.

## PROPOSITIO TERTIA.

*Protestantes & alij Sectarij ab Ecclesia Romana desciiuerunt.*

**L** Vtherus, Calvinus, Zwinglius, Bucerus aliique huiusmodi farinæ homines inficias non ibunt, quin ab Ecclesia Romana desciiuerint; immò, quod peius est, ab Ecclesiasticæ vitæ instituto; quo verò, & cuius instinctu ab eo vitæ statu discesserint, hîc profectò non est discutiendi locus; libri & auctores consulendi sunt, qui rem hanc pro dignitate copiosissimè discussæ. Præterea susceptæ huius provincie ratio non postulat, ut quemquam paulò acrius perstringam; præ-  
ter-

terquàm quòd ille agendi modus nunquam mihi omnino placuit, quo non modò aduersariorum animi ad meliorem frugem minimè reducuntur, verùm etiam magis ac magis exacerbantur.

II. Itaque illud duntaxat vnum indico, sectarios ab Ecclesia Romana descivisse; iure an iniurià, hoc loco non disputo, infrà tamen luculenter concludà; quo animo, quo fine, Deus scit. Calvinus ingenuè fatetur lib. 4. Instit. cap. 2. se ab Ecclesia Romana, excommunicationis fulmine percussus, recessisse, non tamen inuitum, quòd scilicet in ea multos abusus esse videret. Sed de his postea examinabimus, an tales sint, vt Ecclesiæ legitimæ rationem & statum è medio tollant, ac proinde sectariis iustam dederint discedendi occasionem: si enim Ecclesia Romana pristinum nomen & statum retinuit, non erat, quòd discederent ab ea salutis via; nempe vt vel ipse Calvinus testatur, lib. 4. Instit. variis locis, extra Ecclesiam salus non est; & ij sunt filij Dei, quorum Ecclesia mater est; & nisi hanc matrem habeamus, illum Patrem habituri minimè sumus.

III. Nec est, quòd dicant, se ab iis diuinæ fidei articulis non discessisse, quos minimè vitiatos, nec deprauatos Ecclesia Romana seruauit ac retinuit; seque ea duntaxat respuere, quæ vel superstitione, vel errore, vel alia quapiam labe corrupta fuerant. Sed profectò hæc ratio nulla est, vt infrà euincam; si enim Ecclesia in aliquò errat, veram fidem non retinuit, quæ vna est; igitur si eam sectarij in fidei societatem admittunt, ipsi quoque veram fidem

non tenent; si autem nulla in re penitus errat Ecclesia, illi dubio procul errant, qui nonnullos articulos reiiciunt, quos Ecclesia adstruit: sed de his infra.

## PROPOSITIO QVARTA.

*Ecclesie Romanae fides à fide Protestantium, Calvinistarum, aliorumque Sectariorum omnino differt.*

I. **D**ubium non est, quin Ecclesia Romana, in multis ad diuinam fidem pertinentibus, à Calvinistis & Protestantibus dissentiat; longum esset, illos omnes articulos recensere, qui nos inter & illos controuertuntur. In Sacramentis multa sunt controuersiarum capita; illi enim duo duntaxat admittunt, nos septem esse credimus: illi Christum in Eucharistia praesentem esse negant, nisi fortè in ipso usu; nos praesentem agnoscimus & adoramus. Illi sacras ordinationes, potestatem tum ordinis tum iurisdictionis, indulgentias, purgatorium, ut vocant, cultum imaginum, Romani Pontificis primatum ac supremam auctoritatem, aliaque id genus bene multa reiiciunt, quae nos adstruimus, ac certa fide tenemus. In re iustificationis, piorum operum usu, gratia Christi & libero arbitrio, & in multis aliis à nobis dissentiunt, quae ad diuinæ fidei dogmata pertinere constat.

II. Cum autem vna sit ac indiuidua diuinæ fidei ratio, sitque omnium reus, qui vel in vno duntaxat peccat,

peccat, fieri non potest, quin vel nos vera fide careamus, vel eadem illi careant; nam vel in prædictis erramus, aut certè ipsi errant. Si primum, illi veram, nos falsam; si alterum, illi spuriam, nos legitimam fidem habemus: quis autem non dicat, veram fidem à falsa, legitimam à spuria discrepare? Nec est, quòd aliquis dicat, leuiora quadam duntaxat esse discrimina, in quibus nos ab iis dissentimus, atque adeò in substantialibus, ut vocant, communem consensum esse. Hanc oppositionem tertio lib. ex professo refutabimus; interim dico, illa omnia capita esse substantialia, quæ ad diuinam fidem pertinent, cum fides sit sperandarum substantia rerum, & religionis fundamentum. Igitur si vel in vno tantum fidei articulo à Protestantibus dissentimus, hoc sanè sufficit, ut fides nostra ab eorum fide omnino diuersa sit.

III. Præterea illa sunt præcipua religionis nostræ mysteria, in quibus ab iis discrepamus: quidquæso augustius nostrâ Eucharistiâ, in qua præsentem Deum veremur, illi verò pedibus calcant? quid Sacramento reconciliationis frequentius? quid sacris ordinationibus ac ministeriis illustrius? quid Primatu Petri, & sanctæ Sedis fallere nesciæ auctoritate grauius? hæc sanè præcipua sunt religionis ac fidei nostræ mysteria. Omitto cultum imaginum, & beatarum mentium, Ecclesiæ Thesaurum, piaculares vitæ functorum ignes, pleraque Sacramentalia, ut lustralem aquam, sacrum Chrisma, palmas, cineres, cereos, aliâque huiusmodi; ritus ferè omnes,

atque

atque adeò rem sacram omnem: quo sanè fit, vt verè dicamus, fidem nobis ac illis communem non esse.

IV. Religio Romanam fidem profitentium à religione Protestantium diuersa est; licet enim eundem Deum, eundemque Christum adorent, leges tamen communes non seruant. Sacros codices agnoscunt, sed vitiatos; traditiones Ecclesiasticas reiciunt; maximam Conciliorum & sacrorum Canonum partem, constitutiones Pontificias, ius omne Canonicum, Ecclesiæ Præcepta. Quid plura? tam multa sunt ad religionem pertinentia, in quibus ab iis dissentimus, vt cùm hæc religionem constituent, diuersas religiones esse necesse sit; quod sanè tam vulgare & tritum est, vt vel in familiaribus colloquiis de iis mentio fiat, tanquam de hominibus diuersam religionem profitentibus. Si autem eadem religio non est, eadem fides esse nequit, quæ est forma & anima quædam religionis, vt constat ex dictis; nam vbi diuersum esse, ibi diuersa forma est, quæ dat esse rei; igitur cùm diuersa sit religio, diuersa quoque est fides.

V. Deinde Protestantes ab Ecclesia Romana descuerunt, vt constat ex Prop. III. diuersa igitur est Romanorum & Protestantium Ecclesia; si enim eadem esset, dici profectò non posset, eos ab Ecclesia Romana desciuisse ac discessisse. Sed vbi diuersa est Ecclesia, diuersa est fides; nam Ecclesia est congregatio fidelium, eandem Christi fidem profitentium, &c. igitur si diuersa est congregatio, diuersam fidem



fidem profitentium, diuersa est Ecclesia; igitur diuersa fides; quæ sanè si eadem esset, eadem ratio fidelium esse censeretur, eadem igitur Ecclesia. Vno verbo cum ex secunda Prop. perspicuum sit, eandem Ecclesiam non esse, vbi diuersa est fides, inde necessariæ consequutionis vi deducitur, diuersam quoque fidem esse, vbi Ecclesia diuersa est, cum scilicet vtrumque æquè pateat.

VI. Deniq; ibi tantum est vera fides, vbi est certa regula fidei, vt constat ex datis; nec alibi reperitur, quam in Ecclesia, vt ex iisdem manifestum est; igitur in Ecclesia vera duntaxat est fides, in ea scilicet Ecclesia, penes quam est vera fidei regula, id est, suprema & absoluta potestas definiendi res fidei, ac de iis iudicandi: quam sanè potestatem Ecclesia Protestantium sibi non potest arrogare; secus tamen Ecclesia Romana. Præterea apud vtramque nō est vera fidei regula; hæc enim vnica est, per Dat. XII. quod autem eadem vtrique non competat, perspicuum est, cum diuersi vtrinque sint articuli, & ab alia adstruuntur; sed eadem regula diuersa non adstruit; igitur apud vtramque non est vera fidei regula; igitur apud alteram duntaxat; igitur apud alteram vera est duntaxat fides; igitur Ecclesiæ Romanæ fides à Protestantium fide omnino differt, quod demonstrandum suscepam.

## PROPOSITIO QUINTA.

*Ecclesia Romana fidem, & dogmata non mutat.*

I. **Q**uisquis oppositum assereret, hoc ipsum eidem probandum incumberet; idem enim fidei Symbolum semper habuimus; eadem Sacramenta adhibuimus, idem visibile caput agnouimus. Negas fortè; sed ut dictis facias fidem; appellandus esset aliquis ex iis, qui Romanam fidem professi sunt, qui aliquod diuinæ fidei dogma tenuerit; quod his temporibus Ecclesia Romana reiiciat. Fateor, multa esse, quæ iam explicatiora & planiora sunt, præmissis tot Oecumenicorum Conciliorum Canonibus, tot summorum Pontificum constitutionibus, tot eximiorum Doctorum lucubrationibus; Corpus Ecclesiæ mysticum per varios ætatum gradus perficitur; ut enim Christus proficiebat ætate & sapientiâ, ita Ecclesia Christi sponsa, quæ paruula erat initio, utpote cui vbera nondumurgerent; exin, labentibus annis, adoleuit. Equamquam aliquid luti limbus vestis collegit, quid enim aliud in hoc rerum statu, & mundanis sordibus, expectandum erat? longè tamen vegetior & robustior euasit, multiplici accessione aucta. Illa ergo fidem nō mutauit, sed illustrauit, integros seruauit mores, publica scilicet & Apostolica auctoritate confirmatos, sacrorum rituum substantiam retinuit, modum in nonnullis mutauit, ut in Sacramentorum  
 usu;

Vsu; noua quædam præcepta imposuit, pro diuerso temporum usu, alia verò aboleuit, cum præsens rerum status ita fieri postularet: vno verbo, in iis, quæ ad fidem, & ad mores publica auctoritate confirmatos pertinent, contendo, Romanam Ecclesiam non mutasse.

II. Si enim vera est Ecclesia, per Dat. xviii. atq; in ea quilibet saluari potest, fieri nequit, vt fidẽ mutarit; alioquin demus, mutarit, veram igitur fidem non retinuit; sed si vera fides non est, vera Ecclesia esse non potest, vt patet ex dictis; igitur si vera est Ecclesia, fidem integrã seruauit; igitur fidei dogmata minimẽ mutauit. Præterea cum quilibet in Ecclesia Romana saluari possit, veram ibi fidem seruari, manifestum est; nempe sine fide, scilicet vera & legitima, impossibile est Deo placere; cum igitur eandem, à Christo scilicet & Apostolis sibi traditam fidem retinuerit, illam haud dubiẽ non mutauit, immò nec mutare potuit, ne portæ inferi aduersus eam præualerent, ne Petrus eiusque successores Romani Pontifices erroris veneno Dominicum Gregem inficerent, cum tamen sanæ doctrinæ lacte pascere teneantur: sed de his iam suprà fusè actum est.

III. Romanum Episcopum Christi Vicarium esse quis neget? fortè negabis de Petro? cui Christus Claues Regni cælorum promisit, ac deinde promissis stetit, cuius fidei & curæ iterum ac tertio gregem suum ex ouibus & agnis compositum commisit; in quo demum immobile Ecclesiæ suæ fundamentum constituerat, collata scilicet eidem suprema & in-

fallibili auctoritate ligandi, soluendi, iudicandi, ac res fidei definiendi, &c. Si verò Petrus Christi Vicarius est, igitur & Romani Pontifices, qui Petro deinde in officio successerunt. Vt igitur Christus fidem non mutat, ita nec eius Vicarij fidem mutant; alioquin ipse Christus fidem mutare, ac proinde errare diceretur; præsertim cum Christi vices agant, eiusque nomine & auctoritate, quid in re fidei & morum tenendum sit, assistente Spiritu sancto, pronuntient.

IV. Si autem Romanus Pontifex fidem non mutat, Ecclesia Romana fidem mutare non potest, cum sit os & caput Romanæ Ecclesiæ, quæ stat stetitque hæcenus eius oraculis, stabitque in posterum; nec enim Petri, eiusque successorum fides vnquam deficiet; deficeret autem, si mutari posset. Singulares quidem, & vt priuati hominis, lapsus agnoscimus; nec enim inter Romanos Pontifices defuere, quorum mores, & fortè intima animi sensa cum supremi huius gradus dignitate & sanctitate minimè consentirent: sed quid tum? Christus priuatis hominibus nunquam hoc promisit, vt illustres sanctimonia essent; promisit tamen spiritum veritatis, cuius ductu, nullum vnquam falsum dogma, nec prauos mores toti Ecclesiæ proponerent. Igitur Romana Ecclesia fidem non mutat, cum Romani Pontifices, cuius est fidei dogmata definire, & tradere, fides non deficiat; eadem enim est Petri & Ecclesiæ, id est, capitis & reliqui corporis fides.

V. Quodd verò non solum Petro hæc constantia fidei, oratione Christi, qui Patrem rogauit,

vt fides Petri non deficeret, impetrata fuerit, verum etiam eiusdem Petri successoribus, vel inde constat, quod iidem, etiam antiquissimi, vt Lucius, epist. ad Episcopos Gallia, Marcus epist. ad Athanas. Felix I. Epist. 3. ad Benignum, Agatho Epist. ad Constant. Nicolaus I. Epist. ad Michaëlem, Leo passim, omitto alios recentiores, eadem Christi verba usurpant, vt probarent, sanctam Sedem normam Apostolicæ fidei esse; sed Apostolica fides nutare non potest; igitur nec fides Ecclesiæ Romanæ: tu vide sis apud Auctores innumera Patrum testimonia, quibus hæc fidei constantia euincitur.

VI. Quod autem sectarij opponere solent, nonnullos ex Romanis Pontificibus à recta fide descivisse, & in hæresim lapsos esse; esto, non disputo; nempe inter Catholicos controuertitur, & adhuc sub Iudice lis est; hoc fuit vitium credentis, vt persona priuata est, non error docentis, vt publica. Nihil autem afferri potest, nullum scilicet dogma à Romano Pontifice definitum, & toti Ecclesiæ propositum, siue ad fidem, siue ad mores pertineat, quod cum veritate non consentiat. Nonnulli fortè falsis priuatis quibusdam opinionibus adhæserunt, vel iis rationibus sua dogmata confirmarunt, quæ omnis erroris expertes non extiterunt; esto, id vltro damus; quis enim neget, homines esse priuatis erroribus obnoxios, vbi scilicet secundum humanam rationem loquuntur; at quotiescunque loquuntur ex Petri Sede, vt Christi Vicarij, ac de plena supremi

huius officij auctoritate; in eo munere neque falli, neque fallere possunt.

VII. Hinc reiicies sectarios, qui ab Ecclesia Romana descuerunt, propter inductos abusus; à quo tempore? sunt, qui à quingentis annis, alij ab octingentis, alij à mille ducentis, aut trecentis inductos esse velint. Sed an fortè in fidei dogmatis? vel vnum exhibe: statim ad controuersa capita confugies; ad præsentiam Corporis Christi in Eucharistia, ad potestatem clauium, ad primatum Petri, ad thesaurum Ecclesiæ, ad suffragia pro vitâ functis, &c. Sed in his Ecclesia Romana non mutauit; tu ipse abhinc annis mutasti. Mutasse, ais; pernego: quo tandem iudice standum? In Ecclesia duntaxat est potestas iudicandi, per Dat. xvii. & Romanam Ecclesiam, per xviii. igitur penes Romanam Ecclesiam potestas iudicandi est, & fidei controuersias definiendi. Hæc porro nullam mutationem in dogmatis agnoscit, aut permittit; sed novos articulos fidei condit: nouas certè reuelationes non admittit; ad publicam scilicet fidem; sed antiquas explanat, explicat, declarat, quod certè illius muneris est. Ad mores fortè venies; priuata Romanorum delicta non excuso; homines sumus; contendo tamen, nihil vnquam in genere honesti à Romanicis oraculis definitum aut declaratum fuisse, quod re ipsa honestum non fuerit; facta nihil moror, immò ne priuatas quidem sententias, quas iniquas fuisse, fortè aliqui iure queruntur. Nec dubito, quin aliquando in materia facti peccari possit; at verò in

ma-

materia fidei, vel morum, nihil vnquam toti Ecclesiæ à Romano Pontifice, vel Concilio Oecumenico & legitimo propositum fuit, quod vel falsum, vel turpe censi posset.

VIII. Ad id porro, quod dicunt, in Ecclesia Romana ad quingentesimum Christi annum fidem integram & puram mansisse; postea verò, admixtis erroribus, fuisse vitiatam, facile diffilari potest; nam per quingentos illos annos fidem puram seruauit, ex Priuilegio Christi, Petro polliciti, nunquam fore, vt eius fides deficeret, quod sanè quingentorū annorum periodo minimè comprehenditur, aut limitatur, sed ad consummationem vsque sæculi extenditur. Quod si dicas, primis illis quingentis annis, non errasse quidem, fuisse tamen errori obnoxiam; igitur quidquid ab ea toto illo tempore definitum est, sub fidem non cadit; quī enim scis falsum nō esse, cū error subesse potuerit? hinc quatuor prima Concilia concidere, necesse est; hinc vana Christi promissio; hinc spiritus veritatis toties promissus nunquam missus; hinc portæ inferi aduersus Ecclesiam præuallentes: omitto alia: ferè innumera, hæc enim sufficere videntur.

## PROPOSITIO, SEXTA.

*Ecclesia Romana errare non potest.*

I. **H**Æc Propositio ex dictis necessariæ consequentionis vi deducitur : si enim Ecclesia est, eaque vera, per Datum XVII. & cum error esse non possit, ubi vera est Ecclesia, per Propos. I. inde sanè perspicuum fit, Ecclesiam Romanam errori obnoxiam non esse. Hoc ratiocinium ita rem conficit, ut omnem dubitationi locum vel aditum intercludat; si enim Ecclesia Romana vera est Ecclesia, ut loco citato probauimus; nempe cum aliqua sit à Christo instituta, ab Apostolis propagata, ad consummationem usque sæculi permansura, eaque Petri curæ ac fidei commissa, ut constat; cui enim Apostolorum dixit : *Pasce agnos meos, pasce oues meas?* cui clauis regni cælorum promisit & tradidit? pro quo orauit, ne fides eius deficeret? in quo Ecclesiæ suæ fundamentum constituit? cui demum fratres in fide confirmandos reliquit & commendauit? Si autem Petrus est Ecclesiæ Romanæ Pastor & Caput, haud dubiè illa est Ecclesia Romana, quam Christus Petro regendam commisit; Petro, inquam, eiusque successoribus; illa enim ad finem usque temporum durare debet, alioquin Christus promissis non staret. Si ergo Romana Ecclesia aliquando vera Ecclesia fuit, eandem semper esse, necesse est: at ubi error est, Ecclesia vera non est; ubi igitur Ecclesia ve-



ra est, error esse non potest. Romana vera est, ut  
euici, Romana igitur Ecclesia errare non potest.

II. Præterea Ecclesia Romana fidem & dogmata  
non mutat, per Prop. v. si fidem non mutat, errare  
non potest; inde quippe erraret, quod vel articu-  
lum falsum crederet, vel reuelatum & verum reiici-  
ceret. Sed cum ab initio fidem puram habuerit, ut  
omnes fatentur, si deinde aliquem articulum re-  
iecit, quem prius credebat, vel nouum credidit,  
à Christo, vel Apostolis sibi non creditum, fidem  
haud dubie mutauit. Igitur cum fidem non muta-  
uerit, nec mutare potuerit, nec vllum articulum ve-  
rum reiicit, nec vllum falsum adstruit; igitur erro-  
ri obnoxia non est, alioquin fidem mutaret, cum  
error circa fidem sit; ubi autem vera fides est, error  
esse non potest.

III. Deinde nisi Ecclesia Romana erroris omnis  
expers esset, frustra sedes Petri ab omnibus Christia-  
nis consuleretur in controuersis fidei; frustra Cy-  
prianus in Epistolis ad Cornelium & Lucium, Au-  
gustinus, alique Patres eius responsa postularent;  
frustra reliqui omnes, qui hactenus bene senserunt,  
Romanum adirent oraculum, ut controuersias fidei  
terminaret. Recens ob oculos exemplum versatur,  
nam centum ferè Galliarum Episcopi Innocentium  
X. consuluerunt de quinque propositionibus, ex  
Cornelio Iansenio Iprensi Episcopo excerptis; cum  
enim illa disceptatio Catholicos in varias distrahe-  
ret partes, & res tum fidei, tum charitatis in graue  
discrimen adducta esse videretur, optimi Præsules,

ut gregis sibi crediti salutis & incolumitati consulere-  
rent, nihil antiquius habuerunt, quàm exemplo  
Prædecessorum suorum, sanctam Petri sedem adire,  
cuius quot rescripta, tot oracula. Quis autem sibi  
in animum inducat, ut credat, Ecclesiam Roma-  
nam errare posse, quam tot ac tanti doctrinâ &  
sanctimoniâ illustres viri, ne ipsi errarent, toties  
consuluerunt?

IV. Cuius sanè rei plenissimam faciunt fidei  
Romanorum Pontificum decretales, in quibus sta-  
tuitur, quid tenendum sit in re fidei, morum, ri-  
tuum, disciplinæ Ecclesiasticæ: hic enim fuit o-  
mnium sæculorum mos atque usus, ut omnes  
Christiani orbis provinciæ sedem Apostolicam, in  
dubiis ad Christianam rem pertinentibus, consule-  
rent. Res autem Christiana fidei dogmata, mores,  
ritus, disciplinam Ecclesiasticam complectitur; vn-  
de ni fallor, rectè concludo, persuasum omnibus  
fuisse, & communi approbatione & traditione  
receptum, sanctam Petri sedem erroris immunem  
esse, nisi enim hac prærogatiuâ polleat, non video,  
cur præ aliis consulenda sit. Sed frustra in his diu-  
tius hæreo, cum ex dictis perspicuum sit, Ecclesiam

Romanam errori obnoxiam non esse; quare

ad aliam Propositionem, cum hæc  
confecta sit, gradum  
facio.

PRO-

PROPOSITIO SEPTIMA.

*Vna Ecclesia Romana vera & legitima duntaxat est Ecclesia.*

I. **Q**uod sit vera Ecclesia, ex Dato XVIII. perspicuum est; quod illa duntaxat vera sit & legitima, ac proinde nulla alia pro legitima habenda, probandum nobis incumbit; quod certè facile præstabimus: nam illa vera duntaxat Ecclesia est, quæ Catholicam fidem seruat; nempe fides Catholica & Ecclesia Catholica ita inter se connexæ sunt, ut neutra sine altera esse queat; cum & Catholica fides penes Ecclesiam Catholicam sit, & Ecclesia Catholica fidem Catholicam retineat. Ecclesiam autem Christi Catholicam esse, nemo Catholicus, nemo hæreticus nescit, quod vel ex Apostolico Symbolo habemus, quod sanctam Ecclesiam Catholicam nobis credendam proponit, fidei autem Catholicæ Symbolum Athanasij meminit.

II. Ecclesia Romana fidem Catholicam retinuit, fidem enim non mutauit per Prop. v. igitur eandem, quam Christus initio tradidit, etiamnum habet: sed fides à Christo tradita, vera est & Catholica, quod nemo negat; igitur fides Ecclesiæ Romanæ vera & Catholica est. Aliæ verò sectæ ab Ecclesia Romana descuerunt per Propos. I I I. ideo porro descuerunt, quia fidei dogmata mutarunt; fides enim Protestantium & aliarum sectarum, à fide Ecclesiæ Romanæ differt per Prop. I V. Vbi autem diuersa

uerſa fides, Eccleſia diuerſa eſt, per Prop. II. Igitur  
ut fides Proteſtantium Catholica non eſt, differe  
enim à fide Eccleſiæ Romanæ, ita nec eorum Eccle-  
ſia Catholica eſt; igitur vera & legitima non eſt,  
quòd certè Eccleſiæ Romanæ duntaxat competit.

III. Præterea vna eſt duntaxat vera Eccleſia, per  
Datum x. ſed Eccleſia Romana vera eſt Eccleſia,  
per Datum xviii. ſola igitur Romana vera & legi-  
tima Eccleſia eſt. Hoc ſanè ratiocinium rem peni-  
tus conficit; quid enim ultra deſiderares? Nec eſt,  
quòd dicas, proteſtantes in ſocietatem eiufdem  
Eccleſiæ admittendos eſſe; nam ipſi ab ea deſciue-  
runt, & viſibili eiufdem capiti ſubdixerunt ſeſe,  
ne ſcilicet illius imperio ſubiectione eſſent; igitur e-  
iuſdem Eccleſiæ communionem minimè gaudent,  
præſertim cum illorum fides à Romana fide pluri-  
mum diſſentiat, per Prop. iv. & ubi diuerſa eſt fides,  
eadem Eccleſia eſſe non poſſit, per Prop. ii.

IV. Illa duntaxat Eccleſia vera eſt, in qua error  
non eſt; ubi enim error eſt, Eccleſia non eſt, vera  
ſcilicet & legitima, per Prop. i. Romana autem er-  
rare non poteſt, per Prop. vi. illa igitur Eccleſia ve-  
ra eſt. At verò aliæ omnes multis erroribus obno-  
xiæ ſunt; cum enim diuerſam & oppoſitam fidem  
habeant, per Prop. iv. & nihil veræ & Catholi-  
cæ fidei, præter errorem, opponatur, noſtra autem  
fides Catholica ſit, per Prop. v. & vi. ex his neces-  
ſariò deducitur, alias omnes Eccleſias multis errori-  
bus ſimplicitas & irretitas eſſe, ac Eccleſiam Roma-  
nam veram & legitimam duntaxat Eccleſiam eſſe.

V, Illa

V. Illa demum est vera & legitima Ecclesia, in qua veræ Ecclesiæ notæ manifestæ sunt, quas cum in Romana duntaxat esse constet, hanc veram duntaxat Ecclesiam esse, manifestum est. Et verò inter illas notas, duæ sunt præcipuæ, vnitas scilicet & infallibilitas; prima illa rem euincit; cum enim vna solummodò esse possit, & cum Romana vera sit, ut suprà probatum est, Romanam duntaxat veram esse, necessaria consequutione concludo. Quis autem non capiat huiusmodi ratiocinij vim? Vna est duntaxat vera Ecclesia; igitur præter illam, quæ vera est, nulla est: sed Romana vera est; igitur præter Romanam, alia non est.

VI. Altera veræ Ecclesiæ nota est infallibilitas, quâ Romana pollet Ecclesia, per Prop. vi. quam certè sectarij arrogare sibi non possunt; nam Petro duntaxat promissa est; *quidquid enim solueris, aut ligaueris, soluium aut ligatum erit, & tibi dabo clauēs Regni calorum.* Clauis autem potestatem designat, definiendi controuersias fidei; nec Petri fides, pro qua Dominus rogauit, vnquam deficiet, super quam Ecclesia ædificata est, ac proinde portæ inferi aduersùs eam immobili fundamento nixam non præualebunt; hinc oues & agnos Dominici Gregis, fideles scilicet omnes pascere Petrus iubetur. Infallibilitas igitur promissa fuit visibili Ecclesiæ Romanæ capiti, eiusdemque successoribus; at Protestantes prædicta infallibilitate non gaudent; quo enim iure? non successionis, ut patet, cum Petro minimè succedant, sed ab eo potiùs descie-

rint;

fint; nullus autem alius titulus excogitari potest: igitur cum præfata infallibilitas Ecclesiæ veræ nota sit, eaque Ecclesia Romana solâ gaudeat, quid mirum, si hæc duntaxat vera sit Ecclesia.

VII. Alias notas ômitto, vt breuitati consulam, cum expositæ sufficere videantur; plures tamen alia adduci possent; nempe Ecclesia vera, est visibilis, sancta, Catholica, Apostolica, sponsa Christi, Domus Dei, columna & firmamentum veritatis, vnius & constantis fidei, pro qua tot ac tanti doctores scripserunt, quàmque tot pugiles martyrio coronati, sua morte confirmarunt. Quòd autem Ecclesia Protestantium, vel reformationum nec vna, nec sancta, nec Catholica, nec Apostolica, nec Christi sponsa, nec Domus Dei, nec firmamentum veritatis dici possit, sed dissentiat ab antiquorum Patrum doctrina, nec fidem constantem habeat, patet ex dictis; præterquàm quòd iam alij demonstrarunt, præsertim Becanus Tom. 5. opusc. 6. quæst. 3. tu vide sis.

## PROPOSITIO OCTAVA.

*Ecclesia Romana fidem à Christo traditam  
sola retinuit.*

I. Cùm enim fidem non mutarit, per Prop. v. eandem haud dubiè retinuit, quam scilicet à Christo Domino, & Apostolis sibi traditam initio accepit; neque hæc Propositio vberiore aut pleniori probatione indiget, cum ex quinta,

ta, necessaria consequutione deducatur; nempe si fidem initio à Christo accepit, quod nemo negat; Christus enim Ecclesiam instituit; suis legibus instruxit, ac diuinæ fidei lumine illustrauit; est autem fides prima huius mystici corporis forma, vel anima, cuius communi quasi vinculo diuersa membra in vnum corpus coalescunt: dixi primam formam; nam charitas est ad instar vltimæ formæ, perfectioris scilicet, vel supremæ coronidis loco. Si ergo Ecclesia fidem à Christo accepit, illamque deinde non mutauit; inde profectò retinuisse, perspicuè concludo.

II. Porro inductione facta, populari scilicet argumentationis genere, hoc ipsum euinci potest: Omnes articulos Symboli semper tenuit, quod aduersarij vtrò fatentur; item primatum Petri & supremam eamque infallibilem, circa rem fidei & morum, auctoritatem; quod certè huius loci probare non est, ne iam actum agam: innumera huius veritatis testimonia inuenies apud illos auctores, qui de hac controuersia scripserunt, præsertim apud Bellarminum & Suarez. Quod pertinet ad ea, quæ in Tridentino declarata sunt, & definita circa Iustificationem Sacramenta, peccatum originale, liberum arbitrium, diuinam gratiam, cultum imaginum, indulgentias, purgatorium, cuncta hæc diligenter discussa fuerunt tum ab iis, qui præfato concilio interfuerunt, tum ab ipsis controuersiarum Scriptoris; adductis scilicet innumeris Patrum testimoniis, tu vide sis.

III. Præ-

III. Præterea iure possessionis Ecclesia Romana gaudet. Dicis fortè, pristinam fidem apud illam non esse; hoc dicis, hoc proba: nego enim ab ea quidquam olim creditum fuisse, quod modò ab eadem non credatur; profer enim, sodes, quid tandem illud sit, nempe diuinare non possum. Dices fortè, novos articulos Romanæ fidei accessisse, qui cùm erronei sint, pristinam fidem vitiant: aueo scire, quidnam illud sit; appellabis fortè præsentem Christum in Eucharistiæ Sacramento, imaginum cultum, purgatorium, indulgentias, Sanctorum intercessionem; rectè, cuncta hæc tenet Ecclesia Romana; at semper tenuisse, contendo; nec quisquam est, qui contrarium euincere queat. Non diffiteor quidem, nonnulla esse hisce temporibus magis expressa & explanata, quæ ad mysteria nostra pertinent, vt iam suprâ indicaui, corpus enim Ecclesiæ dum adolescit, perficitur quoque huius corporis anima; id tamen vnum verissimum esse contendo, nihil à Romanis modò certa ac diuina fide teneri, quod antiqui saltem tacitè & implicite, vt aiunt, non crederent.

IV. Nonnulla fortè ad ritus pertinent; de quibus Prop. sequenti acturus sum: cùm autem supremam sanctæ Sedis auctoritatem omnis ætas diuina fide tenuerit, non video, cur novas leges condere, pœnas statuere, ritus sacros, saltem in accidentalibus, vt aiunt, mutare non possit: sed de his infrâ. Cæterùm Ecclesia novos fidei articulos non condit; declarat tamen, nonnulla esse diuina fide tenenda, quæ propter obscuritatem, ante declarationem, di-

uina



una fide tenere fideles minimè tenebantur. Sic lex ante promulgationem non obligat, nec diuina reuelatio, antequam ab Ecclesia nobis proponatur; non quòd Ecclesia reuelatum esse faciat, quòd reuelatum non fuit, sed quòd diuini spiritus ductu, reuelatum esse cognoscat, ac credendum fidelibus proponat, quod reipsa reuelatum fuit; id enim munus Ecclesiæ incumbit, discernere, quod reuelatum est, ac fidelibus credendum proponere, ut patet ex dictis.

## PROPOSITIO NONA.

*In Ecclesia Romana vera morum Regula, verique religionis ritus seruantur.*

I. **I**N hac præsertim scena nouatores tragica sua nobis occinunt, exprobrantque Romanæ Ecclesiæ corruptos mores, inductos abusus, & sacrilegos aut supersticiosos ritus accersitos. Hic Romam ut celebrem Babylonem, & famosam meretricem, Romanum verò Pontificem ut Antichristum traducunt; vno verbo, in sancta & intaminata maculam agnoscunt, in religiosa superstitionem arguunt. Sed hi toto cælo errant; ut enim in rebus fidei, ita in moribus & sacris ritibus Ecclesia errare non potest, quod sanè luculenter demonstro-

II. Cùm homines, ad obtinendam salutem, hæc duo potissimum præstare iubeantur, quorum alterum ad sinceram fidem, alterum ad rectam opera-

tionem pertinet; nempe & rectè credere, & rectè agere debemus: vtrumque sanè suâ regulâ indiget, quæ reuerà si absit, vt per errorem falsa credere, ita per ignorantiam malè agere possumus. Et vt in controuersis fidei certus iudex institutus est, qui verum à falso discernat; ita & in controuersis morum, qui bonum à malo, honestum à turpi distinguat. Si enim vel vterque, vel alteruter desideretur, Christus haud dubiè fidelibus suis malè consultum esse voluit, quod dici non potest, vtpote qui Ecclesiam suam iis omnibus instructam reliquit, quæ necessaria videbantur.

III. Non minùs necessarium est, scire, quid agere, quàm quid credere debeas, vt perspicuum est; nec tantùm de fide, verùm etiam de moribus rationem redditurus: Christus enim exigit à te, non modò quid credideris, verùm etiam quid egeris. Vt autem rectè agas, certus esse debes, quid rectè fieri possit, vt certus es, quid rectè credas; alioquin in maximo tuæ salutis periculo versaris, quam haud dubiè per fidem duntaxat consequi non vales, nisi bonæ operationis accessio fiat. Certò igitur scire debes, quid sit rectè operari, ne malum pro bono, turpe pro honesto accipias; quod vt certò scias, certa regula necessaria est, quam adhibeas.

IV. Hac autem si Ecclesia careret, portæ inferi aduersùs eam præualerent, quod diuini oraculi veritas minimè permittit: quid enim, quæso, est, portas inferi aduersùs eam præualere, nisi in id discriminis adduci, vt Christi oues in cōmunem ruinam

ab ipsis Pastoribus trahantur, siue doctrinam erroneam docendo, siue prauos & corruptos mores insinuando; hoc enim à pastore oues expectant, doceri scilicet, quid credere & agere debeant; ut autem vera credere, ita bona pariter agere debent: igitur Ecclesia utrâque regulâ instructa est, quâ & verum à falso, & bonum à malo distinguat.

V. Dicam ampliùs, regulam morum ad fidei regulam referri; ubi enim Ecclesia aliquid faciendum præscribit, ad salutem æternam conducent, v.g. ieiunandum, decimas soluendas, Sanctorum cultum, Sacramentorum vsum, opera charitatis; haud dubiè, saltem tacitè docet, hæc bona esse & rectè facta; hæc enim duntaxat ad finem supernaturalem conducunt; nempe ad bonum finem obtinendum, malum medium adhiberi non debet. Itaque cum Ecclesia aliquid imperat, ut honestum, & ad finem supernaturalem conducent, illud haud dubiè ut bonum approbat: igitur si malum esse accideret, malum approbaret & vellet; quod certè vel ut tale cognosceret, quod dici non potest; cum enim nomine Christi, gregem Dominicum regat, illud ipsum censetur approbare & velle, quod vult & approbat Ecclesia; at Christus malum nec vult nec approbat.

VI. Præterea non pasceret gregem, sed mactaret; nempe in errorem induceret; erratur enim, si malum boni nomine admittatur, qui maximus & grauissimus error est, cum in re practica consistat. Si verò Ecclesia id per errorem fidelibus faciendum

iniungit, quod honestum non sit, errat haud dubiè, idque duplici nomine, fidei scilicet & morum; hinc error longè perniciosior esset, vtpote qui non modò intellectum deprauaret, verùm etiam voluntatem ipsam vitaret. Nec est, quòd aliqui dicant, multas esse leges Ecclesiasticas, quæ cum bonis moribus minùs consentiunt; hoc enim eadem facilitate refellitur, quâ adstruitur: nempe de iis loquor, quæ ab Ecclesia Romana omnibus Christi fidelibus proponuntur, v. g. de ieiunio, Sanctorum cultu, festorum obseruatione, communionis Paschalis præcepto, aliisque huiusmodi, quæ haud dubiè honesta sunt, & ad finem à Christo nobis propositum mirabiliter conducunt. Nec obstat, finem legislatoris Vicarij sinistrum aliquando esse; quis enim neget, supremum etiam Pontificem peccatis esse obnoxium; nego tamen legem ab eo latam, & omnibus Christi fidelibus propositam iniquam esse.

VII. Quod pertinet ad sacros ritus, non nego, aliquos fuisse mutatos, pro diuersa temporum ratione; cùm enim illorum vsus Ecclesiæ liber relictus sit, non video, cur diuersos diuersis temporibus præscribere nequeat. Nempe dum maneat integra diuinarum, quas Christus nobis reliquit, institutionum substantia, quidni exterius quasi indumentum, prout ratio postulat, aliquando mutetur? Vnum tamen assero, nullum esse ritum ab Ecclesia Romana toti Ecclesiæ præscriptum, qui cum recta ratione non consentiat. Scio, nonnullas superstitiones à nonnullis imprudenter induci, captata scilicet

licet ab aliquo sacro ritu occasione; scio, nonnulla per simplicitatem admisceri, quæ aliqua emendatione indigerent; sed aliquid simplicium pietatē indulgendum; præterquàm quòd id sacris ritibus tribuendum non est, quod ab imprudentia & simplicitate nonnullorum profectum est. Non hæreo in discussione singulorum, quod certè huius mei instituti ratio minimè postulat, sed id vnum assero, nullum esse, modò rectè administretur, qui ad religionem, Deique cultum non inducat: sed viderint sectarij, ne vitium administri ad res ipsas sacras, quas ille administrat, traducant.

## PROPOSITIO DECIMA.

*In Ecclesia duntaxat Romana homines  
saluari possunt.*

- I. **C**ùm hæc Propositio sit ad instar cardinis, in quo tota res ista vertitur, & quasi præcipuum huius controuersię caput; in ea demonstranda, paulò maiorem & accuratiorē diligentiam adhibebo, easque omnes rationes congeram, quibus probari & confirmari potest: quod vt distinctiùs fiat, in totidem quasi capita illas distribuam.

## RATIO PRIMA

*Ex eo ducitur, quòd sine vera fide nemo  
saluus esse possit.*

I. **A**ccedentem ad Deum credere oportet; quis autem saluari queat, nisi ad Deum accedat? nempe adhærere Deo summum bonum est, in quo felicitatem ac beatitatem nostrâ positam habemus. Præterea sine fide, ut Deo placeamus, fieri non potest, eaque verâ & legitimâ; quisquis autem Deo non placet, saluari nequit; salus enim nostra diuinâ misericordiâ, Deique erga nos amore nititur; at quisquis Deo displicet, ab eo amari non potest. Denique credentes duntaxat salui fiunt; & hæc est vita æterna, ut Deum & Christum per fidem agnoscant; igitur sine diuinæ fidei subsidio, nemo, qui iam adultus sit, saluari potest; nempe de adultis sermonem institui.

II. Cùm igitur Ecclesia Romana fidem à Christo traditam, & ab Apostolis promulgatam sola retinuerit, per prop. VIII. nec enim fidem, seu dogmata vnquam mutauit, per Prop. V. ij duntaxat veram fidem habent, qui in gremio Romanæ Ecclesiæ viuunt, ac proinde illi duntaxat saluari queunt; alioquin sine vera fide homo saluari posset, quod dici nequit. Et verò hæc ratiocinij forma rem hanc penitus euincit: Ibi tantum homo saluari potest, ubi vera est fides; in Ecclesia Romana duntaxat vera est fides; in Ecclesia igitur Romana homo duntaxat saluari

saluari potest. Prima Propositio certa fide tenenda est; altera ex præmissis probatur per Prop. v. & viii. ex his complexio necessaria consequutione deducitur.

III. Cur autem Deus statuerit, fidem & salutem necessariam esse, licet nostri huius instituti indagare non sit, facere tamen non possum, quin dicam, Deum ita nobis æternam beatitudinem proponere, ut mercedis ac præmij loco sit; præmium autem præuium meritum supponit, hoc vero cultum Dei, obsequium, officium, opus demum, ut aiunt, meritorium. Porro Deus nec coli, nec amari potest, nec quopiam illum officio, vel obsequio nobis demereri possumus, nisi infinitam illius bonitatem, sapientiam, dignitatem, aliáque diuina eius attributa cognoscamus, idque duntaxat per fidem, cuius lumine instructa mens, ab iis erroribus liberatur, quibus alioquin, si vni duntaxat naturæ lumini crederet, subiecta & obnoxia esset.

IV. Hinc fides principium meriti esse dicitur; non quòd sola fides hominem iustum efficiat; quis enim neget, peccantem adhuc credere? sed quòd eximium illud iustificationis opus, à fide ortum & initium ducat. Primo enim loco, de Deo, quòd sit, & quid sit, credere debemus, antequam in eum speremus, illumque timeamus, colamus, amemus, nosque illarum noxarum poeniteat, quibus infinitam eiusdem bonitatem offendimus. Fidem igitur, seu voluntatem credendi primæ dispositionis loco adhibeamus, diuinæ scilicet gratiæ subsidio instru-

eti & adiuti; illa enim bona voluntas, quæ prima est ad iusticiam præparatio, à diuina gratia procedit; nempe Deus hominem, non se ipsum homo discernerit, & præparat cor hominis, vt in eo charitatem per Spiritum sanctum diffundat.

V. Præterea inuitum hominem saluare Deus cum nolit, eius consensum & voluntatem expectat; illud autem quod homo nescit, velle nequit; voluntas enim non fertur in incognitum. Igitur cognoscere debet supremum rerum conditorem & moderatorem Deum, malorum punitorem, & bonorum remuneratorem; itémque seruatorem hominum Iesum Christum: cognoscere, inquam, per fidem; nec enim aliud est cognitionis genus, quod ad hunc finem conducat. Et verò quid, amabò, minus à nobis exigeret, quàm vt fidem eius dictis haberemus; fidem igitur ad salutem necessariam esse voluit, fidem, inquam, veram & legitimam; ibi ergo salus duntaxat est, vbi vera fides est; hæc autem solummodò est in Ecclesia Romana, vt patet ex dictis; igitur in illa homines saluari duntaxat possunt, quod erat probandum.

RATIO



## RATIO SECVNDA

*Ex eo ducitur, quòd una sit salutis via.*

I. **V**Na tantum est via, quæ ducit ad vitam, æta quidem, vt Christus ipse testatur, qui vt veritas est, cui fidem habere, ita & via, quam sequi, & vita, quam consequi debemus. Ille igitur saluari duntaxat potest, qui salutis viam inuit; via autem salutis est, vbi veritas est; quisquis igitur in veritate manet, in via salutis est: hinc quisquis à veritate aberrat, à via salutis declinat. Atqui Ecclesia Romana errare non potest, per Prop. vi. igitur quisquis in Ecclesia Romana manet, in via salutis est: cum verò aliæ sectæ errori obnoxie sint, immò re ipsa errent, extra salutis viam esse, necesse est; homo igitur in Ecclesia duntaxat Romana saluari potest.

II. Vt ad felicem salutis terminum homo perueniat, Christum sequatur oportet; oues enim supremi Pastoris, non modò illius audiunt vocem, verum etiam illum sequuntur; nempe Christus, vt dixi, vera via est, & quisquis Christum sequitur ducem, in via salutis est, cum ipse nostræ salutis auctor sit; atqui oues Dominici Gregis, Petri curæ commissæ sunt, atque creditæ, quas scilicet pascere, repetito iterum, atque iterum imperio, iussus est. Petrus igitur in hoc munere Christi Vicarius fuit, itémque Petri successores; nec enim post Petri mortem, oues Christi sine pastore fuerunt, qui scilicet illas pasceret, ea-

rúmque gereret curam. Igitur quisquis Petrum sequitur, Christum, cuius híc vices gerit, sequi censetur; veram igitur salutis viam iniuit: sed Petrus Ecclesiæ Romanæ caput est; igitur quisquis Ecclesiæ Romanæ membrum est, à Petro pascitur, Petrum sequitur, nec non in via salutis est.

III. Ij verò, qui ab Ecclesia Romana desciuerunt, & à Petro, eiusque successoribus non pascuntur, sunt extra salutis viam; nec enim Christum sequuntur, qui Petrum sequi non dignantur. Quisquis autem Christum non sequitur, in tenebris ambulat, & nescit, quò vadit; igitur extra viam salutis est, nec filius lucis censerì potest, sed tenebrio, Principi tenebrarum seruiens, non Christo, qui vera mundi lux est, omnem hominem illuminare paratus. Sed illum multi non receperunt, magisque tenebras dilexerunt, quàm lucem; quotquot autem illum receperunt, dedit eis potestatem, quâ filij Dei esse queant; si filij, igitur hæredes Dei, & cohæredes Christi. Christum autem recipit, qui pastores ab eo missos recipit; præsertim supremum Pastorem, eiusque Successores, Romanos igitur Pontifices. Igitur in via salutis non est, qui Petrum non recipit, sed ab Ecclesia Romana deficiit.

• IV. Salutis viam ille duntaxat docere hominem potest, qui homini salutis auctor fuit, ipsamque salutis viam iniuit primus, & aperuit. Hinc Regius vates tam enixè apud Deum instabat, vt sibi via Domini aperiretur: *Vias tuas, Domine, demonstra mihi*; aiebat ille, & *semitas tuas edoce me*; illum autem Deus docet,

docet, quem Christus docet; hic est enim dilectus filius, quem ut audiamus, æternus Pater nos monet. Porro ille Christum audit, qui Petrum eiusque Successores audit, quibus pascendi gregem Dominicum munus incumbit; quisquis enim vos audit, me audit, & qui vos spernit, me spernit. Atqui in Ecclesia Romana Petrum audimus, eius oracula excipimus, stamus dictis, & legibus obtemperamus; illum autem spernunt, qui ab Ecclesia Romana recesserunt; sunt igitur extra salutis viam, nos in ea sumus.

V. Si cæcus cæcū ducit, ambo in foueam cadunt, quod diuinæ veritatis oraculum est; in via salutis ducere opus est; ubi enim pastor desideratur, oues disperguntur; Pastoris autem munus est, regere ac ducere oues. In Ecclesia Romana ducem & pastorem habemus, quod nemo negat; in qua scilicet bonus ille Pastor, qui pro suis ouibus animam & vitam posuit, suum Vicarium reliquit atque instituit; extra illam pastores non sunt; quis enim hoc iis munus credidit? quo iure illud sibi usurparunt? qua auctoritate alios regunt? Ab iisdem ouibus eliguntur, & instituuntur: esto; in re ciuili & humana nō nego id fieri posse, at in re diuinæ fidei & salutis secus accidit; nec enim homines auctoritatem illam, erroris nesciam, conferre possunt. Quisquis ergo extra Ecclesiam Romanam, pastoris munus sibi vendicat, cæcus est, cui scilicet diuinæ veritatis, quæ fallere nesciat, radius minimè affulget; cæcus igitur cæcum ducit, ambóq; in foueam æternæ damnationis cadunt. Igitur in Ecclesia duntaxat Romana vera salutis via est, quod ostendendum suscepam.

RA.

## RATIO TERTIA

*Ex eo ducitur, quòd una tantum Christiana lex sit.*

I. **M**ultiplex legis ratio est, ut nemo nescit; vnica tamen lex Christiana & Catholica est, ut in Dato ix. à me demonstratum fuit; ut enim vnica est fides, ita vnam legem esse, necessaria consecutione deduxi. Et ut vera fides penes Ecclesiam Romanam est, ut ostendi Prop. viii. ita veram Christi legem apud eandem esse, necessariò concludo. Denique ut fidem Ecclesiae Romanae à fide Protestantium, aliorumque Sectariorum discrepare, luculenter euici Prop. iv. ita & legem nostram ab eorum lege diuersam esse, manifestum est; igitur Ecclesia duntaxat Romana veram Christi legem seruat.

II. Cùm autem ij saluari duntaxat possint, qui Christi legem seruant; quisquis enim vult beatam vitam consequi, mandata seruet, necesse est, cùm hæc via ducat ad vitam; præcepta, inquam, & Dei, & Christi, cuius singulare mandatum est, ut Ecclesiae pareamus, germanæ scilicet & Catholicæ; atqui præter Romanam, nulla est alia vera & legitima, per Prop. v. ii. quisquis autem Ecclesiam non audit, Ethnici & Publicani loco habendus est. Quisquis igitur Ecclesiae legibus non paret, Christi legem non seruat; sed quisquis Christi legem non seruat, saluus esse non potest, cùm per Christum saluari  
dun.

duntaxat possimus ; rebelles autem saluari non vult, nisi resipiscant ; nam quisquis legem Domini violat, peccat ; peccatum verò à salute excludit, vt nemo nescit, nisi per pœnitentiam expungatur, Deoque fiat satis.

III. Itaque cùm Ecclesia Romana duntaxat legem Christi habeat, quâ certè aliæ sectæ penitus carent, quamuis dictitent, legem Euangelicam apud se vigere ; hinc nonnulli inter sectarios, euangelici vocari volunt ; & cùm sine Christi lege homines saluari nequeant, hoc vnum restat, vt certò concludam, in Ecclesia duntaxat Romana homines saluari posse. De adultis loquor, à quibus Christus exigit diuinæ fidei & Christianæ legis professionem ; illudque vitæ genus, quod Christus suis præscripsit, in quo scilicet Christianis legibus subiiciuntur, quarum præcipuum caput est, vt Ecclesiæ pareant, Ecclesiæ, inquam, veræ & Catholicæ, scilicet Romanæ.

IV. Et verò fieri non potuit, quin Christus supremus Legislator legem à se præscriptam atque traditam alicuius curæ commiserit. Sic Reges & Principes, magistratus & iudices instituunt, qui legum ab iis latarum obseruationi inuigilent, transgressoresque puniant ; aut si quid in lege ambiguum est, illud explanent, & Principis mentem subditis aperiant. Quis autem à Christo hanc legis suæ curam omissam esse sibi persuadere valeat ; in quo, vt liberè dicam, eius prudentiam homines desiderarent ; igitur legem suam Ecclesiæ, pastoribus scilicet,

cet, ac præsertim supremo Pastori, ac visibili capiti commisit, ut eam ab omnibus seruari curaret, cuiusque integritati consuleret. Hinc si aliquid offensionis intercurrat, dic Ecclesiæ, adhibita prius monitione; & si frater tuus Ecclesiam non audierit, eum fratris loco non habebis, sed rebellis & hæretici. Hic autem nomine Ecclesiæ, Romana duntaxat venit, ut supra demonstratum est; ex eo igitur, quod vna duntaxat lex Christiana sit, sine qua homines saluari nequeunt, & quæ penes Ecclesiam Romanam est, optimè probatur, in hac duntaxat homines saluari posse.

## RATIO QVARTA

*Ex eo ducitur, quòd vnus sit tantum spiritus veritatis.*

- I. **Q**UOD vnus tantum sit spiritus veritatis, ex Dato VIII. perspicuum est; quòd autem sine illo salutem consequi non possimus, multiplici ratione probatur. Quis enim saluari queat, nisi Domini Iesu nomen inuocauerit? nempe aliud non est sub cælo nomen, in quo saluari nos oporteat; atqui nemo dicere potest Dominum Iesum, nisi in Spiritu sancto. Præterea ut quis ab erroribus liber sit, verum à falso, lucemque à tenebris distinguere debet; quis autem nescit, hunc spiritum esse, qui docet nos omnem veritatem; nisi enim illam nos doceat, vnde amabò illam accersimus?

mus? Deinde sine præscripto nobis orationis subsidio saluari nequimus; iis enim cæremus auxiliis, quæ cum ad salutem necessaria sint, ea duntaxat petentibus & orantibus concedere statuit; atqui Spiritus sanctus est, cuius virtute, preces nostras fundimus & condimus, hic enim orat pro nobis gemitibus inenarrabilibus.

I I. Accedit, quod Spiritus sancti dona & fructus, aliæque multiplicis gratiæ subsidia saluari volentibus necessaria sunt; cum nemo sine diuinæ gratiæ operâ saluari queat. Quis autem nescit, Spiritum sanctum huius piæ largitionis auctorem esse; nempe ab illo perenni diuini erga nos amoris fonte omnis gratia procedit. Hinc corda nostra suo igne accendit, mentem sua luce perfundit, animum suo rore fœcundat, totum pectus suis motibus concutit: quid plura? in hac miseriarum valle, & mortalis vitæ angustiiis, nisi aliquo diuinæ consolationis sensu recreemur, diu tot mala ferre non possumus; deficimus in via salutis, & tandem in desperationem agimur. Quis autem nescit, sanctum Spiritum optimum Consolatorem esse, & vnicum Paracletum, qui nos in nostra tribulatione consolatur, atque recreat.

I I I. Certum est igitur, hominem saluari non posse, nisi Spiritus sancti ductu veram Christi fidem & legem profiteatur, eamque ineat vitæ formam, ac viam, quam Christus veram & certam esse docuit, atque adeò eundem Spiritum sanctum misit, ut homines illam doceret, eosque suo instinctu, ad rectè viuend.

144 *Lib. II. Prop. X. In sola Rom. Eccl. hominum salut.*  
viuendum sollicitaret & excitaret. Hinc diuina charitas, quæ Christianæ legis quædam quasi coronis est, vel summa in cordibus nostris diffusa per Spiritum sanctum; hinc tam multiplicis gratiæ ortus ac deriuatio, præuenientis, excitantis, adiuuantis, comitantis, subsequents, vocantis, illuminantis, trahentis, pulsantis, recreantis, &c. Omnis enim gratia à Spiritu sancto est, diuini amoris fonte, vel alueo; at sine diuina gratia saluari non possumus, quod nullus hæreticus, præter Pelagium, negauit.

I V. Vbinam porro Spiritum sanctum nancisci possimus, nisi in Ecclesia Catholica, non intelligo; cum enim ibi esse non possit, ubi error est, cum sit spiritus veritatis, cui omnem veritatem, omnes Christi fideles docere incumbit; & cum Ecclesia duntaxat Catholica erroris immunis ac expers sit, vt ostensum est in Prop. i. nam ubi error est, Ecclesia non est; cum demum Ecclesia Romana errare non possit, per Prop. vi. nec fidem mutare per v. sed eam sola retinuerit per viii. ac proinde vera & legitima duntaxat Ecclesia censenda sit, per Prop. xvii. inde, ni fallor, perspicuè concludo, in Ecclesia duntaxat Romana Spiritum sanctum haberi posse, eumque eidem Ecclesiæ assistere, ac impedire, ne portæ inferi aduersus eam præualeant: vnde sequi manifestum est, in ea duntaxat homines saluari posse.

RATIO



## RATIO QUINTA

*Ex eo ducitur, quod unus sit salutis nostræ  
auctor Christus.*

I. **V**Num esse salutis nostræ auctorem ac intercessorem, aut mediatorem, ut vocant; Christum, adiaphori non negant; sed vno communique consensu profitentur. Nemo enim venit ad Patrem, nisi per Filium; & nemo nouit Patrem, nisi Filius, & cui voluerit Filius reuelare; nisi autem cognoscamus Patrem, & quem misit Iesum Christum, vitam æternam consequi non possumus. Christus Ecclesiæ caput est; nisi membra capiti adhæreant, spiritum ac virtutem ab eo accipere non possunt; membrum verò spiritu ac virtute vitali priuatum, non viuit. Christus vitis est, nos palmitēs; si palmēs in vite non manet, non viuit, sed statim arefcit; nec illum vitæ fructum producit, quem supremus agricola ab eo expectat; igitur quisquis in Christo, & cum Christo non manet, spe omni salutis excidit.

II. At quisquis ab Ecclesia, cuius Christus caput est, desciiuit, cum Christo coniunctus esse nequit; membrum enim à corpore rescissum, cum capite coniunctum esse non potest, ut nemo negat. Cum igitur Ecclesia Romana, vera Christi duntaxat Ecclesia sit, per Prop. vii. quisquis ab ea desciiuit, in ea non est; igitur in mystico Christi corpore non manet; cum Christo igitur non est; contra Christum igitur est.

K

Sed

Sed quisquis cum Christo non est, saluari nequit; nam cum Christo Sancti omnes regnabunt; & ubi Christus est, illic & minister Christi erit. Quis autem nescit, Christum prædestinatorum primitias esse, ipsûmque cælestis gloriæ regem, cuius haud dubiè illi participes non erunt, qui Christo coniuncti non sunt; igitur quisquis ab Ecclesia Romana seiunctus est, ut cum Christo non est, ita saluus esse non potest.

III. Quòd autem Christus cum Ecclesia sit, dubium esse non potest; sponsus scilicet cum sponsa, dilectus cum amica: *Omnibus diebus vobiscum sum*, inquit, *usque ad consummationem sæculi*. Vobiscum, inquam, scilicet cum Petro, aliisque Apostolis, qui Ecclesiæ corpus, primis illis temporibus constituebant, ut hac tempestate, Petri & Apostolorum successores eandem componunt. Igitur qui cum Petro non est, cum Christo non est; atqui cum Petro esse censentur, quotquot sub Ecclesiæ Romanæ vexillis militant; ergo isti duntaxat saluari possunt, qui in eiusdem Ecclesiæ gremio viuunt.

IV. Quotiescunque duo vel tres in nomine Christi congregati sunt, Christus est in medio eorum, ut ipse vtrò pollicitus est. Quinam porro in nomine Christi congregentur, faciliè intelligitur; ii scilicet, quibus auctoritatem regendi Ecclesiam Christus concessit; Petrus in primis, cui dictum est: *Pasce oves meas, pasce agnos meos*; nec enim pascendi regendique munus, sine auctoritate concessum est. Quid autem, amabò, est, nomine Christi

sti

si aliquid agere, nisi eiusdem auctoritate valere? Sic lex nomine Regis lata, ab eiusdem auctoritate profecta censetur. Igitur Christus cum Petro est, eiusque successoribus, Ecclesiæ Romanæ Pontificibus, aliisque Ecclesiæ Pastoribus; in nomine Christi congregatis, auctoritate scilicet ab eo, per Petrum accepta; est enim Petrus Ecclesiæ caput, Christi Vicarius, ac proinde illi reliqui Pastores subiecti sunt. Hinc non agnos modò, sed & oues pascere iussus est; immò ubi fortè aliquis ex inferioribus Pastoribus à Petro discedit, ab Ecclesia de seiscere censetur, nec ampliùs nomine Christi quidquam agere potest.

V. Itaque ex præmissis perspicuum est, Christum esse cum Ecclesia Romana, non tamen cum iis, qui ab eo seiuncti sunt. In Christo verò saluari duntaxat possumus; & si quid petierimus Patrem in eius nomine, dabitur nobis: regnum autem cælorum quotidie petimus, æternamque felicitatem, quam Deus amicis suis præparavit. Igitur in nomine duntaxat & auctoritate Christi saluari homines queunt; auctoritas Christi extra Ecclesiam non est, Romanam scilicet, quæ sola est, vera & legitima Ecclesia; igitur extra Ecclesiam Romanam saluari homines non possunt.

## RATIO SEXTA

*Ex eo ducitur, quòd una sit vita charitatis  
diffusa in cordibus nostris.*

I. **Q**ui manet in charitate, in Deo manet; quia Deus ipse charitas est; Deus verò summum nostrum bonum est, & ultimus finis, cuius fruitio, seu possessio beatos nos facit; igitur sine charitate, beati esse non possumus, immò sine charitate nihil facimus, nihil possumus, nihil penitus ad salutem confert. Hæc inter virtutes Theologicas primo loco est, ut Doctor gentium testatur, quam etiam extincta fide, & sublata spe, in cælis habituri sumus. Præterea una est via mandatorum, quæ ducit ad vitam; quod veritas ipsa luculento attestatur oraculo; at plenitudo legis dilectio est, & maximum mandatum illud est, quo Deum; secundum verò, quo proximum diligere iubemur.

II. Accedit, quòd charitas in cordibus nostris diffusa per Spiritum sanctum, diuina eiusdem cordis vita est; vita, inquam, interioris hominis, non veteri Adamo, sed nouo, scilicet Christo, similis. Illa est principium illarum motionum, quibus animus ad Deum fertur, & ad eum accedit. Cùm igitur ad obtinendam beatitudinem nostram, accedere ad Deum oporteat, nisi charitas Dei moueat nos, atque vrgeat, inertes & immobiles iacemus; iter illud, quo itur ad astra, gressibus amoris & charitatis conficiendum est; veste illa nuptiali orati  
sint,

sint, necesse est, qui ad cælestis sponsi mensam vocati sunt. Vno verbo, si charitas absit, amici Dei esse nequimus, nec filij, nec hæredes; igitur sine charitate saluari non possumus.

III. Charitas autem esse non potest, vbi vera fides non est, & ibi duntaxat charitas est, vbi vera est fides; licet enim cæcus amor esse dicatur, quia cæca voluntas est, intellectu tamen duce, tutò graditur; nec in incognitum ferri potest. Porro vt charitas caloris supernaturalis focus, ita fides cælestis luminis fons est; & vt illa cor nostrum accendit, ita hæc mentem nostram illustrat. Cùm igitur in Ecclesia duntaxat Romana, vera sit fides, vt ex prima Ratione, & ex Prop. VIII. perspicuum sit, in ea duntaxat charitas est; igitur in ea duntaxat homines saluari queunt, qui sine charitate saluari nequeunt.

IV. Præterea cum tanta animorum dissensione charitas coniuncta esse non potest; hæc enim consensionem & vnionem voluntatum conciliat, quam haud dubiè animorum dissensio dissoluit. Quis autem non videt, fideles Ecclesiæ Romanæ filios semper idem, certa & indubitata fide tenuisse, vt constat ex Propos. v. & VIII. illi ergo dissensionibus & controuersis aditum nunquam dederunt. Secus verò illi, qui ab Ecclesia Romana desciiuerunt, auitæ fidei vale dixerunt, pleraque dogmata mutarunt; ab Ecclesia, optima scilicet parente discesserunt, eius neglexerunt monita, detrectarunt imperia. Quis, amabò, neget, dissensiones ab iis ortum duxisse? sacram igitur charitatis fibulam resciderunt;

charitas igitur in iis non est, nec ipsi in charitate manserunt; in eo igitur statu sunt, in quo saluari nequeunt.

V. Quæ porro illorum charitas fuerit, qui ab Ecclesia Romana desciuerunt, in omnibus Europæ Prouinciis innumera ferè rerum gestarum monumenta testantur; ædes sacræ direptæ, dirutæ, incensæ; sacræ virgines violatæ; tot sacerdotum & cœnobarum millia vltimo supplicio affecta; sacra omnia polluta & profanis vsibus addicta; Sanctorum cineres & exuiæ proiectæ; tot ciuitates solæquatæ, vel raptâ prædâ exhaustæ: adde afflictas insigni sanctimonia viris calumnias. Hæc & alia his similia Christianæ charitatis sunt argumenta, quam sectarij præferunt: immò ausim dicere, vix Ecclesiam ab ipsis gentilibus idololâtris peiora passam fuisse, quàm à sectariis.

VI. Si verò alia ex parte, eorum charitatem animo perpendas, qui Ecclesiam Romanam agnoscunt; vt omittam tot xenodochia & nosocomia, & illustres passim sanctitate & nobilitate homines, ægrorum & peregrinorum ministeriis & famulatu addictos. Quid, amabò, illorum charitate illustrius, qui animarum conuersioni sedulam operam nauant, quique ob eum finem, tam lōgis itineribus, tot periculis & incommodis sese vltro committunt atq; exponunt; qui patriâ relictâ, iisque omnibus solatiis, quæ ab hominibus tanti sunt, barbaras nationes, per tot discrimina rerum omnium adeunt, vt earum conuersioni strenuè incumbant, pro qua non dubitant

tant gloriosam oppetere mortem? quantus porro sit eorum numerus, qui solo charitatis ductu, vel barbaros ad Christi fidem adducerent, sanguinem cum vita fuderunt. Nemo igitur in dubium reuocet, quin charitas in Ecclesia Romana vigeat, cuius tam eximia extant monumenta; cum tamen apud sectarios ne minimum quidem illius vestigium sit: vnde concludo, in Ecclesia duntaxat Romana homines saluari posse, cum sine charitate nemo prorsus saluus esse queat.

## RATIO SEPTIMA

*Ex eo ducitur, quod nulla fides Romanis & Protestantibus communis sit.*

I. **E**cclesie Romanæ fidem à fide protestantium Calvinistarum, aliorumque sectariorum omnino differre, in Prop. IV. iam à nobis ostensum est; si autem altera differt ab altera, nulla vtrique communis est; nempe ratio credendi vna est, quæ reuerà si absit, nulla est fides; si verò adsit, tota est. Igitur cum in multis articulis sectariorum à nobis discrepent, ratione credendi penitus carent; nihil igitur, ut par est, credunt, nulla igitur fides nobis cum illis communis est; si autem nulla fides communis, nulla salus communis erit; hæc enim ad instar præmij est; præmium verò supponit meritum, & meritum fidem, quæ omnis meriti principium est, ut nemo negat.

II. Hinc ergo necessaria consequutione dedu-

eo, in Ecclesia duntaxat Romana homines saluari posse, penes quam scilicet vera fides est, quâ reliqui sectarij carent; quid mirum ergo, si saluari non possint, cum sine vera fide nemo prorsus saluari queat? igitur quibus fides communis non est, salus etiam communis non erit. Accedit, quod, quibus fides communis non est, spes communis esse non potest. est enim fides sperandarum substantia rerum; & nisi spes diuinarum promissionum certitudine nitatur, subsistere nequit; at diuinarum promissionum certitudinem, certa duntaxat fide tenemus; sed ubi vera fides non est, certa minimè censetur; sectarij igitur certa spe non gaudent: illam igitur beatitudinem assequi non possunt, quam certò sperare nequeunt.

III. Denique si fides communis<sup>non</sup> est, igitur nec religio, nec Ecclesia communis; finis ergo æternæ salutis communis non est; nempe extra Ecclesiam salus non est, ut vel ipse Calvinus ultro fateri cogitur; tanta enim veritatis vis est, ut vel ipsos aduersarios ad spontaneam confessionem adducat. Accedit, quod si eadem religio non est, ut reuerà diuersam esse constat, diuersum quoque Dei cultum esse, necesse est, ab eo scilicet, quem Deus mortalibus præscripsit, hunc enim certa fide tenemus. Igitur quisquis hac fide non gaudet, in Dei cultu errat, qui cum à Deo præscriptus sit, ut illius quasi ductu ad cælestem felicitatem perueniamus, quam Deus nobis, ut præmium proposuit, quid mirum, si, cum verus Dei cultus absit, quo Deum sibi demere.



*Rat. VII. Vera fides non est cōmūis cum Protest. 153*  
si homines possint, diuinā gratiā & gloriā exci-  
dant?

I V. Itaque sectarij, qui diuersam à nostra fidem  
profitentur, ab Ecclesia descuerunt, religionem &  
legem cum fide mutarunt, alium à legitimo & no-  
bis præscripto Dei cultum adhibent; æternam igitur  
mercedem expectare non possunt, nec æternæ  
beatitudinis participes fieri, quæ fidelibus duntaxat  
seruis, diuinæ legis obseruatoribus promissa est: non  
verò iis, qui iugum excusserunt, à vera religione  
defecerunt, quam ex diuinis oraculis accepimus.  
Licet enim sacris Codicibus credere videantur, cum  
tamen sine certa regula id fiat, certa fides non est,  
quā reuerā deficiente, totius religionis, legis, diui-  
ni cultus & nostræ salutis corrui fundamentum.

## RATIO OCTAVA

*Ex eo ducitur, quòd defectionum auctores tales  
non fuerint, ut iis fides habenda sit.*

I. **D**E summa rei vbi agitur, nihil sanè omit-  
tendum, negligendum nihil, vt res ad o-  
ptatum finem perducatur; nullis labori-  
bus, industriæ nulli parcendum, vt felicem exitum  
procuremus; error enim decumanus est, qui dein-  
de reparari nequit. Iacturam rerum caducarum  
haud ægrè ferre possumus; at verò æternarum, in-  
tolerabilis iactura est. In mortalis huius vitæ discrimen  
facile adduci possumus; leuioris momenti alea

est, at ubi de vita æterna & cælesti gloria agitur, nihil aleæ committendum, sed adhibenda summa diligentia, ut tandem illam assequi valeamus: illud porro vnum necessarium est; quid enim homini prodest, si vniversum mundum lucretur, animæ verò suæ detrimentum patiatur?

II. Hinc vix dici potest, quanta auctoritatis robore opus sit, ut quis eam religionis formam amplectatur, ad quam illum quispiam hortatur. Ut solum veritas adduci non potes, nisi infinita propemodum rationum vis, ad id faciendum temoueatur, ut verò religionem mutēs, eum scilicet vitæ modum, quem eo duntaxat animo adhibes, ut cælesti doneris laurea, nullo negotio tibi persuaderi fides. Reuerà, si quid video, hæc vnum maxime perspicuum est, in re tanti momenti, & tam ardui negotij, fidem omnibus habendam non esse; multa esse in examen vocanda, & diligentissime discutienda: quis ille sit, qui noua fidei dogmata suggerit, quibus moribus instructus, quo ductus instinctu, quo animo, quo fine, quid eum ad mutationem impulerit, quæ ratio, quæ causa defectionis, quæ modestia in scriptis, moderatio in dictis, integritas in factis; hæc & alia similia accuratissime ponderanda sunt, ne in errorem inducamur.

III. Lutherus is non fuit, cuius autoritas apud aliquem tanti sit, ut eum ad mutandam religionem inducat; iis moribus, ea charitate; iis virtutibus non fuit, quæ tantam illi fidem conciliarent: eum ducem in via salutis sequi non debēs, cuius male

compositi mores eiusdem salutem in magnum discrimen adducunt. Illa singularis proteruitas, palmaris superbia, innatum temperantiæ, castitatis, & pœnitentiæ odium; illa frequentia periuria, soliti furorès, spumantes iræ, nota desperatio, & celebris apostasia, aliæque id genus elogia, eum hominem esse persuadent, cui non modò in re salutis, fides habenda non sit, sed ne quidem in alio longè minoris momenti negotio.

IV. Calvinus corpore & sensu Luthero temperatior, animo tamen intemperatior fuit, acerrimi vir ingenij, sed atræ bilis vitio supra modum laborans; hinc mania, furor, odium, desperatio, mordacitas, venenum cum linguæ, tum styli, tumultuum & factionum amor, aperta superbia: Zwinglius, Carlostadius, Melancthon, OEcolampadius, Bucerus, aliique sectariorum principes non dissimilis farinæ homines extiterunt; maiori scilicet ex parte apostatæ & transfugæ, quorum mores & indolem habes non modò apud auctores Catholicos, verùm etiam apud alios, qui aperta aduersus Ecclesiam Romanam odia præferunt.

V. Quis ergo huiusmodi hominibus, quorum doctrina noua & suspecta, mores corrupti, ingenia turbida, delicta publica, quique ab Ecclesia Romana, suisque claustris discesserunt, ut eas vitarent pœnas, quas eorum scelera postulabant: quis, inquam, huiusmodi hominibus, non dico rem suam domesticam, uxorem, liberos pecuniam, mortalem vitam, sed animam salutemque suam æternam

pru-

prudenter credat? quis eorum auctoritate ducatur, ut Ecclesiæ Romanæ auctoritatem parui pendat, tot sanctorum Patrum testimoniis confirmatam, tot Martyrum sanguine comprobata, tam multiplici virtutum, & sanctimonie splendore illustratam? Tota Antiquitas, maioresque nostri, tot selecta virorum capita, tot Christi pugiles, qui nullo privati commodi studio ducti, parentes, patriam, amicos ultro relinquunt, ut fidem Christi barbaris nationibus prædicent, vitamque pro illa cum sanguine fundant, illi, inquam, omni asseveratione affirmant, & proprio confirmant sanguine, Ecclesiam Romanam veram Ecclesiam esse, extra illam neminem saluari posse. Lutherus nescio quis cucullatus transfuga, Zwinglius parochus perduellis, Calvinus Canonicus exauctoratus, alique eiusdem instituti homines contrarium asserunt; quis, amabo, his potius, quam illis fidem habeat?

VI. Præsertim in tanti momenti re, in qua si semel, etiam per crassum errorem, errare accidat, iacta est alea; hic enim de summa rei agitur, de æterna scilicet animæ salute. Itaque si quid video, vel intelligo, nemo prudenter factum esse putabit, suspectæ saltem illorum hominum fidei suæ salutis negotium committere, quibus vix generosum equum, vel marsupium crederet. Et si rem hanc sectarij attentè perpendant, huiusque argumenti vim, rationisque momentum ponderent, nullus dubito, quin clarissimè perspiciant, quàm leuiter, quàm impudenter & temerè se suæque omnia novis illis suis

apo.

*Rat. IX. Nemo salutis studio ductus à R. E. descivit. 157*  
apostolis tradiderint, qui nec miraculis, nec sanctioris vitæ exemplis, nec morum integritate, nec legitimæ missionis instrumentis suam doctrinam confirmare vnquam potuerunt.

## RATIO NONA

*Ex eo ducitur, quòd nemo ferè vnquam mero salutis studio ductus ab Ecclesia Romana desciverit.*

I. **Q**ui sibi nequam est, alteri bonus esse nequit, & quisquis ab Ecclesia Romana descivit, alio, quàm propriæ salutis studio ductus, alteri, vt ab ea desciscat, bonus auctor esse non potest; ordinata enim charitas ab eo, cuius est, incipit, nec alienam salutem vero ductus zelo procurat, qui suam negligit: nempe verus zelus veram ac germanam charitatem supponit, & hæc in Dei bonum fertur; atqui propria cuiusque salus æquè ac proximi, ad Dei bonum pertinere censetur. Præterea diuina lege ac Dei præcepto cuiuslibet incumbit, sibi constitutum ac propositum finem persequi, hoc est, propriæ saluti consulere, quod vbi negligit, diuinam violat legem; quisquis autem Dei præcepta non exequitur, germana charitate non pollet; quisquis enim diligit me, ait Dominus, mandata mea seruat; igitur quisquis negligit suam salutem, alienam procurare non potest, vero scilicet zelo ductus, vt supra dictum est.

II. Quis

II. Quis autem nescit, nullam ei fidem adhibendam esse, qui vero zelo minimè ductus, ad mutandam religionem alios hortatur, atque inuitat, nec ducitur æternæ salutis studio, sed factionis potius & pertinaciæ? an fortè illi te tuamque salutem credes, qui de illa parum sollicitus, te quidem contumaciæ ac proteruiæ, non tamen æternæ gloriæ ac beatitudinis socium exposcit? An fortè illi maiorem fidem habendam esse existimabis, quàm Petro, eiusque successoribus, quibus tuæ salutis cura commissa est, dum te cum reliquis Christi ouibus pascere iussi sunt, pro quibus denique Christus orauit, ne illorum vnquam fides deficeret, ut tuam, si quando nutaret, ipsi confirmarent; quàm Petro, inquam, aliisque Apostolico zelo flagrantibus viris, qui pro tua salute, Christi exemplo, sponte ac vtrò vitam cum sanguine profundere parati sunt; nullo propriæ utilitatis, vel commodi studio ducti, sed tuæ duntaxat salutis, ac diuinæ gloriæ amore flagrantēs?

III. Porro quòd ij ferè omnes, qui ab Ecclesia Romana desciscunt, & ad Protestantes vel Caluinistas conuolant, id minimè faciant, propriæ salutis studio, sed propter alios fines, certius est, quàm ut vel minima probatione indigeat. Hunc egit desperatio, illum furor atque odium; alium supplicij promeriti metus, nonnullos iniusta infamiæ nota, plerosque voluptatis ac licentioris vitæ desiderium. Omitto inuidiam, superbiam, maioris lucri spem, cuncta innouandi libidinem, diuitias, dignitates, aliâ.

*Rat. IX. Nemo salutis studio ductus à R. E. desciuit.* 159

aliâque huiusmodi, quæ maximam apostatarum & transfugarum partem ad auiram religionem relinquendam, nouamque amplectendam incitarunt, in quibus nulla procurandæ salutis ratio habetur, nullus diuinæ gloriæ est locus.

IV. De Luthero, nemo est, qui nesciat, quo animo, quo fine ab Ecclesia desciuerit; quot motibus inuidiæ, odij, furoris, timoris ac desperationis actus sit; quam tumultuum ac voluptatum amans, dissensionum & factionum auctor. De Caluino proscripto, & vt multi asserunt, nigro thea notato, criminis pessimi reo, nihil est, quod dicam; res per se ipsa loquitur. De Zwinglio, Carlostadio, Theodoro Beza, OEcolampadio, Petro Martyre, aliisque, qui tum ab Ecclesia, tum à sacro cœlibatûs ordine defecerunt, constans fama est, quo studio ac fine ducti id fecerint. Quidquid sit, ne hîc accusatoris partes agam, certum est, eos solum non vertisse virtutis amore, sed vel formidine pœnæ, vel liberioris vitæ desiderio, vel rerum nouarum cupidine, vel alio quopiam, quod minus honestum erat, incitamento.

V. Itaque cùm nemo, saltem inter prima sectarum capita, ab Ecclesia Romana discesserit, merâ procurandæ salutis causâ, inde non leuis ratio ducitur, extra Romanam Ecclesiam, procurandæ salutis modum non esse; alioquin propriæ salutis studio iî tenerentur, qui ab ea discedunt; & hæc discessio eò, vt plurimum saltem, spectaret. Quis autem vel animo fingere possit, religiosi instituti homines, præfer-

præsertim eos , qui austerius vitæ genus amplexi sunt, ad Lutheranos, vel Calvinistas confugere, uxorem ducere , pias omnes, quæ prius familiares erant , virtutum exercitationes relicere , vt placato Deo , obtentâque peccatorum veniâ, beatitudinem assequantur. ?

VI. Scio quidem , à plerisque transfugis, procu-  
randæ salutis speciem obtendi ; sed nugæ ; mera fi-  
ctio est , quam, vbi ad nos redeunt , vltro fatentur ;  
aliud finem dubio procul omni sibi proponunt ;  
eumque multiplicem , qui vt plurimum neminem  
sater ; sed de his hoc loco disputandi locus non est.  
Ex alia verò parte , quotquot ab iis ad nos acce-  
dunt , si aliquot vagos nebulones excipias , aliud  
finem sibi non proponunt , quam propriam salu-  
tem ; hinc tot lacrymæ atque gemitus , vsusque me-  
lioris vitæ. Vnde profectò , ni fallor , conclude-  
re possumus , in Ecclesia duntaxat Romana homi-  
nes saluari posse ; cum ab ea nunquam transfugæ  
accedant , vt salutis suæ consulant , secùs verò mul-  
ti ex sectariis in eam admitti curent, vt saluari pos-  
sint.

## RATIO DECIMA

*Ex eo ducitur, quòd pauci sint, quos ignorantia in-  
uincibilis, vt vocant, excuset.*

**P**Auci sunt , inquam , inter sectarios , quos  
ignorantia inuincibilis, vel inculpabilis, sic  
enim appellant , excuset ; nempe duplex  
vulgò



Vulgò distinguunt ignorantia genus, inuincibilis scilicet & crassa, inculpatam dicemus, & culpata. Prima est, quâ sine culpa aliquid præceptum omititur, quia sine culpa ignoratur; secus verò alia, quæ sine peccato non est, quia ex propria malitia ortum ducit. Prima excusat à peccato, ut iam suppono, & Catholici omnes ita sentiunt; secus verò secunda: quamquam si peccatum primæ attribuas, ad rem præsentem nihil penitus facit, tunc enim nulla prorsus ignorantia excusaret, ac proinde nulla inculpata censeretur. Sed quandoquidem cum iis hominibus ago, qui volunt multos hoc nomine excusari, ac proinde saluari, licet Ecclesiam Romanam minimè agnoscant, vtrò admitto cum omnibus Catholicis, aliquam reuerà ignorantiam inculpatam esse.

II. Quòd autem paucos, scilicet ex Protestantium & Calvinistarum secta, excuset, mihi probandum incumbit, atque inde concludendum, in Ecclesia duntaxat Romana homines saluari posse. Vtrumque autem faciliè conficio; primum quidem, quia ignorantia inculpata ea solùm est, quæ hominem in eo vitæ statu supponit, in quo ne minimum quidem dubium in mentem illi veniat, vel minima cogitatio de ignorato præcepto; nulla illius, quam profitetur, sectæ suspicio; nullus errandi in fide metus; sed firmiter tenet, nullam aliam religionem esse, in qua rectiùs viuere, Deo placere, peccatorum veniam ac remissionem, & tandem vitam æternam consequi valeat.

L

III. Nem.

III. Nempe si anxius de admissis peccatis viuit, adhibito scilicet remedio, iuxta suæ legis ritum & formam; si dubitat de iis dogmatis, quæ à Pastoribus proponuntur; si Pastores inter se minùs consentire quotidie videt; si pertinaciam, inconstantiam, iactantiam, maledicentiam, aliàsque vitiorum notas, quæ prædicatores Apostolicos minùs decent, in iis identidem obseruat; si variis ac veris conscientiae motibus, sæpe ac sæpius concutitur, qui haud dubiè à diuina gratia procedunt. Hæc & alia huiusmodi dubio procul omni faciunt, ne ignorantia inculcata sit; nempe inde saltem obligatur, diligentius inquirere; quod nisi faciat, peccat; nec illum excusat ignorantia, quam affectat; hinc crassa vulgò dicitur, ego culpata[m] appello, cùm à culpa minimè liberet[ur].

IV. Porro inter sectarios pauci sunt, quibus aliquod, illudque rationabile suæ fidei ac salutis dubium subortum non sit; qui iustis conscientiae stimulis ob eam causam aliquando non agitentur; quibus aliqua saltem cogitatio de fidei Catholicæ bonitate in mentem non cadat, aut diuini luminis radius non affulgeat; spiritus enim ubi vult, spirat. Sed cuncta hæc sufficiunt ad hoc, vt ignorantia culpata sit; ex his enim quiuis facili consequutione concludit, suæ saluti diligentius consulendum esse, ac proinde teneri se ad maiorem veritatis inquisitionem, vt viam salutis doceatur; quod cùm facere p[er]mittat, in hoc reuerà peccat, nec eum ignorantia excusat; igitur inculcata non est.

V. Scio

V. Scio quidem, cuncta hæc ab iis vltro negari; palàm enim se ac sua iactant, omnique asseueratione affirmant, se suæ fidei ac religionis certos esse, omnisque dubij expertes; suæ legis bonitatem sibi compertam ac perspicuam esse: hæc, inquam, palàm dictitant & iactant. Sed quotquot ad nos migrarunt, arcana referant, ac vltro fatentur, se cum multa anxietate vixisse, nec sibi vnquam in ea secta factum esse satis; nihil se vnquam certo credidisse, ac de plerisque dubitasse, præsertim cum ipsi Pastores de dogmatis inter se minimè conuenirent; sapius actos se conscientiaë stimulis, sed contra stimulum calcitrasse. Lutherus ipse de se asserit, prædictos conscientiaë stimulos post multos solummodo annos, ex quo ab Ecclesia Romana descuiuerat, extinctos fuisse. Si totius sectæ Princeps hoc ipsum de se fatetur, quid de aliis, quæso, censendum est? Certum igitur est, paucos esse, quos inculcata ignorantia excuset; vnde tandem concludo, in Ecclesia duntaxat Romana homines saluari posse; licèt enim aliquos fortè prædicta ignorantia excuset, aliunde tamen saluari nequeunt, propter alia peccatorum impedimenta, de quibus infra.

## RATIO VNDECIMA

*Ducitur ex Sacramentorum necessitate,  
pro Adultis.*

- I. **E**A est hominum ad peccandum propensio, & naturæ corruptæ, vt vocant, infirmitas, vt homo, nisi singulari prærogatiua instrua-

164 *Lib. II. Prop. X. In sola Rom. Eccl. hominum salu-*  
struatur, sine peccato esse non possit; quo fit, vt inde saluari potissimum sperare debeat, vnde maior spes delendi ac expungendi peccata affulget, cumque vitæ modum tenere, & eam legis formam profiteri, quæ ad peccatorum veniam & remissionem tutius & facilius conducit. Hæc, ni fallor, adedò certa sunt & perspicua, vt in iis nullus dubio locus esse videatur; quocirca ab iis omnibus faciliè concedentur, quos nimia pertinacia in præceps non agit.

II. Ante Dominicam Incarnationem ea fuit mortalium conditio, vt post admissam lethalem noxam, nulla veniæ spes affulgeret, nisi perfecta contritio, vt vocant, adhiberetur. Illa autem est perfectæ contritionis ratio, vt non modò summum dolorem, summamque detestationem super omnia, vt vocant, desideret, verùm etiam omnem proprii commodi & vtilitatis rationem excludat; nec enim pœnarum metu, nec peccati turpitudine, nec etiam cælestis gloriæ ac felicitatis spe ille ducitur, qui per veram contritionem patrata scelera detestatur.

III. Porro vt actus perfectæ contritionis & charitatis nobilissimus est, ita sanè ardui negotij res est. Hinc præ cæteris beneficiis, quibus Seruator noster Iesus Christus hominum genus sibi obstrinxit, illud haud dubiè primo loco esse debet, quòd remissionem peccatorum longè faciliorem reddiderit, instituto scilicet ob eum finem Sacramento, cuius virtus perfectæ contritionis absentiam suppleret, modò saltem imperfecta, quam attritionem vocant, adesset. Si enim, vt antè, perfecta contritio necessaria esset,

esset, non erat, quòd Dominus noster Iesus Christus Petro & Apostolis, ligandi atque soluendi, ac remittendi peccata potestatem faceret, quæ iam perfecta contritio expunxisset; aliud igitur longè facilius remedium esse voluit, quod cum prædicta potestate coniunctum, eâdem vi polleret; Sacramentum reconciliationis, vel exhomologesimæ sancti Patres appellant; nos vulgò Sacramentum Pœnitentiæ nuncupamus.

IV. Hoc autem salutari remedio sectarij penitus carent, neq̃ illud vllatenus adhibent. Nec est, quòd ad suam recurrant fidem; quis enim ignorat, multos etiam inter fideles esse, qui cùm grauitè delinquant, aliud à fide remedium adhibeant oportet. Equidem inter alias dispositiones, quas iustificatio peccatoris (hanc enim vocem vulgò vsurpant) desiderat, fidem recensendam esse, non negauerim; illam tamen haud sufficere, nemo nescit; alioquin nullus fidelis peccare posset, nisi statim, amissa fide, infidelis euaderet, quod vel dictu ridiculum est. Hoc igitur remedio sectarij carent, quo Romana Ecclesia gaudet; igitur cùm sine illo peccator adultus vix saluari queat, sectarij huius defectu saluari vix possunt, cùm tamen in Ecclesia Romana, hoc subsidio freti, facilè saluari possimus.

V. Alia quoque Sacramenta habemus, quibus sectarij, saltem maiori ex parte carent; sunt autem diuinæ gratiæ ductus, vel ad reconciliationem cum Deo, vel ad confirmandum cor nostrum contra hostes salutis nostræ, vel ad fouendam ac sustentan-

166 *Lib. II. Prop. X. In sola Rom. Eccl. hominum salus.*  
dam supernaturalem animæ vitam, vel ad sacram  
potestatem Apostolis traditam, in successores pro-  
pagandam, vel ad delendas peccatorum reliquias.  
His omnibus adminiculis & præfidiis sectarij ca-  
rent, sine quibus præ naturæ infirmitate, homines  
salutem consequi vix possunt: præterquàm quòd  
benignissimus nostræ salutis auctor Christus Iesus;  
cui omnis potestas à Patre fuit tradita, hæc nobis  
remedia instituit, eorúmque vsum præscripsit, ad  
peccatorum veniam obtinendam; frustra igitur ad  
alia, nolente ac inuito Deo confugeremus. Itaque  
cùm in Ecclesia duntaxat Romana prædicta Sacra-  
mentorum remedia nobis suppetant, quid mirum,  
si in illa duntaxat saluari possimus.

## RATIO DVODECIMA

*Ducitur ex imitatione Christi.*

I. **D** Paulus enixè commendat, mandátque fi-  
delibus, vt Christum Dominum indu-  
ant, eúmque vitæ modum teneant, qui  
cum eo, quem Christus tenuit, consentiat; illud  
enim rarum exemplar est, in quod intueri debemus,  
vt vitam nostram, nouúmque hominem, vt vo-  
cant, ad eius formam componamus. Hinc idem cœ-  
pit facere, & docere, vt eius exemplis instituti, eius  
vestigiiis insistamus, vt quemadmodum ille fecit, ita  
& nos faciamus; exemplum enim dedit nobis, suis-  
que virtutibus præluxit. Hinc quisquis perfectus  
Christianus fieri cupit, Christum sequatur oportet,

tet, sese abneget, deliciis renuntiet, crucem portet, omnia vltro relinquat, Apostolorum exemplo, qui omnibus relictis sequuti sunt Christum: hæc autem nemo Christianus in dubium vertet, cum in sacris Codicibus perspicua sint.

II. Hinc Evangelica illa consilia, spontaneæ scilicet paupertatis; quisquis enim propter Christum omnia sua vltro relinquit, vltro pauper est: huic accedit perpetua Castitas, quam & Christum seruasse intactam, & vt Apostoli seruarent, auctorem fuisse, constat; nouum certè consilij genus fuit apud illam gentem, quæ generis propagationem tantè faciebat; hinc Christus de hoc consilio sermonem faciens, subiunxit, qui potest capere capiat. Omitto alia consilia, vt obedientiæ, spontaneæ macerationis, Paulus enim castigabat corpus suum, eosque impensè laudat, qui carnem suam crucifixerunt, & quæ desunt passionum Christi, vltro supplebant; Pauli autem imitatores esse debemus, vt Christum imitemur; *estote, inquit, imitatores mei, sicut & ego Christi.*

III. His positis, videndum restat, vtrum apud sectarios Evangelicorum consiliorum observatio vigeat; nihil haud dubiè minùs; vix nòrunt castitatis nomen, rem ipsam fugiunt; paupertatem & corporis afflictationem penitus abhorrent; nullum illis cum cruce commercium, cuius vel minimo signo muniri dedignantur. Ecclesiastica ieiunia è medio sustulerunt, & carnis vsum, certis diebus vitum, semper adhibent; cœlibatum ipsum vitio  
L 4 ducunt;

168 *Lib. II. Prop. X. In sola Rom. Eccl. hominum salus*  
ducunt; Christianam animi demissionem, rerum,  
que caducarum humanarumque contemptum, at-  
que adeò ipsam ignominiam & contumeliam non  
modò non appetunt, verùm etiã palmari odio  
prosequuntur. Igitur Euangelicorum consiliorum  
vix nomen nôrunt, rem ipsam minimè attingunt;  
Christum igitur, qui suo nobis præluxit exemplo,  
nullatenus imitantur.

IV. At in Ecclesia Romana prædictorum consi-  
liorum obseruatio viget; immò multa sunt homi-  
num millia, qui præfatam obseruationem profi-  
tentur, & ad illud vitæ genus, solemnibus votis se-  
se adstringunt. Fateor multos esse, etiã inter il-  
los, qui præfatum religiosæ ac strictioris vitæ insti-  
tutum amplexi sunt, quorum mores ab ea viuendi  
ratione alieni sunt. Neque est, quòd sectarij nobis  
hoc exprobrent, & corruptos multorum Catholi-  
corum mores, etiã illorum, qui sacris ministeriis  
addicti sunt, exaggerent; hæc vltro fateor, nec ope-  
ræ pretium esse puto, vanas excusationes contexere:  
sed quid tum? multi suo munere non defun-  
guntur, quos haud dubiè grauior pœna manet. Sed  
quis neget, multos esse, qui exemplo Christi vi-  
uunt, & consiliis Euangelicis perquàm accuratè  
parent; in iis integram castimoniam, summam ani-  
mi demissionem ac modestiam, mundi contemptum,  
ardentissimum erga Deum & proximum amorem  
& charitatem, Martyrij desiderium, voluntarias  
pœnas, & acerbam carnis macerationem, contem-  
plationis studium, aliâque huiusmodi non mirari  
qui-



quidem, ( res enim insolitas mirari solemus ) sed passim obseruare ac inspicere quiuisset.

V. Nihil tamen horum est extra Romanam Ecclesiam ; nec quisquam hoc negat ; vnde facili ratiocinio deduco, fieri non posse, vt ij saltem, quos Christus saluos non fore prauiderit, nisi consilia Evangelica sequantur, extra Ecclesiam Romanam salui fiant. Hinc, si vis perfectus esse, vende omnia, & da pauperibus, & sequere me : hinc mittens manum ad aratrum, & respiciens retrò, aptus non est ad regnum Dei : hinc quisquis semetipsum non abnegat, & non tollit crucem suam, & non sequitur Christum, eiusdem discipulus esse non potest : hinc demum illud, finite mortuos sepelire mortuos suos. Itaque ibi tantummodò est salus, vel salutis via, vbi est Christi imitatio, qui nobis suo præluxit exemplo, vbi vitæ Christianæ perfectio viget ; vbi Apostolica instituta florent ; scilicet in Ecclesia Romana : cùm enim apud sectarios cuncta hæc desiderentur, apud eos salus non est, apud quos Christi exempla, & consilia nullo sunt loco.

VI. Porro vt Christus vnus est, eidem Ecclesiæ vnico ac indiuiduo testamento omnia sua tradidit, legem scilicet, dogmata, præcepta, consilia ; illa igitur Ecclesia, penes quam sunt consilia, habet etiam præcepta ; & vicissim illa, quæ præceptis gaudet, gaudet consiliis, ne Christus diuisus sit, & lex Christi, aut religio Christiana multiplex. Cùm igitur sectarij consilia non habeant, præcepta non seruant ; sunt igitur extra salutis viam ; via enim

mandatorum ad vitam æternam ducit. Accedit, quòd, quisquis peccat in vno, factus est omnium reus; & quisquis aliqua in re Christum reiicit, in omnibus reiicit, nec enim Christus scinditur in partes; cùm ergo illi Christum reiciant pro consiliis, pro nulla re sincerè admittunt. Equidem in Ecclesia Romana multi sunt, qui præceptis, non consiliis parent; at consilia non reiiciunt; & sunt in eadem Ecclesiâ, qui eadem amplectuntur; igitur in Ecclesia Romana hæc Christianæ vitæ perfectio non desideratur, hæc sublimior ac tutior cælestis ac regię viæ semita, hæc Christianarum virtutum coronis, ac vltimum religionis nostræ complementum.

## RATIO DECIMA TERTIA

*Ducitur ex præcepto Pœnitentiæ.*

I. **N**Vlli sanè Christiano dubium est, quin Pœnitentiæ singulare præceptum sit, renouatum potius à Christo, quàm nouum aut recens sancitum: vt enim illa est nostræ mortalitatis conditio, quâ multis delictis & noxis obnoxii sumus; ita illa nobis incumbit necessitas, quâ admissa peccata singulari pœnitentiæ remedio eluamus. Hæc enim secunda est post naufragium tabula, cuius operâ saluari possumus, quam sanè nisi adhibuerimus, nulla salutis spes restat. Hinc illud: *Nisi pœnitentiam egeritis, omnes simul peribitis*: hinc Ioannes, vox illa deserti, nihil nisi pœnitentiam personam.

sonabat; hinc iussi à Christo Apostoli prædicare pœnitentiam in remissionem peccatorum.

II. Quòd autem in Ecclesia Romana sit pœnitentiæ Sacramentum, apud omnes Catholicos in Confesso est, quo sectarij penitus carent, quod ipsi vltro fatentur; immò nullum à Christo institutum esse contendunt. Sed cùm Ecclesiam Romanam, veram esse constet, per Datum XVIII. & Prop VII. & cùm ipsa errare non possit, per VI. atque in ea seruentur veri religionis ritus, per IX. haud dubiè tam solemne Sacramentum omnibus fidelibus proponere non potuit, quod falsum & spuriû censeri queat. Hic certè palmaris error esset, idque in re tanti momenti; quid enim de illo medico censes, qui lethali morbo correptis, falsum remedium præferberet; hocine est pascere & curare oves Christi, an verò perdere, seu mactare? Nemo igitur huius Sacramenti vim ac diuinam institutionem in dubium vertet, nisi qui errorem Ecclesiæ Romanæ affingat, quod dici non posse, passim iam suprà probatum est.

III. Nec est, quòd sectarij dictitent, se quoque illud pœnitentiæ præceptum exequi, ac dolere se de peccatis, ac pœnis spontè susceptis Deo facere satis. Nam illud quidem in veteri Lege locum haberet; at verò in lege gratiæ, in qua scilicet computruit iugum à facie olei, longè facilius remedium Christus Ecclesiæ suæ reliquit, cuius efficacitate, pœnarum sponte susceptarum ac doloris impuritas castigaretur. Enimverò antiquæ legis fidelibus id dun-

taxat

taxat remedij supererat, ad peccatorum veniam obtinendam, vt contritionem perfectam, ac purum amorem (de actualibus, vt vocant, loquor) adhiberent, quæ sanè contritio, perfecta scilicet, quàm difficile obtineatur, vix credi, nedum dici potest.

I V. Aliquid mollius noua lex gratiæ habet; alioquin peioris, quàm Iudæi, conditionis essemus; vt, pote qui, præter illam contritionem perfectam, spontaneam scelerum confessionem addere teneremur: præterquàm quòd hæc contritio perfecta post longam duntaxat corpusculi afflictationem, & carnis macerationem à Deo obtinetur, saltem vt plurimum, cum maximum donum Dei sit; Deus enim huiusmodi afflictationibus spontè susceptis mouetur, vt videre est in Niniuitis; & ad misericordiam flectitur; molitur nostris lacrymis cor Dei, & ira, quam peccata nostra excitauerant, extinguitur. At talem consuetudinem sectarij non habent, apud quos carnis maceratio locum hætenus non inuenit; immò hæc ab illis ludibrio habentur; pia scilicet, flagella, cilicia, aliæque huiusmodi pœnitentiæ instrumenta; & si quando ieiunia adhibent, publico indicuntur consilio, vel edicto, non quidem ad peccatorum remissionem, sed ad felicem suscipiendæ expeditionis euentum obtinendum.

V. Prætereà si ad peccatum originis expiandum, singulare Baptismi Sacramentum institutum est, an fortè actuales noxæ, vt vocant, singulari etiam remedio carere debuerunt? si perfectam contritionem & pœnitentiam Apostoli prædicare à Christo iussa

luffi sunt; quid noui subsidij, quid gratiæ, quid prærogatiuæ, Christi nomine mortalibus denuntiabant? quid tandem noui gaudij euangelizabant, dū idem imponerent onus, sub quo humana infirmitas dudum gemebat? Itaque cū nouum remedium pro actualibus noxis Christus Ecclesiæ reliquerit, Pœnitentiæ scilicet Sacramentum, vt certa fide tenemus, in qua Ecclesia Romana errare non potest, per Prop. vi. & cū à Christo præceptum Pœnitentiæ hominibus datum sit, illud certè sectarij exequi nequeunt, cū prædictum Sacramentum minimè agnoscant: hinc, vel hoc nomine, saluari non possunt, cū tam salutari careant remedio. Nec obstat, eandem vim contritionis manere; nempe fieri non potest, vt quis verè conteratur, si voluntate seruandi mandata careat, quā reuerà sectarij carent, cū hoc præceptum Pœnitentiæ à Christo institutum, & Ecclesiæ relictum exequi nolint.

## RATIO DECIMA QVARTA

*Ducitur ex præcepto Humilitatis.*

**I.** Christianam animi demissionem, quam vulgò humilitatem vocant, in mandatis à Christo habemus: *Discite à me*, inquit, *quia mitis sum, & humilis corde*; nisi efficiamini sicut paruulus iste, non intrabitis in regnum cælorum. Hinc illa sui abnegatio non modò commendata, verum etiam à pio Seruatore nostro mandata: hinc

Chri-

Christus exinanivit semetipsum, ut nobis exemplo suo præluceret; hinc honorum & diuitiarum contemptus, quo Christianam virtutem armatam & instructam esse voluit. Vno verbo, verba & exempla Christi Domini mirificam animi demissionem præferunt, quæ toto passim Euangelio ita inculcatur; quasi hæc virtus totius rei Christianæ primarium esset fundamentum; nec multa ratio deest, quâ id fieri operæ pretium erat, sed quia trita res est, neque hæc in parte vlla controuersia intercedit, hinc vltra hærendum esse non existimo.

I I. Itaque illa est trita & tuta salutis via, quam fides dirigit, Humilitas sternit; illa est, quæ tendit ad vitam, quâ itur ad astra, quam Christus suis vestigiis signauit; & quam, quisquis saluus esse vult, inire debet. Vtrum verò sectarij hanc viam ineant, & hoc Christi mandatum exequantur, iis profectò compertum ac perspectum est, qui huiusmodi hominum mores & indolem nôrunt. An fortè legitimum Ecclesiæ iugum excutere, modestiæ & Christianæ demissioni quisquam tribuet? intolerabilis profectò superbia est, iudicis partes assumere, dum reus es; prophetam agere, dum erras; oracula fundere, dum somnias; sacros libros interpretari, dum ipse deliras; hæc, ni fallor, luculenta sunt Christianæ humilitatis argumenta, & illustria specimina.

III. Lutherus publica edidit prædictæ virtutis exempla: Hinc iugum excussit, Romani Pontificis imperia detrectauit, Pontificios legatos & nuntios  
con.

contemptui habuit, religiosam obedientiam renuntiavit, legitimis potestatibus restitit, nemini unquam cedere voluit, seque omnibus, etiam antiquis Patribus anteposuit, ac neminem præ se unquam duxit. Calvinus eiusdem artis & indolis Homo fuit, ut vel ipsis historiarum ab iisdem sectariis scriptarum monumentis traditum est. Zwinglius, Melancthon, Carlostadius, OEccolampadius, Bucerus eiusdem farinae, seu furfuris homines extiterunt. Quid in schola huiusmodi doctorum doceri queat, quid ab iis sequaces ac discipuli discere valeant, nihil est, quod dicam, cum res ipsa per sese pateat.

IV. At in Ecclesia Romana, illustria humilitatis exempla passim habemus; viros doctissimos, qui spontè doceri volunt; nobilissimos, qui despiciatui haberi gestiunt; sanctissimos, qui nesciri ambiunt; Principes, qui purpuram in saccum, coronam in cucullum, regias in cellas, imperia in obsequia, lautissimas epulas in ieiunia, honores in contumelias ultro commutarunt; abiectis officiis sese ultro addixerunt, iisque Christi Domini exemplo, non sine suavissimo voluptatis sensu defunguntur. Hæc fortè sectarij explodunt, non sine cachinnis, eosque mentis & consilij inopes esse dictitant, qui hoc vitæ genus profitentur. Sed vel Euangelium mutandum est, vel certa fide tenendum, hæc & alia similia humilitatis exempla valde commendari, utpote quæ cum Christi & Apostolorum moribus mirificè consentiant.

V. Equidem inficias ire non possum, quin multi  
sint

sint in Ecclesia Romana, quos superbia in præceptis agit; neque negauerim, inter Ecclesiasticos, aliquos esse, immoderato turgentes fastu, Luciferi potius quam Christi imitatores; sed quid tum? Ecclesiæ vitio verti non potest, quæ sancta est, cum etiam Apostolico senatui sua vitia non defuerint. Immo & in claustris non rarò accidit, ut superbia vltimum locum non inueniat; sed quid inde? vitium priuatum est, & priuatorum? quis enim credat, homines in hac mortali vita, omnis peccati expertes esse? Hoc vnum sufficit; tale apud nos vitæ institutum esse, in quo præfatæ virtutis exercitatio præscribitur, eamque multi profitentur, licet nonnulli suo muneri defint; cum tamen apud sectarios nullus huiusmodi exercitationum vsus, sed potius contemptus existat. Vnde cum apud illos, euangelicum humilitatis mandatum nullo sit loco, quod tamen apud nos suum vsum habet, restat, ut concludam, illos à via salutis, in qua nos versamur, omnino deflectere.

## RATIO DECIMA QVINTA

*Ducitur ex præcepto correctionis fraternæ.*

- I. **H**Oc præceptum solemne est in euangelicis codicibus, eaque verborum formulâ conceptum, quæ nullum dubio locum relinquit: *Si peccauerit in te frater tuus, inquit, corripe illum inter te & ipsum solum, &c.* si verò non audierit, etiam



etiam adhibitis testibus, Dic Ecclesiæ, germanæ scilicet, legitimæ, & Catholicæ, quæ vna duntaxat est, per Dat. x. Quod sanè vltimi remedij loco Christus imponit; priuata enim correctio præcedere debet, quam si reus eo, quo par est, animo acceptarit, maximum sanè litis compendium est. Sin minùs, testes aliquot adhibendi sunt, vt fidem facere possint, tum charitatis arguentis, tum contumaciæ Rei; denique si nihil horum iuuet, Dic Ecclesiæ; & si Ecclesiam non audierit, sit tibi sicut Ethnicus & publicanus.

II. Imperium Christi manifestum est, quod licèt aliqui violent, fateor enim minùs frequentem huius præcepti vsum, tum quia humanis rationibus ducimur, tum quia correctio fraterna, in hoc rerum statu, in quo fortè multorum charitas refrigit, non rarò maioris mali causa esset; hoc tamen non facit, quin reuerà præceptum diuinum sit, ad cuius executionem, omnes omnino tenentur. Nec ab eo quifquam liber est; quod enim Deus iniunxit, homo abrogare non potest; quod sanè legem diuinam inter & humanam discrimen intercedit; nempe hanc, vt homines edunt, ita & abrogant; illam verò abrogandi facultatem non habent.

III. In Ecclesia Romana hoc præceptum exequimur; sic ad Ecclesiam eorum nomina deferre solemus, quorum fides suspecta est, aut mores salutis multorum noxij; nempe illi maximè in nos peccant, qui vt fidem nostram labefactare, ita animam nostram in salutis æternæ discrimen adducere co-

178 *Lib. II. Prop. X. In sola Rom. Eccl. hominum salus.*  
nantur. At sectarij, quibus idem onus incumbit, hoc munere defungi nequeunt, cum veram Ecclesiam non habeant; cui enim Ecclesiæ dicent? quibus Episcopis animarum suarum? quibus pastoribus, quorum cœtus totam Ecclesiam exhibeat? nempe Apostoli, eorūque successores totam Ecclesiam repræsentant, ut rectè monuit Augustinus, lib. 3. de Bapt. contr. Donat. & ut ait Chrysostomus, ille dicit Ecclesiæ, qui Præsulibus ac Præsidentibus dicit, ut iam suprâ inculcaui.

I V. An fortè Luthero? an Zwinglio? an Caluino? aliisque huiusmodi hominibus? sed hi Ecclēsia non sunt, ad quam delinquentes deferre iubemur; immò nec Ecclesiæ, nec in Ecclesia sunt, à qua turpiter defecerunt. Non habent igitur sectarij, ad quem confugiant pro correctione fraterna; modum igitur non habent, quo præceptum illud exequantur: at quisquis mandata non servat, saluari non potest. Dicere Ecclesiæ iubentur; sed ab Ecclesia desciverunt; Ecclesiæ, inquam, ut optimæ Parenti, sed illam pro matre respuunt; ut omnium controuersiarum iudici, sed ab ea iudicari nolunt, & ad suum Lutherum, aut Calvinum, transfugas scilicet, & Apostatas appellant.

V. Itaque apud sectarios præcepto correctionis fraternæ cum locus non sit, illud sanè ipsi non exequantur; ac proinde vel hoc nomine saluari nequeunt; quisquis enim diuina præcepta violat, salutem consequi non potest. At in Ecclesia Romana, hoc vitio non laboramus; habemus enim Ecclesiam, cui  
dica-

dicamus, ad quam in primis sectarios deferimus, qui certè in nos grauissimè peccant, vîpote qui non bonis, non famæ, non vitæ, sed animæ insidias moliantur, quod sanè grauissimæ offensionis loco habendum est; Ecclesia verò cognitâ causâ, illos benignè ad resipiscendum inuitat, atque hortatur, nec non eorum errores configit: sed cùm Ecclesiam non audiant, nec eius sententiæ acquiescant, pro Ethnicis & Publicanis habendi sunt; igitur inde concludo in Ecclesia Romana homines saluari duntaxat posse, in qua huius præcepti observatio viget.

## RATIO DECIMA SEXTA

*Ducitur ex præcepto vitandi scandala.*

I. **O**ffensio proximi, quàm vulgò scandalum appellamus, sub grauissimis poenis à Christo prohibetur: *Vae mundo à scandalis*, inquit, *si quis scandalizauerit unum ex pusillis istis, qui in me credunt, expedit ei, ut suspendatur mola asinaria in collo eius, & demergatur in mare.* Pusilli autem illi sunt Apostoli, quibus hoc ipsum iam Christus significarat: *Nisi efficiamini sicut paruuli, non intrabitis in regnum calorum, & : Quicumque humiliauerit se sicut paruulus iste, hic est maior in regno calorum. Qui suscepit unum paruulum talem in nomine meo, me suscipit; &, qui vos recipit, me recipit; videte ne contemnatis unum ex pusillis, quia Angeli eorum semper vident faciem Patris mei.* Itaque nemini dubium est, quin graui lege à Christo cautum sit, ne quis

180 *Lib. II. Prop. X. In sola Rom. Eccl. hominum salus.*  
huiusmodi offensionem, seu scandalum cuiquam præbeat.

II. At sectarij hac lege soluti esse videntur; nec enim maior offensio excogitari potest, nec maius scandalum, quàm illud, quod bonis omnibus afferunt. Quid enim, amabò, ad animorum perniciem atque ruinam non moliuntur, quas machinas & artes non adhibent, vt eos in errorem inducant, vt à vera Christi fide ac religione auertant, vt à bonis operibus amoueant? Ieiunas fortè? ad pocula & conuiuia inuitant; abstines à carnibus, certis statisque diebus? carnes apponunt & porrigunt; omnia sacra è medio tollunt, suisque salibus ac iocis condiunt; vno verbo, illud præsertim procurare nituntur, vt Catholicos in erroris ac perditionis societatem inducant.

III. Adde alia fortè grauiora; sacras ædes demoluntur, in quibus preces nostras Deo ac sanctis persoluimus; sacra disiciunt altaria, in quibus incrementum sacrificium offertur; sacras imagines destruunt, quas honorare solemus; æraria diripiunt, quæ Christi pauperibus distribuimus; vasa exportant, quæ sacris vsibus destinamus; sacerdotes aliosque Christi ministros trucidant, quorum operam ad res sacras tractandas adhibemus. Vno verbo, summo conatu ac omnibus partibus ad destruendam Romanam & Catholicam Ecclesiam conspirarunt; nec quisquam est, qui vel in dubium hoc consilium reuocet; aperta res fuit; tristitia etiamnũ extant huius machinationis monumenta; sic furor  
sub

sub zeli specie & larua suas partes egit.

IV. Itaque quis scandalum, quis offensionem neget; idque in re tanti momenti; vbi enim de salute ac felicitate æterna agitur, summa profectò rei est. En facinus non sine pœna, æternæ scilicet damnationis; nempe, *va homini illi, per quem scandalum venit*; quæ sanè comminatio nihil nisi cruciatus æternos sonat. Præceptum igitur Domini non seruat, quisquis ab Ecclesia Romana deficit; præceptum, inquam, vitandi scandala: quisquis autem præcepta non seruat, saluari non potest, vt patet, ac certa fide omnes tenemus; igitur extra Ecclesiam Romanam salus esse non potest.

V. Opponunt fortè sectarij, etiam apud Romanos multa scandalà subinde nasci; do vltro, multa esse, quæ deplemamus, immò execremur; multi enim sunt, qui saluti proximi certam perniciem afferunt, & probrosis factis aut facinoribus, grauissimam concitant offensionem; sed non in re fidei. Castitatem alterius labefactas, sed fides intacta manet, cuius operâ iactura castitatis reparari & resarciri potest; at sectarius fidem petit, columnam & firmamentum Christianæ religionis subuertit; præterquàm quòd plerique sunt apud Romanos & Catholicos, qui non modò proximi ruinam minimè procurant, sed illius salutem mirificè promouent, nullisque, ad hunc finem obtinendum, laboribus parcunt; pro quo etiam vitam cum sanguine haud ægrè profundunt.

## RATIO DECIMA SEPTIMA

*Ex eo ducitur, quòd sectarij non minùs à Catholicis & Romanis segregati sint, quàm olim Samaritani à Iudæis.*

I. **I**N hoc præsertim à Iudæis Samaritani discrepabant, quòd Iudæi summum sacerdotem ac templum haberent; utroque autem Samaritani carerent; illum quidem omnium controuersiarum in materia fidei & rituum supremum Iudicem, errare nescium; hoc verò, in quo supremo rerum omnium moderatori Deo ita sacrificia fieri ac offerri poterant, ut in eo duntaxat sacrificare liceret. Porro Samaritani utrumque negabant; nempe alios Sacerdotes & Prophetas ad id muneris instituerant, & alium destinarent faciendis sacrificiis locum; dolus Ieroboami gentem hanc in prædictum errorem induxerat, ut populi animos à Regibus Iuda magis ac magis abalienaret.

II. Quòd autem Samaritani errarent, ac hæretici essent, fidei oraculum est, à Christo Domino editum & publicatum; salus enim, inquit, à Iudæis est; nec ullus hac in re dubio est locus. Certum igitur est, errorem in fide fuisse utrumque negare, summum scilicet sacerdotem, ac templum Dei; huius quidem sacrificiorum & oblationum prærogatiua, illius verò supremam auctoritatem, quæ in materia fidei errori obnoxia non esset. Porro Aaron prædictum honorem sacerdotij à Deo acceperat, innumeris  
ferè

*Rat. XVII. Sect. à Cath. ut Samar. à Iud. segregati.* 183  
ferè miraculis confirmatum : ab eo verò successio-  
nis iure , ad posteros ac successores prædicta aucto-  
ritas traducta fuerat , vt patet , & ab aduersariis vl-  
trò datur.

III. Tam Christûs Petro supremum sacerdotiû ,  
primique Pastoris munus contulit , quàm Deus , vel  
Angelus Dei nomine ipsi Aaron ; immò luculen-  
tiora loca & testimonia pro Petro , quàm pro Aaron  
nobis suppetunt , quæ iam suprà indicauimus , & ad-  
huc infrà exponam. Petro enim clauces cælorum tra-  
ditæ , ligandi atque soluendi potestas collata , fides  
illius verbo Domini confirmata , fundamentum Ec-  
clesiæ in eo collocatum , pascere oues & agnos trina  
indictione iussus est , ab aliis Apostolis consultus ,  
primo concilio præfuit , primûmque illud oraculum  
pronuntiauit , *visum est Spiritui sancto & nobis.* Ab  
ipso verò Petro tam in eius successores Pontificium  
traductum est , quàm ab Aaron in summos Iudæo-  
rum Sacerdotes ; & par vtrique ratio est , immò po-  
tior pro Petro , qui illius Ecclesiæ caput fuit , aduer-  
sùs quam portæ inferi nunquam præualerent ; quod  
certè de Synagoga , cuius Aaron caput fuit , dici  
non potest , aduersùs quam , lege gratiæ inducta , por-  
tæ inferi præualuerunt , cùm ante sæculi consumma-  
tionem destructa sit.

IV. Quòd autem sectarij tam reiiciant Roma-  
num Pontificem , quàm olim Samaritani Hieroso-  
lymitanum sacerdotem respuebant , certo certius  
est ; nec vllus videtur esse disputandi locus ; nec ma-  
gis illi Ecclesiam Romanam agnoscunt , quàm isti

184 *Lib. II. Prop. X. In sola Rom. Eccl. hominum salus,*  
Hierosolymitanam admitterent; utrobique schisma  
& diuortium fuit, nec non defectio à legitimo Ec-  
clesiæ capite. Hinc verum Dei templum, acceptum  
sacrificium, summus sacerdos, legitimus cultus,  
germana Religio; illinc verò Bethel, vituli aurei &  
Baal, cultus illicitus, nulla religio, sacrilegum sa-  
crificium, schisma demum & hæresis.

V. Ut igitur salus à Iudæis tunc erat, ita à Roma-  
nis nunc est; & ut Samaritani olim extra viam salutis  
erant, ita modò sectarij extra viam salutis sunt; par  
vtrinque, immò eadem ratio, nisi quòd longè plu-  
ra esse videntur, in quibus sectarij errant, quàm  
olim essent, in quibus Samaritani errabant. Hinc il-  
li potiori iure à via salutis, quàm isti excludendū  
sunt: præterquàm quòd in tanta doctorum & san-  
ctorum Patrum turba, in tot Conciliorum definitio-  
nibus, rebus fidei plus lucis modò affulget, quàm  
olim affulgeret; nec enim dubium est, quin Euan-  
gelium multam lucem diuinis oraculis attulerit. Ex  
his igitur rectè concludo, in Ecclesia Romana dun-  
taxat homines saluari posse, quæ scilicet Synagogæ  
successit.

## RATIO DECIMA OCTAVA

*Ex eo ducitur, quòd ij omnes, qui ab Ecclesia Ro-  
mana hætenus descinerunt, pro hæreticis  
habiti fuerint.*

I. **H**Æc ratio summi ponderis esse videtur,  
cùm enim certum sit, hominem hæreti-  
cum



*Rat. XVIII. Desertores E. R. pro hæreticis habiti.* 185  
cum saluari non posse, & cum nemo vnquam ab Ecclesia Romana desciuerit, qui pro hæretico habitus non fuerit, inde facilè deducitur, nullum ex iis, qui ab Ecclesia Romana defeecerunt, saluari posse. Quòd autem ij pro hæreticis habiti fuerint, probatissimis historiaꝝ monumentis traditum est: de Manichæis, Arianis, Monothelitis, Pelagianis, Nestorianis, ne ipsi quidem aduersarij à nobis dissentiunt; de Græcis fortè negabunt. Sed quoties de illorum ad Ecclesiam Romanam reditu actum est? quoties illorum errores detecti, atque damnati? consulantur auctores, vnus Bessarion ad instar omnium erit; cum enim ipse Græcus esset, suspectus esse non potest. Non diffiteor, illis in quibusdam Authoribus tribui, quæ non omnes docent: vt videre est apud Leonem Allatum.

II. De Albigenis, Valdensis, Hussitis, idem iudicium esto, quorum etiam errores huius temporis sectarij agnouerunt, ac refutarunt, licet eos in communem contra Catholicos conspiracy ac societatem admiserint. Lutherani, Calvinistæ, Anabaptistæ, aliique eiusdem furfuris homines pro hæreticis iure habentur. Hoc negas? hoc probo: Ab eo iudice damnati sunt hæreseos, ad quem hoc iudicium pertinebat; nempe in controuersis fidei iudicandis suprema potestas in Ecclesia relicta est, per Dat. xvii. & de auctoritate iudicis constare debet, quòd legitima sit, per Dat. xvi. nec non Ecclesia Romana vera est Ecclesia, per Dat. xviii. quæ sola fidem retinuit, per Prop. viii. Vnde concludo, extra

illam, veram fidem non esse; errorem igitur & hæresin; igitur quisquis ab ea deficit, pro hæretico iure habetur.

III. Itaque cum sectarij ab Ecclesia Romana hæreseos damnati sint, pro hæreticis iure habentur; cum enim in suis iudiciis ad fidem pertinentibus errare non possit, per Prop. vi. quia vera & legitima duntaxat est Ecclesia, per Prop. vii. hoc iudicium verum est, ac iusta sententia. An fortè negas? audio legitimum iudicem, Petrum scilicet, cui pascendi gregem Dominicum cura credita est, potestas iudicandi, ligandi, soluendi tradita, claves regni cælorum datæ, cuius fides divina promissione confirmata est, vel, ut sic loquar, canonizata, *Oramus pro te Petre. ne deficiat fides tua*; illius ergo standum dictis, vel oraculis: Petrus asserit, Lutherus negat; utriquæso habenda fides? an ullus restat deliberationi locus?

IV. Quod autem pro hæreticis ab Ecclesia Catholica habeantur, illi haud dubiè in controuersiam non vocant; extant Romanorum Pontificum constitutiones, & diplomata, nec non OEcumenicorū conciliorum canones & anathemata; accedit præterea communis omnium conciliorum consensus: vno verbo, cum Ecclesiam non audierint hætenus, nec etiamnum audiant, sunt nobis sicut Ethnici & Publicani. Nec est, quod ipsi reponant, penes se veram Ecclesiam esse; vera enim Ecclesia Romana est, per Dat. xviii. ac præter illam nulla, & nullibi alia, per Prop. vii. Cum igitur Ecclesiæ Romanæ legibus

gibus ac præceptis non pareant, haud dubiè Ecclesiam non audiunt, igitur pro hæreticis habendi.

V. Atqui nemo hæreticus, quamdiu non resipiscit, saluari potest, fides enim sperandarum rerum substantia, basis, & fundamentum est; speramus autem in primis salutem, æternamque felicitatem; sublato igitur spei fundamento, spes ipsa stare non potest. Sed hæreticus fidem non habet, veram scilicet, quæ ad prædictum finem conducit, sed spuriam; ubi enim hæresis est, fides non est; igitur sectarij, qui hæresin profitentur, salutem sperare non possunt; igitur neque saluari, quamdiu scilicet errori pertinaciùs adhærescunt: igitur in Romana duntaxat Ecclesia, quæ nec hæresi, nec errori obnoxia est, saluari possumus.

## RATIO DECIMA NONA

*Ex eo ducitur, quòd claves regni calorum Petro duntaxat data fuerint.*

- I. **H**Æc ratio palmaris esse videtur; quisquis enim cum Petro non sentit, in cælum ingredi non potest; aditum scilicet prohibente Petro, cui claves & fores à Deo commissæ sunt. Est autem clavis auctoritatis Symbolum, quasi tessera: hinc dum Rex suæ ditionis civitates lustrat, urbium claves, in promissionem fidei ac clientelæ magistratus illi offerunt. Ita prorsus cum Christus Vicarium instituere vellet, qui eius loco Ecclesiæ  
præ-

præfset, Petrum elegit, eique suas vices demandavit, clauium scilicet vsum, vt vocant, tum ad remissionem peccatorum, tum ad poenarum impositionem; hoc enim est soluere & ligare: tum demum ad referendas facultates, & controuersias, in materia fidei subortas; hæc illa est clauis David, clauis scientiæ, quam Hieronymus aliique sanctissimi sacrorum codicum interpretes consuluerunt.

II. Et verò nemo salutem obtinere potest, nisi prius peccatorum remissionem consequatur, quam haud dubiè obtinere nequit, nisi virtute clauium; ab eo scilicet, qui potestatem remittendi peccata à Deo accepit. Nempe nobis constat de modo remissionis, quam scilicet Petrus, eiusque successores impertiri rectè dispositis iubentur; cur ergo alium gratis fingimus, quem in sacris literis non habemus? cur præscriptum nobis à Christo non adhibemus? cum enim peccatorum remissionem suo sanguine nobis compararit, haud dubiè illius muneris fuit ac bonitatis, huius sanguinis pretium tali vel tali modo applicare, vt scilicet eo frui liceret.

III. Quisquis igitur Petri clauis non agnoscit, illarum virtute peccatorum remissionem obtinere non potest; igitur nec salutem consequi. Porro sectarij clauis Petri non agnoscunt, nec Romani Pontificis auctoritatem admittunt; igitur peccata sua clauibus minimè submitunt; igitur clauium virtute non remittuntur; igitur vel inde saluari non possunt. Nempe licet potestatis clauium vsus Petro concessus, ab eius quidem voluntate & nutu dependeat

*Rat. XIX. Claves regnicolorum tantum Petro data.* 189  
deat (est enim soluendi ligandique libera facultas,  
item remittendi ac retinendi) ea tamen ratio insti-  
tuta est, ut rectè dispositis peccata dimittat, aliis  
verò retineat. Illi autem rectè dispositi censeri de-  
bent, qui sese clauibus submitunt, & prædictam  
auctoritatem agnoscunt, atque verentur.

IV. Cum peccator reus sit, aliquem iudicem  
agnoscat, oportet, eiusque iudicio stet; licet enim  
Christus supremus Iudex sit, iudicia tamen per se  
ipse non exercet, scilicet in hac mortali vita; illius  
igitur est, qui vicarij partes sustinet: nempe ut vi-  
cem gerit in pascendo ac regendo, ita & in iudican-  
do; Reus autem iudici sese submittit. Immo Chri-  
stus Apostolis pollicitus est, fore, ut ipsi aliquando  
federent, duodecim tribus Israël iudicaturi: si hæc  
potestas in publico iudicio iis concessa est, quidni  
& in priuato? si ad destructionem & damnationem  
iudicatorum, quidni ad ædificationem & salutem  
pœnitentium? ille autem pœnitens est, quem & de-  
licti pœnitet, & iudicem placare conatur. Quomo-  
do verò placabunt, quem non agnoscunt? quomo-  
do peccatorum veniam ab eo sperare possunt, cuius  
auctoritatem respuunt?

V. Ecclesia super hanc Petram ædificata est;  
quisquis ergo hac petra non nititur, in Ecclesia non  
est; sed extra Ecclesiam non est salus. Præterea  
quisquis non pascitur, deficiet in via; ad terminum  
igitur non perueniet: sed pascendi munus Petro,  
eiusque successoribus incumbit; sectarij à Romano  
Pontifice pasci nolunt; quid mirum, si deficiant in  
via,

via, nec salutis metam attingant? Deinde ouis rectore ac pastore indiget, non modò vt pascatur, verùm etiam vt regatur, doceatur; hinc oues Christi eius vocem audiunt; Christum autem audit, qui pastores ab eo relictos audit; at nisi regantur, à via salutis deflectunt; igitur nisi Pastorem, summi Pastoris Vicarium, scilicet Petrum, sequantur, saluari non possunt; quod cùm in sectariis desideretur, quid mirum, si saluari ipsi non possunt.

## RATIO VIGESIMA ET VLTIMA.

*Ducitur ex eo, quòd fides auditum, hic prædicantem, & hic legitimam missionem supponat.*

I. **F**ides ex auditu, vt nemo negat; auditus autem prædicantem supponit; nam quomodo audient, sine prædicante? & quomodo prædicabunt, nisi mittantur? ab eo scilicet, qui legitima auctoritate pollet. Romanorum fides germana est; quia ab iis prædicatur, & proponitur, quibus id munus incumbit; orauit enim Dominus, ne fides Petri vnquam deficeret, vt deinde fratres suos in fide confirmaret. Et verò nemo saluus esse potest, nisi nomen Domini, eo scilicet modo, quo par est, inuocauerit; quis autem illum inuocet, in quem per veram fidem non credit? quis ei credat, quem non audiuit? fides igitur ex auditu, auditus autem per verbum Dei.

II. Sed qui vos audit, me audit; Deus igitur audi.

*Rat XX. Fides audit. prædicant. & Missio requirit.* 191  
audiri non potest, nisi per eos; quos ipse misit;  
*Ecce ego mitto vos;* à quibus viam salutis discimus.  
Hinc scimus, à quo didicimus, scilicet à Pe-  
tro, eiusque successoribus, à quibus verbum Dei,  
veramque illius explicationem accepimus. Osten-  
dant, quæso, sectarij, à quo acceperint; à Lu-  
thero fortè, aut Caluino; sed à quo isti nouatores  
missi sunt; à Deo? proferant tabulas, quo signo,  
quo miraculo id euincunt; in sacris literis hoc non  
inuenio, quæ nec Lutheri, nec Caluini vnquam me-  
minerunt. Sed Lutherus, inquit, purum Dei ver-  
bum prædicat; quâ porro auctoritate, quo missio-  
nis iure hoc sibi arrogat? At non modò prædicat,  
sed explicat; qua fronte? quis hanc illi facultatem  
concessit? quis nescit, illum errori obnoxium esse?  
ergo eius dictis fides certa niti non potest.

III. Nos autem scimus, à quo didicerimus; à Pe-  
tro scilicet & Apostolis, legitimisque eorum succes-  
soribus, qui ex Deo sunt; & qui nouit Deum, audit  
eos. In hoc autem cognoscitur spiritus veritatis, &  
spiritus erroris; in hoc, inquam, vnde perspicuum  
discrimen petendum est, quod germanam inter &  
adulterinam fidem intercedit. Hinc sanè conclu-  
do, cum vna duntaxat fides sit, cuius operâ ad Deum  
accedimus, illumque inuocamus, ad æternam feli-  
citatem obtinendam; cum hæc legitimam prædi-  
cantis ac proponentis auctoritatem desideret, vt  
constat ex dictis; & cum hæc auctoritas, in hoc re-  
rum statu, vno duntaxat successionis iure obtineri  
queat (quisquis enim eam sese à Deo per reuelatio-  
nem

nem priuatam accepisse contenderet, si nullo eam signo probaret, pro seductore & Pseudoapostolo habendus esset) haud dubiè ius successionis à nostris partibus stat, cum successores Petri & Apostolorum habeamus. Vnde concludo, in Ecclesia duntaxat Romana veram missionem, ac fidem esse; Deumque, ut par est, inuocari; ac proinde homines in hac fide, & Ecclesia saluari duntaxat posse.

IV. Ad hoc rationis caput innumera ferè alia reduci queunt; nonnulla perstringo. 1. Quisquis in naui Petri non est, certo naufragio in mari huius mortalis vitæ addictus est: at quisquis Ecclesiam Romanam non agnoscit, in naui Petri non est; cum illa naui Petri sit, cuius scilicet Petrus caput & nauclerus est; igitur quisquis in Ecclesia Romana non est, ad salutis portum peruenire nequit. 2. Quisquis in Sanctorum communione non censetur, communem Sanctorum beatitatem consequi non potest; nempe ex communione gratiæ & meriti sequitur communio gloriæ & præmij: at sectarij, qui ab Ecclesia defecerunt, ad Sanctorum communionem non pertinent, nullamque in ea partem habent; cum hæc Ecclesiæ sit ac fidelium; ibi enim sunt sancti, ubi vera est fides & religio; igitur sectarij ad Sanctorum patriam peruenire nequeunt. 3. Extra ouile Dominicum nulla est salus; nec enim hædi saluantur, sed oues: sed ouile Christi Petri curæ subest; igitur quisquis Petrum summum supremi Pastoris Vicarium, eiusque Successores non agnoscit, intra ouile Christi non est; igitur saluari nequit.



*Rat. XX. Fides audit. prædicant. & Mission. requirit. 193*  
quit. 4. Quisquis lapis Templi Dei non est, in beata illa Hierusalem locum non habet : sed quisquis auctoritate ac fide Petri non nititur , lapis Templi Dei esse non potest ; templum enim Dei est Ecclesia , super hanc Petram ædificata. Omitto alia his similia , quæ cuius faciliè venient in mentem.

V. Itaque, ut finem tandem huic libro , & huic propositioni imponam ; iam , si fallor , perspicuum esse videtur , extra Romanam Ecclesiam neminem saluari posse, idque multiplici ratione à me demonstratum fuisse , breuiter quidem , ut res, ac præsens institutum postulat, accuratè tamen, eaque claritate, cuius breuitas patiens fuit. Scio ; contumacem ac pertinacem quempiam reluctari posse ; sed quid tum ? etiam obstinatus ; si oculos semper claudat, nolitque aperire, ortum solem non intuetur, nec illius lumine recreatur ; dicere tamen ausim , neminem esse ; qui si exposita rationum momenta paulò attentius ponderet, clarissimè non videat, rem propositam demonstrari. Si qui ex sectariis annuerint, plurimum gratulabor ; sin minùs, ægrè quidem fam, sincerum tamen animum ac voluntatem meam Deus videbit, atque probabit, quod summæ mercedis loco mihi est. Sed iam ad præcludenda aduersariorum effugia me accingo.

N      LIBER



# LIBER III.

## PROOEMIUM.

**H**IC tertius liber duobus iam præmissis locum & occasionem dedit; vt enim aduersariorum effugia præcludantur, ac nobis opposita refellantur argumenta, operæ pretium fuit, ea iacere responsionum fundamenta, & principia, ex quibus illæ, necessaria consecutione deducerentur, ac proinde opposita penitus corruerent. Nec aptior methodus adhiberi potuit, saltē meo iudicio, ad vitandas scilicet inutiles repetitiones, quæ non rarò ita, farciunt voluminum molem, vt centies aliquando, nec sine nausea, eadem repetita legere cogamur. Itaque ne iam actum agam, ea pro certis in hoc libro supponam quæ à me in prioribus demonstrata fuerunt, quod certè nouum cuiquam accidere non debet; iure meo vtor. Ex datis nonnulla demonstro, ex his porro demonstratis, ni fallor, euinco, opposita nullius momenti esse, & vix eo plausu digna, quem nacta esse dicuntur. Ad populum phaleras; illa pietas simulata impia est & ficta; misericordia im-  
mise.

misericors atque crudelis. Diuinæ bonitati minùs consultum à Romanis esse dictitant; faxit Deus, vt iustitiæ ipsi bene consulant. Ausim dicere, diuinam bonitatem & sapientiam in ea religionis institutione, quam Romani seruant, ita splendere, vt inde maximè fides nostra confirmetur. Fingamus hominem sapientissimum, aliquod religionis ac diuinæ cultûs huic rerum statui conueniens institutum, iam ab orbe condito, animo versasse, nonquam tam appositum, & commodum, tam præclarum & necessarium excogitare potuisset. Infinitâ sapientiâ opus fuit cum infinita bonitate coniunctâ, vt omnia tam aptè, tam appositè, tam perfectè componerentur. Nempe in nostra religione, omnia plana sunt & recta, & ad finem, quem Christus Dominus sibi proposuit, obtinendum, ita accommodata, vt nihil planius & rectius, nihil accommodatius esse posse videatur. Nulli sunt hiatus, nihil mancum, nihil superfluum omnibus incommodis itum obuiam: nullus morbus sine remedio, nulli scopuli, nullæ salæbræ, nodi indissolubiles nulli. Sed ad rem propositam venio, ac primo loco, ne quid dissimulem, effugium clarè ac nitidè expono, nihil affingo, nihil detraho, sed rem sincerè propono; tum subnecto responsionem, hic enim modus, quamuis simplicior esse videatur, rem tamen tum breuiùs, tum clariùs expedit, & iudicio Lectoris exponit.

## EFFVGIVM I.

*Petitur à Symbolo Apostolico communi.*

**C**Redunt omnes, inquiunt, quæ ad salutem explicitè necessaria sunt; non esse autem alia explicitè necessaria, quàm ea, quæ Symbolo Apostolico continentur, vel ipsa Theologorum auctoritate, & perpetuo Ecclesiæ usu comprobatur. Catholicos, ut vim argumenti elidant, non negare quidem, Symbolum credendorum summam esse, sed negare Symbolum à Protestantibus credi, ac plerosque dicere, quæ sint à vero aliena. Duo posse obijci, quòd Calvinistæ negent descensum ad inferos, deinde quòd protestantes omnes non credant articulum de Ecclesia. Quod primum attinet, quum Gentes aliquot Christianæ non habuerint in symbolo suo descensum ad inferos, inde constare, non esse de illius integritate, adeoque in Nicæno esse omissum: quod alterum, credi articulum de Ecclesia, prout super ea verba conceptus primò fertur, & explicatur ab antiquis Patribus; interpretationem Romano-Catholicam esse novam; illi tantùm Ecclesiæ particularem, credi ab omnibus Ecclesiis, ut declarata fuerit in Synodis Oecumenicis.

PRÆ-

## PRÆCLVDITVR.

I. **N** Vllum Symbolum illis ac nobis commune est; quod enim ipsi tenent, nos reiiciamus; quod verò tenemus, ipsi reiiciunt. Nos credimus Christum descendisse ad inferos, ad inferiores scilicet partes terræ; hic enim articulus, *descendit ad inferos*, ita explicatur, & intelligitur à sanctis Patribus, tum Latinis, tum Græcis, quorum citationes tu vide sis apud Bellarminum lib. 4. de Christo c. 14. Calvinus hac interpretatione reiecta, nouam commentus est, lib. 2. Inst. cap. 16. §. 10. & 11. Descendit ad inferos, inquit, id est, pertulit in Cruce diros cruciatus damnati ac perdit hominis, vt coactus fuerit, vrgente angustia, exclamare, Deus meus, vt quid dereliquisti me! Hanc expositionem confirmat Catechismus Heidelbergensis, qui apud plerosque Calvinistas parem ferè cum Scriptura auctoritatem habet, scilicet quæst. 44.

II. Præterea nos credimus Ecclesiam Romanam, nec aliam pro Apostolica & Catholica habemus; illi hanc non credunt, sed aliam. Eadem igitur non credimus, ex iis scilicet, quæ sunt explicitè credenda; igitur idem fidei Symbolum non habemus, vt pote quod verbis & sensu constat: verba fortè communia sunt, at sensus varius est; Symbolum igitur varium. Idem in nonnullis aliis articulis facile ostendi potest, v. g. in peccatorum remissione, & Sanctorum communione; illi enim diuersum à nostro sensum his verbis tribuunt, quem sua fide com-

plectuntur, nos vt hæreticum damnamus, ac oppositum certa tenemus fide. Vnum igitur ac idem nobis illisque Symbolum non est; quia diuersa fides; igitur diuersa Ecclesia, per Prop. II.

III. Prætereà quòd aliquot Ecclesiæ prædictum articulum de descensu ad inferos non habuerint, quid tum? appellandæ fuissent illæ Ecclesiæ, vt de illarum fide iudicare possemus. In Nicæno ommissus fuit; ita est, nec habetur in Constantinopolitano, quod licèt maiori ex parte cum Nicæno idem sit, unde à quibusdam pro eodem accipitur; nonnulla tamen de Spiritu sancto, & Ecclesiâ Constantinopolitanum subiunxit, quæ Nicænum omiserat. Deinde ab Ecclesia contra errorem Græcorum hæc formula *filioque* annexa est; quæ in Symbolo quoque Athanasij legitur, quod Ecclesiæ auctoritate receptum est, vt quasi regula fidei habeatur, vt ait D. Thom. 2. 2. q. 1. a. 10. ad 3. Quid porro Symbolo addendum, quid detrahendum sit, pro diuersa temporum ratione, Ecclesiæ incumbit decernere, in qua scilicet omnium controuersiarum ad fidem pertinentium iudicem agnoscimus, per Dat. xvii.

IV Quòd autem dicunt, credi à se articulum de Ecclesia, prout super ea verba conceptus primò fertur, dare non possum; nempe is primò sensus illorum verborum est, vt vera Ecclesia sit. Sed ipsi veram Ecclesiam non credunt; Romana enim vera est Ecclesia, per Dat. xviii. eaque sola, per Prop. vii. Romanam autem talem esse, non credunt, vt patet; Ecclesiam igitur non credunt. Nec antiqui Patres  
aliam

aliam vnquā Ecclesiam agnoscere potuerunt, quā veram, de qua scilicet hunc articulum intelligerent. Vel vnum adducere debuissent, qui Ecclesiæ Romanæ partes secutus non fuerit; vel vnum Synodi cuiuspiam OEcumenicæ canonem, qui hanc veritatem in dubium reuocarit. Omnes vnā Ecclesiā Catholicā & Apostolicā prædicant, verā & legitimā Christi sponsam, corpus, domum, templum, columnam, ouile, omnium fidelium matrem; illa autem Romana est, vt constat ex Prop. VII. Nec ideo Catholica vel vniuersalis est, quod omnes Christianos complectatur, sed omnes fideles, nulla habita ratione, vel facta distinctione Iudæi vel Græci: ille autem fidelis est, qui veram Christi fidem proficitur. Quod autem fides nostra ab illorum fide omnino differat, patet per Prop. IV. porro Ecclesia Romana fidem & dogmata non mutat, per Prop. V. sed veram & diuinam fidem sola retinuit, per Prop. VIII.

V. Quod spectat ad auctoritatem Symboli Apostolici, frustra illam hoc loco demonstrarem, quod iam omnes ferè controuerfiarum auctores egregiè præstiterunt. Porro duodecim huiusmodi articulorum omnes ferè Patres meminerunt, vt Augustinus serm. 115. de tempore; & quia nonnulli dubitant, an is sermo D. Augustini sit, alia loca non desunt, v. g. in Enchiridio cap. 34. & 64. & lib. de fide ac symbolo cap. 4. Augustino accedant alij Patres, vt Clem. lib. 7. const. Apostolic. Irenæus lib. 1. contra hæres. cap. 2. & lib. 3. c. 4. Epiphan. Hæresi 68. Leo serm. 11. de pass. & epist. 8. 13. & 25. Chrysost. ho-

mil. 12. de Symb. Ambros. lib. 1. de Spirit. sancto, & Epist. 81. & serm. 38. Maxim. homil. de tradit. Symbol. Venant. Fortunat. in exposit. Symb. Alcuin. de off. Eccles. cap. 22. Raban. de instit. Cleric. lib. 2. c. 56. omitto alios breuitatis causâ. Denique quòd huiusmodi Symbolum, nō scripto quidem, sed quasi per manus ab ipsis Apostolis profectum ad nos, nunquam interrupta traditione, peruenerit, omnino extra controuersiam est. Et hæc ad præcludendum hoc effugium sint satis, cū inde potius oppositum euincam; nam commune nobis & illis Symbolum non est; igitur nec fides communis; igitur nec communis Ecclesia.

## EFFUGIUM II.

*Ducitur ex eo, quòd Ecclesia novos articulos fidei condere non possit.*

**E**A, quæ sunt homini saluando, ad salutem necessaria, sunt institutionis diuinæ, inquit, quæ non cognoscitur ab Ecclesia illa proponente, nisi ex reuelatione à Deo facta Prophetis & Apostolis. Ecclesiam enim vniuersam, & multò minùs Pontificem, non posse condere articulos fidei, omnium consensu constat; rationi igitur omnino consentaneum est, quòd omni tempore eadem sint, ad quæ credenda, homo obligatur, seu creditu ad salutem necessaria. Reuelatio autem alia non extat, præter eam, quam scripturis diuinis comprehensam habemus. Quòd si dicas, aliam etiam



etiam eodem tempore Ecclesiæ factam esse, quæ traditione tantum conseruetur, quum illa quoque revelatio per Apostolos & Evangelistas Ecclesiæ innotuerit, fieri non potest, quin illam revelationem videamus in scriptis vetustissimorum Patrum expressam, atque eam observemus in usu & praxi Ecclesiæ, Apostolorum tempora secutæ; ita ut Scriptura diuina scriptæ revelationis, usus autem & praxis Ecclesiæ primitivæ, traditæ norma & regula appellari debeant; eadem enim traditionis diuinæ, quæ humanæ erit ratio. Hanc rectè in dubium vocamus, si omni coætaneorum & subsequentium auctorum testimonio destituatur; qua ratione pleraque, quæ fabulosa irrepperunt, eliminamus. Quod si igitur, sub traditionis diuinæ schemate, aliquid venditatur, cuius in scriptis veterum Patrum, atque in usu, & praxi Ecclesiæ, nulla facta fuerit mentio, illud pari ratione meritò suspectum esse potest.

Nunc ergo secundum utramque hanc credendi regulam, quarum priorem omnes, alteram nonnulli tantum protestantium admittunt, exigenda fuerint, quæ in Romana Ecclesia proponuntur, ut vnum eorum neganti, denegetur Ecclesiastica communio. Quod si fiat, aiunt, facile probari posse, quanto opere deficient Ecclesiæ Romanæ probati testes: rem in primis esse manifestam, quod communionem sub utraque, cultum imaginum, indulgentias, eiusque thesaurum, coelibatum Clericorum, & delectum ciborum sub necessitate omnibus impositum spectet. Errare igitur Ecclesiam Romanam, quod libertatem

credendi, circa ea adimat; quia tamen, quæ sub illa ratione, non evertunt ea, quæ omnium consensu creditu necessaria sunt, ideo quoq; neque illi fraudi fore, quòd ea insuper credat; neque protestantibus, quòd eiusmodi secundum S. Scripturæ & Ecclesiasticæ traditionis regulam, non admittant.

## PRÆCLVDITVR.

**P**Ræter utramque regulam à vobis propositam, tertiam, eamque potissimā, cum sine illā gemina illa ad amissim reduci nequeat, admittendam esse contendo. Nec enim sacra Scriptura, & multò minùs traditio Ecclesiastica, in controuersis ad fidem pertinentibus, iudex vel vltima regula esse potest, per Dat. XIII. eùm de vtraque dubium, seu controuersia suboriri possit: immò vna est propria & vltima duntaxat fidei regula, per Dat. XII. eaque in Ecclesia, per Dat. XVII. His autem semel admissis, opposita penitus corruunt: debet enim esse, qui de vestra scriptura iudicet, qui libri canonici, qui dubij, quis locorum difficultium sensus, qui errores irrepperint; quid à vobis additam, quid detractum, quæ traditio legitima sit, quæ spuria; quis antiquæ Ecclesiæ vsus, quæ praxis, quibus verborum inuolucris antiqui Patres sacra nostra descripserint. De his, inquam, quæ in controuersiam cadere possunt, & re ipsa cadunt, immò de his acriter vobiscum disputamus; dicimus enim, antiquum Ecclesiæ vsum à nobis retineri, in his saltem,

tem, quæ ad fidei ac morum substantiam spectant, vos ipsi negatis; en litem; quis iudex, nisi Ecclesia, per Dat. xvii. eaque Romana, quæ vera est, per Dat. xviii. eaque sola, per Prop vii. quæque in suis iudiciis ac decisionibus errare non potest, per Prop. vi.

II. Præterea, Ecclesiæ Romanæ dogmata ad fidem & mores pertinentia, multiplici antiquorum Patrum auctoritate, quasi gratuita & vltro tributa opera, auctores nostri confirmarunt, quos tu vide sis, puta Bellarminum, Horantium, Cocleum, Malderum, Perronium, Valentiam, Suarem, Becanum, Richelium, Gonterium, Gualterium, aliisque ferè innumeros, qui hoc munere, pro dignitate defuncti sunt. Neque huius instituti ratio postulat, ut iam actum agam, præsertim cum hoc loco dogmata non discutiamus, sed nonnulla refellamus Aduersariorum capita, in quibus comprobare nituntur, communem quamdam omnium Ecclesiam esse, ex Romanis scilicet, Protestantibus, Calvinistis & Græcis schismaticis compositam Igitur quod indicatis de communione sub vtraque, imaginum cultu, indulgentiis, thesauro, cœlibatu, & ciborum delectu, quid de his tenendum sit, apud prædictos auctores facile inuenietis: sed esto, nihil apud illos sit, quod istorum dogmatum veritatem euincat; vel huic vni argumento cedendum est.

III. Ecclesiæ legibus parendum esse, certa fide tenendum; an fortè negatis? *qui vos audit, me audit: Qui Ecclesiam non audierit, sit tibi sicut Esauicum & publica-*

*blicanus* : Obedite *præpositis vestris* , legitimis scilicet animarum nostrarum pastoribus. Vera autem Ecclesia Romana est, per Dat. xviii. & Prop. vii. quid huic igitur parere recusatis , dū vel Laicis sacram synaxim sub vna specie, vel Clericis cœlibatum, vel ciborum delectum statis certisque diebus imperat? Indulgentiæ & imaginum cultus ad dogmata pertinent, itēque realis præsentia Christi , quam vos Calvinistæ negatis. Quem in huiusmodi controuersis iudicem consulere possumus? Scripturam? traditionem? Patres? at vt nos pro causa nostra hæc adhibemus, ita & vos pro vestra adhibetis. Nulla igitur inde decisio, nulla causæ terminatio. At nutantes fortē in fide erimus? qui tamen regulam certam habemus, per Dat. xii. & supremam absolutamque in Ecclesia iudiciorum potestatem, per Dat. xvii. Porro Ecclesia, scilicet Romana, quæ vera est, per Dat. xviii. eaque duntaxat, per Prop. vii. hæc mihi dogmata proponit , hæc mihi præcepta imponit ; cur credere, cur parere recusarem?

IV. Testes vltra desideratis eosque probatos? abundè suppetunt, eorumque testimonia apud præfatos auctores habetis. At demus , testes etiam deficere; Testem res dubia, non certa postulat ; Ecclesia Romana Spiritus sancti ductu regitur, nec portæ inferi aduersus eam præualere queunt; nec fides Petri deficiet vnquam , vt in ea fratres suos , si quando opus sit, confirmet ; vno verbo, Ecclesia Romana, dum ea omnibus fidelibus proponit , quæ ad fidem & mores pertinent, errare non potest, per Prop. vi. testi-

testibus igitur non indiget; quamquam illi vltro producantur. Quòd novos fidei articulos condere nequeat, id est, novos reuelare, concedimus; quòd novos, iam olim reuelatos, & implicitè solummodò, vt vocant, creditos, credendos explicitè proponere possit, quis sanæ fidei neget? Nemo ignorat, innumera propemodùm esse Scripturæ loca, non adedò cuiquam obuia, & sensus omnino perspicuus sit; corpus Ecclesiæ in dies adolescit, ac perficitur, non modò fidei propagatione, & nouæ prolis accessione, verùm etiam nouorum luminum appulsu, quorùm opera, non quidem noua reuelantur, sed iam reuelata, nondum tamen probè comperta, explicantur; cuius rei mille suppetunt exempla. Hinc tot hæses atque errores, quibus tum hominum proteruia causam dedit, tum scripturarum obscuritas occasionem præbuit.

V. Præterea vt nonnulli vestrùm vtramque fidei regulam, ita aliqui alteram tantùm admittunt; fatentes reos habemus; isti ergo, aut illi errant. Nam vel illa regula vera & legitima est, ac proinde errori minimè obnoxia, vel fallax & spuria: si primum, quisquis eam reiicit, errat; si alterum, quisquis eandem admittit, etiam errat; quisquis autem in regula fidei errat, in ipsa fide non errare non potest, vt patet. Deinde Ecclesiam Romanam errare dicitis; si errat, quomodo vera est Ecclesia? quomodo in ea saluari possumus? quod vltro datis; an fortè quia in substantialibus non errat? sed in eo duntaxat, quòd libertatem nonnulla credendi adimat, quæ

tamen

206 *L. III. Eff. II. Eccl. non potest novos fidei art. conderere.*  
tamen ea non euertunt, quæ omnium consensu creditu necessaria sunt. Sed quid magis ad substantiam fidei pertinet, quam auctoritas errare nescia, in causis morum & fidei, quam sibi Ecclesia Romana iure vendicat? quam tamē vos minimē admittitis; quam realis Christi præsentia; quam Sacramenta Pœnitentiæ, Ordinis, Matrimonij, &c. quam res diuinæ gratiæ, liberi arbitrij, iustificationis; quis neget hæc ad substantiam fidei pertinere? quæ tamen plerique vestrum hæcenus negarunt.

VI. Frustra igitur concluditis, cuiquam fraudi non fore, quod nonnulla crediderit, quæ tamen Protestantes respuunt; id sanē fraudi, aut vitio nobis non vertetur. De vobis verò quid dicam, qui ea nō creditis, quæ nos creditu necessaria esse iuramus; ea tutò à nobis credi posse, ac sine salutis æternæ dispendio asseritis; nos tutò reiici non posse, nec sine certo salutis æternæ periculo asserimus; quæ pars, amabò, tutior? Vel enim necessariò credenda sunt; vt nos omni asseueratione affirmamus; vel non sunt necessariò credenda, licet ea credi possint: si primum, certum lucrum æternæ salutis nos manet, vos verò æternæ damnationis pœna; si verò alterum, vt nihil inde lucramur, ita nihil perdimus. Videte, quæso, quàm prudenter agamus: si credimus, nullum adimus periculum, sed certam æterni præmij spem; si verò non credimus, nullum inde fructum speramus, sed pœnam æternam timemus. Vno verbo, cū diuina fides vna sit, vna enim est credendi ratio, vt nihil reiici debet ex iis, quæ credenda, ita  
nihil

*L. III. Eff. III. Pleriq; errores sunt ex ignor. inuincib. 107*  
nihil credi ex iis, quæ credenda non sunt; nec minùs  
contra fidem peccamus, si quædam non reuelata  
credimus, quàm si alia reuelata non credimus.

EFF. V. G. I. V. M. III.

*Ducitur ex ignorantia inuincibili Lutheranorum  
& Calvinistarum.*

**Q**Vorum inquit, simplex ignorantia  
damnanda non est, neque error damnari  
debet, maximè inuincibilis, vti est plero-  
rumque; sed errores, quos Catholici in Lutheranis  
& Calvinistis, hi verò in illis comprobant, ita sunt  
comparati, vt eorum, circa quæ versantur, ignorantia  
innocua sit; igitur neque errores damnabiles e-  
runt, sed mutuò reuterari possunt. Ignorantia autem  
illa dupliciter considerari potest; vel enim sunt talia,  
quæ ex se & sua natura spectando fidem, in ordine  
ad omnes homines tutò ignorari possunt, cuius ge-  
neris multa sunt in Concilio Tridentino definita, &  
vel sunt eiusmodi, quorum notitia quidem requiri-  
tur, non tamen imputatur culpæ eorum ignoratio,  
si nullâ suâ culpâ contigerit.

Ad eundem modum, cum errore etiam circa ta-  
lia, comparatum est; in quo si quid vitij est, res tota  
redit ad primum proponentem; cæteris omnibus  
fuerit innocuus. Iam verò numerum inire eorum  
articulorum, quorum ignorantia innocua fuerit,  
haud difficile est, si consideremus, quæ fuerit mul-  
torum Martyrum, quæ plerorumque fidelium ex

vulgo conditio, ut illis fraudi coram Deo non sit, quod nemo fuerit, qui ipsis omnia proponeret. Ita alios quoque coram Deo, extra culpam futuros, quod eadem non rectè ipsis fuerint proposita; Iudæis olim & Gentibus non potuisse aliter obtingere æternam salutem, nisi per fidem in futurum Messiam, quantumvis quis & qualis esset futurus, plerique erroneè crederent. Quod si in primario articulo error aliquis innoxius esse possit, in promptu esse, quid censendum sit de reliquis.

### PRÆCLVDITVR.

**N**illus dubito, quin illa ignorantia, quam inuincibilem vocant (ego suprà inculpatam vocavi) à peccato excuset; idem prorsus de inculpato errore dicendum est. Præterea scio, diuinæ fidei dogmata duplicis generis esse, alia nempe sunt, ad quæ credenda explicitè ita tenemur, ut nulla nos ignorantia excuset, in ordine scilicet ad salutem; quarum autem illa sint, cum Theologi minùs inter se de iis conueniant, non est huius loci disputare. Sunt, qui putent dari posse ignorantiam Dei inculpatam; alii negant: dato verò, quod esse possit, fortè cum omnimoda omnium articulorum ignorance aliquis adultus saluari posset; nempe infans sacro lauacro tingi potuit; ubi verò adoleuit, breui post tempore, nulla mortali noxa obstrictus mori, atque adeò saluari; licet ea temporum & locorum ratio esse potuerit, quæ non passa sit,



fit, eum quidquā de Deo, vel religione audire. Idem de inculpato errore dicendum esse constat; sic multi ex Iudæis & Gentibus, fidem de Christo valde obscuram habere poterant, immò multa de Christo per errorem credere; fidem autem de Christo explicitam ante Christi aduentum ad salutem necessariam fuisse, probari vix potest.

II. Sed quamuis vltro dēmus, quidquid in hoc capite adducunt; quid tum? bene est; quisquis vestrum inculpate aliquem articulum ignorat, vel in eo errat, etiam inculpate, hoc nomine, ab æterna gloria nunquam excidet. Sed quā pauci sint, quos inculpata ignorantia, vel inculpatus error excuset, abundē sanē dictum est, in Prop. x. Rat. x. quā enim multa sunt, de quibus dubitatis; quæ per contumaciam, vel alio simili, eoque minùs honesto ducti studio defenditis; quæ religionem vobis incutiunt, & conscientiae stimulis mentem agitant; quæ rationē vestræ non faciunt satis; quæ non modicam vobis offensionem præbent, vel scandalum, vt vocant. Scitis, vnde vestra religio foedissimum ortū duxerit; ex quo fonte vestri errores hausti; quid Lutherum, quid Calvinum, aliósque vestrarum partium principes ad Ecclesiæ Romanæ excutiendum iugum mouerit. Quā illi sanctimoniā, quā virtute & pietate, quā indole fuerint, quā demum charitate, quo zelo accensi. Pauci sanē inter vos hæc ignorant; vos saltem magistri in Israël minimè ignoratis; vos ergo nulla ignorantia, nullus error excusat.

III. Præterea, esto, iis fraudi futurum non sit;  
O quod

quod inculpatè ignorant ; si tamen alia quapiam lethali noxa adstringantur , quod certè proclive esse , negari non potest , habita scilicet corruptæ naturæ ratione , cùm iis remediis careant , quibus à Deo peccatorum veniam obtinere possint , quis miserimum eorum statum non deploret : remediis , inquam , quæ à nostrorum Sacramentorum usu petimus . In hoc articulo errant v. g. quantumvis inculpatè volueritis , quòd scilicet per fidem , lapsum hominem iustificari falsò credant ; hic quidem error nouæ culpæ non vertitur , nec imputatur ; non tamen facit , vt reuera per fidè iustificentur , & ab aliorum peccatorum vinculis absoluantur . Hinc sanè videre potestis , quantum æternæ salutis detrimentum , ex hoc etiam inculpato errore nascatur ; nisi enim fortè hoc errore tenerentur , alia profectò remedia quærerent , ac de iis doctiores interrogarent , ac tandem diuinæ gratiæ præsidio instructi peccatorum veniam obtinerent .

I V. Hinc sanè perspicuum fit , quàm leue ac friuolum sit , quòd de ignorantia , vt vocatis , inuincibili , & inculpato errore prætexitis ; cùm perrari profectò ij sint , quos inculpatus error excuset . Et quamvis hoc demus ; hoc tamen non facit , quin eorum conditio pessima sit , in qua iis mediis ac remediis carent , quæ Christus singulari certè beneficio suis fidelibus præparauit ; Sacramentorum scilicet efficaciam . Si enim Sacramentum Baptismi ac primam illam regenerationem excipiam , nullo alio gaudeatis Sacramento ; nempe nullam exhomologesim habe-

habētis, quæ secunda est post naufragium tabula;  
& prorsus necessarium reconciliationis Sacramen-  
tum. Veram quoque synaxim minimè adhibetis;  
si fortè Græcos sacris mysteriis legitimè initiatos  
excipiamus; nempe Calvinistæ præsentem Christum  
esse negant; Lutherani præsentem quidē agnoscunt,  
saltem in ipso vsu, defectu tamen validæ ordinatio-  
nis, ac potestatis, præsentem Christum non habent.  
Cum igitur hæc duo Sacramenta ad salutem obti-  
nendam, adultis adeò necessaria, vobis defint, quid  
mirum, si in eo statu sitis, non obstante quouis erro-  
re inculpato, in quo saluari minimè potestis.

## EFFVGIVM IV.

*Ducitur ex flagitiosis Cleri moribus, qui schisma-  
ti occasionem præbuerunt.*

**C**onstat, inquiunt, ante hos CXX. annos  
cum primùm hoc lamentabile schisma in  
Occidente exortum est, flagitiosissimos  
passim fuisse Cleri mores, magnam eius imperitiam  
& ruditatem, summam in instruendis in doctrina  
Christiana, & administrandis Sacramentis segni-  
tiem, corruptam fuisse Episcoporum vitam. In reli-  
quo Clero; præter alia grauissima vitia, concubina-  
tum perpetuum obtinuisse; curiæ Romanæ mores  
deprauatissimos, omnibus piis fuisse abominationi.  
Episcopos denique Urbis maximam partem ita se-  
gessisse, non tantùm in vita priuata, sed etiam in

gubernanda Ecclesia, quam nepotum direptioni exposuerunt, ut homines pietatis amantes nihil æquè optauerint, quàm eos esse alios. Constant, aiunt, illa omnia, ex illius temporis historia & scriptis, de corrupto Ecclesiæ statu, ab optimis & Catholicis viris, quin etiam sanctis, eo tempore editis; nota sunt gesta Alexandri VI. & Iulij II. Pontificum proximè Leonem X. antecedentium.

Adrianus VI. quum legatum suum F. Cheregatum ablegasset in Germaniam, ipse vltro passus est, in capite & membris necessariam esse reformationem. Idem visum est delectis à Paulo I V. iisque eruditissimis Cardinalibus, quibus id negotij datum erat; neque ipsum Tridentinum Concilium diffitetur, Ecclesiam indigere reformatione. Plura addere opus non est; nota illa sunt in vulgus, non ex scriptis tantum protestantium, sed etiam ipsorummet Catholicorum: quin igitur deplorandus ille Ecclesiæ status schismati occasionem dederit, dubium nullum est. Quamquam autem Lutherus & Calvinus sectarum principes fortè non satis excusari possint, quòd re non satis ponderata, dimiserint Ecclesiam, aut in reformatione Ecclesiæ, ab ipsis Pontificibus iudicata necessaria, & ab omnibus expetita, longiùs quàm fas erat, & ex usu Ecclesiæ, fuerint progressi; non id tamen iis obesse posse, qui obseruatis tam manifestis Ecclesiæ vitiis, eorum odio & studio sanctioris disciplinæ inducti, bono animo illos sequuti sunt. Quòd autem aliqui laxioris vitæ desiderio, quam sperare poterant rebus turbatis, aut spe prædæ ex  
bo-

bonis Ecclesiasticis capiendæ, eorum partibus sese addixerint, illos uti culpâ non carent, ita etiam neque poenâ esse carituros.

Negari equidem à nemine posse, quin maxima culpa penes curiam Romanam & Episcopos, atque reliquum Clerum resederit, qui indignati vitia sua, quæ omnibus horrore erant, à quoquam notari, non tantum non mutauerint, sed in sententia perstiterint, in id tantum intenti, quomodo minis & terroribus, non autem meliore sui mutatione, refragantes in ordinem redigerent. Ipsorum igitur culpâ & sceleratâ societate scissam fuisse Ecclesiam, cum illi, qui reformationi coeptæ assenserunt, maximam partem fuerint innocentes. Nunc verò etiam eò magis habendos immunes errore ullo graviore, quò altiores per educationem, & satis longam armorum seriem, in eorum animis radices egit amor religionis, quam sequuntur, cui tamen plerique ita adhæreant, ut profiteantur, se quàm lubentissimè, etiam reapse, iterum coalituros in vnam Ecclesiam & cœtum conformem, modò remoueantur obstacula, quæ maiores eorum primum mouerint, ut Pontificum minis coacti suas sibi res habere mallent.

Quamquam autem fortè aliqua mutata sint in melius, manere tamen adhuc pleraque, quæ schisma foueant, & incurabile reddant: eiusmodi esse Pontificum summam ambitionem, in eo maximè sitam, quòd sibi arrogant auctoritatem, ceu à Deo sibi collatam, statuendi de capite & fortunis quorumvis Regum & Principum, veluti iudicium orbis totius

illis competat : nunc etiam eorum studia nihil minus esse, quàm Ecclesiastica, cum tantum, neglectis cælestibus, ad res terrestres sint intenti. Cardinalium luxum & fastum vix amplius ferri posse; curiæ Romanæ rapacitatem neque nunc desisse; Episcoporum, in grege suo colendo, socordiam, & sacerdotum multorum vitam impuram etiamnum plurimis scandalo esse. Plura esse alia, quæ mutari oporteat, quò possit ex protestantium animis euelli opinio, quam conceperunt de Clero & Romana Ecclesia, ceu tota religio eò ab ipsis torqueatur, ut luxui eorum & studiis atque ambitioni seruiat. Hæc si mutantur, facilem fore viam ad plenam concordiam, facile tum inuentum iri rationes, quibus quidquid præterea est controuersiarum, sopiatur : interea autem, dum hæc non fiunt, neque illa emendantur, non posse sperari perfectam vnitatem. Suadendam tantum aliquam tolerantiam inter partes, dum Deus aliter prouideat ; esse Protestantibus quòd gaudeant, quòd se ex eo labyrintho expedierint ; & doleant eorum vicem, qui in eodem adhuc luto hærent, quos tamen absit, ut damnent, ut potius eorum misereantur, iisque precentur, quo eluctati, expeditius simul possint fieri regni cælorum participes.

Longè aliam nunc esse eorum rationem, qui hodie sese ab Ecclesia Romana separarunt, quæ olim fuerit segregatorum ab Ecclesia Catholica ; tunc enim Ecclesiam optimè fuisse constitutam, doctrinâ, sanctimoniâ vitæ, & morum puritate excelluisse ;

se; nec quidquam eos habuisse, quod in Ecclesia carperent præter fidem, quam ab iis non rectè tradi dicebant. Protestantes autem conuenire cum Romana in iis omnibus, in quibus illi dissenserint à Catholica; contendere autem tantum de iis, quæ confectaria sunt malæ Pontificum & Cleri vitæ, atque corruptelarum, quas ipsi Catholici in Ecclesia agnouerint, & grauitè doluerint. Siquid ab vna, aut altera parte mutatum sit, in illo æstu diffidij, quod satius fuisset relinqui, debere Ecclesiam Romanam eâdem vri animi moderatione, & laudata veteribus *συγκαταβάσει*, in eorum tolerandis infirmitatibus & defectibus, quâ, illi erga eam vtantur. Deinde etiam si quædam ab vno, aut altero sunt, ea non esse imputanda toti cœtui. Intereâ inuigilandum quotidie perfectiori Ecclesiæ reformationi, & gratias Deo esse agendas, quòd in quaque parte conseruari ea, quæ constituunt fidem Christianam, quâ Christiana est, &c. vti illa à Mahometana & Iudæorum, eorūque Christianorum, qui priora genera Concilia non admittunt, fide distinguitur.

## P R Æ C L V D I T V R.

I. **T**anto verborum apparatu opus non erat, vt crambem recoctam denuo condiretis; hic vester communis locus, hæc argumentorum vestrorum præcipua sedes est; hæc iam trita declamatio in corruptos Ecclesiasticorum mores. Sed demus, hæc ita esse, vt vultis; demus intolerabilem

bilem esse Romanorum Pontificum ambitionem; Cardinalium luxum, Episcoporum incuriam, sacerdotum socordiam, ac perditos totius Cleri mores; licet meras calumnias esse constet; atque inde Patriarchas vestros Lutherum & Calvinum occasionem accepisse desciscendi ab Ecclesia Romana: quid tum? ne quidem vos huiusmodi defectionem approbatis. An fortè Sacerdotum mores imitari Christus vos iussit? an fortè illius præcepti estis immemores? *Super cathedram Moysis sederunt Scribae & Pharisei, omnia quaecunque dixerint vobis, servate & facite, secundum eorum opera nolite facere.* Si Pastor ultro sese in fluviū præcipitem agit, quis gregem eò quoque ruere cogit? si consul insanit, cur ciuis sapere non potest? si delirant reges, cur miseri plebuntur Achiui?

II. Mirus certè mihi accidit huiusmodi ratiocinij modus: Romana curia vitiis scatet; ab Ecclesia igitur Romana discedendum est; res nostræ desperandæ; æternæ saluti valedicendum ac renuntiandum. Fidem non accusatis, sed mores, eosque privatorum hominum; nunquam enim Ecclesia Romana in moribus docendis erravit; utique nec errare potest per Prop. ix. cur ergo illius doctrinam reiicitis, quæ sana est? cur mores ab ea præscriptos reprobatis, qui sancti sunt? quid vestrâ interest, si pastores suo erga Deum munere non defungantur? modò sanæ doctrinæ cibo vos pascant, & sanctis legibus instituant. Exempla optatis; optandum reuerà esset, ut ij suo vobis prælucere exemplo; si tamen



men secus accidit, verbis, non exemplis; dictis, non factis standum est; ac Christi oraculo parendum, quis, amabò, non videt?

III. Quòd dicitis, iis obesse non posse, qui Lutherum & Calvinum secuti sunt, quòd observatis tam manifestis Ecclesiæ vitiis, sanctioris disciplinæ studio inducti, ab ea discesserint, dare non possum; extra Ecclesiam Romanam saluari nequeunt, per Prop. x. quid porro magis obesse possit non video. Supponamus autem, vobis morem gestum esse, ac ea vitia purgata, quæ vos tam acriter sugillatis; palàm omnino promittitis, fore, vt vestri omnes ad Ecclesiam redeant? si secus aliquis faciat, illum sanè non excusabitis. Eadem porro militat ratio, licet ea vitia non purgentur; fidem sequere, vitia fuge, ne si fugias fidem propter vitia, in longè maius ac perniciosius vitium incurras. Innocentes vocatis, qui ab Ecclesia desciverunt, Lutheri & Caluini exempla secuti; sed transfugas & apostatas insontes esse, nemo sanæ mentis facilè concedet. Ecclesiasticorum culpæ scissionem & schisma tribuitis; ille, nì fallor, criminis reus est, qui crimen patrauit; scissionis igitur, quisquis ab optima parente discessit. Nec est, quòd bonam prætexatis fidem, cui furor & libido nullum sanè locum reliquerunt. Deinde, esto, demus illam bonam fidem; illa quidem discessio culpæ ipsis non vertitur, eos tamen in eo rerum statu collocat, in quo iis remediis careant, quæ ad salutem necessaria iudicantur.

IV. Ambitioni Romani Pontificis tribuitis;  
O 5 quòd

quòd traditam sibi à Christo potestatem tueatur, eamque adhibeat, vbi opus est: quòd autem facultatem sibi arroget statuendi de capite & fortunis Regum, cum veritate minimè consentit; ipse tantùm pascendo gregi Dominico inuigilat, atque operam nauat; hæc autem spiritalia sunt, vt vocant, in quibus Reges & Principes subditos summus Pontifex agnoscit: nec enim, opinor, Christianos & Catholicos Reges ab ouili Christi excluditis, quod scilicet ipsius curæ creditum est. Denique nemo Catholicus ea concedet, quæ assumitis, in qualibet parte conseruari ea, quæ cōstituunt fidem Christianam; multa enim sunt, quæ ad fidei substantiam pertinent, in quibus nos à vobis dissentimus; nempe quod caput est, ipsam fidei regulam, quam adhibemus, vos ipsi non admittitis: sed hoc caput iam suprà ex professo versauimus, scil. Prop. i v. & Prop. x. Rat. vii. Frustra autem tolerantiam illam, seu moderationem ab Ecclesia Romana exposcitis; cuncta præter errores libentissimè tolerabit; erroris tamen vel minimum næuum tolerare non potest; quia tota pulchra est, omnis maculæ & erroris expers. Hinc antiquorum ac recentiorum Schismaticorum, impar ratio, vt dicitis, non est, cum in vtrisque fidem Ecclesia desiderârit; tam hi, quàm illi Catholica dogmata impugnabant; immò ausim dicere, plura esse, quæ à Calvinistis, vel Lutheranis impugnentur, quàm ab Arianis, Acephalis, Monothelitis, Pelagianis; quod quàm verum sit, nostri auctores, præsertim Gualterius, luculenter ostendunt.

V. Porro

V. Porro ex iis datis, quæ vos immeritò assumitis, pessimè concluditis, inde vestram defectionem excusari; nunquam enim peccatum iustam excusationem admittit; nec alterius culpa vobis imputatur, nisi consensu ac voluntate vobis eam vindicetis. In mandatis à Christo non habetis, ut ad sacerdotum vitam, si fortè impura est, vestram componatis; illi haud dubiè delictorum poenas dabunt: quod dicunt, credite, facite; quod faciunt, non credite, non dicite, aut saltem non facite: quamquam, ut iam supra indicaui, corruptos Cleri mores nimium exaggeratis. Vt non negauerim, aliquos in hoc gradu esse, qui eam morum sanctitatem non colunt, quam huius ordinis dignitas postularet, neque hoc mirum est, in tanta Ecclesiasticorum multitudine; ita quisquis veritatis amans est, inficias non ibit, quin plerique eiusdem ordinis eam vitæ formam teneant, quæ homines sacris ministeriis addictos plurimum decet. Inter Romanos Pontifices erunt sanè, etiam hisce temporibus, qui tanti nominis & muneris mensuram impleant; Marcellos, Pios, Adrianos, Gregorios, Clementes, iis sanè virtutum ornamentis instructos fuisse, nemo nescit, quæ non modicum huic summæ dignitati splendorem attulerant: Alexander VI. & Iulius II. aliquot fortè naui maximas alioquin virtutes suas macularunt.

VI. Præterea quòd Adrianus VI. ingenuè fassus sit, Ecclesiam indigere reformatione, in capite & in membris, antiqua vox est in Concilio Constantiensi audita. Quasi verò homines ipsi non simus, atque  
adco

adedò omni tempore Ecclesia membra corrupta non habuerit; hinc sanctorum Patrum querelæ. In primitiua Ecclesia non desunt huiusmodi corruptionis exempla: quid si vnus ex duodecim Apostolis Christum ipsum Iudæis vendidit & tradidit; vnus ex septem primis Diaconis hæresiarcha fuit; septem illi Episcopi, quos S. Ioannes obiurgat, à primo feruore defecerunt; innumeri ferè Episcopi Arij, Donati, Macedonij, Pelagij, aliorumque hæreticorum partes amplexi sunt; non tamen propterea ab Ecclesia Romana discedendum fuit. Cur igitur defectionis vestræ culpam in corruptos Cleri mores reiciitis? cur exprobratis reformationē in capite & in membris, quam optimus Pontifex Adrianus VI. pro eo quo erat animi candore necessariam esse iudicauit? cur potius humanissimam optimi Parentis monitionem contempsistis? Nempe ille paterna sanè oratione maiores vestros ad reditum hortatus est; eo fine tot nuntij delegati, tot legati destinati & missi; prima scilicet Ecclesiæ Romanæ capita, Alexander, Cheregatus, Commendonus, Delphinus, Caietanus, Campegius, Contarenus, Ceruinus, Moronus, Hosius, aliique eiusdem ordinis homines, quorum pretiosam operam maximis expeditionibus minimè imparem, inutilem reddidistis.

VII. Quid? quòd mores duntaxat corruptos carpitis; sed eximias virtutes & luculenta virtutum specimina, quæ nostri homines passim edunt in lucem, malignè reticetis: nempe in singulis ordinibus, illustri sanctimoniâ ac doctrinâ viros habemus.

mus. Sed more veſtro , virtutes in vitia conuertitis ; ambitionem vocatis , ſtudium retinendi ac defendendi ſua iura ; & auctoritatem à Chriſto Petro conceſſam , factum appellatis , illum exterioris cultûs apparatus , qui tamen cum Chriſtiana animi demiffione coniunctus eſt ; avaritiam eſſe dicitis , modicam Eccleſiaſticorum veſtigialium exactionem. Quid porro diceretis , ſi ſummo iure Romanus Pontifex vteretur ? illa paulò acrior Chriſti obiurgatio hîc fortè locum haberet , Hypocrita eiice priùs trabem de oculo tuo , qui feſtucam in oculo alterius adedò exaggeras. Fateor , Clerum noſtrum ita ſanum & integrum non eſſe , quia aliquid labis contraxerit ; ea quippe eſt noſtræ mortalitatis conditio , vt in qualibet multitudine eximij , pauci ; multi , mediocres ; nonnulli pravi ac vitiati ſint. Miniſtellos veſtros , immò & Patriarchas vobis ante oculos pono , vt eos cenſeatis ; Eccleſiam Romanam lapidibus obruere deſideratis ; adulteram illam Babylonem , ſic enim vocatis ; ſed , quæſo , quiſquis veſtrûm ſine peccato eſt , in eam primus lapidem mittat : ſeriò loquor , cùm agnoſcatis fidem ſanam in Eccleſia Romana , & mores duntaxat carpatis ; quid fidem ſanam , reiectis moribus , amplecti recuſatis ? Sed ad alia effugia veſtra gradum facio.

## EFFVGIVM V.

*Ducitur ex ea nonnullorum Catholicorum sententia, Gentibus scilicet notitiam naturalem de Deo sufficere.*

**N**onnulli sunt in Ecclesia Romana, & ex Societate Iesu in primis, eruditissimi Theologi, quorum hæc est sententia, quam Iustino martyri, Clementi Alexandrino, aliisque antiquis Patribus tribuunt; Gentibus, quibus Christianæ religionis notitia nulla est, sufficere notitiam naturalem de Deo, & de lege naturæ; si vitam secundum eam rectè instituant, ne damnentur. Quanto igitur magis censendi sunt æternæ salutis futuri participes, qui ea omnia credunt, quæ propriè & intrinsecè, atque ex sua natura à Deo, ad consequendam vitam æternam sunt ordinata. Quin verò Lutherani & Calvinistæ cum Catholicis in illis omnibus conveniant, dubium non est, quum omnes profiteantur Symbolum, vnà cum omnibus declarationibus, in antiqua Ecclesia editis; neque quicquam in præcipuis fidei nostræ articulis, Trinitatis & Incarnationis mutarint, nihil quoque in iis, quæ spectant ad vitam æternam, resurrectionem mortuorum, aliâque maioris momenti.

Si durum Theologis videtur, damnare ad inferos, qui colunt Deum, sicuti cognosci potest ratione naturali; quanto durius est & crudelius, stygiis obicere flammis eos, qui non tantum colunt Deum, vti cognosci potest, sed etiam quem-

quemadmodum ipse reuelavit, atque coli præcepit. Contendunt autem de rebus, quæ Dei cultum & honorem non spectant, atque bono animo dissident; de Pontifice non rectè sentiunt, culpâ potiùs illius, quàm suâ; cum ita plerumque viuat, atque ita se gerat, ut in honore nullo esse possit. Sanctos non inuocant, ne honori diuino, quicquam detrahere videantur. Indulgentias negant, quòd delibare aliquid de infinita meriti Christi efficacia videantur: ritus quosdam aboleuerunt, quòd arbitrentur, illorum multitudine, abstrahi potiùs animum à vero Dei cultu, qui in animi puritate & submissione consistat, quàm ut mentem eleuent; commendant verò orationem in spiritu & veritate. Sub utrâque malunt communicare, quòd eam institutioni primæ putent esse conformiorem: transubstantiationem non admittunt, quòd persuasi sint, non tantum nouam eam esse vocem, sed etiam veritatem verborum Christi, simplici, sed imperceptibili, nec ab humano ingenio curiosè scrutanda coëxistentia cum pane, saluari posse; mysteria autem, & in primis sublimia, non debere multiplicari, præter necessitatem. Presbyteris suis permittunt coniugium, quod idem etiã Seruator & Apostoli fecerunt, & quotidiano exemplo discamus, multos quidem esse cœlibes, sed paucissimos continentes. Pari ratione expendi posse, aiunt, reliqua, de quibus inter partes controuersia est; etiamsi errent, nullius tamen momenti errores esse præ reliquis, in quibus conueniant; cum etiam bono animo ab ipsis errari.

## PRÆCLVDITVR.

I. **Q**uid censeant eruditissimi Theologi, quos non citatis, scire non possum: vnum scio, sine fide nos placere Deo non posse; sine Baptismo in re vel in voto neminem saluari posse; accedentem ad Deum debere credere: scio quoq; communem esse scholasticorum sententiam, neminem adultum, propter peccatum originis duntaxat vnquam damnari; quod licet probabile sit, non tamen, vt arbitror, ab iisdem demonstratur, sed probabilibus solummodo argumentis comprobatur. Scio demum, verisimile esse, quod si adultus sacro lauacro non tinctus, legem naturæ intactam & integram seruârit, Dei prouidentia esse, illius saluti consulere: suppetunt autem innumeri ferè modi, quibus rem ad felicem exitum Deus perducat. Hoc tamen non probat, noticiam Dei naturalem, Deique amorem pariter naturalem, ad finem illum supernaturalem obtinendum sufficere; cum Baptismus, saltem in voto, necessarius sit, vt verba Christi cum veritate consentiant. Sed quid inde, quæso, deducitis? vestros scilicet, qui errore inculpato tenentur, minimè damnari? si nullo alio scelere obstricti sunt, facilè concesserim; nempe inculpatus error non imputatur, aut culpæ vertitur; sed rara avis in terris. Si verò alia scelera committant, cum remedio à Christo nobis parato careant, vix vnquam ab iis liberari, & exsolui queunt. Contritionis vi, inquires; sed quàm difficile? Itaque pauci sunt,



Ei sunt inter vos, qui errore inculpato ducantur, ut constat, tum ex Effug. I.II. tum ex Prop. x. Rat. x. Ex his verò paucis, nullus ferè animum ab omni labe mortali liberum seruat, atque adeò omnes delinquant; ex his autem pauci, immò ferè nulli, qui per veram contritionem culpas suas expungant. Per fidem, inquiunt; sed in hoc erratis; neque error, quamvis inculpatus sit, huic occurrit incommodo; nec ideo, quia hoc creditis, vestra fides peccati veniam vobis affert: vnde hoc argumentum penitus corrui, ac effugium inane præcluditur.

II. Frustra vobis idem Symbolum arrogatis, quod certè idem non est, ut suprà euicì in Effug. I. imò quod Tertullianus de Bapt. c. 15. de Hæreticis sui temporis habet, in vos aptè quadrat. Non idem Deus, inquit, nobis est & illis; nec vnus Christus, id est, idem Addo ea, quæ S. Augustinus Manichæis exprobrat. Qui in Euangelio creditis, quæ vultis, & in Euangelio non creditis, quæ non vultis, non Euangelio creditis, sed vobis ipsis. Nec durum dictu est, infidelem hæreticum, apostatam; stygiis flammis deuouendum esse, nisi resipiscat; nec bonus ille animus sufficit, qui & in paucis est, & eos, qui eò ducuntur, ab aliis peccatis non liberat. Quod verò subnectitis, nostrarum controuersiarum capita ad Dei cultum & honorem minimè spectare, stare nullatenus potest: quasi verò res sacrificii, Sacramenti, sacre ordinationis, consiliorum Christi, perfectionis Euangelicæ, diuinæ gratiæ, liberi arbitrii, iustificationis, auctoritatis Ecclesiæ, primatus Petri, aliæque

id genus ad diuinum cultum & fidem non pertinent? Nisi quis in media luce cœcutiat, sanè oportet, agnoscat, cuncta hæc ad diuinum cultum & fidem pertinere: quasi verò sola Trinitas, æterni Verbi Incarnatio, vtraque æternitas, carnis resurrectio, fidem nostram adæquent; dij vobis meliora.

III. Quod subiicitis de Romano Pontifice, stylo vestro indignum est; quæso, memineritis velim præcepti Apostolici, *Obedite prepositis vestris, etiam discipulis*. Quasi verò minùs Christiana vita cum iure suo, auctoritate sua spoliet; culpa vestra est, non optimi Parentis, qui vobis dexteram porrigit, amplexus & cor ipsum aperit, pro vestra conuersione preces & lacrymas ad Deum fundit; hæc grauis illius culpa est, hoc modo erga vos se gerit, ita viuit, vt apud vos in nullo penitus honore sit. Bona verba, quæso; res secus se habet, mihi credite; si leuiiores quandoque sunt nœui, magnis haud dubiè virtutibus expunguntur: quamquam, licèt etiam hoc demus, quæcunque dixerit vobis, seruate & facite, secundùm eius opera nolite facere. Vltimo loco delibatis nostrarum controuersiarum capita, Sanctorum cultum, indulgentias, ritus sacros, communionem sub vtrâque, transubstantiationem, sacerdotum coelibatum; hæc à nostris auctoribus agitata fuère, & pro dignitate discussa, vos videritis. Cæterùm quòd sanctos Dei amicos singulari cultu & obseruantia colatis, nihil certè honori diuino detrahit, cùm ad eius honorem & gloriam cuncta hæc refer-

ferantur. Indulgentiæ infinitis Christi meritis nō aduerfantur, cū illa potiùs supponant, vt Theſaurus inexhaustus ſit; Sanctorum enim merita finita ſunt. Ritus ſacri, quos adhibemus, animum à vero Dei cultu nullatenus auertunt, quin potiùs ad eum finem mirificè iuuant, & Chriſtianam animi demiffionem, pietatem, & diuini amoris ardorem non parū promouent: probate, amabo, nec enim vobis inexper- tis fides habenda eſt. Communio ſub vtrāque veſtræ optionis non eſt; legibus Eccleſiæ parendum, & rerum ſacrarum præſectis. Ridiculū dictu eſt, quòd cuique ad ſuam indolem ſacros ritus componere liceat. Transubſtantiationis res & nomen vobis non placent; nomen, inquam, quod nouum eſt: nomen etiam Trinitatis & conſubſtantialis in ſacris libris non reperietis. Vnum reponere ſit ſatis: Cuius eſt de rebus & controuerſiis fidei iudicare; ouſne, an paſtoris? diſcipuli, an doctōris? in Eccleſia auctoritas illa iudiciorum ac definitionum, pro controuerſiis fidei, relicta eſt per Dat. xvii. cur eius decretis & conſtitutionibus non ſtatis? Coniugium ſacerdotum quid, quæſo, vos mouet? rerum veſtrarum ſatagite; veſtris vxoribus conſulite; ſinite Clerum noſtrum; cur Laici adminiſtrationi Eccleſiaſtica vos immiſcetis, quæ ſummi Pontificis ſacrorum præſecti curæ commiſſa eſt? Denique quòd veſtros, nullius momenti errores eſſe dicitis, proſectò hallucinamini; maximos, pernicioſiſſimos & innumeros eſſe ducimus; neque vos antiquis Arianis, Pe-

lagianis, Manichæis, aliisque hæreticis minores aut meliores esse putamus.

## EFFUGIVM VI.

*Ducitur ex eo, quòd errores partium ita sint comparati, ut eapropter Deus neminem excludat.*

**Q**Uòd si igitur partium omnium errores, quicunque tandem illi fuerint, ita sunt comparati, ut sperare liceat, Deum eapropter non exclusurum quemquam, si cætera rectè viuat, ab æternis gaudiis; quæ tam fuerit illa effrænis animi feritas, ut cum cohæredes aliquando simus futuri in cælis, hîc in terris, non tantum nos inuicem non amemus, & alter alterius onera portare parati simus, sed etiam inuicem persequamur, mutuisque odiis decertemus; quum Deus Opt. Max. nos habeat pro filiis, nos tamen dedignemur inuicem habere pro fratribus.

## PRÆCLVDITVR.

**I**AM ostensum est, partium errores, vestrarum scilicet, ita comparatos esse, ut pro grauissimis habeantur; nec sperari posse, nisi inculpata ignorantia excuset, ut æternam felicitatem obtineatis. Quamquam licet inculpata ignorantia, quâ reuera pauci tenentur, faciat, ne inculpatus error vitio

tio & culpæ vertatur, in eo tamen statu vos ponit, in quouis remediis à Christo institutis, ac suæ Ecclesiæ relictis, omnino caretis, sine quibus vix ququam adultus saluari potest. Hinc sanè effræna non est animi feritas, vestri vos officij monere, nec non manifesti æternæ damnationis periculi, quod vobis imminet. Si veritas vobis non arridet, aliud à nobis expectare non debetis, quam certè si vobis libere prædicamus, non odio, non liuore, nec alio quopiam deprauati affectûs studio, sed puro vestræ salutis desiderio ac zelo ducimur.

II. Porro cohæredes in cælis habere percupimus, & fratres in terris; ac parati sumus, saltè maxima pars, pro vestra salute, cum sanguine vitæ profundere, clementissimi Seruatoris nostri exemplo, cuius reuerà testimonio, sacris tabulis consignato, nemo maiorem charitatem habet, quàm vt quis vitam & animam ponat pro amicis suis; id est, pro iis, quos in Domino diligit, licèt ab iis fortè non redametur. Hæc, inquam, maxima bona vobis ex animo exposcimus, aprecamurque; sed cum eiusdem Matris, Ecclesiæ scilicet, filij esse nolitis, nobis certè, qui eiusdem Ecclesiæ filij sumus, fratres esse recusatis. At quisquis Ecclesiam matris loco non habet, Deum Patris loco habere non potest; si autem Deus vobis Pater non est, sua profectò hæreditate vos excludet; hinc nec veri fratres, nec cohæredes nostri futuri estis.

## EFFUGIUM VII.

*Ducitur ex modestia Saluiani Massiliensis, qui de Gothorum damnatione dubitauit.*

**I**mitandam esse, inquiunt, Saluiani Massiliensis modestiam, qui de Gothis & Wandalis Ariana labe infectis, quâ nulla fuit hæresis grauior, & quacumque, quidquid Protestantibus & Romanis affingitur, seu verè, seu falsò errorum, nullo loco haberi debeat; ideo tantum, quòd decepti à quibusdam Episcopis bono animo errarent, senserit, sciri non posse, quomodo aliquando in extremo iudicio plectendi sint. Si enim vita inspicatur, eos Catholicis longè meliorem agere vitam; si fidem, eos in sua sententia ita perstare, ut putent, ita atque illi Deum colunt, rectè coli, aliterque illi fieri iniuriam. Quòd si ea fuit Saluiani sententia de Gentibus Arianis; quarum error, totius penè orbis iudicio, erat damnatus, quique Christianam fidem ouertit; quid cum putemus dicturum fuisse de partibus, in quas Ecclesia hodie scissa est? præsertim quum pariter, quæ recesserunt à Romana, vitæ sint purioris & continentioris, atque illæ, quæ Romanæ adhærent, emineant certè plerisque illis virtutibus, quas in Gothis Wandalisque laudat Saluianus; cæteris ferè iisdem iterum vitiiis commaculatis, quæ suo tempore in Catholicis damnabat Saluianus. Illum ægrè non latitum, quòd Calvinistæ imaginibus cultum non tribuant; quum multis annis postea, patriæ ipsius Massiliæ Episcopus Serenus eas, quòd populus nimium

miùm illis esset addictus, metu idololatriæ, ex templo eiecerit: Illum imitatos reformatos, Lutheranos verò sequi Gregorium Magnum ad Serenum scribentem, posse eas relinquere in Ecclesiis, ut vice librorum essent rudibus: Et vulgò Hominum communionem sub utrâque, Saluiani tempore, ubique fuisse in Ecclesia receptam: De Iustificatione, si tota illa doctrina verbis simplicibus proponatur, sicut Saluiani ætate, fidei articulos proponere vsus erat, nullam esse dissensionem. Saluiani igitur iudicio, tolerantiam aliquam inter partes institui posse; saltem de omnibus optimè sperari, huius moderationem animi potius sequendam, quàm aliorum seuere sententiam.

PRÆCLVDITVR.

I. **S**aluiani modestiam osculamur, quem utinam iudicem in præsentibus controuersiis habere possemus; nullus enim dubito, quin homo verè Catholicus errores vestros damnet. Equidem in libris suis ita exaggerat Christianorum, & maximè Clericorum sui temporis mores, ut nimius videri posset, nisi ex vero zelo gloriæ Dei, ut bene monet Bellarminus, & salutis animarum, eius oratio proficisceretur. Quid porro dicturus esset, si strages illas, quas vestri Ecclesiæ Catholicæ intulerunt, aspiceret? quibus lacrymis miseram Ecclesiæ sortem defleret? quibus querelis cælum terramque completeret? quibus verborum aculeis errores vestros perstringeret? quibus

demum formulis impietatem, crudelitatem, barbariem hæreticorum huius temporis exaggeraret?

II. Sugillabat Catholicos sui temporis, non religiosos, quos nominatim excipit, sed alios omnes, omnisque generis, nobiles, milites, mercatores; ubi autem de hæreticis sermonem instituit, lib. 4. de Prouid. His omnibus, inquit, quantum ad legem diuinam pertinet, dico, nos sine comparatione esse meliores; quantum ad legem, inquit; quantum ad fidem. fideique dogmata; Veritas apud nos est, inquit, lib. 5. apud nos, id est, apud Catholicos. Et quamquam Arianos ibidem excusare videatur, Gothos scilicet & Wandalos, quorum errores magistrorum suorum culpæ tribuit; nunquam tamen asserit. saluos fore, sed propter eum errorem suum, quem inculpatum esse supponit, & cum bono animo coniunctum, in extremo iudicio minimè fortè puniendos; Qualiter, inquit, pro hoc falsæ opinionis errore puniendi sint, sciri non posse, ac iudicem Deum duntaxat scire.

III. Hæc non modò damus, sed aliquid ultra, nempe scimus, ac sentimus cum doctoribus Catholicis, neminem propter inculpatum errorem iustè plecti posse; inculpatum autem hic auctor supponit. Hoc tamen non facit, quin propter alia peccata plectantur, quibus remedia difficilè adhiberi possunt, quibus ij scilicet carent, qui ab Ecclesia descinuere: hinc illos, inquit, Dei patientia sustinet, vt tandem diuinæ fidei lumine perfusi plenam faciant Dei voluntatem, & salui euadant. Si hic disputandi locus  
esset,



esset, aliud profectò tribunal non appellarem; statim Saluiani verbis ac sententiis, atque ex eius scriptis, mille contra vestros errores testimonia proferre possem; contra illum præsertim, qui vobis omnibus, in re iustificationis communis est. Quòd Arianos longè deterioris conditionis esse dicatis, disputandum non censeo; quamquam ij Episcopos habebant, quos saltem maiori ex parte respuitis, multisque gaudebant Sacramentis, quibus vos caretis. Sed hoc non disputo, nec errores vestros cum illorum erroribus comparo; nam, quod mihi satis est, qui peccat in vno, factus est omnium reus.

IV. Inficias igitur non eo, quin si aliqui vestrum inculpatis erroribus tenentur, culpæ iis minimè vertantur, ut iam suprà fusè ostensum est; sed inibi quoque ostensum, eos eo in statu esse, in quo vix, ac ne vix quidem, Sacramentorum defectu, saluari queunt. Quòd autem dicitis, vos esse purioris & continentioris vitæ; pace dixerim vestra, hæc ficta laus vestro sordebit in ore. Non negarim sanè, nonnullos inter nos esse profligatissimæ vitæ homines, qui sub Catholico nomine, perditissimam vitam agere videntur; ac proinde facillè dederim, multos inter vos esse purioris & continentioris vitæ: nec etiam similis furfuris homines apud vos desiderantur. Sed quòd iis, qui apud nos Catholicum nomen & institutum verè profitentur, vestri meliores & continentiores sint, dare profectò non possum; de quo iam suprà Prop. x. Rat. xii. viii. itémque Prop. v i, vos videritis, quæ hîc repetere

non vacat. Illæ virtutes, quibus vestri homines emi-  
nere dicitis, adeò occultæ sunt, vt oculos nostros  
minimè perstringant: mihi credite, fieri non potest,  
vt in magna hominum multitudine, omnes probi  
sint; qui sitis, nouimus; qui viuatis, scimus; vestra  
miracula nec vidimus vnquam, nec audiuius. Tri-  
tum prouerbiu hîc fortè locum haberet, Sus Mi-  
neruam: sacras virgines: quas Paulus maximopere  
commendat, hominèsq; illustri sanctimonia in-  
signes, omniq; virtutum genere præditos habemus.  
Sed quæso vos, sermonem & orationem ad alia con-  
uertamus; hoc mihi excidit, animalis homo non  
percipit ea, quæ Dei sunt; & sanè dubito, utrùm ve-  
re ac Christianæ sanctimonix ratio, & Christiana-  
rum virtutum praxis vobis probè perspecta sit.

V. Factum Sereni Episcopi, quod sanè vitiosum  
est, Saluianus, vt fingitis, nullatenus probasset, quod  
Gregorius Magnus lib. 9. epist. 9. acriter reprobat,  
ac zelum illius inconsideratum vocat, & culpabilem  
interrogationem. Laudat quidem hominem, quòd  
adorationem & idololatriam vetuisset; quòd verò  
fregisset imagines, acerrimè reprehendit. Quid por-  
rò ex his vestræ causæ faueat, non video; quasi ve-  
rò priuati Episcopi factum à sancta Sede primùm,  
tum à Conciliis OEcumenicis damnatum toti Ec-  
clesiæ imputari possit: errauit haud dubiè Serenus,  
ac zelo indiscreto peccauit, non enim sunt facienda  
mala, vt bona eueniant. Sed quid inde? an fortè hic  
primus errauit ex Episcoporum ordine? in fide ta-  
men à Gregorio Petri successore confirmatus fuit,

vt vel inde firmissimum contra vos eruat<sup>r</sup> argu-  
mentum; nempe Gregorius Magnus Pontifex de o-  
mnibus omnium causis cognoscebat, scripsitque e-  
pistolas ad Episcopos vtriusque Ecclesiæ, Orientis,  
scilicet atque Occidentis, ad regimen Ecclesiasti-  
cum pertinentes, & pro supremo in Ecclesia iudice,  
ab omnibus habitus est, quod sanctæ Sedis præroga-  
tiuam prorsus euincit.

VI. Quod pertinet ad sacrarum imaginum cul-  
tum, apud nostros auctores videritis; si alij desunt,  
vnus Bellarminus controuers. 7. lib. 2. sufficiet; res  
adeò trita est, vt vel ipsi Tirones probè intelligant,  
quid imaginem inter, & idolum discriminis inter-  
cedat. Præterea, neque vos ipsi conuenitis; Luth-  
erani admittunt, Calvinistæ respuunt, maluntque  
Leonis vtriusque, Isauri scilicet & Armeni, Copro-  
nymi, Theophili, aliorumque conomachorum,  
quàm Constantini, Theodosij, Caroli Magni, Lu-  
douici Pij, aliorumque Catholicorum Imperato-  
rum partes sequi. De Communione sub vtrâque nō  
disputo, ne iam actum agam; institutionis diuinæ  
esse concedimus; præcepti tamen esse negamus.  
Sic Apostolatus diuinæ est institutionis, non tamen  
præcepti; idem dico de Matrimonio: verbo dico,  
in iis, quæ ad sacros ritus spectant, legibus Ecclesiæ  
standum est. Quod autem illa vbique fuerit tempo-  
re Saluiani recepta, eadem facilitate negamus, quā  
asseritis. Legite nostros auctores, & videbitis, com-  
munionē sub altera duntaxat licitam semper fuisse;  
si alij desunt, vel vnus Becanus sufficiet, to. 2. opusc.

6. cap. 4. & 5. Quod subnectitis de iustificatione, pro qua nullam nisi verbo tenus inter nos dissensionem esse vultis, nemini certè persuadebitis. Denique quòd Tolerantiam aliquam, Saluiani iudicio, inter partes institui cupiatis; profectò, si Saluiani iudicio & stylo standum sit, qui vix in suis aliquos nò vos ferre potuit, in vobis infidelitatem & contumaciam nullatenus tolerabit. In hoc sanè pietas est, pium non esse; nullum errorem ferre possumus; nec in fidei societatem illos admittere, qui in præcipuis fidei articulis ab Ecclesia Catholica dissentiunt; arca Dei cum Dagone conuenire nunquam potuit.

## EFFVGIVM VIII.

*Ducitur ex facie veteris Ecclesie, qua retento communi Symbolo, varios ritus & opiniones permittebat.*

**C**onsiderandam esse faciem veteris Ecclesie; primà maximè ætate, eam fuisse diffusam per totum orbem prædicatione Apostolorum, qui ideo, antequàm vnusquisque eorum secederet in provincias, quas erant sortiti, instinctu Spiritus sancti, in Symbolum, ceu credendi regulam consenserint. Alios ritus & opiniones fuisse passim diuersissimas; non vnum omnibus in Sacramentis celebrandis, non in festis, non in ieiuniis morem; neque sciri posse, vnde ista diuersitas fuerit, nisi ab Apostolis, aut primis Euangelij præconibus, qui se

captui

captui & ingenio populorum, ad quos proficiscerentur, suauiter accommodauerint: non aliam posse dari huius diuersitatis causam. Vnamquamque Ecclesiam iam olim ad primos, qui Euangelium illis prædicauerint, originem earum referre; sed constituisse inter omnes optimè concordiam, per illam breuissimæ fidei consonantiam; quamquam cæterarum rerum & opinionum dissonantia esset maxima. Vnum fuisse omnibus nomen Christianum; cæterum quemque secutum fuisse ritum Gentis suæ.

Deinde verò vbi constitutæ essent passim Ecclesiæ, iisque præpositi præsides, atque illi aliis iterum subiecti, eos quoque cœpisse regere Ecclesiam eo modo, quo solent gubernari Respub. cœpissèque iisdem modis studere vnitati Ecclesiæ conseruandæ, quibus Reipub. tranquillitati consulitur. Tum natas concertationes de rebus non magni momenti; quumque illæ turbarent Ecclesiam, tandem ex prudentiorum, aut plurium auctoritate, in alterutram partem cœpisse aliquid definiri; non quidem quòd res, de qua disceptabatur, tanti esset ponderis, sed quòd quisque acerrimè defenderet, quam semel probasset sententiam, eamque alteri obtrudere conaretur; vt vel eo modo obtineretur aliqua tranquillitas, quæ rectius potuisset, opinandi, aut hoc vel illo ritu vtendi, aut non vtendi, libertate concessa, obtineri. Hæc omnia aliena esse à prima & recta Ecclesiæ gubernatione, quæ non debeat regi instar Reipub. sed tantum instar societatis alicuius, aut collegij, vel *φερεστος*, vti appellabant in Atheniensium

fium Repub. Ex illa imitatione externi politici regiminis, natam esse in Ecclesia potentiam etiam externam; politicæ potiùs similem, & à Tyrannica parùm alienam, ad cuius conseruationem necessarium sit, tollere de multis credendi libertatem, quæ per-mitti potuisset, si cõstitisset illa Ecclesiæ gubernatio, quæ fuit primo Christianæ religionis æuo, quàm-que ipsa officiorum, inspectoris nimirum, senioris, & œconomi, siue dispensatoris, aut ministri appellat-iones, qualis fuerit, ostendunt. Constitissent etiam reliquæ tempora intra necessitatem credendi ea, de quibus Apostoli tam sollicitè conuenerant; statuen- dum enim esse, aut nesciuisse Apostolos, cùm dis-cessuri in varias Prouincias, in Symbolum illud con-uenirent, quid deinde euenturum erat in Ecclesia, quod rationi non videatur consentaneum, aut verò eos iudicasse, illa, quæ sanxerant, rectè accepta & intellecta sufficere.

## PRÆCLVDITVR.

**Q**UOD Apostoli ante discessum, Symbolum fidei condiderint, quod iam in Ecclesia, sub eorum nomine venit, à nemine, quæ Catholicus sit, negari potest; itémque esse veluti summam eorum articulorum, ad quos reliqui facile referri queunt. Sed profectò, ut iam suprà liberè dixi, idem vobis & nobis Symbolum non est, cùm idem non sit Symboli sensus. Quod additis, alios ritus & opiniones diuersissimas fuisse, de ritibus, care-

cæremoniis, vt vocant, seu formulis, adhiberi solitis, tum in Sacramentorum vsu, tum in Liturgiis; diuersitatem illam facillè concesserim: itémque in iuniis, & nonnullis festis; nam in diem Dominicum omnes consenserunt. At omnibus eadem Sacramenta fuerunt; omnibus idem sacrificium incruentum; eadem synaxis; eadem exhomologesis; eadem Ecclesia; eadem fidei regula; eadem fides; nec enim illa fuit opinionum diuersitas in rebus ad fidem pertinentibus; immò nec esse poterat, cum singuli Apostoli eadem infallibilitatis, vt vocant, prærogatiuâ pollerent. Hinc ad sanctam Sedem recurrere necessarium illis non fuit, cum in iis, de quibus erroris metu consulissent, errare ipsi non possent.

II. Porro, quòd illi errores, quibus deinde illæ nationes, quibus Euangelium Apostoli prædicarant, infectæ fuerunt, ab iisdem Apostolis originem duxerint, sine maxima impietate dici nequit. Appellate, quæso, aliquam nationem, quæ diuersam à Romana fidem deinde professa fuerit, & statim nullo negotio palàm fiet, errores, quibus laborauit, vel ab Ario, vel à Nestorio, vel à Dioscoro, vel à Macedonio, vel ab Eutychete, vel à Pelagio; aut si ad posteriora tempora descendimus, à Luthero, Caluino, aliisque eiusdem farinae hominibus profectos esse. Nota sunt hæreticorum incunabula; nec tam ignari sumus antiquitatis, vt nesciamus Apostolorum etiam temporibus, hæreses fuisse. Neque hic agitur de simplicium rituum vsu ac diuersitate; quis enim nescit,

nescit, facile illam ab Ecclesia Romana permitti, vñ in Græcis videre est, cum sancta Sede coniunctis. Immo in diuersis Ecclesiis, apud Latinos, diuersi sunt ritus in rerum sacrarum administratione & v. su; modò salua sit diuinæ legis ac fidei substantia: in aliis, quæ ad ritus pertinent, prædictam varietatem, antiquitate scilicet firmatam, Ecclesia Romana facile tolerat; quæ tamen illam, quam vultis, opinionum diuersitatem in re fidei, seu doctrinæ nunquam tolerauit.

III. Christianum nomen iis omnibus, qui Christum agnoscunt, commune est; Catholicum tamen iis duntaxat competit, qui ab Ecclesia Catholica, Romana scilicet, non descuerunt. Quod verò improbatis, Ecclesiam regi ad instar Reip. vel Monarchiæ, animum vestrum manifestè prodit; vtpote Anarchiæ addictum. Oves Christi sine pastore, à quo regantur, esse non possunt; & Petrus, cuius fidei creditæ fuerunt, summi Pastoris vices gerit. Corpus capitis expers, inanis truncus est: caput Ecclesiæ est Christus; Petrus Vicarius Christi. Militum, seu castrorum acies duce catere non debuit: neque nauis Ecclesiæ nauarcho. Præsides igitur esse oportuit, supremo Præsidi, scilicet Petro, eiusque successoribus subditos, & ab eo destinatos. Quis nescit, à Petro, aliisque Romanis Pontificibus, immò & cæteris Apostolis ex singulari priuilegio à Christo ipsis concesso, Episcopos variis Ecclesiis destinatos & institutos fuisse? de Timotheo, Tito, Marco, Ignatio, & multis aliis, constans & publica vox est.

IV. Quod



IV. Quod spectat ad dissensiones ortas, in re scilicet doctrinæ, minùs probare videmini, quòd convocatis Conciliis extinctæ fuerint, ac res definitæ; quod sanè rationi consentaneum esse videtur: quasi verò si quis erret, emendandus non sit. Sunt, qui afferant, Filium Patre minorem esse, etiam ut Deus est; alij Christum verum hominem non fuisse; quidam vnam tantùm habuisse voluntatem, & operationem; nonnulli filium Ioseph esse dixerunt, ac proinde ex Virgine minimè natum; alij Spiritum sanctum ex Filio procedere negarunt. Fuerunt, qui duo rerum principia ponerent, & fatum inducerent; nonnulli, reiectâ Christi gratiâ, naturæ plus æquo tribuerunt; alij demum in ipso Sacramento-rum usu errarunt: Vos demum in multis erratis, ut suprà sincerè monui. Ecclesia sine macula, sine ruga, huiusmodi errores ferre non potuit, nec debuit; ac proinde Spiritûs sancti ductu, sua fudit oracula, pronuntiauit effata, decreta tulit, canones condidit; vnam fidem, vnam legem, vnam duntaxat religionem esse posse sciebat, eosque in fidei societatem admittere noluit, qui diuersam fidem haberent.

V. Non agitur, mihi credite, de festis, de ieiuniis, de ciborum delectu, de aliis præceptis Ecclesiasticis: fidei quæstio est, non modò in Sacramentis, in libero arbitrio, sed in ipsa fidei regula, sine qua vera fides stare non potest. In ipso iudice controuersiarum, in re fidei, nos Ecclesiam ut parentem agnoscimus, ac Romanum Pontificem Eccle-

fiæ caput, ac eius esse credimus, regere populum Christianum, & gregem Dominicum pascere, eiusque legibus ac præceptis obtemperandum, in re scilicet religionis. Quod iis non obtemperetis, Hæretici non estis; cum etiam multi Catholici Ecclesiasticas leges violent, nec propterea hæretici censeantur. Quod tamen iis obtemperandum non esse, temerè dicatis, & obstinatè adstruatis, & nullam imperandi potestatem, nullum primatum à Christo Petrum, eiusque successores accepisse, vel hoc nomine, quamvis alia decissent, vos pro hæreticis habendos esse censemur.

VI. Hinc haud dubiè tranquillitati publicæ Ecclesia optimè consuluit, dum lites in re fidei subortas definiuit, ac contumaces anathemate percussit; quanta enim perturbatio ex tanta dogmatum varietate sequeretur; vera profectò Babylon esset Ecclesia, nisi hanc confusionem vitasset. Neque tyrannis est, ut temerè dicitis; quasi verò vlla societas esse valeat, sine aliqua iudiciorum forma, sine præfectis & magistratu; quasi verò Episcopus vigilem pastorem, seu custodem non sonet; & centies pastoris, ac præpositi nomina in sacris codicibus non legantur. Qualibet privata Ecclesia suos etiam Diaconos, seu ministros habet, rerum scilicet sacrarum administrationi addictos: sed quid tum? an fortè isti pasci non debent, regi, doceri, corrigi? quis porro eos pascet aut reget, nisi superior? Societas, inquires; sed hæc ab illis pascitur; an fortè ouicula pastoris munere erga pastorem defungitur?

*Præ-*

Præterea in Ecclesia Romana Petri successores nunquam interrupta serie præfuerunt, quorum auctoritate, alij Episcopi instituti, positi, depositi, missi, correcti, moniti, controuersæ fidei discussæ ac terminatæ; œcumenica concilia coacta; errores damnati; hæretici reiecti; tota res sacra administrata. Hinc Hierarchiam, non *Dea-relan* in Ecclesia agnoscere deberetis, nec Apostolis errores vestros tribuere, qui erroris omnis expertes fuerunt. Quod demum subnectitis in extremo dilemmate, dictu ridiculum esse, ac proinde rationi minimè consentaneum, Apostolos nesciuisse, quid deinde euenturum esset in Ecclesia; friuolum est: quo enim argumento, quo textu probabitis, nihil, quod in Ecclesia futurum esset, Apostolos latuisse; Paulus quid sibi Hierosolymis euenturum erat, ab alio Prophetâ didicit. Sed quid in his hæreo; præterquam quòd, esto, demus hoc, futura omnia sciuisse; quid, quæso, aliud agere potuerunt; rectam & sanam fidem prædicarunt, ac Gentes veram Christi docuere legem; quòd deinde errores irrepserint, quos etiam ipsi fortè præuiderant, an fortè illis imputandum, ac vitio vertendum? Hoc argumenti genere, contra Christum & Deum, qui omnia futura præuident, uti quis posset. Sed hæc mittamus, quæ leuia sunt.

## E F F V G I V. M IX.

*Ducitur ex schismate orto in Ecclesia  
Corinthiaca.*

**E**Xemplo esse Ecclesiam Corinthiacam, quæ etsi aliàs vnum sentiret, in confitenda vera Christi diuinitate, ex infirmitate tamen humana, scissa fuerit in varias factiones; ita vt alius diceret, ego sum Pauli; ego Apollo; ego verò Cephæ; alius verò se Christum sequi profiteretur. Grauius quidem monet Apostolus Corinthios, ne patiantur discerpì Ecclesiam tot contentionibus; hortatur, respiciant, in cuius nomine sint baptizati; quis pro ipsis crucifixus. Neque dubium est, quin Christiani omnes operam dare debeant, vt sopiantur contentiones, si quæ oriuntur in Ecclesia, & aboleantur illa factionum nomina, cum alius se Pontificis, alius se Patriarchæ Constantinopolitani, Lutheri alius, alius Caluini se dicit esse; hoc enim, exemplo Pauli, faciendum esse: huc facere tot exhortationes nostri Seruatoris ad vnitatem conseruandam.

Negant charitatis Christianæ esse, prorumpere continuo in Anathemata, & probrosas condemnationes, Quamquam ita esset comparatum cum Ecclesia Corinthiaca, quamquam tot in ea essent schismata, Apostolum tamen, non tantum eos appellare fratres, sed ita statim affari initio Epistolæ. *Ecclesia Dei, quæ est Corinthi, sanctificatis in Christo Iesu, vocatis sanctis, cum omnibus qui inuocant nomen Do-*

*MINI*

mini nostri Iesu Christi, &c. Nec verò hac tantum labe infectam fuisse Ecclesiam Corinthiacam; aliam grauiorem ei adhæsisse, ob peruersam mortis Dominicæ commemorationem, propter quam tamen Apostolus eos non protinus Sathanæ tradiderit, uti hodie indubiè inuicem facturi sint Christiani, si quid simile hoc tempore fieret. Neque breui tantum tempore perdurasse contentiones illas, & schismata Ecclesiæ Corinthiæ; iam sublato è viuis Apostolo, nondum tamen fuisse sopita; atque ideo in eandem sententiam scripsisse ad eos Clementem Romanum Episcopum, uti veteres testantur, & hodie ex ipsa Clementis Epistola nuper iterum recepta & edita constat.

## P R Æ C L U D I T V R.

I. **E**xemplo sit, ut vultis, Ecclesia Corinthiaca, in qua nonnulli, contentionis studio abrepti, varias factiones induxerant, quasi de magistrorum gloria & præstantia superbientes. Erant, qui Paulo, alij Apollo magistro gloriabantur; quos alij ut compescerent, & à factionis studio auocarent, nec Paulum, nec Apollo supremum Ecclesiæ præsidem, sed Cephæ agnoscendum esse censebant; vel potiùs Christum ipsum, in cuius nomine sacro lauacro tincti fuerant. In his porro contentionibus, de re fidei minimè agebatur, ut perspicuum est; sed de doctioris, aut eloquentioris magistri prærogatiuâ, & verò sanam doctrinam Apollo docebat, ut patet,

II. Sed profectò causa vestra diffimilis est; nec enim doctrinæ præstantia, vel præcellens eruditio nostras controuersias facit; de re fidei agitur, ac de multis erroribus, iisque palmaribus, quibus impliciti estis, quòsque Ecclesia nec tolerare, nec diffimulare potest. Si quid aliunde vitij & labis mores corrumpit ac deprauauit, quod ad fidem non pertineat, non propterea optima parens Ecclesia ab eiusdem fidei societate excludit. Monet quidem delinquentes filios, corripit, adhibetque remedia, ut ad meliorem frugem reducat, & vitiatas oves in pristinam sanitatem restituat: at ubi erratur in fide, atque adeò ipsum religionis nostræ fundamentum destruitur, illa haud dubiè, aduersùs quam Portæ inferi præualere non possunt, cum errantibus, præsertim contumacibus & obstinatis, nullam fœderis vel communionis societatem habere potest; ubi enim diuersa est fides, diuersa lex, diuersa religio, diuersa Ecclesia est, ut ex præmissis Datis & Prop. manifestè constat.

III. Nec piæ cohortationes defuerunt, quibus Maiores vestros, vel in officio continere, vel postquàm ab eo defecerant, ad resipiscentiàm inducere, Ecclesia Romana materno sanè affectu enixa est. Extant adhuc Romanorù Pontificù, Leonis, Clementis, Adriani, Pauli, aliorùque Epistolæ, quibus vos non modò ad saniorem mentem, verùm etiam ad concilium œcumenicum inuitarunt. Quot, amabò, Apostolici nuntij, quot legati, ad eum finem destinati, quæ verborum suauitas, amoris & charitatis lenitas, quot

quot officia erga proceres vestros., quot præmia proposita? Quid prætermisum, quid omissum ab Ecclesia Romana, ut vos ad deserta religionis castra reuocaret? nullis reuera sumptibus, nullis laboribus, industriæ nulli pepercit, ut salutem vestram consulere. Atque adeo ausim dicere, Romanum Pontificem optimi Pastoris munere probe defunctum fuisse, utpote qui sanas oves quasi reliquerit, ut errantem in deserto quæreret, eamque in ouile reduceret; plus sexaginta annis in hoc opere defudatum est, sed pertinacia vestra charitatem nostram non fatigauit quidem, sed superauit. Paxit Deus, ut is aliquando tot tantorumque laborum sit fructus, quem speramus, quem optamus, quem votis omnibus, non sine lacrymis, quotidie à Deo exposcimus.

IV. Quod Apostolus honorificâ illâ verborum & scriptionis formulâ Corinthios compellet, quid mirum? maior enim & melior illius Ecclesiæ pars huiusmodi contentionum & factionum experta erat, ut optimè sancti Patres obseruarunt; præterquam quod contentiones illæ ad fidem nullatenus pertinebant; nec enim errores illos Apostolus dissimulasset, qui longè minora vitia castigabat; sed charitati duntaxat aduersabantur: sic olim inter Apostolos orta contentio est, quis eorum maior esse videretur. Et verò si quid atrocius fuisset, longè acrius remedium vir diuini zeli ardore accensus adhibuisset; sic incestum illum, in eadem Epistola, Sathanæ tradidit, vel tradi iussit. Nec erat, quod Erasmus & alij suspectæ fidei homines, huiusmodi

Corinthiorum schismata cum variis religionum institutis, vel scholarū sectis compararent; hæc enim charitatis leges minimè violant; & illa varietas esse potest, licèt nullum ambitioni det locum, quæ sanè Corinthios in prædictas factiones agebat.

V. Cæterùm quandoquidem hanc Pauli Epistolam adducitis; nonnulla ex ea vobis accipienda essent, quæ ad castigandos errores vestros, non parùm conferre possent. Ibi enim primo loco consilium Evangelicum de virginitate, quod tantoperè fugitis, expressum habetis; *De virginibus*, inquit cap. 7. *præceptum Domini non habeo, consilium autem do.* Ex quo reuerà loco, cum omnibus Patribus, necessaria consecutione deduco, cœlibatum esse in nostra potestate, modò illum à Deo petamus, & diuinæ gratiæ subsidio vti velimus; nempe inutile, immodò ridiculum & absurdum de re impossibili consilium esset; Qui te hortatur, vt voueas, inquit Augustin. in Psal. 137. ipse adiuuat, vt reddas. Præterè habetis, quòd Apostolis & pastoribus Domini gregis diuina mysteria Deus reuelat per spiritum suum, cuius ductu Ecclesia regitur; quòd iidem Dei adiutores sint, & dispensatores mysteriorum. Deinde potestatem & iurisdictionem Ecclesiasticam habetis, cap. 4. in virga illa, cuius Apostolus ultimo vers. meminit; & cap. 5. in sententia excommunicationis cōtra incestum lata: habetis etiam cap. 7. Matrimonium ex Dei præcepto indissolubile, c. 10. & 11. realem Christi præsentiam in Eucharistiæ Sacramento, itémque traditiones Ecclesiasticas, c. 11.

vnita-



unitatem Ecclesiæ sub vno capite: omitto alia, quæ ad refellendos errores vestros non parùm conferunt.

VI. Porro quòd hic sit Lutheri, vel Caluini, parùm interest; nec magnum affert differentia lucrû; cùm tam hic, quàm ille erroribus implicitus sit. At quòd sit Pontificis Romani, vel Caluini, diuersum quid est à prædicta Corinthiorum contentione, quâ vnus Pauli, alter Apollo se esse dicebat; nempe eadem erat Pauli & Apollo fides; at Pontificis, Lutheri, seu Caluini, vel Patriarchæ schismatici, diuersa omnino est fides, vt patet ex dictis. Par igitur similisque ratio non est; præfatæ contentiones ambitionis erant, nostræ verò religionis & fidei. Frustra igitur unitatem charitatis desideratis, vbi fidei ac religionis vnitas non est; quamquam in visceribus Christi vos diligimus, ac vobis meliora consilia precamur. Quòd fratres Corinthios Paulus vocet, quid tum? vtpote eiusdem matris, Ecclesiæ scilicet filios; vos etiam sultis, eodem nomine compellabimur; idem enim nobis Deus Pater est, & Ecclesia Parens, in qua per sacrum lauacrum Christo geniti estis; sed quam matris loco non habetis, licet illa vos vt filios ad se inuitet. Quòd diu contentiones illæ permanserint, quid tum? quis nescit, nos homines esse vitiiis obnoxios. Denique illa commemoratio mortis Dominicæ, quam verbo indicatis, sacra synaxis est, quam Agape præcedebat, in qua cùm ipsi Corinthij intemperantiùs se gererent, & minus, quàm par esset aduersùs inopes,

charitatis præferrent, ac proinde ad S. synaxim imparationes accederent, eosdem acriter corripit; nullus autem hic error in fide, sed in moribus; hinc haud dubiè ex hoc eodem capite, non nostri, sed vestri errores confutantur.

## EFFUGIUM X.

*Ducitur ex similitudine ac dissensione Petrum inter & Paulum.*

**P**AULO ipsimet, inquiunt, cum Petro non convenisse; non quidem quòd Paulus existimaret, omnem omnino observationem caeremoniarum legalium abiiciendam esse, siue illæ ex Iudeis essent, siue ex Gentibus; utpote cum ipse se eis subiiceret, & omnibus factus omnia esset: sed quòd in gratiam Gentis suæ, Petrus earum necessitatem Gentibus imponere vellet. Eorum igitur exemplo disci, non omnem protinus contentionem scindere Ecclesiam, dummodò pars altera rem, de qua contenditur, non vrgeat tanquam necessariam. Parem videri S. Petri & Ecclesiæ Romanæ causam esse hodie: multa esse in ea, quæ si liberæ tantum sint observationis, permitti possint; nunc autem probari nequeant, quia sub necessitate omnibus præcipiuntur. Id sæpius à protestantibus fuisse inculcatum; perinde quoque Petri Apostoli sententiam maximè, ut tunc erant tempora, multis visam esse salutarem; aliter verò iudicasse Paulum, postquam

quam necessariam cæremoniarum Iudaicarum observationem S. Petro probari intellexerit. Horum igitur Apostolorum exemplum imitandum esse, qui etiam, quid fieri deberet à subsequentibus, ostenderint; cùm propter infirmitatem Gentibus præceperunt, ut à quibusdam, quæ haud difficulter seruari poterant, in eorum gratiam abstinerent; deinde desituri, si ratio, quæ eos mouerat, cessasset. Ita etiam Ecclesiam Romanam in gratiam protestantium, quos verè fratres infirmos appellare possint, debere aliqua mutare in melius, aut verò liberum eorum usum cuique permittere, quæ scilicet eos maximè offendunt, eorùmque communionem impediunt, vti Iudæorum coalitionem cum Gentibus Idolothyti sanguinis & suffocati esus impederit. Hoc verò cùm Romani non faciant, ipsis esse imputandum, quòd nullus adhuc schismatis finis prospiciatur; reddituros aliquando illos iusto iudici rationem tam obstinati animi: non tamen esse desperandum, quin Deus Opt. Max. pro infinita sua misericordia, imbecillitati humanæ etiam hanc culpam sit condonaturus.

## P R Æ C L U D I T U R.

**I.** **D**E leui illa, quæ Petrum inter & Paulum intercessit, dissensione, quæ ad rem non facit, non disputo; quorum alter innocentia ac bono animo, alter bono zelo agebatur. Vtrum alter peccauerit, vel vterque, vel potius neuter,

ter, liberum cuique, quod libuerit, sentiendum relinquo, ne saltem extra chorum. Vnum duntaxat reponendum esse arbitror; scilicet, controuersiam illam de re fidei non fuisse, vt perspicuum est; nec Petrum vnquam iudicasse necessariam huiusmodi cæremoniarum obseruationem; si enim ita iudicasset & statuisset, vt supremus controuersiarum iudex erat, ita res definita fuisset, & Paulus nihil antiquius habuisset, quàm vt sententiæ acquiesceret, & captiuaret intellectum in obsequium fidei. Petrus igitur, licet prædictam obseruationem minimè iudicaret necessariam, ac reuera sciret, habitatione Gentium, minùs expedire; in gratiam tamen suorum, aliquid tolerandum esse putabat, & patriis legibus, quæ tam altas radices in Iudæorum animis egerant, aliquid concedendum. Paulus verò hanc indulgentiam & tolerantiam minimè probabat, ac ingenuè mentem suam ipsi Petro aperuit, qui deinde coacto Hierosolymis Concilio, prædictam controuersiam terminauit.

II. Sed nostrarum controuersiarum par ratio non est, in quibus agitur de re fidei, ac præcipuis religionis Christianæ dogmatis; equidem nonnulla sunt præcepta Ecclesiastica, quæ mutari possent; v.g. vsus calicis concedi, permitti sacerdotum coniugia, cuique libera relinqui statuta ieiunia, aliàque id genus, quæ institutionis diuinæ non sunt. Sed hic profectò non est nostrarum controuersiarum cardo; demus enim, Ecclesiam hæc mutasse, & importunis, quibus apud illam Maiores vestri institerunt,

sunt ; sollicitationibus cessasse ; an fortè dissensio sopita esset ? an fortè id, quod dicitis, Ecclesia vnquam probare queat, hæc & alia similia non posse ab illa vetari, iuberi, præscribi ? Quòd imperium detrectetis, graue quidem delictum est, non tamen pro hæresi habendum ; quòd verò imperandi & clauium potestatem negetis, in hoc reuerà hæretici estis ; nec Ecclesia, ne vestri erroris particeps sit, id vnquam probabit. Et hic est nostræ difficultatis cardo ; parum esset, nonnulla præcepta Ecclesiastica mutare, aut saltem vos ab iis eximere ; sed errores vestros fouere, Petri primatum abolere, vicariam Christi auctoritatem è medio tollere ; hæc sunt, quæ ab Ecclesia Romana, quæ omnis erroris immunis est, nunquam expectare debetis.

III. Itaque nunquam ab exemplo beatissimorum Apostolorum recedemus ; vobis semper & humanitatem Petri, & Pauli zelum exhibebimus ; ea tamen lege, vt errores vestros eiuretis, qui oertè cum vera fide nullum fœdus, nullam societatem inire queunt. Depositis autem erroribus, & admissa Romanæ Ecclesiæ potestate statuendi de rebus Ecclesiasticis, de sacris ritibus, festis, ieiuniis, Sacramentorum formulis, iudicandi, soluendi, ligandi, &c. an fortè putatis, Ecclesiam adeò vobis imitem & acerbam fore, vt si vos aliqua ratio à quibusdam præceptis Ecclesiasticis eximi postulet, vestris votis illico morem non gerat ? an fortè suas illa vobis non aperiet manus, quæ iam sinum & viscera vobis aperuit ? vinculis non exsoluet, quæ coro-

nas vobis & diademata contexuit? Vnum certè aũ-  
sim dicere, si aliquando accidat, vt ad optimæ Pa-  
rentis gremium reuertamini, fore, vt huiusmodi ex-  
emptiones vobis vltro oblatae spontè recusetis. Di-  
cam, quod res est; neminem vidi ex iis, qui à vestris  
partibus ad nostras transierunt, quibus iisdem sub-  
iici legibus, gratum non acciderit, quibus alij sub-  
iiciuntur; probate, sultis; idèmq; in vobis peri-  
culum faciètis.

I V. Quòd dicitis, præcepta Ecclesiastica exem-  
plo primitiuæ Ecclesiæ in pauca reducenda esse, ra-  
tione caret; nempe tam pauca esse video, præsertim  
pro solutis hominibus, vt vix alia sit religio, quæ  
pauciora & faciliora suis præscripserit. Præceptum  
annuæ confessionis & communionis ad rem prorsus  
necessariam nos adstringit: Ieiuniorum Eccle-  
siasticorum leges adeò mites sunt, vt vix inde  
caro maceretur: Quisquis die Dominico rei sacræ  
vix sanè mediam horam recusaret, ille haud dubiè  
illum diem diuino cultui non tribueret: Res deci-  
marum iam ferè in ius politicum abiit, & in censum,  
vt vocant. De vsu calicis quid, amabò, solliciti estis,  
cùm maxima vestrùm pars realem præsentiam non  
agnoscat; præterquàm quòd vel inde præceptum  
contrahitur, ac restringitur. Sacerdotum coniugia  
quid ad vos, qui laici estis? deinde nemo ad id mu-  
neris vi adigitur, sed sponte accedens, si dignus sit,  
initiat, iis tamen legibus, quas vltro admittit.  
Monachi non placent; quis, amabò, vos cogit ad  
monasticum institutum amplectendum? Imagi-  
nes

nēs abhorretis, imaginosi cerebri vitium est, quod pace vestra dixerim; quid rei sit, probè scitis; sed studio contentionis ducti, idola exprobratis: ita imagines adoramus, vt si charitas postulet, & scandalum absit, cruces ligneas ad fouendum ægrum, comburere parati simus.

V. Itaque, vt ingenuè fatear, quid mollius, quid minus, quid facilius ab Ecclesia statui ac præscribi possit, non video; equidem ius Pontificium amplissimum & multiplex est, quod fortè tantulum contrahi, operæ pretium esset, sed illud penè totum in Clericos & Ecclesiasticos cadit, Laicos vix tangit. Quid si longè plura Turcarum lex suis subditis imponit; quid si aliquid quodammodò grauius vobis incumbit; quid si nulla respublica, nulla ciuitas, nulla hominum societas est, quæ pluribus & grauioribus legibus non subiaceat. O vtinam vel apice vno ea indicassetis, quæ mutari, seu molliri ab Ecclesia Romana postulatis. Declamatis contra Pontificum ambitionem, Cardinalium fastum, Sacerdotum libidinem; sed hæc, quæso, quid ad vos? an fortè hæc vobis imputantur? an culpæ, seu vitio vertuntur? præterquàm quòd vocis ac nominis abusum adhibetis; nempe augustam maiestatem, pro ambitione; decorum dignitatis, pro fastu; & frequentes calumnias, pro veris criminibus traducitis. Vestra igitur culpa est, non nostra, quòd in vestris erroribus obstinatè sordescatis; nec vllam obstinati erga vos animi rationem supremo iudici reddere verebimur: dolemus tamen, quòd spem sine vera

fide

fide nutriatis, quæ rerum sperandarum substantia est. Videte, ne vera spes non sit, sed mera præsumptio; nam ut sincerè dicam, eo statu non sunt res vestræ, ut quidquam; nisi reiectis erroribus, iure sperare debeatis.

## EFFUGIUM XI.

*Ducitur ex eo, quod Ecclesia non possit ea, quæ Christus libera esse voluit; ut necessaria proponere.*

**A**LIAS, inquiunt, si rectè rem omnem consideres, non posse Ecclesiam ea, quæ Seruator noster, à cuius prima institutione id omne dependeat, libera esse voluit, deinceps ita proponere, ac si omnino creditu & obseruatu necessaria essent. Non esse hanc potestatem Ecclesiæ à Deo relictam; nihilominus tamen maximam partem controuersiarum, quæ hodie tam acriter Ecclesiam diuidunt, circa talia versari. An autem libertas circa aliquid agendum, credendumue relicta sit, duplici modo probari posse; vel cum ex sacris Scripturis, & veteris Ecclesiæ obseruatione illa libertas apertè ostendi possit; vel si constet, illud, quod hodie in Ecclesia necessario agendum credendumque proponitur, vno vel altero sæculo neque factum, neque creditum fuisse. Sic cum duobus primis sæculis, imagines nullæ in Ecclesia fuisse videantur, non posse quemquam ad vsum, multò minùs



tò minùs ad venerationem earum adigi, adeòque liberum esse debere, quidquid circa illas fiat.

Quamquam autem ab vtraque parte hìc grauius peccatur, tum ab illa, quæ velut necessarium aliquid proponit, cùm liberum esse debeat; tum etiam ab altera, quæ maiore animi feruore reluctatur, quàm fas erat, cùm vtrique parti semper ob oculos versari deberet vnitas Ecclesiæ, propter quam obtinendam, animi moderationi sit studendum.

Quia tamen hìc, error nullus propriè circa fidem versatur, ideo etiam neminem propterea à Deo puni- tum iri, sed tantùm propter animi obstinationem, & præceps odium, cuius grauitas ex variis circumstantiis iudicari debeat. Iam verò animi illa vitia ita esse comparata, vt propterea nemo extra vnitatem Ecclesiæ, quæ intra se bonos & malos habet, collocetur; pari igitur ratione, neque cœtum integrum, qui eodem vitio morali imbutus sit, vnitatis Ecclesiæ exsortem esse. Quamquam igitur vnaquæque illarum partium præcipiti zelo, aut inconsiderato potiùs odio adducta, sibi soli veræ & Catholice Ecclesiæ nomen adsciscat, posse tamen vel hanc solam ob causam statui, nulli illarum Ecclesiæ Catholicæ appellationem debere denegari, sed eam ex illis velut partibus integrantibus constitui.

Ab illa animi mansuetudine & moderatione laudata in Apostolis non discessisse, qui proximè eos fuere subsequuti; longè certè maiorem fuisse penes Ecclesiam orthodoxam & antiquam, quàm nunc videamus, Quamquam qui tunc erant secta-

rij, & fide & moribus essent pessimi, productaque alia propemodum religione, quam Christiana erat, & nouis confectis libris sacris, sua sponte altare contra altare erigerent: nihilominus tamen Iustinum martyrem de iis ipsis, quique diuinitatem nostri Seruatoris expugnabant, modestissime esse loquutum; Nouatianos verò in Concilio Nicæno etiam pro Catholicis stetit contra Arianos, & plurimum fuisse laudatos.

## PRÆCLVDITVR.

I. **D**emus, quaeso, Seruatorem voluisse, cuncta libera esse, hoc vno duntaxat excepto, quòd scilicet Ecclesiæ parendum esset, quam quisquis profectò non audierit, Ethnici & Publicani loco habendus est; si deinde illa aliquid fieri iubeat, aut credendum proponat, an fortè detrectanda imperia, & fides neganda? Quasi verò Christus voluerit, ut oues sui gregis, pastorum à se relictorum vocem non audirent, mandatisque non obtemperarent? obediendum præpositis nostris esse, conceptis verbis Paulus monet; qui porro sunt præpositi nostri, nisi qui à Deo constituti sunt, ut regant Ecclesiam Dei? An fortè Christus Vicarium suum sine iurisdictione, ut vocant, esse voluit, quam vel minimus regulus suis magistratibus atque ministris concedit? An caput visibile constituit, quod tamen inferioribus membris non præesset? Si caput est, ratio est, quæ dirigit, voluntas, quæ statuit,

tuit, os & lingua, quæ voluntatis imperia promulgant. Hinc fortè, vt monent Patres, D. Petro dictum, macta & manduca, quòd scilicet os & caput Ecclesiæ esset.

II. Præterea hæc mihi omnino repugnantia videntur; statis enim, vt fatemini vltro, quatuor primis conciliis œcumenicis, in quibus haud dubiè multa fidelibus, tum facienda, tum credenda præscribuntur; præceptum, opinor, Apostolicum fuit, vt primi illi Christiani ab Idolothytis, suffocatis & sanguine abstinerent; quis autem prima illa Ecclesiæ capita eâ imperij potestate, quam ipsi adhiberent, caruisse dicat? Porro Christus hæc libera reliquerat; alioqui nos hac eâdem lege teneremur. Vnde, ni fallor, necessaria consequutione deduco, Christum Ecclesiæ potestatem fecisse, non modò pascendi Dominicum gregem atque regendi, verùm etiam imperandi, vetandi, iudicandi, plectendi; atque adeò perfectam & supremam Iurisdictionem eidem reliquisse, vt constat ex Dato xvii.

III. Quod verò ad credenda spectat, certum est in primis, præsentium temporum controuersias de iis esse, quæ in primitiua Ecclesia certa fide tenebantur; realis Christi præsentia in Eucharistia, Sacramentum reconciliationis, sacra Ordinationes, extrema Vnctio, primatus Petri, hæc & alia similia, quæ vos negatis, apud fideles primitiuæ Ecclesiæ nullum dubio locum reliquerunt. Nec ea credere nobis Christus liberum reliquit, qui ea conceptis verbis enuntiauit: Dixit suum corpus & sanguinem

esse; credere igitur mihi liberum non est, qui eius dictis credere teneor. Dixit: *Tu es Petrus, & super hanc petram, &c. & tibi dabo claves Regni calorum; quidquid ligaueris super terram, &c. Pasce oves meas & agnos meos; Caro & sanguis non reuelauit tibi, sed Pater meus; Confirma in fide fratres tuos; Quorum remiseritis peccata; Predicate pœnitentiam in remissionem peccatorum; Qui vos audit, me audit; Qui Ecclesiam non audierit, sit tibi sicut Ethnicus; Et porta inferi non praualebunt aduersus eam; Orani pro te, Petre, ne deficiat fides tua; Omnibus diebus vobiscum sum; Spiritus, quem ego mittam vobis à Patre, docebit vos omnem veritatem.* Cuncta hæc, & innumera prope modum alia Christus pronuntiavit, quibus fidem detrectare non licet: modo vestro explicatis & intelligitis; cuius porro est sacrae Scripturae sensum & controuersias definire, nisi Ecclesiae? nisi Petri? qui est os Ecclesiae, ut supra dictum est, & constat ex datis XII. XIII. XIV. XV. XVI. XVII.

IV. Quod autem hæc potestas Ecclesiae à Christo facta sit. tum ex scripturis, tum ex traditionibus, tum ex ipso Ecclesiae nunquam hætenus interrupto vsu, manifestum est; nulla verò libertas credendi à Christo relicta est; quasi verò credere possimus, quod volumus, aut non credere. Opinari quidem in nostra potestate positum est, non tamen credere, fide scilicet diuina; nempe non minoris vitij est, ea credere, quæ reuelata non sunt, quàm iis detrectare fidem, quæ sunt reuelata. Vnde, ni fallor, certò concludo, liberum à Christo nobis relictum non esse, ut

se, vt nonnulla credamus ad libitum, aut non credamus. Equidem vt omnia, quæ nobis Deus reuelauit, explicitè credimus, aut saltem implicitè, vt vocant (nec enim vnum sine alio credi potest, cum vna eadèmq; sit diuinæ fidei ratio) ita sæpe accidit, vt quædam cōsequentibus temporibus explicitè credamus, quæ prius implicitè dūtaxat credebamus. Sic enim multa definit Ecclesia, & explicitè credenda fidelibus proponit, cum habeat clauem scientiæ, vt suprà dictum est; nobis enim malè omnino consultum esset, nisi aliquem haberemus, quem in dubiis fidei & scripturarum nodis consulere possemus.

V. Hinc fieri potest, vt aliquid vno, vel altero sæculo explicitè creditum non sit, quod deinde credere teneamur, propter decisionem, definitionem & declarationem Ecclesiæ, vt perspicuum est. Quod reuerà de præceptis Ecclesiasticis potiori iure dicendum est; nempe pro diuersa temporum ratione, diuersa præceptorum ratio esse potest. Sic optimum factu fuit, in primitiua Ecclesia, abstinere ab Idolothytis, suffocatis & sanguine, quod deinde necessarium non fuit. Sic præceptum communionis sub altera duntaxat ad præsentem temporum rationem accommodatius esse videtur, quod in minore fidelium numero locum fortè non haberet; idem de aliis iudicium esto. Hinc quod adducitis de imaginum cultu, nos minimè vrget; demus enim ita fuisse, vt dicitis; quamquam Bellarminus controu. 7. suprà citatus, aperti mendacij Caluini vestrum, in hac materia conuincit. Et verò

cùm proximè elaplo sæculo, Cæmeterium Domitil-  
læ, idque casu reſeratum eſſet, quod certè iam à  
mille & trecentis annis clauſum fuerat, in iis cry-  
ptis ſanctę imagines repertę ſunt, ſed vetuſtate,  
quaſi oblitteratę. Sed demus, inquam, ita fuiſſe, vt  
dicitis; quid inde? nondum temporis ratio tulerat,  
vt illud fidei dogma explicite credendum ab Eccle-  
ſia proponeretur, vt deinde tulit, cùm VII. & VIII.  
Synodus, immò & Romana, ſacrarum imaginum  
cultum approbarunt.

VI. Quod dicitis de parte oppoſita, veſtra ſci-  
licet, quę maiore animi ſeruore, quàm fas eſſet,  
reſiſtatur, ita accipimus; quis enim tantam obſti-  
nationem probaret? Quod additis, neminem pro-  
pterea à Deo punitum iri, non damus; ſchiſma e-  
nim & hæreſis, vbi præſertim accedit contumacia,  
grauiſſimis pœnis digna ſunt; quantum enim ſcan-  
dalum eſt? væ autem homini illi, per quem ſcan-  
dalum venit. Eccleſia quidem bonos & malos com-  
plectitur, ſed fideles omnes; vbi enim quis fide ex-  
cidit, Eccleſia excedere cenſetur. Quòd Proteſtan-  
tes ſibi arrogent veram Eccleſiam, id voce tenus  
fieri exiſtimo, cùm Caluinus vltro fateatur, ſe ab Ec-  
cleſia deſeciſſe; & iam ſuprà oſtenſum eſt Dat.  
xviii. & Prop. vii. ſolam Eccleſiam Romanam ve-  
ram & legitimam eſſe; vera autem Eccleſia vnica  
eſt, per Dat. xi. & cùm erroris expers ſit, vos ſanè,  
qui erratis, admittere non poteſt. Neque antiqui  
hæretici, conuiſti ſcilicet, in fidei ſocietatem ab Ec-  
cleſia admiſſi ſunt, ſed damnati & proſcripti; cu-  
ius rei

ius rei faciet fidem, quisquis in historia Ecclesiastica tantulum versatus est. S. Iustinum appellatis; utinam illius iudicio stare velletis; ab illo enim præsentiam corporis Dominici discere possetis in apolog. 2. in resp. ad q. 44. gentil. in dialog. cum Tryph. item inuocationem Sanctorum, tum in ead. apol. tum in Resp. ad q. 50. tum in apol. 1. ad. sen. item cultum imaginum & reliquiarum ad q. 28. 128. & in dial. cum Tryph. de libero arbitrio, vestros errores confutat in apol. 2. & 1. ad sen. & passim alibi, coelibatum valde commendat in apol. 2. Quod denique subnectitis de Nouatianis, quòd in Nicæno contra Arianos steterint, cum nihil ad rem faciat, in multis enim Hæretici inter se dissentiunt, frustra omnino discutiendum susceperem; quamquam ibidem decretum fuit, ut non admitterentur in societatem fidei, nisi eiuratis erroribus, veram fidei promissionem emitterent. Præterquam quòd nec Iustinum, nec ullum vnquam ex sanctis Patribus inuenietis, qui errantes & hæreticos in fidei societatem admittendos esse sentiat; & si quis fortè ita sentiret, in eo imitandus non esset, nec eius sententiam Ecclesia approbaret; nullum etiam legitimum & œcumenicum concilium habetis, in quo hæretici, scilicet cogniti, laturi sententiam & suffragia sederint; rectori per fraudem interesse potuerunt, non tamen comperti & cogniti.

## EFFVGIVM XII.

*Ducitur ex eo, quòd Cypriani, Optati, & Augustini sententia de vnitatē Ecclesiæ paulò duriores sint.*

**V**erum quidem esse, aiunt, quòd apud Cyprianum in primis, Optatum, Augustinum, aliòsque reperiantur duriores quædam sententiæ de vnitatē Ecclesiæ, quorum auctoritatē hodie maximè fieri videatur, vt ab vtraq; parte quàm plures perstent in illa animi duritie, ad quam ipsi illos Patres præiuisse existimauerint. Sed primò, in tanti momenti negotio, non esse vnum atque alterum Patrem imitandum; homines illos fuisse, & sæpe aliquid humani passos, sæpe fuisse affectibus abreptos, & tempori seruiisse, aut zelo nimio, quamquam pio, commotos, in tam aspera prorupisse, verba, vt vel illà vehementiâ verborum, & grauissimarum pœnarum, quas aliquando subituri essent, commemoratione, populum in officio continerent. Timuisse enim optimos Patres, ne ortis schismatibus & dissensionibus, Ecclesiæ, quæ Imperatorum edictis premebatur, quæque omnibus odio erat, iterum dilaberetur; nèue Ethnicis, qui charitate potissimùm admirabili, quæ erat inter Christianos, & summa animi pietate alliciebantur, ad Christiana sacra suscipienda, illæ dissensiones scandalo essent, & ab iis amplectendis deterrentur, cessante primaria ratione, quæ animos eorum permulcebat.

*Iulia.*



Iuliano igitur Imperatore, cum deserta Christiana religione, totus in gentilitate prouehenda occuparetur, nihil magis in votis fuisse, neque in vlla re ita allaborasse, quam ut suos in primis Mystas iisdem charitatis legibus obstringeret. Eo itaque tempore, si, quo tum erat loco res Christiana, consideres, facilius Patrum vehementer veniam dari posse, qui imitati fuerint Rhetores, solitos, ut obtineant, quod volunt, non semper ex animi sententia perorare ad populum, sed iis uti argumentis, quorum maximam putent vim esse futuram, ad impellendum animum. S. Augustinum verba facientem ad Donatistas, etiam ubi quam maxime existimet, se insolentem Afrosum pertinaciam expugnaturum, fratres tamen eos appellare; quo nomine nullum Christianorum eum dignari debeat, quem non speret cohæredem Christi esse futurum. Tum etiam illos ipsos, qui horum Patrum auctoritatem sibi esse sequendam putent, ab ea tamen manifestè recedere; veterem enim sententiam ita habere, si rectè consideres, ut omnes illos, qui quoquo modo in segregatorum ab Ecclesia turba permanent, qualiscumque tandem illa sit, non posse saluos esse statuant, quantumuis optimè viuant, ingentes Eleëmofynas faciant, quin etiam martyrium pro fide Christiana subeant. Hodie autem, saltem è prudentioribus, esse neminem, qui non magnam partem protestantium, quod idem de Catholicis protestantes sentiunt, saluam fore statuant, quantumuis in suo quisque cœtu finem vitæ accipiat.

## P R Æ C L U D I T V R.

I. **N**on erat, quòd præfatos auctores duntaxat appellaretis; cùm innumeri ferè alijs reperiri possint, qui non minore vehementia & zelo contra hæreticos scripserunt: Vbi enim Basilus contra Eunomium? Hieronymus contra Iovinianum & Vigilantium? Hilarius & Athanasius contra Arianos? &c. Vnum ferè sub aspectum plurimos verborum aculeos, quibus sancti Patres hæreticos perstrinxerunt, adduxit Theophilus Raynaudus in eo libro, quem inscripsit de iusta & iniusta librorum confixione; ibi legere poteritis insignia laudum nomina, & illustres appellationes, quibus viri alioquin humanissimi huiusmodi homines ab Ecclesia desciscientes cumularunt. Quòd autem tam frequentem illustrémque sanctorum Patrum manipulum in hoc agendi & scribendi modo peccasse dicatis, nemini sanè, qui sit Catholicus, persuadebitis. Nihil in hoc, mihi credite, humani passi sunt, nullis affectibus immoderatis abrepti, tempori seruierunt; verarum, non fictarum pœnarum commemoratione populum in officio continebant. Et religioni ducerem, id fraudis genus viris doctrinà & sanctimonià clarissimis affingere; quòd scilicet aniles fabulas, falsa dogmata, fictitias pœnas, ad terrorem, de sacro pulpito suis populis prædicarent.

II. Nec vilo modo edictis Imperatorum premeban-

bantur. Augustinus, Fulgentius, Hieronymus, Iulianum timere non poterant, iam à multis annis vitâ functum, antequam ipsi scriberent. Cyprianus eum non timuit, utpote qui nondum clauum imperij teneret, cum iam ille pro Christo, cum sanguine vitam gloriosissimè profudisset. Nec fides nostra, post Constantini tempora, omnibus, ut dicitis, odio erat, quo tamen tempore clarissima illa Ecclesie lumina fulserunt. De summa Christianorum charitate & animorum consensione, nemo vobis dissentiet, quamquam nullum fuit sæculum, quod suas hæreses & dissensiones inter Christianos non pepererit. Chronologos consulite, & rem ita esse comperietis; pro viribus quidem optimi Pastores enitebantur, ut à grege suo lupos arcerent, ut suos omnes in officio & fidei unitate continerent, ut demum hæreticos refellerent; sed quòd Rhetores illos imitati sint, qui ad populum perorarent, non quidem ex animi sententia, sed fictis argumentis & narrationibus, dici reuerà non potest, sine crimine grauissimi huius vitij labes iis aspergi nequit, de sanctissimis & doctissimis Patribus honorificentius & modestius scribendum esset: sed hoc loco censo-rem non ago

III Augustinus contra Pelagium & Iulianum, qui Afri non erant, acerrimè pugnavit; & licet contra Donatistas agens eos fratres appellârit, quid ad rem faciat, non video; hæc enim, si quid video, sunt repugnantia. Si fratres appellat, eosdem Christi co-hæredes fore non dubitat; eos tamen ut hæreticos  
inse-

infectatur, ab Ecclesiæ communione segregatos; sed extra Ecclesiam non est salus, ut idem passim Augustinus cum aliis testatur. Hæc sunt, ni fallor, repugnantia; sed ut iam supra monui, hæretici sunt quidem Ecclesiæ filij, quos scilicet per sacrum lavacrum Christo genuit (de iis enim loquor, quibus saltem illud Sacramentum cōmune est) sed cum ab optima parente desciverint, hæreditario iure priuantur. Fratres igitur nostri estis, sed exhæredes, culpā vestrā facti; deinde fratres nostri estis, ab eodem scilicet Deo conditi, quem reverā communi Patris nomine, iubente Christo, innocamus. Quid mirum ergo, si Augustinus Donatistas, fratres appellārit, licet cohæredes Christi futuros esse minimè crediderit; sed ne quid dissimulem, hæc sunt futilia & plusquā friuola.

IV. Frustra nos cum Patribus committere tentatis; nec enim diuersa sentimus ab ipsis, quod rectè profectò considerauimus; nullum enim Patres inter appellare potestis, qui dicat, ignorantiam inculpatam non excusare. Illorum igitur sententia ita habet, ut omnes illos, qui suā culpā ab Ecclesia segregati sunt, saluari non posse statuunt; quidquid aliunde accedat: nempe quisquis suā culpā errat, vel hoc solū nomine, dignus pœnā est, quantumvis in aliis optimè se gerat. Præterea cum Patres illi paucos esse scirent, qui optimam vitam cum inculpato errore coniungerent, illud fieri statuerunt, quod ut plurimū fieri constaret. Quod de martyrio subnectitis, friuolum est; nec enim verum martyrium

tyrium est, vbi veræ fidei testimonium desideratur; quisquis autem vera fide caret, veram fidem testificari non potest. Porro quandoquidem ad Patres confugitis, nullo sanè negotio supra centum recensere possem, quorum selectis locis vnitas Ecclesie & Primatus Petri confirmantur; consulite, sultis, auctores nostros, qui strenuè hac in parte se gesserunt, Bellarminum scilicet, Valentiam, Becanum, Suarem, Gualterium, aliosque innumeros.

V. Quòd dicitis, neminem è prudentioribus esse, qui non magnam partem Protestantium saluam fore statuatur, nullum ex nostris noui, qui hoc sentiat; vix magnam partem nostrorum saluam fore putamus, licet hi veram habeant fidem, iisque polleant Sacramentorum prædiis, quæ ad salutem valde conducunt; multi enim sunt vocati, scilicet ad fidem & gloriam, pauci verò electi. Dicam, quod res est, vix vnum ex multis, ignorantia inuincibili scilicet excusante, extra Ecclesiam saluari arbitror, vel enim error, quo tenetur, inculpatus non est, ac proinde errantem non excusat; aut si fortè inculpatus est, quod rarò accidit, alia peccata non desunt, quæ à salute penitus excludant; præsertim cum Sacramentorum subsidia adhiberi ab iis non possint, qui scilicet iis non gaudent. Nostra igitur sententia cum Patrum sensu optimè consentit; nec difficile est, si vos auctoritas mouet, in omni sæcu-

lo multos reperire, qui vestros errores configant.

## EFFVGIVM XIII.

*Ducitur ex vero sensu illius communis effati, excidere eos omnes æterna salute, qui extra Ecclesiæ unitatem constituti sunt.*

**S**Ed quidquid tandem de eo sit, considerandum demum propiùs esse, quid sibi velit commune illud effatum, excidere eos omnes æterna salute, qui extra Ecclesiæ unitatem sunt constituti. Neque nunc admodum referre, quæ veterum de eo fuerit sententia: sed quomodo hodie accipiatur, nihil pænè esse, quod non veniat in controuersiam. In primis Romanorum animum duriores primùm emolliendum esse; protestantes enim, quorum magna pars iam eò inclinēt, deinceps quoque haud difficulter manum esse duros. In Romana igitur Ecclesia, quamquam Theologi multas & diuersas soleant afferre interpretationes, hanc tamen esse primariam, & vice omnium; exsortes esse unitatis Ecclesiasticæ, quorquor cum Pōtifice Romano nulla intercedit communio; atque in eam sententiam exponi passim populo à Theologis & Catechistis unitatem Ecclesiæ, in Symbolo Christianis omnibus credendam propositam.

Quòd si autem recolantur, quæ sæpe fuere superiùs asserta, quomodo ea comparata esse debeant, ad quæ credenda Christianos omnes obstringi fas sit; reniciendam esse omnino interpretationem illam, cum neque in diuinis scripturis vsquam  
fit

*Sit tradita, neque veteri vnquam Ecclesiæ in vsu fuerit. Absurdos esse, qui existiment, quidquam ad rem facere, quod suo tempore, de communione cum Damaso obseruandâ, vnus aliquando dixit Hieronymus: Nunquam auditum esse in toto Oriente, cum vtraque Orientis & Occidentis Ecclesia vna adhuc esset, unitatem totius Ecclesiæ, vti in Symbolo creditur, à communione cum Episcopo Romano dependere: de Occidentis tantum consensu, illius auctoritatem eò venisse. Superesse etiam, num complures veterum Symboli enarrationes, in quibus omnibus nihil eiusmodi extet. Qui hodie ex Romana Ecclesia in vtrâque Indiâ barbaris Gentibus Euangelium annuntiant, iis inculcare, cum reliquis fidei Christianæ articulis, necessitatem communionis cum Romano Pontifice, quem Christus totius Ecclesiæ caput & Vicarium suum constituerit.*

*Quod si igitur idem olim senserint, qui fidem Christianam per totum orbem prædicando diffuderunt, fieri non posse, quin aliqua huius traditionis vestigia reliqua sint: sed nulla fuisse animaduersa, quàm primùm Lusitanorum & Hispanorum classes ad extremos Asiæ Africaque portus appulissent, vbi notitiam acceperint, de inuentis in Oriente & versùs Meridiem Gentibus, antea ignotis, quæ fidem Christianam inter tot nationes infidelium conseruarent. Eos verò ignorasse, vtrum esset aliquis in orbe Christiano Romanus Pontifex, ne dum viderent, communionem cum eo colendam esse ei, qui*

qui saluus esse velit ; nec tantum ignotum olim fuisse, quidquid de Romano Pontifice hodie in hanc sententiam dicitur , impossibilem etiam esse communionem , quam hodie iudicent esse necessariam, & olim fuisse difficiliorem , cum nondum ita proclive esset, maria omnia adire. Qui adiere Sinenses, Patres Societatis Iesv , memorare , quod ex monumentis quibusdam antiquis colligi possit , fidem Christianam neque incognitam iis fuisse, neque infrequentem , & tamen ante hos centum quinquaginta annos, vix nomen eorum peritissimis Geographicarum in Occidente viris notum erat.

In propatulo esse, quam longo tempore, translatis diutissimisque Regnis, & aliis semper succedentibus Gentibus, ita fuerit abruptum Orientem inter & Occidentem , maximè extrema vtriusque omne commercium, ut vtriusque incolæ sibi inuicem pænè ignoti fuerint : Abissinorum , qui tamen magnam Africæ partem tenent , eandem esse rationem. Alienum igitur esse à providentia diuina , statuere aliquid necessarium ad obtinendam unitatem Ecclesiasticam , extra quam salus esse nequeat, cuius tamen usu & notitiâ integræ Gentes, nullâ suâ culpâ excidere possint. Huc igitur rem totam redire, ut statuatur, communionem cum Romano Pontifice anilem tantum esse coniunctionem, ad restringendam compagem vasti corporis, minimè autem eam ex intentione Seruatoris esse necessariam. Neque tamen à Theologis in Romana Ecclesia aliam posse dari descriptionem unitatis Ecclesia.



clasticæ, quæ reliquos omnes cœtus, qui non idem cum ea sentiunt, ita separet, atque hæc ipsa: cæteras omnes interpretationes ita esse comparatas, vt etiam alij, quàm illi, vnitatis illius possint esse participes; atque adeò nullam amplius esse causam, quare homines prudentes, partiùmque studio minimè addicti, non possint, saluâ conscientiâ, Græcos, Protestantes & Romanos in vnitatem Ecclesiæ Catholicæ adsciscere.

## PRÆCLVDITVR.

I. **D**E communi illo effato, nulla modò est inter Catholicos controuersia, & eodem nunc, vt olim, sensu intelligitur, nisi enim inculpata adultum ighorantia excuset, (quàm pauci autem ij sint, quos excuset, iam suprà fusè dictum est) certum est, neminem extra Ecclesiæ unitatem positum saluari posse. Nempe ipse error, si cum culpa coniunctus est, reum facit; si verò inculpatus, ab errore quidem ipso excusat (quod enim inculpatum est, minimè imputatur) non tamen ab aliis culpis admissis, quæ cum remediorum penuriâ, quam error attulit, expungi nequeant, quid mirum, si vel inde salus impediatur. Quid aliud inter nos controuertatur, vt verum fatear, non video. Quòd duriorum animum nobis inesse dicitis, à veritate penitus alienum est; testis est nobis Deus, quanto animi & cordis ardore, vestram salutem & conuersionem expectamus, pro qua cum sanguine vitam,

ex animo dico, libentissimè profunderem. Utinam, quod subnectitis, ad bonum exitum perducatur; ut tandem Protestantes vltro dent manus; cum iam eò inclinent, ut dicitis; utinam, qui cœpit in iis opus bonum, tandem communi omnium bonorum gratulatione perficiat.

II. Vna est nobis prædicti effati interpretatio; quod cum Romana Ecclesia, vera & Catholica duntaxat Ecclesia sit, per Prop. v i i. quisquis ab ea segregatus est, ab Ecclesia Catholica segregatus sit, ac proinde saluari non possit, per Prop. x. nec aliam Ecclesiam in Symbolo agnoscimus, vel populis proponimus. Nec quidquam hucusque à vobis assertum est, quod præfatam interpretationem reiiciendam esse demonstret; immò ex iis, quæ disseruimus, oppositum euincitur. Illam autem tum ex Scripturis, tum ex Traditionibus, tum ex nunquam interrupto usu Ecclesiæ, & Conciliorum, tum demum ex sanctis Patribus & Doctoribus habemus, ut constat ex dictis. Et sanè miror, crambem hanc recoctam toties à vobis versari; testantur haud dubiè omnium sæculorum monumenta, iudicem in Controuersis fidei à Christo esse relictum, alioquin, ut iam sæpe inculcaui, nostra fides nutaret, & nihil certi esset, quod credere possemus; sed de his iam suprà. Hieronymum perperam reiicitis, cum alij Patres eidem sententiæ suffragentur: Augustinus scilicet, Cyprianus, Optatus, aliique ferè innumeri, quos apud nostros auctores videre poteritis. Religioni profectò ducerem, tanti Doctoris, ac de Ecclesia bene meriti aucto-

authoritatem flocci facere; sed in hoc Caluino vestro non abfimiles estis, qui sanctos Patres probris, conuitiis & maledictis acerrimè & mordacissimè insectatus est.

III. Nunquam auditum esse dicitis, cum vtraque Ecclesia vna esset, unitatem Ecclesiæ ita accipiendam esse. Immo nusquam aliud auditum est; & statim atq; Græci ab Ecclesia Romana desciiuerunt, quod sæpissime factum est, pro schismaticis & hæreticis habiti fuere. Quasi verò Patres Orientis ad Romanam Ecclesiam non confugerint, Athanasius, Chrysostomus, Ignatius, aliique iniuste oppressi, & Conciliis Orientis Legati Apostolici non præfuerint, aut saltem illorum approbatio à Romanis Pontificibus petita non sit. Nullam porro Symboli enarrationem exhibere potestis, à Catholico scilicet auctore scriptam, ex qua non constet, Ecclesiam illam esse, cuius Romanus Pontifex Christi Vicarius caput visibile esset. Quòd verò illud idem Gentibus barbaris prædicemus, nostro reuerà munere defungimur, quasi verò Ecclesiam à suo fundamento, scilicet à Petro separare possimus, iisque supremum iudicem in materia fidei tacere; absit, ut Dei causam & Ecclesiæ adeò perfidè vnquam prodamus.

IV. Idem autem olim senserunt, qui fidem Christianam per totum orbem prædicando diffuderunt; quid enim aliud prædicarunt, quàm Euangelium, in quo expressè legimus, Gregem Dominicum Petri curæ commissum, eidem clauēs Regni cælorum creditas, omnimodam soluendi ligandique potestatem

factam, Petram esse, super quam Ecclesia ædificata est, aduersus quam portæ inferi non præualebunt, Christi precibus eius fidem non defecisse, ut fidem aliorum confirmaret. Cuncta hæc iis primis temporibus definita & circumscripta non fuisse; cum Ecclesia ad finem usque temporum permansura sit: Christus enim omnibus diebus nobiscum est, usque ad consummationem sæculi, & Ecclesiam in sempiternum sibi sponsauit. Nisi hæc prædicarint, Euangelium sanè non prædicarunt, cum hæc merum putum sint Euangelium. Quòd autem nulla huius traditionis vestigia in Meridie & Oriente à Lusitanis obseruata sint; quid mirum; cum à Græcis & Alexandrinis suas leges, ac mystas suos acciperent, qui iam dudum Ecclesiæ Romanæ insens, illius nomen, & multò magis auctoritatē extinxerant. Abassinus etiamnum Patriarchæ Alexandrino, Cophto scilicet subesse, cuius schisma manifestum est, ac errores perspicui. Quòd verò alterius Alexandrini iurisdicção ad Indos excurreret; nota res est. De Armenorum Patriarcha, nihil est, quod dicam; ut vel inde constet, totum Orientem erroribus Eutychetis, Nestorij, Dioscori, Iacobi Syri, aliorumque dudum implicitum fuisse; ac proinde Romanum Pontificem nullo apud illos loco fuisse; quid mirum ergo, si ab iis, ad extrema usque Orientis iidem errores propagarentur.

V. Quòd verò dicitis, impossibilem esse huiusmodi communionem cum Romano Pontifice, eadem facilitate rejicitur, quâ adstruitur; ex eo enim,  
quod

quod modò fit, quid fieri potuerit, facìle colligimus. Porro etsi aliqua fidei Christianæ monumenta apud Sinas à Patribus Societatis obseruata sint, id tantum pro verisimili asseritur: sed quid inde concludatis, non video. Sinarum nomen ante hos centum & quinquaginta annos Europæis incognitum fuit; esto: quamquam, si M. Paulum Venetum legeretis, sententiam haud dubiè mutaretis. Sed demus hoc; quid inde? ergo Romanus Pontifex Sinas, quos non nouerat, curare, pascere, regere non poterat: sed quidni? supponamus, fidem Christianam ipsis prædicatam & expositam, in suo vigore, ad hæc vsque tempora, apud illos viguisse; non tamen potuisse hætenus, propter maxima locorum intervalla, mittere Romam ad Petri successorem; habuisse tamen Episcopos ritè consecratos, iuxta primum illum ritum ab Apostolis traditum, ac fidem intactam seruasse; hæc reuera sufficiunt ad prædictam Ecclesiæ unitatem. Sed aut nunquam fides còperuénit, aut statim extincta est, & Idololatria postliminio restituta; ac proinde licèt fortè leuia monumenta supersint, illa tamen obscura sunt & incerta; nec ij, qui modò viuunt, scire queunt, quid maiores ante mille & sexcentos annos crediderint.

VI. Denique quod subnectitis, alienum esse à Prouidentia Diuina, id necessarium ad salutem statuere, quo Gentes integræ nullâ suâ culpâ careant, vel excidant; inane profectò est: quis enim Dei còsiliarius fuit? cur mundum per tot sæcula sine seruatore reliquit? cur alias gentes & maximam or-

bis partem præ Iudæis aliquo modo abiecit? cur Americam Euangelij luce tamdiu orbatam esse voluit? Idem de multis versus Australem tractū regionibus dicendum est; nascimur iræ filij, ac proinde digni, quos Deus æternis tenebris addicat, æternæque priuet beatitudine. Hoc sufficere debet, & maximæ gratiæ loco habendum, quòd nemo, nisi suâ culpâ damnetur; quòd nemini peccatum illud, actuale scilicet, imputetur, quod ipse vitare non potuit. Hæc, inquam, sufficere debent, quòd nemo æternis cruciatibus addicatur, nisi propter lethale peccatum, omnino liberè admissum. Accedit, quòd, ut plurimum saltem, prædictæ gentes illâ notitiâ necessariâ, suâ culpâ, exciderunt; nempe grauiora peccata fidei lumen extinguere solent, & diuinam iustitiam irritant, quo fit, ut in pœnam admissorum scelerum, grauiora deinde Deus permittat. Huc igitur res tota redit, ut stet prædicta interpretatio, ut vnitas Ecclesiæ sub vno capite visibili, Petro scilicet, eiusque successoribus, necessaria sit; ut nemo extra illam saluari queat, nisi fortè illum ignorantia inculcata excuset; quæ certè nulli ferè suffragatur, ut fusè supra demonstratum est; ut nemo nisi suâ culpâ damnetur; ut Diuina Prouidentia cuncta suauiter & sapienter disponat; ut alius modus, saltem faciliior & commodior esse non possit, ad pascendum gregem Dominicum, omnes errores arcendos, controuersias fidei dirimendas; denique ut Protestantes & Græci, aliique omnes, qui diuersam à nostra fidem tenent, in vnitatem fidei & Ecclesiæ admitti non possint.

## E F F V G I V M XIV.

*Ducitur ex eo, quod Græcorum errores nullius momenti sint.*

**E**T cum Græcis quidem Romanam Ecclesiam longè faciliùs transigere posse; nullius esse momenti errores, si quidem eo nomine appellandi sint, quorum eos reos faciant. Romani, quamquam etiam falsò multa iis tribuant; præcipuum esse, quod profiteantur processionem Spiritûs sancti à Patre per Filium, negent eandem rectè derivari à Patre & Filio; certè non ita debere vocari, adeoque dissentiant, non tam quoad rem ipsam, si sine animi pernicacia tota expendatur controuersia, quàm quoad loquendi formulam, & additionem *Filiòque*, quam ab Occidentalibus, in scio Oriente, & sine Concilij œcumenici suffragio, propter sacrosanctam omnibus Christianis Symboli auctoritatem non debuisset fieri; nec id fortè sine ratione dicant. Consectaria, quæ Romana Ecclesia ex eorum sententia eliciat, & prauum aliquid sapiant, ab iis non admitti; neque deesse in Romana Ecclesia, qui vel penitus eos excusent, in primis nupera Epistola mox typis edenda ad Boineburgium Leo Allatius copiosissimè, vel tamen Schismaticos tantum appellandos esse censeant.

Neque etiam si purgatorium spectes, aliam esse Græcæ cum Romana Ecclesia, quàm de nomine

contentionem; quidquid præterea iis tribui soleat; aut fingi tantum eorum odio, aut adeò nauci esse, ut nemo prudens de eo contendendum existimet. Totam igitur controuersiam eò redire, quòd Episcopo Romano, quem tamen Occidentis totius Patriarcham, & inter reliquos primum esse, primumque in Conciliis locum tenere fateantur, negent rectè tribui infinitam illam potestatem, quæ ipsi à plerisque Theologis tanto conatu asseratur. Esse eos in hac sententia, quòd non liceat Romano Pontifici definire fidei controuersias, nisi cum scitu Concilij œcumenici. Canonistarum quoque & Theologorum culpæ imputandum, si Græci Pontificem Christi esse Vicarium interdum negare videantur, non tam enim de re ipsa eos inter se contendere; quàm de consecrariis, quæ plerique vano studio, ex illo Vicariatu deducere conentur; suis potiùs & Pontificis commodis, quàm conseruationi simplicitatis fidei Christianæ, & veritatis Ecclesiasticæ intenti.

Quin etiam, si vlteriùs ire libeat, & ipsa tam longi & deplorandi schismatis initia animo reuoluere, disci posse, quàm lubrica illa fuerint, quàmque pauci, quidquid in eo culpæ est, illius fuerint participes. Iam igitur cogitandum esse, etiamsi singulare quid D. Petro eiusque Successoribus à Seruatore Christo fuerit delatum, quod tamen eo sensu, quo Romani volunt, Græci non admittant: An ideo tamen tam ingens & numerosa Ecclesia, qualis utique Græca fuit, quæque in hodiernum tot Christianorum myriadas numerat, propter paucorum culpam,



pam, & à tot quidem sæculis, dici possit excidisse sine suo, qui ei propositus est, æterna dico salute? Et quidem eam ob causam, quia non colat omnimodam communionem cum homine, qui etiam cum optimus est, vix tamen mediocriter virtuti deditus, par cenferi debeat? Necesse utique esse, qui ita sentiunt, ut credant, Deo magis cordi esse auctoritatem Romani Pontificis, quàm proprii Filij; sine cuius tamen notitia, posse hominem saluari, multum Theologi statuunt; quæque in veteri Ecclesia, à Patribus quibusdam, nedum à vulgo hominum, non satis videatur fuisse perspecta.

Neque verò etiam videri Diuinæ Providentiæ & Iustitiæ conforme, ut tanti nominis, & per tot provincias diffusa Ecclesia à tot sæculis (nonum enim iam agi sæculum, cum primum erupit schisma) perftet tamen immota atque inconcussa, si tanti momenti sit error, quo teneatur. Arianos toti præter orbem Christiano fuisse dominatos, sed statim iterum post sumpta vno impetu incrementa, defecisse, dum post vnum vel alterum sæculum penitus extinguerentur. Hæresum, quarum Irenæus, Tertullianus, Clemens Alexandrinus, Epiphanius, Hieronymus, Augustinus, aliique Patres meminerint, iam à pluribus sæculis nulla amplius vestigia superesse; quæ enim in Oriente, & Africa, Nestorij atque Eutychetis erroribus gentes infectæ esse hodiernum memorantur, eas ignorare, quid sibi illæ sectæ velint, neque eorum impeditas tricas capere; magis illis sectæ autores Dioscorum, & Iacobum Syrum, aliósc.

S S

que,

que, quòd præstantes aliàs essent viri, ipsis notos esse, quàm eorum dogmata, quæ etiam, quidquid adhuc eorum apud ipsos reliquum est, ita nunc sine comparata, ut alia esse videantur, aut captum illorum superent.

Tum quoque Græcam Ecclesiam iisdem pænè adhuc Provinciis contineri, quas olim possederit, nonnullas etiam recens accessisse: frustra verò esse, qui propterea eam putent domitam fuisse, & à Turcis atque Saracenis infestam. Hispanos Romanæ addictos fuisse Ecclesiæ, cum eos missis illuc copiis Mauri obruerent. Græcam atq; Orientis Ecclesiam maximum damnum esse passam, quòd Gentibus illis esset vicinior, iisque bellico robore & copiis militaribus, tum etiam votis concordibus inferior: maius in Occidente esse robur, & ab eorum viribus longius diuisum, quas atteri potius videas & frangi, quàm vim hostibus inferre queant. Si eo statu Romana fuisset Ecclesia, quo Græca fuit, idem eam factum haud dubiè fuisse mansurum. Cum igitur perftet à tot sæculis Ecclesia Græca, & quantum fieri potest, inter tot barbaras Gentes, quibus passim obsidetur, adhuc vigeat & floreat, videri utique, non adeò Deo curæ esse illorum errorem, si quem habent, cum veterum hæreticorum & schismaticorum coetus omnes iam pridem Divinâ prouidentia perisse videamus.

## PRÆCLVDITVR.

**Q**Uod spectat ad errores Græcorum, hoc certè loco discutiendi non sunt; pro his consulantur auctores: eorum synopsis habetis apud Gualterium in sæcul. 9. illi autem damnati sunt diuersis Conciliis, scilicet Lateranensi 4. Lugdunensi 2. Viennensi; Florentino, quibus, si Viennense excipias, ipsi Græci interfuerunt, manûsque dederunt, post longas disputationes, in quibus semper inferiores extiterunt. Mira profectò est huiusmodi hæreticorum aut schismaticorum indoles, qui toties errores suos eiurarunt, Ecclesiæ Romanæ reconciliati, ac deinde ad vomitum redierunt; quater & decies conuersos ac relapsos esse, antiquis historiæ monumentis traditum est. Vnde fides Græca germana est, varia credere, ac identidem fidem mutare, cum tamen Ecclesia Romana eandem fidem intactam atque integram semper tenuerit.

II. Huic schismati ambitio Patriarchæ Constantinopolitani causam dedit, qui cum per trecentos & aliquot annos simplex Episcopus fuerit, ubi deinde in gratiam Imperatorum, Patriarchæ dignitatem adeptus est, secundum initio post Romanum Pontificem locum sibi vendicauit, tum deinde paris conditionis esse voluit, ac tandem per intolerabilem superbiam, reiectis Latinis, ut hæreticis, primatum sibi arrogauit. Primus Phorius eò venit audaciæ; vir quidem non contemnendæ eruditionis, ut eius scripta testantur, sed elatæ mentis & tumultuantis indolis; sed ut funestum opus incepit, quod deinde  
Ser.

Sergius valde promouit, ita hoc idem Michaël Cæ-  
rularius Latino nomini infensissimus ad vltimum  
exitum perduxit, circa annum 1043. quàm verò in-  
iuste Constantinopolitanus primatum sibi arrogâ-  
rit, nemo est, etiam inter aduersarios, qui nesciat.

III. Quòd dicitis, errores Græcorum nullius  
momenti esse; pace dixerim vestra, absurdū est; nul-  
lus enim error in fide est, qui minimi momenti esse,  
vel dici possit; præterquàm quòd in grauissimis ar-  
ticolis errant; scilicet in Trinitate, in Ecclesia, in Sa-  
cramentis, in æterna vita, &c. An fortè hæc nullius  
momenti sunt? negant enim, Spiritum sanctum à  
Filio procedere; Ecclesiam Romanam minimè agno-  
scunt, quæ vera duntaxat est Ecclesia, vt supra osten-  
dimus; corpus Christi à peccatoribus negant acci-  
pi, licèt ad S. Synaxim accedant; animas functo-  
rum ad extremum vsq; iudicii diem à gloria cælesti  
arcent. Quòd de Spiritu sancto, non tam quoad rem,  
quàm quoad loquendi modum, dissensio sit, nemini  
sanè persuadebitis, ex iis scilicet, qui rem intelli-  
gunt; faxit autem Deus, vt vos ipsi probè intelliga-  
tis. De additione *Filiæque* in Symbolo, inscio Orien-  
te, vt dicitis, & sine Concilij œcumenici suffragio,  
Græci queruntur: sed imprimis multa Concilia ge-  
neralia illam additionem approbarunt, vt Latera-  
nense 4. Lugdunense 2. Florentinum; & licèt tertia  
Synodus quidquam addi Symbolo prohibuerit, non  
prohibuit tamen ibidem contenta meliùs explicari;  
deinde prohibet tantū aut falsam aut prauam ad-  
ditionem, cū aliam prohibere non possit: quasi

verò

verò vnum Concilium aliis vincula iniicere queat.

IV. Sed pro hac controuersia legite Bellarm. tom. 1. contr. 2. lib. 2. à cap. 20. ad libri finem, si enim ratio vos mouet, haud dubiè acquiescetis; nec Græci iure queruntur hac de re, tum quia post hanc additionem, tria Concilia generalia habuerunt, in quibus consensere cum Latinis, tacueruntque per totos trecentos annos, scilicet ab anno 600. ad 900. tum quia Conciliis nostris interfuerunt, Lateranensi 4. Lugdunensi 2. & Florentino, in quibus hoc fidei dogma confirmatum fuit, non sine illorum suffragio. Nulla inde consecutaria deducimus, ad fidem pertinentia; equidem Theologi nostri de hac re disputant, ac probant, Filium à Spiritu sancto distinctam personam non fore, si hic ab illo non procederet, sed nihil hæc ad fidem: Quomodo excusari possit hic error, non video, cum expressè articulo Symboli aduersetur. Epistolam illam Leonis Allatii in lucem editam non vidi, scio tamen ab erudito & Catholico viro nihil dici, quod à vera fide alienum sit; nonnulla fortè reiiciet, quæ falsò illis imponentur: quòd autem palmarem illum errorem excuset, adduci non possum, vt credam. De Purgatorio leuiùs errant; saltem ipsi in Florentino falsi sunt vtrò, à suis purgatorium non negari, sed ignem duntaxat, qui sit propriè ignis, non metaphoricè; licèt autem verum ignem esse Catholici teneant, habeantque pro certo, de fide tamen non est, vt fateatur Bellarminus eic. controu. 6. lib. 2. cap. 10. & 11.

V. Nihil autem illis per odium à nobis afflictum est,

ut dicitis; & si aliqua sint, quæ ipsi non admittant, indoli fortè illorum, quæ mutationum amans est, imputari debet; hinc enim factum est, ut pro variis temporibus, variè senserint. Fateor etiam maximam & potissimam controuersiam eò redactam esse, ut negent non illimitatam quidem, sed iustam & legitimam Romani Pontificis potestatem definiendi controuersias fidei: nec Theologi, aut Canonistæ Pontifici quidquam, in hoc saltem, tribuunt, quod ipsi iure non competat; neque hîc agitur de consecrariis, sed de re ipsa. Christi Vicarium esse, credimus; illi verò negant; illud autem affirmamus, ac certa fide tenemus, nulla sanè proprii commodi ratione ducti, sed æternæ salutis gratiâ, quam, nisi rectè sentiamus, assequi vnquam non possumus; nec quid certum sit in fide, habemus, nisi hunc controuersiarum Iudicem, ac viuam Diuinæ fidei regulam agnoscamus. Si quis autem potestatem illam Ecclesiasticam ad propria commoda conuertit, in hoc sanè non laudo; secundum opera nolite facere, at diuinis oraculis stete. Porro qualia fuerint schismatis initia, suprâ exposui; & grauissima fuit, tum Phottij, tum Michaëlis culpa: de iis denique, qui nullâ suâ culpâ huic schismati adhærent, quid dicendum sit, ex dictis suprâ perspicuum est.

VI. Non admittunt Græci, ut vultis, quidquid D. Petro eiusque successoribus à Christo delatum fuit, eo sensu, quo Romani volunt: sed cuius tandem est iudicare, ac dirimere litem; quis clauēs, quis potestatem iudicandi accepit, nisi Ecclesia Romana?

cur

cur ipsi toties accesserunt, dederuntque manus? Pontificem tanto muneri dicitis imparem: si proprias illius vires duntaxat ponderetis, impar omnino est; si Dei gratiam, & Spiritum sanctum assistentem, non video, cur eo pro dignitate defungi non possit. Ecclesia Græca vastissima est; do vltro; sed quàm varia, quot sectis, quot capitibus distincta; nam, præter Constantinopolitanum, Armeni, Cophi, Syri, Arabes, Assyrij, Abassini, Moschi suum habent; variis hinc inde distincti erroribus, Nestorij, Eutychetis, Dioscori, Iacobi Syri, aliorumque eiusdem farinae hominum. Adde multos cum Ecclesia Romana coniunctos, tum ex ipsis Græcis, tum ex Armenis, Syris, Bulgaris, Sclavis, Russis, seu Ruthenis, Maronitis, &c. Et quamquam aliorum magnus adhuc numerus super sit, si tamen meros schismaticos accipiat, exclusis scilicet iis, quos pro hæreticis vos ipsi habetis, tot fortè myriades non erunt; præterquàm quòd licèt longè plures essent, non tamen est, quod quis desideret, ut in eorum gratiam, Christus nouam Legem ac nouum Euangelium instituat.

VII. Nec iuuat dicere: Hinc videri, Deo magis cordi esse auctoritatem Romani Pontificis, quàm proprii Filij, quod sanè ridiculum est; quasi verò inculcata ignorantia eos non excuset, qui de Romana Ecclesia nihil vnquam acceperunt, quod nemo vnquam Theologus negauit. Immo illi, qui sine Christi notitia hominem saluari posse negant, sine notitia Romani Pontificis saluari posse affirmant. Nec est,

est, quod Diuinam Iustitiam & Prouidentiam accusetis, cum nemo nisi suâ culpâ damnetur; Græci diuina bonitate abusi, dignam rebellionis suæ pœnam dederunt; hinc sub Turcarum Tyrannide & Iugo miserrimè gemunt; hinc tanta sectarum & opinionum confusione impliciti, quid certi credere debeant, nesciunt; hinc homines doctos & sanctos, ut olim, ampliùs non habent; hinc Patriarcharum Constantinopolitanorū contentiones, rixæ, mutationes; hinc ij toties extrusi, intrusi, expulsi, fugati; is nempe qui maiorem vim pecuniæ Turcis pendit, ille superior euadit. Pudet hæc referre, quæ nemo ignorat: ac miror, quod illam Ecclesiam immotam semper & inconcussam perstare dicatis, quæ quater & decies errores suos eiurauit.

VIII. Nonnullæ quidem hæreses, quarum antiqui meminerunt, extinctæ sunt; aliquæ tamen etiamnum vigent; multi adhuc Ariani, Nestoriani, Iacobitæ; quid verò de Turcis dicturi estis? Quod autem plerique errorum ac dogmatum suorum periti sint, certò scimus, ac fidem faciunt, qui cum huiusmodi hominibus versati sunt; nec illorum superant captum, aut alia esse videntur à prioribus, nisi fortè quòd, ut fieri solet, multi noui errores accesserunt. Porro non putamus frustra ideo Græcos à Turcis domitos esse, & in miseram seruitutem redactos; cum scilicet suauissimum Christi & Ecclesiæ iugum detrectarent. Quod constantes in suis erroribus fuerint, nihil iuuat; in hoc enim Turcis & Iudæis pessimæ conditionis hominibus haud absimiles sunt.



sunt. Si Græcorum discordia & impietas tot damna ipsis attulerunt, aliis causis tribui non debet; Occidens suis hostibus non caruit; nec Græci virium defectum causari debent, qui totum ferè Orientem & Occidentem olim subiugarunt. Roma etiam multa olim passa est; expugnata scilicet à Gothis, Wandalis, Germanis: quot & quantæ præterea barbaræ Gentes Italiam inundarunt, Longobardi, Hungari, Eruli, Saraceni, & quod omittere non possum, ab ipsis Græcis immodica sanè pertulit; non tamen idem fatum fuit. Ecclesia Romana immota semper in his turbinibus fuit; nunquam fidem, nunquam prima sua dogmata mutavit; quod de Græca dici nequit, quæ toties hucusque resipiscere visa est, & adhuc insanit: nec video, quomodo florere ac vigere dicatur, quæ ferè inter sordes, saltem inter errorum tenebras miserè iacet. Deo igitur curæ est; error ille, quo illa tenetur, maxima, mihi credite, poena est; itémque cœcitas & obstinatio, quod certè Iudæorum & Turcarum exemplo cōfirmari potest. Accedit, quòd viuunt adhuc multi ex antiquis erroribus, scilicet in Nestorianis, Arianis, Iacobitis, &c.

## EFFVGIVM XV.

*Ducitur ex eo, quòd Protestantium non dissimilis sit ratio.*

**N**on dissimilem esse Protestantium rationem; quum ex publica fama & fide dignis auctoribus constet, Pium IV. Pontificem obtulisse

T

Re.

**R**eginæ Angliæ Elisabethæ, sese librum Liturgicum, publico Parlamenti consensu in Anglia receptum, totamque Hierarchiam Ecclesiasticam, sua quoque auctoritate confirmaturum; dummodò Pontificis Romani primatum, & supremam in Ecclesia auctoritatem agnitura esset: Stolidum esse, qui inde non facile eliciat, non tam Pontifici Romano curæ esse, quidquid aliàs est controuersiarum inter Protestantes & Romanam Ecclesiam, quàm ipsius auctoritatem supremam, de qua disceptari molestè feratur. Iam verò Protestantium eruditissimos, proinde atque Græci faciant, non denegare Episcopo Romano potestatem, quam iure Patriarchali in Occidentem totum obtineat; neque de eo admodum contendere, utrùm Episcopo Romano, ceu Primario, præ reliquis omnibus, vniuersæ Ecclesiæ sollicitudo incumbat; neque etiam an Petrus fuerit Princeps & vertex Apostolorum, quin etiam certo aliquo modo & eminentiùs, quàm id sibi quisquam Episcoporum ausit tribuere, Christi Vicarium fateri: de eo tantùm controuersiam esse, an sit Monarcha totius Ecclesiæ; an solus omnia possit, sine suffragio & præscitu concilij; an liceat Romam causas omnes euocare, & alia plura, quæ eò spectant; nihil horum esse in Concilio œcumenico definitum; aliter quoque ea de re loqui, qui olim, & ante complura sæcula illius meminere, quàm eos, qui nunc viuunt, aut in Gallia, atque Germania cis Alpes agunt.

Nihil esse opportunius, ad restaurandam Ecclesiæ concordiam, quàm si Pontificis auctoritas, negle-

neglectis vanis & perniciosis Canonistarum & aliorum adulatorum regulis, quas tamen curia Romana hodie sequatur, intra antiquos Canones constringatur; nec aliam esse causam, quòd Protestantes Episcopum Romanum Antichristum appellent, quàm ideo, quòd eum videant, contempta veterum canonum auctoritate, plus sibi sumere, quàm fas sit, & è re sit Regum Principumque, quin etiam ipsorum Episcoporum; cum aliter plerumque viuat, quàm deceat Episcopum: Posse contineri Ecclesias felici concordia, quamquam Pontifici non tribuatur tam ingens potestas; redeundum esse ad prima sæcula, cum omnium consensu nondum esset tanta Episcopi Romani existimatio; redeundum denique ad eos, qui superiore sæculo, quamuis essent Romanæ Ecclesiæ addictissimi, vel aboleuerint omnino aliquamdiu nominis Pontificij auctoritatem, vel de ea restringenda, & constituendo in suo regno Patriarcha, cogitauerint; cum omnis demum controversia ad hanc immensam Pontificis auctoritatem redeat, hanc primùm esse expugnandam, docendumque, eam non esse necessariam, neque traditam, neque scripta reuelatione Ecclesiæ impositam: Qui tamen eam sponte ferre, atque illi se submittere voluerint, hoc illis fraudi non futurum; vt ideo summum nomen quemquam etiam, qui innoxius est, censerì debeat, summo priuaturum bono, id & prouidentiae & bonitati Diuinæ minimè esse consentaneum; quin etiam iustas esse causas, propter quas dubitare liceat, quantumuis Seruator noster Pontifici Roma-

no eximium aliquid contulerit, an id ei perpetuum esse voluerit; ita vt illo priuilegio, vti aliàs in humanis fieri videmus, per scelera & flagitia nequeat excidere: sanè cùm curia Romana sæpe sit adeò flagitiosa, & Pontifices adeò degeneres, vt nullam ampliùs in iis primi antecessoris notam agnoscas, quì fieri possit, vt Deus Opt. Max. pro sua *φιλανθρωπία* tam seuerè homines puniat, si quid non agnoscant in Episcòpis Romanis, quo ipsi semet reddiderunt indignor.

## PRÆCLVDITVR.

I. **N**Unquam Pius IV. aliquid Reginz Elisabethæ obtulit, quod vel bonis moribus, vel sanæ doctrinæ aduersaretur; famam autem inter Hæreticos vulgatam, in testimonium adducere non debetis, vtpote quæ iustam patitur exceptionem. In eo libro Liturgico, vt nonnulla eò ex nostris traducta, tolerari possunt, ita quædam admitti nequeunt; præ cæteris aliqua contra Pontificem in eo leguntur, quæ à Pio IV. approbata fuisse, verisimile profectò non est. Porro ex falso antecedente, falsum reuerà consequens deducitis; scilicet non tam alias controuersias Romano Pontifici curæ esse, quàm supremam illam, qua pollet, auctoritatem. Hanc sanè ipsi cordi esse, non negauerim; cùm in ea Protestantes plurimùm errare constet; sed de aliis eorundem erroribus æquè sollicitus est; cùm nullū ipse errorem valeat approbare; quisquis enim peccat  
in

in vno, factus est omnium reus. Quod de iure illo Patriarchali habetis, futile est; nam quæso, vnde ius illud profectum est, vnde collatum, ac deriuatum? an fortè à Principibus? sed quò ipsi carent, ius illud conferre nequeunt: A Conciliis œcumenicis, inquires; cedo loca, & sacros Canones; ab ipsis Episcopis, vbi transactio, vbi cessio?

II. Præterea frustra illi sollicitudinem Ecclesiæ vniuersæ incumbere dicitis, nisi potestatem à Christo Petro factam agnoscatis; Christi autem Vicarium esse, non certo aliquo modo, sed verè ac propriè, manifestum est; vnde enim vos certo aliquo modo talem esse probabitis, inde nos verè ac propriè talem esse concludimus: cui enim aliorum Apostolorum dicit: *Pasce oues meas; confirma fratres tuos; orauit pro te, ne deficiat fides tua; super te ædificabo Ecclesiam meam, aduersus quam porta inferi non præualebunt; tibi dabo clauis regni calorum; quidquid solueris & ligaueris, erit solutum & ligatum;* atque alia huiusmodi. Si autem Principem & Caput Apostolorum esse, negare non audetis, inde faciliè concludetis, esse caput Ecclesiæ, quam nobis Apostoli repræsentant; Ecclesia verò corpus mysticum est, suo capite, suis membris constans; virtus autem à capite in reliquum truncum deriuatur; capiti denique reliqua subesse, par est.

III. Igitur suo modo Monarcha est totius Ecclesiæ; non quòd Concilio œcumenico cum suo capite coniuncto, & ab eo directo, vel confirmato, sua potestas non insit; nullus Catholicus hoc negat;

neque huc facit , quidquid inter Catholicos de v-  
triusque auctoritate controuertitur. Agnoscite ,  
quæso , Romanum Pontificem , eo saltem modo ,  
quo ab iis agnoscitur , qui inter Catholicos œcume-  
nici Concilij auctoritatem magis , immò maximè  
extollunt ; nec enim illi negant Romanum Episco-  
pum supremum Dominici gregis pastorem esse , cu-  
ius sit , res fidei controuersas definire , saltem ad  
proximum vsq; Concilium , & maiores causas ad se  
euocare. Dico, *saltem* , cùm nemo Catholicus id ne-  
get ; ne scilicet quidquam à me adducatur , quod à  
Catholicis Doctoribus in controuersiam vocetur.  
Hinc ab aliis Episcopis consulitur , in re fidei & mo-  
rum ; hinc nuper octoginta circiter Galliæ Præsul-  
es ad eum quinque Propositiones Iansenianas de-  
tulerunt, vt de iis, quid tenendum esset, definiret, &  
tamen in Gallia, Concilij auctoritas, seu potestas  
non infimo loco est.

IV. Quòd dicitis, in Concilio œcumenico defini-  
tum non esse, Romanum Pontificem hac potestate  
valere : esto ; quàm multa sunt, quæ certa fide te-  
nemus, quæ tamen in Conciliis nunquam definita  
fuère, sed supposita ; vt Patris diuinitas, hominum  
redemptio, &c. Deinde, quòd omnia Concilia œcu-  
menica huiusmodi potestatem agnouerint, ex eo pa-  
tet, quòd vel iis Romanus Pontifex, per suos Lega-  
tos saltem , præfuerit, vel ea deinde confirmârit ;  
quod certè hoc loco probandum mihi non est, cùm  
alij iam id pro dignitate præstiterint, præsertim Bel-  
larm. tom. I. cont. 4. l. I. c. 19. &c. Nec aliter hæc de

ie antiquiores Catholici senserunt, quàm modò recentiores orthodoxi sentiant; & si quid Catholicos inter controuertatur, quod ad auctoritatem Romani Pontificis pertineat, liberum sit suarum cuique partium iudicium. Neque id à vobis exigo, vt hanc, vel illam opinionem, quæ ad fidem non pertineat, teneatis, vel adulatoribus, si qui fortè sunt, suffragemini. Sed quòd Romanum Pontificem pro Antichristo habeatis, iis sanè prærogatiuis repugnat, quas illi vltro conceditis; cùm scilicet eum certo quodam modo, Vicarium Christi, ac D. Petrum Apostolorum Principem appelletis, quæ nemo sanæ mentis Antichristo peccati filio concesserit.

V. Appellate, quæso, antiquos illos Canones, quos Pontifex, abrogatâ sibi iniustâ auctoritate, contempserit; an fortè aliquis Primatum Petro abrogat. Quod è re Catholicorum Principum sit, supremum Pastorem ac communem Patrem habere, luce clarius est; quasi verò subditis sibi Episcopis & tumultuanti Clero subiici bene illis vertat; præsertim cùm Romanus Pontifex in eorum ditionem nullum sibi ius vendicet; nec enim est Dominus temporalium; & si quid fortè ab vno, vel altero immoderatiùs actum est, quod hîc non dispuro, id certè laudi tribui non debet, nec vnius delictum reliquis omnibus imputari. Episcopis vel inde gratulor, quòd supremum habeant in causis fidei & morum arbitrum, ad componenda dissidia, quæ vel ipsos inter Episcopos nonnunquam intercedunt. Redeamus porro ad prima sæcula, per me non stat; eadem enim semper

fuit Romani Pontificis auctoritas, ab antiquis Patribus commendata, à Conciliis celebrata & expetita ab Imperatoribus magno honore habita; & ne hoc unum omittam, quod nonnullis fortè mirum accidet, nullū vnquam legitimū & œcumenicum concilium fuit, in quo de Romano Pontifice actum sit maiori cum libertate, quàm in nupero Tridentino, ut historia mox edenda fidem faciet.

VI. Quinam porro addictissimi Ecclesiæ Romanæ esse queant, ac simul auctoritatem Romani Pontificis abolere, capere animo non possum; hæc enim duò sibi inuicem repugnant. Quòd autem id superiore sæculo ab aliis, quàm ab hæreticis, præstitum sit, nemo sanæ mentis crediderit: quis enim Catholicus Romani Pontificis auctoritatem in re fidei & morum non admittat? Quod additis de Patriarcha, inane est; quasi verò vllā prærogativā Patriarchæ gaudere valeant, quam à Romano Pontifice non acceperint; quasi verò ovis Christi Patriarcha non sit, ac proinde ipse summo Pastori subditus; quasi verò Episcopi Patriarchalem auctoritatem conferre possint, qua ipsi carent: sed hæc omitto, quæ mera sunt simpliciorum terriculamenta. Itaque agnoscenda est supremi Pontificis, non immensa quidem (nec enim omnia potest) sed magna tamen & verenda auctoritas, in sacris libris expressa, communi traditione accepta, à Conciliis admissa, à sanctis Patribus celebrata, eaque ad Ecclesiæ regimen prorsus necessaria; nisi enim supremum Iudicem haberemus, qui



qui controuerfias fidei & morum definiret, Eccle-  
fiæ ftatus perturbatiffimus efferet.

VII. Quòd liberam fidem cuique fuam relin-  
quatis, ferre non poffum; cùm enim eadem fit fidei  
ratio, vel omnia credenda, vel nihil, vt par efl, credi-  
mus; igitur vel erramus, dum præfatam auctori-  
tem credimus, aut fi rectè credimus, vos ipfi eam-  
dem negando, erratis; error autem, modò inculpa-  
tus non fit, vitio vertitur; ac proinde Diuinæ Iufti-  
tiæ efl, errantem fuâ culpâ plectere, cùm ille maxi-  
mè noxius fit. Quod tandem fubnectitis, dubium  
fuboriri poffe, vtrùm ea Chriftus perpetua effe vo-  
luerit, quæ in Ecclefia fua conftituit, vt, quod fentio,  
liberè dicam, horrendum efl; eadem enim ratio contra  
auguftiffima Catholicæ religionis myfteria milita-  
ret; vnde omnia ferè incerta redderentur; præter-  
quàm quòd fingulari profectò iure factum efl, vt au-  
ctoritas illa errare nescia ad confumationem vſq; ſæ-  
culi, vel ipſo Chrifti testimonio, extenderetur; nun-  
quam enim portæ inferi aduerſus Eccleſiam in Pe-  
tro fundatam præualebunt, nec fides Petri vnquam  
deficiet: licèt autem flagitioſa vitæ eſſe poſſit, omnia  
quæcunque dixerint vobis, ſeruate & facite, at ſe-  
cundum opera ne feceritis. Porro Pontifices noſtri  
adeò degeneres non ſunt, vt exaggeratis; ſed odio,  
quo aduerſus eoſdem flagratis, aliquid condonan-  
dum: quamquam de priuata eorum vitæ, hoc loco  
non agitur, de qua ipſi rationem Deo reddituri ſunt,  
ſed de auctoritate à Chriſto accepta; Chriſti autem  
verbis, non priuati hominis factis ſtandum eſſe, quis

non videt: quòd autem per scelera dignitate excidat, quamdiu fides integra est, periculum esse nequit; si verò in fide peccaret, errorémque suum publicare veller, tunc esset alia ratio, de qua scholastici disputant: sed quid ad rem? cùm etiam, vt vos vltro fatemini, Pontifices Romani dogmata fidei non mutant.

## EFFUGIUM XVI.

*Ducitur ex beato ex hac vita exitu, quò demum tota Christiana religio spectat.*

**P**raterea spectandum esse, quò demum tota Christiana religio redeat; Christiano autem vnicè esse propositum beatum ex hac vita exitum, quo de altera vita obtinenda, securo possit esse animo. In hoc igitur vltimo agone, in quo de summa rei agitur, haud dubiè neruum totius religionis Christianæ spectari. Iam verò vti Romanis, Græcis, Protestantibus sit propositus finis, ita etiam eodem omnes modo contra communem hostem in hoc postremo certamine depugnare: vnum & idem omnibus esse Symbolum; arma esse omnibus eadem; idem omnibus scutum diuinæ bonitatis & passionis, atque meritorum nostri Seruatoris. Vbi ad tam serium certamen ventum est, neminem ampliùs esse sollicitum de vanis contentionibus, quæ antè animum distraxerint; tum maximè fidem Christianam intra pauca quædam & ardua constringi, in quibus quum omnes consentiant, tentandum esse hominì  
mode-

moderato , vt aliquam inter partes tolerantiam conciliet.

## PRÆCLVDITVR.

I. **F**Ateor, eumdem omnibus finem propositum esse, beatam scilicet vitam ac cœlestem gloriam, ac omnibus in extremo agone, contra communem hostem depugnandum esse; non tamen eadem omnibus sunt arma, nec idem clypeus. Commune Symbolum frustra esse contenditis; iam enim suprâ, diuersum esse, luculenter ostendi: exteriorem duntaxat literæ corticem consideratis, sed interiorrem veri & Catholici sensûs medullam minimè inspicitis. Eadem quoque fides non est, vt suprâ euicci; igitur neque spes eadem; vestra enim spes mera præsumptio est. Diuersa sunt arma; vos merita Christi, sed minimè applicata prætexitis; quæ nullis Sacramentis instructis, vobis prorsus inutilia sunt; nos verò, in eo transitu, iis præsidiiis munimur, quibus & peccatorum veniam obtinemus, & proximæ salutis pignus accipimus, Sacramentis scilicet Pœnitentiæ, Eucharistiæ, extremæ Vnctionis, quibus cùm Protestantes omnino careant, quid mirum, si minùs instructi ac imparati decedunt.

II. Huc autem volo vos, ad vltimum scilicet mortalis vitæ terminum redactos, in quo nullus tricis vestris, aut cauillis est locus; in quo nihil odiis, aut factionibus, nihil superbiæ vel contumaciæ dandum est; in quo mero salutis studio teneri ac duci debe-

debemus. Itaque perpendite, quæso, & vobiscum reputate, quàm melioris conditionis nos simus; nos enim de fide nostra certi, ita spem in Deo nostram collocamus; vt Christi merita, per Sacramenta ab eodem Christo instituta in nos deriuari curemus; ac credimus, vos à salutis via errasse, ac proinde nisi vos inculpatus error excuset, tartareis ignibus addicendos; cùm tamen doctissimi quique vestrùm fateantur, Catholicos, seu Romanos, vt vocare soletis, tutos ac securos in sua religione mori, in qua scilicet æquè saluari possunt. Dicam, quod res est, nullum apud nos morientem vidi, quem Catholicum mori poeniteret; nonnullos è vestris in eo transitu incredibili anxietate laborantes vidi, quòd de sua religione maximè dubitarent; hæc mihi potentissima ratio semper visa est, quæ vnico salutis æternæ momento niritur, de qua cùm agitur, nulla vnquam tolerantia ferenda est.

## EFFVGIVM XVII.

*Ducitur ex eo, quòd falsò aliqui putent, admissâ partium tolerantia, Ecclesiam saluam esse non posse.*

**N**Eque audiendos esse, qui ideo tantùm impediant eiusmodi tolerantiam, quòd existiment, eâ semel admissâ, saluam non posse esse Ecclesiam, nec saluam etiam republ. Satius quidem esse, si vna & in omnibus quibusque consentiens religio animos contineat; quando id tamen

res ipsa exigat, imitandam esse Ecclesiam & Rempublicam Iudaicam, qualis ea maximè postremis ante natum Seruatorem sæculis fuit; in eadem enim Ecclesia & repub. varias fuisse sectas, Phariseorum inprimis, Sadduceorum & Essenorum; fuisse quidem alias quasdam, sed has principes floruisse; in has enim totam Ecclesiam Iudaicam fuisse diuisam, populumque omnem vni, vel alteri parti adhæsisse; eadem ipsis fuisse sacra, commune templum; quamquam diuersæ ipsis essent sententiæ, diuersa etiam viuendi ratio: Non aliam tum fuisse in orbe Ecclesiam, quàm hanc Iudaicam, quique ad eam passim è Gentibus accesserunt; nisi quis adiungere velit nouam aliquam, Gentium ratione naturali rectè vtentium; tum etiam non fuisse veram Ecclesiam in vna, aut altera parte sola, sed ex omnibus eam fuisse constitutam.

Essenos quidem, quamquam à Seruatore & Apostolis nunquam commemoratos, quum homines probi fuerint, & optimæ vitæ, minimè omnium posse excludi; nec verò etiam Phariseorum sectam, quæ reliquas amplitudine superauetit, dici posse exfortem, quum ipse Seruator Scribis & Phariseis, qui obtinebant Cathedram Moysis, iusserit esse obediendum, & faciendum, quidquid præceperint; vitandos tamen monuerit eorum mores, simulatam pietatem, fastum, & superstitiones quasdam obseruationes, quæ ipsis maiori fuerint curæ, quàm ea, quæ Deus ipse præceperat: De Sadduceis tantum iustas esse causas, propter quas dubitare liceat; sæpius tamen

men etiam cum his Seruatorem egisse ; fuisse etiam tum quidem præterea homines insigniter pios , vt Zachariam, Simeonem , aliósque, quales etiam eximia pietate præditi viri adhuc hodie reperiantur; illos solos Ecclesiam non constituisse, non constituisse eos alios & peculiare coetus, non alia ipsis fuisse sacra, non templum aliud.

Ex hac facie Ecclesiæ Iudaicæ, quam haud multis post reditum à Babylonica captiuitate annis, induisse videatur, adstrui eorum sententiam, qui statuunt, Ecclesiam Catholicam ex pluribus coetibus particularibus colligi; quamquam de nonnullis inter se dissidentibus, quorum coetuum alij aliis sunt puriores, perinde atque in Ecclesia quapiam vicana, aut vrbica, vna familia aut altera sæpe rectius percipit diuina mysteria, & vitam secundum ea exigit. Explodi hanc piam & moderatam opinionem, quòd existimetur, fieri non posse, vt Ecclesia, quæ vna esse debeat, ex coetibus diuersa sentientibus colligatur; id verò iam constare exemplo Ecclesiæ Iudaicæ, quæ vna fuerit, quamquam in varias sectas diuisa; ideo quòd omnes expectarent venturum Messiam, omnes reciperent scripturam canonicam, omnes ad idem templum tam apertè ipsis in diuinis Literis commendatum, commearent: ita quoque hodie Christianos, si vtique vellent, quamuis & ipsi tantopere inter se dissideant, posse esse concordēs, eum vna omnibus sit scriptura canonica, idem Symbolum, vnus ipsis Deus, vnus Christus & Seruator, vnum Baptisma, vna in præcipuis & fundamentalibus

bus consentiens Fides; vnam tantum non habere Ecclesiam, quæ aliàs necessariò inde resulter, non quòd verè non sit vna Ecclesia, sed quòd variis opinionibus, affectibus & zelo præcipite impediti, existiment, propter quamcunque contentionem, desinere protinus Ecclesiam esse vnam; quæ opinio imbecillitati humani Intellectus tribui solet, res diuinas humanis sensibus & vulgari more metientis.

### PRÆCLVDITVR.

I. **N**illus error in Ecclesia tolerari potest; vt vel hinc maximè audiendi sint, qui prædictam abhorrent tolerantiam; vnam esse Ecclesiam constat; vnam scilicet, eandem Christi fidem profitentium congregationem. Vbi ergo eadem fides non est, eadem Ecclesia non est; fides autem Protestantium & Caluinistarum à nostra penitus diuersa est, vt iam sæpe inculcaui. Nec quidquam ad rem nostram facit illa sectarum in Ecclesia Iudæica diuersitas, quarum singulæ in iis conueniebant, quæ ad substantiam pertinebant. Fuit autem lex illa triplex, moralis, cæremonialis, & iudicialis: Moralis Decalogo summam continebatur, & hæc nō solos Iudæos, sed omnes homines obligabat, secus verò aliæ duæ; quòd verò ad nescio quas legis appendices, vel interpretationes, vel traditiones pertinet, cum à summo Sacerdote, vel Pontifice declaratæ non essent, nec definitæ, licet plerique in iis errarent, non tamen vel inde hæretici censi poterant, quòd

quod ab Ecclesia illius temporis pro hæreticis non haberentur.

II. Non pauca apud nos exempla suppetunt; sic nonnulli inter scholasticos aliquid de fide esse sentiunt, quod tamen alij de fide esse negant; nec propterea hæreticis adnumerantur. Et verò in Ecclesia Iudaica pauca omnino definita erant; Diuina scilicet fide tenenda; v.g. vnitas Dei, Messias futurus, templum Domini; vix aliud inuenio, quod ad fidem illorum explicitam pertineret; præter historica. Hinc Samaritani in fidei societatem ab ipsis non admittebantur, quod templum Dei negarent; itaque cum Sadducæi & Pharisei in prædictis conuenirent, licet in quibusdam aliis errarent, quæ definita & declarata non erant, non propterea ex fidelium numero expungebantur: idem prorsus accidit in multis questionibus Theologicis, in quibus vtramlibet partem sequi licebat, antequam ab Ecclesia definirentur; vbi verò definitæ sunt; definitioni Ecclesiæ standum est.

III. Ita prorsus, si Pontifex Iudæorum declarasset cum suo concilio, resurrectionem mortuorum certa fide tenendam esse, haud dubiè Sadducæi, nisi vellent extra Synagogam fieri, sententiam mutare debuissent: idem dico de Christi ac Messie Diuinitate. Præterea Ecclesia Iudæorum non erat vniuersalis Ecclesia, cum multi extra illam fideles essent, vt Melchisedech, Iob, Niniuitæ, Cornelius Centurio, Eunuchus Candaces, &c. Igitur etiamsi Iudæorum Ecclesia extincta fuisset, non propterea Eccle-

sia



sia omnino defecisset, ut patet. Scio, Protestantes nonnulla opponere contra Ecclesiæ Iudaicæ auctoritatem & infallibilitatem, sed cum ad rem nostram non faciant, omitto, tu vide sis apud Bellarm. to. r. contr. 3. & 4. & apud Becanum singulari opusc. de analog. Veteris Testamenti.

IV. Itaque, ut prædictæ Iudæorum sectæ in expressis ac definitis articulis conveniebant, dissentiebant verò in aliis capitibus, quæ nondum definita erant, ac proinde eiusdem fidei societate coniunctæ erant, cum fides expressa ad ea, quæ definita ac declarata non sunt, minimè extendatur, ut patet; ita prorsus variæ sectæ inter Catholicos, v. g. Thomistarum, Scotistarum, Nominalium, &c. eiusdem fidei vinculo coniunctæ, varias opiniones nondum ab Ecclesiâ declaratas defendunt; at Protestantes à nobis dissentiant in expressis fidei articulis, ut iam suprà luculenter ostendi. Longè igitur diuersa est ratio; atque inde hoc effugiū manifestè præcluditur, quamquam enim Ecclesiâ Catholica ex pluribus cœtibus componatur, ij tamen omnes, Ecclesiæ Romanæ subditi sunt, eadem fidei dogmata credunt; licet nonnulli aliis rerum fidei peritiores sint. Quod ad Scripturam Canonicam attinet, in Lege Iudaica res adeò explicata nō erat; hinc Sadducæi libros Moysis duntaxat admittebant.

V. Quòd idem sit nobis & Protestantibus Symbolum, iam sæpe negavi, idem quoque non est Evangelium, nec eadem Scriptura; eadem fortè litera, quamquam hæc in multis vitiata, non tamen

idem Spiritus; litera autem occidit, Spiritus verò viuificat; immò nec vnus est nobis Deus, nec vnus Christus: quisquis enim peccat in vno, factus est omnium reus, cùm multa sint, in quibus fidem Ecclesiæ, ac proinde Christo detrectetis, nihil sanè, vt par est, creditis, cùm eadem diuinæ fidei sit ratio. Non est igitur, quòd imbecillitati intelligentiæ, ac præcipiti zelo tribuatis, si Protestantes aliósque eiusdem farinæ homines in societatem fidei admittere nolumus; illa certè animi demissio, qua Ecclesiam audimus, eiúsque præceptis paremus, ac dictis fidem habemus, imbecillitas dici non debet; magnanimitas potiùs censenda est; arduum enim est superbiam deprimere, & in obsequium fidei captiuare intellectum.

## EFFVGIVM XVIII.

*Ducitur ex communi templo Ecclesia Iudaica, quamquam in varias sectas distincta.*

**C**ontentiones, quæ Ecclesiam Iudaicam in sectas diuiserint, non ita fuisse obuias, quòd vnum & commune ipsis esset templum, eadem synagogæ, & oratoria. Quòd si Seruator noster suis Discipulis æquè atque olim sub Vetere Legge Deus per Moysem Hebræis præcepisset, vt vnum tantum & insigne omnibus esset templum, in quo solemni maximè ritu sacra fierent, quò ex omnibus orbis Prouinciis mitterentur oblationes; non ita facile

cilè diffidia Christianorum eruptura fuisse in atroces factiones, & partes diuersas, nullo amplius vinculo inter se connexas, quas apud Iudæos vnus & communis templi continuerit, reiectis abscissisque Samaritanis, teu Hæreticis, quòd exsortes essent istius communis templi: Christianos verò nullo ita sensibili vinculo, sed mutua tantùm charitate contineri in officio, cuius præcepta, cùm facilè etiam ab imprudentibus violentur, ideo diffidia esse, & frequentiora, & apertiora.

Quantum aliàs valeat religio vnus templi, ad coniungendos variarum nationum animos, spectari posse etiam hodiernum in sanctissima basilica sepulchro Domini & Seruatoris nostri inædificata, in qua concorditer viuunt Latini, Græci, Armeni, Cophri, Abyssini, Syri, Chaldaïque, & quique suæ gentis & patriæ ritum sequantur: Christiani quidè omnes, sed plurimùm inter se diuersi, in illo loco concordēs, quum aliàs inter se omnes dissideant, tantum apud eos posse loci maiestatem & reuerentiam. Latinos quidem illic, propter gentis amplitudinem, atque Imperatoris Regumque Europæorum maiestatem, digniore esse loco, non verò propter religionis puritatem, aut aliquam excelsiorem æstimationem. Quotquot ibi sunt, Christiani nominis gentes, æquo iure ibi censerì, omnes ibi Christum colere & adorare, eiusque vestigia deuota ueneratione prosequi, vt olim Iudæi omnes, cuiuscunque aliàs essent sectæ, in templo Hierosolymitano æquo iure olim Deo Creatori victimas macta-

uerint, venturi Messiae praeludia. Tot Orientis Africaeque gentes nunc sacra faciant Hierosolymis, suam quaque linguam & ritum, ut moris est in Liturgiis ipsorum; iam à pluribus saeculis non frequentasse tantum sacra loca, sed etiam seorsim ibi sacris fuisse se semper operatos.

Quin etiam si Protestantes interdum eò veniant, visum loca sancta, admitti eos à Latinis, atque Christianos censerì; neque ibi inter se mutuo odio dissidere, siue locorum interualla aliquid de dissidij atrocitate diminuant, siue ipso locorum conspectu, in quibus Seruator noster, summus veræ charitatis præco, conuersatus est, mitescant animi; videri idem iis euenire, quod solet populis Prouinciarum conterminarum, longo & auito odio, ut fieri solet, inter finitimas gentes, inter se collisis, qui ubi fortè in Prouinciis longè distitis conuenerint, veterum contentionum immemores, amicè agant, domi aliàs hostes. Aut verò eandem, aut non multum diuersam esse rationem, quæ si eorum, quorum alij in ipsa quidem Germania, se Hassos, alij Rhenanos, Saxones alij, alij Austriacos, extra eam verò in Prouinciis longinquioribus vno & communi nomine, se Germanos appellauerint. Ita in ipsa Ecclesia quidem Latina, alium posse appellari Pontificium, Lutheranum alium, alium Calvinistam, qui si fortè in Oriente conueniant, vno Christianorum nomine censeantur, & sæpe in istis Prouinciis pluribus, maioribusque officiis Christianam amicitiam colant, quam non faciant, colantque ipsi inter se Catholici,

Quo

Quo modo igitur inter se concordēs viuunt, atque agunt Hierosolymis tot diuersæ gentes Christianæ; ita etiam in Europa, Catholicos, Lutheranos & Calvinistas, quos vocant, posse, sancitâ inter se mutuâ tolerantia, in gratiam redire; desitura etiam odia & graues illas contentiones, nisi cuiusque partis duces abrepti prauis affectibus & liuore concisi, spem concepissent, alterutram illarum partium opprimendi; qua spe inflati, maiore quàm ipsos aduersarios odio eos prosequantur, qui aliquam tolerantiam, aut concordiam inter partes moliantur; metuentes, ne excidant spe sua, quam de reditu ad eos ingenti fructu, ex alterius partis oppressione & excidio, conceperint.

## PRÆCLVDITVR.

**I**lla templi communis ratio ad concordiam inter partes conciliandam parùm conferreret, cùm enim in aliis articulis dissensio esset, ij sanè, qui viribus præstarent, alios ex templo exturbarent. Cùm autem Iudæorum sectæ, exceptis duntaxat Samaritanis, ea legis capita tum moralis, tum iudicialis, tum cæremonialis, quæ ad substantiam legis pertinebant, admitterent (pauca enim dogmata, ut iam suprâ dixi, definita erant) quid mirum, si eodem omnes templo, eadêque fidei societate & communione gauderent. Cur verò vnius templi duntaxat, nō verò vnius Summi Pontificis meministis? vtrumque enim diuersæ illæ sectæ agnoscebant,

utrumque negabant Samaritani. Si vnum commune templum Christus nobis non præscripsit, vnam tamen Ecclesiam, vnum Ecclesiæ Caput ac Vicarium reliquit, cui omnes fideles subesse ac parere debeant; cur quæso de templo adeò solliciti estis, de Pontifice verò, sine quo templum inutile esset, tam parùm curatis? Sed hæc sunt leuia.

II. Prætereà non tantùm mutux charitatis vinculo Christiani omnes, sed eiusdem potissimùm fidei, contineri debent. Quòd charitatis leges violamus, & aliquo, quantumuis minimo vos prosequamur odio, dare vobis non possum, vtpote qui pro vestra salute, cum sanguine vitam profundere parati simus, & quidquid dissensionis intercedit, id saltem, quod nostrum est, erroribus duntaxat vestris, non verò amorì erga vos nostro aduersetur. Scribunt plerique nostrum, prædicant, disputant, differunt, vt hæreses vestras refellant, nullo sanè aduersum vos odio ducti, quos saluos esse impensè volunt; sed vt vos ad veram fidem conuertant, atque adeò vestram procurent salutem.

III. Quod de Basilica Dominici sepulchri exaggeratis, inane prorsus est; quasi verò in potestate Catholicorum positum sit, alios arcere, qui persolutà Turcis pecunià, id alioquin facilè obtinerent, nec in religione concordēs dici queunt, qui sunt fide diuersi. Quòd verò sub eodem tecto, vt aiunt, sua obeant sacra, diuerso ritu & modo, & quod caput est, diuersa omnino fide, ad vnitatem religionis & Ecclesiæ nullatenus conducit. Sic in Germa-

nianonnullæ sunt ædes sacræ, in quibus Catholici & Protestantes alternis sacris operantur; sunt item in Gallia, quæ muro duntaxat à Calvinistarum templis dirimuntur, communi campana utrisque famulante. Quod Latini in præfata Basilica sepulchri Domini digniore sint loco, non tantum gentis amplitudini tribuendum est, verum etiam tum antiquæ possessionis Iuri, tum etiam Turcarum opinioni, qui præ Catholicis, alios Christianos non putant.

IV. Illic quidem omnes Christum adorant & colunt, sed diuersa fide & ritu, ac proinde diuerso euentu. Quod diuersa sit rituum & Liturgiarum ratio, parum refert, modò eadem fides esset; sic enim in nostris Basilicis, Græcos, Armenos, Maronitas suo ritu facere permittimus. Si tamen prædicta basilica Turcarum imperio subducta esset, & Catholicorum ditioni subdita, Hæreticis haud dubiè eò aditus non pateret, saltem ad sua sacra facienda; nec etiam modò Protestantes nostri admitterent, in sacrorum scilicet Cômunionem, quamquam eos amicè alioquin exciperemus. Nec vsquam ab iis mutuo dissidemus odio, aut saltem mutuum non est; neque vos vllatenus fugit, quanta charitate & humanitate vos interdum, etiam in Europa, excipiamus, quamquam huiusmodi officiorum vrbanitatem rejicitis, quod an suspicioni vestræ, an fortè odio, vel potius utrique tribuendum sit, prorsus ignoro; facite, ut simili animo erga nos sitis.

V. Latini omnes communi Francorum nomine veniunt in Oriente, à Turcis Infideles omnes vo-

cantur. Quòd in Ecclesia Latina alij Pontificij, alij Protestantes, Caluinistæ alij censeantur, non admitto; cùm Ecclesia ex Catholicis duntaxat constet. Illa porro comparatio, quam à diuersis Germaniæ Pro-  
uinciis ducitis, valde claudicat; ad hanc enim Patriæ communionem, linguæ, morum, indolis, & vulgaris appellationis communio sufficit; cùm tamen in religionis communitate secus accidat; alia omnia di-  
uersa sint, modò fides eadem sit; vt autē eadem sit, in nullo penitus differat, oportet. Itaque falsum est, hæreticos Orientales in basilica sepulchri Domi-  
nici in societatem fidei à Catholicis admitti; nec etiam ibidem illos suis sacris operari paterentur, si suprema potestate valerent. Nec illa, quam vos tantopere commendatis, tolerantia, vlllo modo Ca-  
tholicis probanda: nec vos vllatenus opprimere cogitamus; vtinam tot errorum pondere iam ob-  
rutos, discussis erroribus, liberare possemus, & in salutis viam reducere; nullo sanè liuore, odio nullo, sed mero charitatis studio ducti; id nobis malum adueniat, quod vobis volumus.

VI. Hanc quæso suspensionem ac sinistram de nobis deponite opinionem: quòd autem eam, quam proponitis, concordiam acceptare nolimus, non vestri odio, sed veritatis & fidei zelo facimus; Deus cum Belial conuenire non potest, cum Dagone Arca, cum luce tenebræ, cum fidei puritate obstinatus error: vel hinc certè non maiore odio, sed maiore commiseratione digni, quòd antiquis erroribus, per huiusmodi conciliatores nouus error accedat.

Error



Error enim palmaris est, Hæreticos cum Catholicis, Protestantes cum Romanis in fidei societatem venire; immò monstrum quoddam erroris esset, eò cæteris perniciosius, quò laxiore via salutis aperta, firmatòque illo dogmate, quemuis in sua religione saluari posse, omnibus salutis incuriam iniiceret, eumque sanctum metum subduceret, quo plerique ducti, non anxij quidem, sed valde solliciti, in hoc propriæ salutis negotio viuunt.

## EFFVGIVM XIX.

*Ducitur ex dissensionibus recentiorum Iudæorum, quæ tamen unitatem religionis non dissolunt.*

**Q**Uòd si ulterius, inquiunt, Iudæorum exemplo insistere libeat, esse etiamnum inter eos graues dissensiones, aliòsque esse ritus Hispanorum, alios Germanorum, alios Orientalium Iudæorū, tam etiam notam admodum olim eos fuisse sectam Karraitarum ( Samaritani enim, quorum nomen multis post Christi Natiuitatem sæculis celebre fuit, semper fuerunt à Iudæis seiuncti ) quòd reiectâ reliquorum pænè omnium sententiâ, quæ nescio quas traditiones à præcipuis Doctoribus, diuersis voluminibus comprehensas venditabant, solas diuinas scripturas sequendas arbitrarentur; ingens ideo exortum fuisse passim inter Iudæos in Oriente & Occidente diffidium, atque Karraitas mul-

ta damna atque incommoda reliquorum Iudæorum inuidiâ pertulisse: interea tamen utrosque Iudæos esse, neque, quocunque aliâs inter se diffidio laborerent, alio loco haberi posse, quàm quo sunt apud Christianos, aliósq; diuersam religionem sectantes Iudæi; utrosque enim eadem habere sacra, eandem fidem in vnum Deum Creatorem cæli & terræ, atque Messiam aliquando venturum.

Quòd verò Karraitæ non recipiant fabulosas illas atque incertas, si quidem Symbolicæ non sunt, Thalmudicorum narrationes, omnibus etiam è trivio notas, nec veterum omnium Rabbiorum commenta approbent, ideo tamen non minùs eos Iudæorum loco esse censendos, atque illi, qui eiusmodi ceu à maioribus tradita, verè anili fide credant, quorum conditionem perinde misereri liceat, atque eorum Christianorum, qui olim nescio quas fabulas de draconum, serpentum, horrendorum vermium, multarumque aliarum hodie non amplius cognitarum bestiarum, cum sanctis quibusdam Viris pugnâ, velut quondam Gentiles Herculis sui certamina, pari propemodùm fide, atque alia Christianæ fidei dogmata receperunt. Huiusmodi narrationes à Iudæorum commentis, haud multùm diuersas olim passim in Ecclesia fuisse creditas, atque ita vsu receptas, ut adhuc hodie apud plurimos fidem inueniant, & transuras fortassis aliquando fuisse incertos, publicoque vsu receptos codices, nisi maior fuisset semper veræ eruditionis, Philosophiæ atque omnium artium liberalium habita apud Christia-

nos ratio, quam ynquam apud Iudæos.

Quibus autem sæculis natiua fuerit barbaries, quæ sunt rerum humanarum vicissitudines, iis plura eiusmodi & ficta, atque credita fuisse, quæ nunc ab omnibus explodi videas. Quin etiam in vna Prouincia, in qua maior regnet passim apud populum, quàm in cæteris ignorantia, & simplicitas, sæpe recipi, & ceu verissima atque sancta credi, quæ vbi in alias perferantur Prouincias, vbi homines sint naris emunctioris, ac prima statim narrata, sibilo promodùm excipiantur. Videri autem si rectè vtriusque secta, & reliquorum Iudæorum atque Karraitarum instituta & mores consideres, posse Protestantes Karraitarum vicem, Catholicos autem atque Orientales reliquorum Iudæorum, siue Thalmudistarum, quorum præterea longè maior sit reliquis numerus, vicem obtinere.

## PRÆCLVDITVR.

**L** Vid, quæso, ad nos diuersa illa Iudæorum post Christi mortem instituta, & variæ sectæ, cum iam eos errore teneri vos quoque fateri debeatis? Quòd errantes illi in nonnullis conueniant, in aliis differant, quid tum? meram societatem humanam componunt; cuius institutum earundem opinionum unitatem non desiderat. Iudæi meris opinionibus ducuntur, cum diuina fide careant; opinionum autem varietatem in eadem gente, eodem populo, eadem ciuitate & familia, ci-

tra

tra societatis humanæ labem aut solutionem tolerari posse, nemo sanè est, qui dubitet. Quòd autem prædicta Iudæorum communitas intra humanæ societatis fines sese contineat, certo certius est; cum nihil penitus diuinæ fidei habeant: & quamquam religionis nomen obtendant, illud tamen varium est, & merus obtentus, cum religione omni careant. Igitur Karraitæ cum aliis humano illo vinculo coniuncti manere possunt, licèt ab iis in plerisque dissentiant; neque hoc facit, quin eandem Iudæorum gentem, eundemque populum constituent.

II. Haud sanè dissimili ratione Protestantes, Calvinistæ, aliique Hæretici, licèt varia sentiant, & in plerisque non minùs inter se, quàm à Catholicis discrepent, eandem tamen sectam componere possent: Immò inter Protestantes diuersa sunt dogmata, & vix duos ministellos, vt vocant, inuenias, qui idem in omnibus sentiant. Possent, inquam, in eandem religionem coire; nempe cum vera fide careant, & humanæ duntaxat communionis nexu ac vinculo teneantur, cumque illum nexum opinionum dissensio non soluat, quid mirum, si in vnam gentem, vnum populum, vnam, vt vocant, religionem, coalescere valeant; quod præfato conciliatori longè meliùs succedet, quàm id, quod faciendum suscepit, & è re Christiana fore asserit, vt scilicet Catholici cum Protestantibus, Calvinistis & Græcis in eiusdem Ecclesiæ communionem conueniant.

III. Hoc autem fieri minimè posse, ex dictis constat; nempe Catholici omnes eius fidei nexu copulan-

lantur; cum iis igitur in fidei societatem conuenire nequeunt, quid diuersam ab iis fidem profitentur, ut patet: quod autem Protestantium fides à nostra diuersa sit, in controuersiam non cadit. Dissimilis igitur ratio est; nempe ut errores inter se conuenire possunt, ita & errantes; cum tamen error cum vera fide simul stare non possit: Bonum ex integrâ causa, malum verò ex minimo defectu: hinc quisquis errat in vno, sit omnium reus. Quod vera fides bona sit, plusquam certum; hinc leuissimi erroris accessione vitatur; hinc bona amplius non est; igitur neque vera: idem de vera Ecclesia, ac vera Religione dictum sit. Igitur licet diuersæ Iudæorum, vel Hæreticorum sectæ in vnam societatem coeant, Catholici tamen cum iis sociari nequeunt.

IV. Exaggeratis præterea narrationes quasdam, maiore saltem ex parte apocryphas, nempe Gelasius Papa Can. *Sancta Romana*. distinct. 15. S. Georgij & Draconis historiam inter Apocryphas recenset; quasi verò Sanctorum acta diuina fide credamus, exceptis scilicet iis, quæ sacris Litteris continentur. Nec est, quod scriptores vestri Melanchthon, Caluinus, aliique ferè omnes adeò vehementer nobis exprobrent eorum Sanctorum cultum, qui nusquam fuerunt, ut SS. Georgij, Christophori, Catharinæ, Hippolyti, &c. Fateor, nonnulla fortè iis affingi, quæ cum veritate minùs consentiant: Hinc Abdias Babylonius multa de Apostolis scripta reliquit, quæ manifestæ falsitatis conuinci queunt; hoc tamen non probat, Sanctos illos nunquam extitisse,

ut optimè ostendit Bellarm. tom. 1. contr. 7. lib. 1. cap. 7. itémque Becanus opusc. singulari de inuocatione Sanctorum, quæst. 13. apud quem innumeros auctores, magni reuerà nominis habetis, qui huiusmodi Sanctorum meminerunt, eosque aliquando vixisse testantur.

V. Quis amabò, neget, Carolum Magnum existisse, aut Cyrum Persarum Regem, aut Alexandrum Macedonem; iis tamen innumeras fabulas affectas fuisse legimus, in Heroicorum gestorum fictis historiis, quas vulgò *Romanas* appellamus; immò res à Christo Domino Seruatore nostro gestæ nonnullis scriptis apocryphis vitiatæ ac fœdatæ fuerunt. Itaque licèt nonnulla sint Sanctorum acta, vel nullius, vel suspectæ saltem fidei, hoc tamen non facit, quin profectò illi extiterint, ac eo cultu digni sint, quem iisdem Catholici deferunt: imponitis autem fidei nostræ; quasi verò illa vnquam certa fide tenuerimus, aut ea fidelibus credenda Ecclesia vnquam proposuerit? Si quid in hoc peccatum sit, non aliis; quàm rudioribus ac syluestribus hominibus imputandum est, crassâ, aut inculpatâ ignorantia laborantibus, qui vel in ipsis fidei nostræ articulis ea concipiunt, quæ vix inter fabulas locum inuenirent. Non est igitur, quòd Ecclesiæ errorem illum tribuatis, qui nonnullis duntaxat, Ecclesiæ quidem fidelibus, inculpatè, vt aiunt, errantibus competit, qui vel nonnulla ad fidem pertinere putant, quæ fidei non sunt, aut aliqua ad fidem pertinentia

ita

ita fabulis infestant, ut vel in ipsam fidem aliqua nota refundi videatur.

VI. Nonnulla quoque esse fateor, quæ ut à maiore parte vera esse creduntur, licet non ea fide, quam diuinam vocamus; ita sunt alij, qui quod vel inde aliquid inanis auræ captare velint, ea reiicere non verentur; abstineo ab exemplis, quæ passim obuia erunt. Quidquid sit, ea probè distinguimus, quæ piâ quidem, humanâ tamen fide credimus, ab istis, quæ certâ & indubitâtâ fide tenemus, in quibus certè nihil falsum, nihil fabulosum habemus; unde sanè, quæ vos opponitis, penitus diffiantur. Quod autè Protestantes Karraitis, nos cæteris Iudæis comparandos esse, subnectitis, perperam dictum, pace dixerim vestra, quod ad nos spectat; fabulas enim fides nostra prorsus eliminat, utpote quæ veri duntaxat patiens est: quod verò ad Protestantes attinet, facile concesserim, eos Karraitis vel in hoc haud absimiles esse, quod traditiones Ecclesiasticas reiiciant, quas tamen admittendas esse, suprà euicimus.

## EFFVGIVM XX.

*Ducitur ex eo, quòd difficile sit, ex vulgi animo opinioniones euellere, quas cum lacte materno imbiberunt.*

**N**ihil est difficilius, quàm ex vulgi maximè animo euellere opinioniones, quas cum lacte materno imbiberint, atque abolere auitas traditiones à maioribus acceptas, quantumcunque  
etiam

etiam fabulosæ illæ sint, & ridiculæ aliis videantur; tantam esse in animis hominum vim vetustatis, ad quam labefactandam nouis oraculis sit opus, aut antiquis iterum in lucem protractis, quorum auctoritate, siue ea verè, siue falsò adducatur, emolliuntur primùm hominum animi. Quamquam autem multi sint, qui satis percipiant, quantum istiusmodi res valeant, eos tamen studiis populi eò rapi, quò illa tendunt, quemadmodum peritissimi etiam Nauarchi ventorum atque fluctuum vi abripiuntur; aut verò si prudentiores sint, conniuere ad omnia, & vultum ad populi mores componere, ne grauiora patiantur, aut bonis suis excidant; vel etiam innato partium studio, transuersum agi, ne verum peruideant, aut perspectum amplectantur. Paucos esse, qui gloriari possint, se ab istiusmodi affectibus esse immunes; ineptos plerosque, qui de rebus propriis rectè iudicent, perinde atq; Medici suos morbos haud facilè cognoscunt, atque iis medentur.

Vtrumque perspicere eorum exemplo posse, qui Machometis legem sequuntur, eos non minùs esse in varias atque diuersas sectas scissos, atque hodie Christiani sint diuisi. Non deesse, qui inter eos, LXXII. numerent, de quibus nuper Abrahamus Echelenis Maronita, libro peculiari de sectis & religione Arabum atque Machometanorum plura scripserit: à Christianis autem omnes illos, quamquam atrociter inter se dissideant, habere tamen pro Machometanis; nam si eorum dissensiones circa interpretationem legis suæ, aut alia quædam, de quibus



quibus contendunt, expendantur ab iis, qui nullo affectu ducuntur, aut odio huius, aut illius partis, quique neque vni, neque alteri opinioni sunt innutriti, non posse aliam ab iis ferri sententiam, quàm quòd res, de quibus disceptant, non sint magni momenti, vt proinde possint tranquillè & pacificè viuere, dummodò velint.

Interea tamen Machometanos propemodùm inter se atrociùs dissidere, quàm Christiani faciant; certè Persas inter & Turcas tantum esse odium, & tam funestum, vt Turcæ satiùs existiment, vnum occidere Persam, quàm decem Christianos: quibus, cunque tamen aliàs Turcæ atque Persæ sint moribus, non esse eos homines, neque stupidos, neque imprudentes, sagacitate quidem ingenij quibusuis etiam Christianorum gentium pares debere censeri; & tamen eorum dissidia, quæ Christianis adedò videantur esse leuia, & tam parui momenti, ab illis tanti fieri, vt quidquid bella secum afferunt molestiæ, nihili æstiment, dummodò pars quæque suam defendat sententiam. Non deesse etiam inter eos, qui hæc perspiciant, sed illos vel multitudinis studio abripi, atque suam celare sententiam, vel ita deuinctos teneri opinione veteris traditionis, vt quamquam lyncei aliàs sint, hîc quidem cæcutiant.

Hanc ingenij humani imbecillitatem, quam adedò apertè in aliis deprehendamus, posse etiam obrepere Christianis; vtrimque enim homines esse, qui etiam cum prudentissimè agere sibi videntur, humani tamen aliquid patiantur. Huius infirmi-

tatis signa, de pluribus pauca, eaque manifesta, ne alia commemorantur, quàm quæ nemo negauerit, cerni posse in diffidiis religiosorum Ordinum; de rebus nullius momenti summo animi feruore, atque magno Ecclesiæ scandalo, contendentium; quorum exemplum etiam hoc erudito sæculo, omnibus indignantibus, non veriti fuerint Capuccini & Franciscani strictioris obseruantiz producere in lucem, summa contentione, mutuisque odiis, atque conuiitiis, confictisque ab vtraque parte miraculis, inter se decertantes de S. Francisci Caputio, vtrum illud acuminatum fuerit, an obtusum; ceu illud quidquam referret, aut sciri religionis Christianæ interesset.

In Græca quoque Ecclesia quondam agitata fuisse similes contentiones; inter quas in primis celebris fuerit illa de transfiguratione Seruatoris nostri in monte Thabor, quæ eò fuerit progressa, vt propemodùm Ecclesia in partes scinderetur. Vel ex paucis his exemplis, de quibus omnium consensu constet, colligi posse, quàm non sint etiam Christiani cœtus, ab eiusmodi infirmitate immunes, quæ, si contentionibus non fuisset obuiam itum, diuisisque etiam populus vtrique parti adhæsisset, potuisset erumpere in schismata diu duratura. Cogitandum igitur, an omnia, de quibus in Ecclesia Latina contenditur, sint tanti ponderis, vt ideo tantopere dissidere fas sit; & vtrum non sint quædam, quæ mereantur in numerum superuacaneorum referri: cogitandum esse interdum, etiam à Pontificibus,

opi-

opiniones quasdam fuisse damnatas, ne solus Philastrius huius culpæ reus fuisse existimetur, quæ etiam ab omni alio errore fuerint immunes. Eiusmodi verò, ubi longo usu recepta fuerint, transire in legē, sicut in ciuitatibus & Rebus sæpe obseruationes quædam non inutiles tantum, sed etiam noxiæ & ridiculæ, ideo tantum, quia longa consuetudine à vulgo fuerunt approbatæ, maioris fiant, atque in earum conseruatione, etiam ab iis, qui illas nihil æstimant, tantum ne quid innouetur, & Resp. ex illa mutatione quidquam sentiat detrimenti, maius studium collocetur, quàm in aliis, quæ statum Reip. propius concernunt.

## PRÆCLVDITVR.

I. **L**icet difficile sit, vulgi animo altè insitas opinioniones euellere, nihil tamen vulgo mutabilius esse constat; hinc ad Lutheri, Caluini, aliorumque hæresiarcharum classicum, tanta in populis mutatio facta est, & tot hominū myriades ab auita religione descuerunt, easque reliquerunt traditiones, quæ ab Apostolis ad nos usque traductæ fuerant, vt noua commenta & somnia ab ignotis ac suspectæ fidei & famæ hominibus acciperent; neque nouis oraculis, aut miraculis opus fuit, ad vetustatis maiestatem labefactandam: quidni ergo eadem facilitate ad Ecclesiam redeant, quâ olim ab eadem discesserunt? Fateor vtrò, ventorum vi multos abripi, humanorum scilicet affectuum, quorum studio  
X 2 ducti,

ducti, de religione statuunt; neque me latet, quid plerosque à reditu retineat, qui religionem propriis commodis metiuntur.

II. Quid ad rem faciant Machometanorum dissensiones, non video, quamvis longè plures adhuc essent; demus etiam de minimis, nulliusque momenti rebus contendere, quid tum? quis nescit, gravissima bella, ut plurimum, à minimis principiis ortum ducere, & propter leuissimam interdum offensionem, ne dicam suspensionem, vel umbram, vehementissimas tempestates excitari. Scio, Turcas Persis infensissimos esse; utpote qui non modò de religione, verum etiam de imperio inter se contendunt, sed quid inde? fallax est argumentationis forma, quà ex particularibus, ut Logici vocant, aliquid concluditur; licet enim verissimum sit, gravissimas interdum dissensiones de quilibet esse, ac de rebus parvi momenti, non tamen inde sequitur, dissensiones illas, quæ nos inter & Protestantés intercedunt, huiusmodi esse: præterquàm quòd, ut iam dixi, diversi errores inter se fœdus ac societatem inire queunt; error tamen cum vera fide stare & consentire non potest.

III. Fateor etiam, inter nostros de quibusdam opinionibus acerrimè disputari, quæ cum ad diuinam fidem non pertineant, utrique parti liberè permittuntur: immò ad vitandam offensionem, silentium nonnunquam utrique, auctoritate Apostolica, imperatur; ab exemplis abstineo, quæ obuia sunt. Vtrum verò laudi, ac vitio huiusmodi disputatio-

nes vertendæ sint, definire meum non est: vnum tamen subnecto, à ratione penitus alienum esse, pro meris opinionibus tam acriter decertare, quarum veritas perspecta non est: iis tamen nonnulli tantâ pertinaciâ & obstinatione adhærent, vt potius diuinæ fidei dogmata eiurare velle, quàm suas opiniones relinquere, videri possint; tanti ponderis est factionis studium, vt animos hominum præcipites agat, & cæcorum more, in apertum erroris baratrum inducat.

IV. Sed quid ad nos, quid ad fidem, quid ad quæstionem? fateor, huiusmodi dissidia posse aliquando Christianis obrepere; nec inficias eo, quin tanta sit humani ingenij imbecillitas, vt ipsi quoque Catholici aliquid humani patiantur; hoc tamen non probat, aliquid quantumuis leue à Catholicis remittendum esse in materia fidei. Illas Franciscanorum & Capuccinorum disputationes à bono zelo profectas esse facile crediderim; si quæ tamen iactata vtriusque conuitia, nec laudi, nec vitio verto; quid enim ad me? immò quid ad rem, quid ad fidei controversias, de quibus hoc duntaxat loco agitur? Idem dictum esto de contentionibus in Græca Ecclesia agitatis; neque res illa transfigurationis Dominicæ tantos, vt dicitis, tumultus concitauit; quidquid sit in moribus & dogmatis fidei, ab Ecclesia Græci, quid tenendum esset, acceperunt; licet deinde ab ea defecerint, multisque erroribus sese implicuerint.

V. Multa sunt, vt iam dixi, de quibus contende-

re inter Catholicos licet; omnem enim disputationem, quam nonnulli ingeniorum cotem appellant, auctoritate publica prohibere, tyrannicum esse; multa enim sunt, quæ cum nec ad fidem, nec ad bonos mores pertineant, in disputationem cadere possunt. Quod autem à Romano Pontifice nonnullæ opiniones hæreseos damnatæ sint, quæ tamen omnis erroris fuerint immunes, probandum vobis incumbit. Sed quidquid in hanc rem opponi potest, apud nostros auctores habetis, præsertim apud Bellarminum, to. 1. controu. 3. l. 4. quasi per totum; ubi egregiè diluit calumnias Romanis Pontificibus affectas; vos videritis, frustra ego iam actum agerem. Nego igitur, quidquam à nobis certa fide teneri, quod falsum sit; nec vllum errorem longa consuetudine in dogma fidei transiisse. Porro Philastrius Episcopus Brixianus strenuus defensor fidei Catholicæ fuit, teste Baronio, & Catalogum hæreticorum descripsit; si quem fortè iniuria appellauit, cur reticetis; quisquis certo crimine Deum non accusat, responsum nullum meretur.

## EFFVGIVM XXI.

*Ducitur ex eo, quòd pleraque capita nunc controuersa, aliquando impune aut ignorata, aut libera fuerint.*

**P**Leraque, inquiunt, capita, quæ nunc sunt controuersa, & Ecclesiæ vnitatem scindunt  
in

in partes, aliquando impunè aut fuisse ignorata, aut de iis, tamen sine vlllo salutis periculo, dubitatum. Vetustissimos quoque Patres sæpe dubiè fuisse locutos; neque id tum, quum in viuis & summa auctoritate essent, sed aliquot deinde post sæculis primum fuisse animaduersum, quum in erroris societatem ab aliis traherentur. Duo enim esse hominum genera, quæ maximè turbent Ecclesiam; alios quidem fidei controuersias prætexere factionibus, & ita suas sententias populis proponere, vt ex iis sibi cætus peculiare colligant: alios deinde esse, qui imprudenti zelo commoti, in quosuis dissentientes protinus insurgant, & homines, aliàs tranquillitatis amantes ita vrgeant, vt victâ tandem patientiâ, vltima tentare audent; vtrumque hoc hominum genus si procul fuisset ab Ecclesia, nihil aut parum vnquam futurum fuisse in ea turbarum.

Sedeo statu esse res humanas, vt proclive quidem sit, optare, ne eiusmodi hominum turbulenta ingenia Ecclesiæ pacem disturbent, sperare minimè liceat; ideo prædictum esse, quod oporteat esse hæreses, sectas & schismata, spectatâ humani ingenij inconstantia & imbecillitate, atque varietate rerum humanarum; quem nullum etiam imperium, aut Resp. vlla diu possit sine factionibus quibusdam & mutationibus consistere. Ortis igitur atque agitationis aliquamdiu eiusmodi controuersis, iis quibus in alterutram partem aliquid determinare consultum videatur, non fuisse primariò propositam rei definiendæ necessitatem, sed pacem & tranquillita-

tem Ecclesiæ, quæ ipsis, inter tot dissensiones, non fuerit visa inconcussa posse persistere.

Nullum posse dari exemplum illustrius, quàm quod nuper suppeditauerit Innocentius X. quum quinque propositiones Iansenianas definiuit; de ipsis fuisse disputatum, neque sine contentione, inter homines eruditos, ita tamen ut charitatis & moderationis Christianæ terminos non omnino excederent. Et quidem si inter doctos tantum solertesque homines omnis stetisset contentio, nunquam potuisse Pontificem adduci, ut ea acerbitate de quinque illis propositionibus decerneret, quàm eum vsum fuisse omnes pænè admirentur. Vbi verò suarum dissensionum in Belgio & Gallia Theologi etiam populum cœperint facere participem, eique editis libris piis & Catecheticis, variisque precationum formulis, seorsim easdem instillare sententias, tum verò etiam illi, quos habebant aduersarios, hos ausus cœpissent in pessimam accipere partem, de eo verba ad populum facere, ut eum ad se pertraherent: visum fuisse Pontifici, ne quid detrimenti acciperet Ecclesia Romana, & inter se diuisa apertum latus hostibus obiceret, ex usu esse, ut ad Ecclesiæ tranquillitatem conseruandam, in alterutram partem aliquid definiretur; quidquid aliàs de illis propositionibus futurum esset.

Eandem rationem semper obtinuisse in Ecclesia; homines esse, qui ei præsent, atque ita humanis, etiam consiliis, humanoque modo eam gubernare: in diuinis scripturis de quinque illis propositionibus



bus nihil apertè esse determinatum; si quid enim in iis fuerit definitum, iam grauissimi erroris esse accusandos, quotquot antea aliter senserint; sed eos immunes haberi ab errore; nunc tantum si qui contrà mutire audent, grauissimi criminis reos agi; nunc esse blasphema, impia & hæretica, de quibus antea licuerit dubitare; quum tamen constet, fidei articulos neque ab Ecclesia, neque à Pontifice nouos condi posse. Nihil igitur probatu esse facilius, quàm quòd ideo sint declaratae hæreticae quinque illae propositiones, quia id intererat tranquillitatis Ecclesiae, & auctoritatis potissimum Pontificiae; perinde atque si in Rep. oriuntur factiones, ad eas sopiendas, necesse sit, vt qui ei cum imperio praeest, alterutri earum se iungat, vt alteram opprimat, nisi ipsi è re esse visum fuerit, si quidem tanta est eius potentia, vt vtramque extinguat.

Hoc verò nunc eò magis necessarium esse, quòd regimen Ecclesiae regimini politico est similis; iam enim eò rem rediisse, vt iisdem quoque artibus conseruari debeat, quibus resp. conseruatur. Romanam maximè Ecclesiam iis niti, in qua Monarchiam affectat Vrbis Romae Episcopus; nec reliquas Protestantium Graecorumque Ecclesias earum esse expertes, quamquam in iis magis spectetur Aristocratia aliqua, & in quibus democraticum aliquod regimen, quod in Graeca Ecclesia ex Monarchia & Aristocratia mixtum esse videtur. Quibus igitur mediis vnaquaeque harum rerum pub. forma conseruatur, iisdem etiam illa Ecclesiarum regimina defendi; hoc

facile probari posse, si opus sit; inter omnes tamen eminere Romanam, in qua illa artificia paulò prudentioribus sint in propatulo. In primis in ea hoc cauere, ne quid eorum omnium, quæ aliquando quocunque modo fuerunt recepta, mutetur; id ipsis esse adeò ab Aristotele, aliisque nouis & veteribus rerum politicarum scriptoribus omnibus Rerump. rectoribus obseruari mandatum; nolle igitur Pontifices quicquam mutari, quamquam id aliàs videant utile & salutare fore, ne ex illa mutatione, præsens Ecclesiæ status quicquã detrimenti accipiat, & quibusdam in melius commutatis, spes & vota populorum vltius tendant, aliæque etiam aut restitui, aut abrogari petant: tum etiam Principes ipsi Pontifici, & Episcopis, totique clero illa, quæ ipsorum partim liberalitate, partim conuiuentiâ tenent, & se longa temporis præscriptione, & longo sæculorum usu tueri possunt, iterum ereptum eant. Cauere igitur diligenter Pontificem, ne de ipsius auctoritate & iuribus, quæ multa ipsi tribui soleant, vnquam disceptetur, cum ex eiusmodi disputationibus, id ferè semper soleat resultare, vt res, de qua contenditur, aut maius capiat incrementum, aut ei aliquid decedat; rarè verò in eodem statu permaneat.

Eiusmodi artes, quum Concilium Tridentinum haberetur, ita omnibus propalâ fuisse, vt de eo dubitare non liceat; multa tûm à legatis Pontificiis fuisse proposita tantum, ad explorandos Episcoporum & Theologorum animos. Iam verò Pontificem non minùs sibi cauere à Synodis, siue vniuersalibus,  
siue

sive nationalibus, quàm Imperatores sibi timere possentur ab imperij comitiis, & conuentibus circularibus statuum, atque Reges alij & Principes à parlamenti & conuocationibus suorum ordinum. Quòd si autem aliquando habitæ fuerint Synodi, tum Pontifices iisdem artibus dissidia excitasse inter Episcopos atque nationes, conatosque esse, sibi plurimos reddere obnoxios, quibus vti soleant Principes atque Reges, ne ex Comitibus & Parliamentis quicquam ad ipsos damni redeat, eorumque potestas minuantur. Demum cauere sibi ab omnibus, quibus vnius imperium corrumpi soleat, quòd suam auctoritatem suumque regimen iisdem aliàs corruptionibus videant esse obnoxium.

Protestantium quoque eandem parè esse rationem; eos iam quidem prospicere, qua in re Ecclesiam reformando errauerint; sed nunc quidem non audere ea mutare, ne populi hoc perspecto, credant, se ab iis fuisse deceptos: agnoscere eos quidem rectius futurum, si quispiam sit, qui omnium Ecclesiarum supremam, sed limitatam curam gerat, qui in officio possit continere effrænes Prædicatorum animos, dominorumque, Principum, & ciuitatum suarum libidinem coercere, quiduis vt placet & libet mutantium. Sed vanos nunc esse & irritos omnes illos conatus; clamatueros enim complures, ideòne ex Ægypto exiimus, vt moriamur in deserto? nunquid ideo tyrannidi Pontificiæ nos subtraximus, vt peiori & atrociori iugo colla nostra subdamus? absit à nobis, vt tam indignum faci-

nus admittamus. Si ministri nostri tam altos gerunt spiritus, age, redeamus, vnde exiuius; melius est ferre onus, cui assueuimus, quàm cum periculo, nouo se submittere; eandem enim videri esse rationem Protestantium, quæ sit populi, qui profligata Tyrannide, se in libertatem asseruerit, nam & hunc, si id ita res ferat, promptiùs libentiùsque ad priorem dominum redire, quàm ferre æquo animo imperium noui domini, à quo partam libertatem defensum iri sperauerint.

Cùm igitur Ecclesiarum omnium ea sit ratio, vt si illas saluas esse velint, qui iis præsunt, necessariò huiusmodi mediis & artibus illarum tranquillitati consulere, & in primis illud cauere debeant, ne quicquam mutetur, quod manifestè à populo animaduerti possit, nèue ex indulgentia quadam, nimiaque conuiuentiâ, aliqua mutatio obrepat. Mirandum non esse, si tot declarentur hæreses, tot schismata prodeant; mirandum potiùs esse, considerata Ecclesiæ amplitudine, quòd non plures maioresque exoriantur, & Ecclesiam concutiant. Quamquam igitur, postquam ita sunt constitutæ Ecclesiæ, vix aliter fieri possit, quin vnusquisque omni studio incumbat conseruationi illius Ecclesiæ, cui præest, non tamen ideo protinus quemquam fore extorrem è regno cælorum, qui exfors hîc habeatur huius, vel illius communionis, non ideo quidem, quòd id res ipsa in se spectata postulet, sed quòd id intersit illius societatis, in qua viuit, quòdque ea aliter in sua vnitæte & tranquillitate contineri nequeat, nisi ille eiiciatur.

Re-

Rectè verò existimari, longè alia esse iudicia summi Numinis; neque ab insigni temeritate eos posse excusari, qui infinitam Dei sapientiam humanæ prudentiæ legibus circumscribere audeant; minimè esse probabile, Deum ter Opt. Max. cuiquam crimini imputaturum, quod ab Ecclesiarum rectoribus, non propter Dei honorem, sed propriam conseruationem iudicatur esse necessarium, dummodò illi, qui ad hanc vel illam sententiam tuendam accedunt, id nulla ambitione, aut gloriæ, & contentionis studio adducti, sed bono animo faciant; aliter enim si agant, eos punitum iri à Deo propter peruersæ & refractariæ voluntatis crimen, non verò propter errorem intellectus. Quòd si autem quispiam, sectarum, quæ hodie in plures partes Ecclesiam discerpserunt, auctores, ea intentione, ad res nouandas accessisse dixerit, immunes tamen coram Deo futuros, qui bono animo illos fuerint secuti; magnam esse humani ingenij imbecillitatem, quæ quò magis Deo est perspecta, eò sincerius etiam & æquius ab eo expectandum esse iudicium: Homines verò ita plerumque esse peruersos, & partium studio occupatos, ut paucissimi vera peruidere queant, & ambitioni, aliisque animi vitiis imputent, quod recta & simplici intentione fieri soleat.

#### PRÆCLVDITVR.

**D**O vltro, pleraque nunc esse fidei dogmata, de quibus olim dubitare licuit, antequam essent definita & declarata; multa enim

enim sunt, quæ ante prædictam declarationem fideles credere non tenerentur; ut vel ipsis Tyronibus compertum est; nempe nonnulla sunt in diuinis literis, vel antiquis traditionibus, quæ cum obscuriora esse videantur, licet reuera fuerint reuelata, non obligant tamen, antequam ab Ecclesia credenda proponantur. Hinc nonnulli sunt inter Patres, qui ante prædictas definitiones, vel de iis dogmatibus dubitarunt, vel omnino secus senserunt. Augustinus de animæ origine dubitare visus est, an per infusionem, an per traducem; Cyprianus in Baptismo Hæreticorum errauit, quem inualidum esse censuit; omitto alia ferè innumera capita, quæ frustra adducerem, cum in hoc aduersarij nobiscum sentiant. Porro quisquis controuersias fidei factionibus prætexit, Catholicus censendus non est. Quis, amabo, factiones conciuuit, tum in Gallia, tum in Germania, Religionis ac fidei obtentu, nisi Caluinistæ & Lutherani? quis conuentus peculiare collegit, præter eos, qui à fidelium cœtu, & Ecclesia Rom. desciiuerunt? Nos quidem, non certè imprudenti, sed Catholico zelo huiusmodi nouatoribus contradiximus, restitimus, & impios illorum conatus reprimere conati sumus; non propterea tranquillitatis publicæ minus amantes, quàm isti, cum religione, perturbauerunt; sine illis haud dubiè nihil uspiam turbarum extitisset: nos verò sine crimine tacere non potuimus, ne tanquam canes muti à Domino iuste ac rigidè plecteremur.

II. Rem sanè lepidam; in possessiones nostras inuo-

inuolatis, quas dum nos defendere conamur, nos  
turbarum & rixarum auctores appellatis, utpote  
qui tranquillitati vestræ insidiamur! Vera fides,  
quam à maioribus nostris accepimus, possessio no-  
stra est; illam impugnatis, quòd succurramus, tur-  
bulenti homines sumus. Ecclesiam matrem no-  
stram proscinditis; quòd pro illa aduersùm vos ste-  
mus, ideo turbas illas atque tumultus nobis imputa-  
tis; filij hominum recta iudicia iudicate. Verbo di-  
cam, nisi vos & Patres vestri, Ecclesiæ pacem turbas-  
setis, eam non sperare quidem, sed eâ frui modò li-  
ceret: inde vobis cogitandum relinquo, utrùm pro-  
brum illud turbulentorum hominum nobis, an po-  
tius vobis conueniat? Sat scio, vix fieri posse, quin  
sectæ, schismata & hæreses oriantur, quod iam olim  
Seruator noster fore prædixerat; væ tamen homini  
illi, per quem scandalum venit, & qui schismatis au-  
ctor est.

III. Præterea rectè obseruatis, eam rerum hu-  
manarum varietatem & inconstantiam esse, quâ fiat,  
ut nullum imperium, aut respub. sine factionibus &  
mutationibus diu stare possit; hinc tot regna, tot  
imperia funditùs euersa. At vnum obseruatu dignis-  
simum omisistis, Ecclesiam scilicet Catholicam tot  
persecutionibus agitatam, tot factionibus & schis-  
matis discerptam, tot vitiis, ut more vestro loquar,  
in membris suis foedatam, euertere minimè potuisse,  
sed immobilem & constantem in fidei ac morum  
doctrina permanere. Sed quid mirum, cum portæ  
infernæ aduersùs eam præualere non possint. Neque  
est,

est, quòd illud humanæ prudentiæ, & politicis Romanorum Pontificum artibus tribuatis: hoc enim humanam omnem prudentiam superat; & nisi à Spiritu sancto regeretur, iam dudum variis erroribus implicita, primam fidem & antiquos mores mutasset. Hinc sanè ortis controuersis, in materiâ fidei, non modò vt tranquillitati consuleret, verùm etiam vt fideles doceret, nec quemquam in re dubia, & minùs expressa fluctuare pateretur, causam definiuit, oraçulum pronuntiauit, aperuitque & publicauit, quid Spiritui S. videretur; hinc orta credendi necessitas & obligatio.

IV. Quod Innocentij X. factum, in causa quinque Propositionum, ex Iansenij libro excerptarum, exempli loco attulistis, mihi sanè gratissimum accidit, cùm illustrius esse vix possit, quò Sedis Apostolicæ auctoritas demonstretur; nempe ad Pontificem octoginta Galliarum Episcopi causam illam detulerunt, & enixè ab eo postularunt, vt causam dirimeret, & quid de prædictis Propositionibus sentiendum esset, edita constitutione Apostolica, definiret: quod ille reuerà præstitit, non sine maxima laude, præsertim cùm id temerè ac præcipitanter non fecerit, sed adhibitis doctissimorum hominum consultationibus, acceptis multarum Academiarum responsis, habitis coram se variis Cardinalium congressibus, discussisque plurimis scriptis & libris; eadem claritudine, quæ dubium omnè penitus excutiat. Nec est, quòd nimiam huius sententiæ acerbiter exaggeretis; quidquid enim censura continet,



Nec, in prædictas propositiones optimè quadrat, Protestantes idem quoque senserunt : hinc Samuel Mareſius grauitè de hoc iudicio queſtus. Nec eſt, quòd dicatis, omnes pænè admirari, Innocentium tanta uſum eſſe acerbitate ; cæteros fortè præ ueſtris nullo habetis loco ; ſi enim hæreticos, detractis duntaxat Arminianis, & Ianſenianos excipiam, reliquis haud dubiè prædicta Innocenti j conſtitutio gratiſſima accidit ; porro iſti maiorem, ni fallor, partem componunt.

V. Rectè autèm monetis, eò adductum eſſe Innocentium, ne quid detrimenti Eccleſia acciperet ; nempe errores ſuborti maximum afferre ſolent, cùm multa membra corpori Chriſti, & optimæ Parenti multos filios ſubducant. Itaque ut verum à falſo fideles diſtinguerent, illud oraculum edidit, non tantùm maioris tranquillitatis gratià, quæ vix vnquam in eiſmodi factionibus obtinetur, ſed præfertim, ut intelligeremus, quid certa fide tenendum eſſet de prædictis propositionibus ; tales enim cenſuit, quales reuerà ſunt. Et licèt Romanus Pontifex homo ſit, & humanæ rationis lumen adhibeat, nec enim cæco modo fertur, ſed res diligenter diſcuti & explanari curat ; in edendis tamen huiusmodi oraculis, errare non poteſt, cùm à Spiritu ſancto regatur, ut iam ſuprà probatum eſt ; alioquin fruſtra illum Galliarum præſules, quorum plerique longè doctiores erant, interrogaffent, niſi ab eo Catholicum, & omnis erroris immune reſponſum expectaſſent. Nec eſt, quòd vlli aſſentationi quiſpiam id

Y

tribuat,

tribuat, cùm illi Episcopi, præ cæteris, sint suorum iurium & auctoritatis retinentissimi, nec ij, qui Romano Pontifici quidquam tribuant, quod ipsi iure non competat: itaque tam illustri patentique testimoniò suprema Romani Pontificis dignitas, auctoritas, & vt vocant, infallibilitas mirificè confirmatur.

**VI.** Expressa sunt, mihi credite, in sacris Scripturis loca, quibus quinque propositionum falsitas conuincitur; quid enim expressius, quàm libertas ad vtrumlibet? Christum pro peccatis totius mundi mortuum esse? homines nonnunquam Spiritui sancto ac diuinæ gratiæ resistere? mandata Dei possibile esse? &c. Præterea licet nihil de iis apertè determinatum esset, modò implicitè, vt vocant, aliquid in Scriptura, vel in antiquis traditionibus contineatur, vnde falsitas illa ostendi queat, id satis esse videtur, ad hoc, vt Ecclesia rem definiat, & Propositiones illas iustâ censurâ configat; talis enim fuit Ecclesiæ vsus, & praxis; sic in causa Arij, Macedonij, Nestorij, Eutychetis, Donati, Nouatiani, aliorumque actum est. Et miror, subtilia & perspicacia ingenia hîc cæcutire; quis enim nescit, novos fidei articulos ab Ecclesia non condi, id est, novas non edi reuelationes; licet illa multa definiat & declaret, quæ antè reuelata fuerant, non tamen ea claritudine, quæ citra nouam declarationem & definitionem, ad credendum obligaret: hinc diuinam fidem, lumen infusum esse dicimus, quo à Deo reuelata, & ab Ecclesia ad credendū nobis proposita credimus.

**VII.** Hinc

VII. Hinc edita constitutione Innocentij, illæ Propositiones blasphemæ, impiæ, & hæreticæ censentur, quæ priusquàm edita esset, sine vlllo errore defendi poterant, ab iis scilicet, quibus de illarum expressa falsitate & impietate non ita constabat, modò inculcata esset ignorantia. Nec probatu facile est, quòd ideo declaratæ sint hæreticæ, quia id intererat tranquillitatis Ecclesiæ, & auctoritatis Pontificiæ; quod nullatenus probari potest, cùm falsissimum sit: quasi verò intima cordis Pontificij penetralia & arcana penetraueritis, eiùsque animum, ac finem, quem in edenda illa constitutione sibi proposuit; hoc sanè diuinare est, ne dicam impunè nugari & mentiri. Eo fine, mihi credite, Pontifex ex cathedra pronuntiavit, vt Episcopis interrogantibus in materia fidei responderet; vt obrepentes errores arceret; vt fideles veram doctrinam doceret; vt controuersiam, quod ipsi ex officio incumbit, tolleret; vt demum certa ab incertis, vera à falsis, & Catholica dogmata à gliscentibus erroribus distingueret. Ex his autem, quòd tranquillitas, seu pax inter partes sequatur, optandum quidem erat, vix tamen sperandum; nempe illi, qui factionis studio, ad defensionem quarundam opinionum, quas deinde erroneas esse constat, animum applicuerunt, vix vnquam cantatà palinodià resipiscunt; vnde fit, vt Pontificia oracula prædictam illam tranquillitatem non afferant; immò potius tumultus augeant. Hinc eò potissimum spectant, non quidem vt factiosos errantes reducant, quod vix vn-

quam accidit, sed vt simpliciores, qui vno duntaxat religionis studio ducti, errores defenderant, accepto Ecclesiæ iudicio, eosdem relinquunt; & Catholici de fidei dogmatis certiores facti, nullum erroribus aditum præbeant.

VIII. Ecclesia quidem Romana ea humanæ prudentiæ adhibet adminicula, iisque artibus remp. administrare, ac Dominicum Gregem regere solet, quas recta ratio & æquitas postulare videntur. v. g. doctorum ac prudentum hominum consilia, frequentes deliberationes, optimorum magistratuum, & administratorum delectum, aliâque id genus adhibet, quæ in optima quaque rep. administranda adhiberi solent; hæc fusè omnino prosequi valerem, si res postularet. Sed cuncta hæc frustra essent, nisi Spiritus sanctus adesset, eiusque ductu cuncta pro votis succederent. Quòd autem ad Monarchiam accedat, negare non possum; conciliorum tamen auctoritate integra seruata, quæ vniuersalem Ecclesiam representant, potiora scilicet & nobiliora cum supremo capite membra. Quæcumque porro regiminis forma à Græcis & Protestantibus vsurpata sit, perinde est; quid enim ad nos? Ideo verò nihil eorum, quæ definita sunt, mutari sinit; quia quod semel de fide est, semper est; nec Ecclesia Romana fidei dogmata mutare potest: nonnulla sunt, fateor, quæ citra errorem mutari possunt, vt ea, quæ ad ritus pertinent, quæ si quando mutanda esse recta ratio postulat, illico mutari Ecclesia constituit, neque id religioni ducit, quod sæpe ac sæpius factum

atum esse, historiarum monumenta testantur.

I X. Nec magis timet, ne Christiani Principes Ecclesiastica bona auferant, quàm ipsi Principes timeant, ne alieni in eorum ditionem inuadant, nempe hi meliore iure sua non possident, quàm Ecclesia suis fruatur; neque ius, quod ex pia donatione resultat, eo deterius est, quod armorum vi acquiritur: suam porro auctoritatem integram seruare tenetur Ecclesia, quam ne quidem, si vellet, abdicare licite valeret. Disputationes de auctoritate Romani Pontificis, vt plerumque inutiles, Ecclesia non probat, præsertim cum illam sibi duntaxat arroget, quam certa fide omnes Catholici tenent: si quid ultra eidem aliqui tribuunt, admittere, vel reiicere liberum cuique esse debet; quia disceptationes huius secundi generis rixas & factiones, vt plurimum excitare solent, nec non Principibus suspicionem iniiciunt, ab iis abstinere longè satius est.

X. Quod de Tridentino subnectitis, ab auctore vestro accipitis; sed nos eius dictis & fide non stamus; hic non hæreo, nam in recens edita historia habetis, vnde augustæ & sacre Synodo affictæ calumniæ efficaciter refellantur, cæque omnia elidantur, quæ Romanis Pontificibus, hac in parte, opponi queunt. Vt autem dicam, quod res est, hoc loco vnum grauitèr peccatis; nempe Christi Ecclesiam pro congregatione vel republ. merè seculari, vel temporali, vt aiunt, accipitis, ac proinde, quæ humanis & politicis duntaxat rationibus regatur, nec quidquam ab eo expectet, qui impugnari quidem

illam, nunquam tamen expugnari patietur. Si quis fortè Ecclesiastici sese negotiis sæcularibus implicent, aut in prudentiâ carnis & vanâ Politicâ suas spes omnes collocent, in hoc profectò non laudo; illi certè in curribus & in equis, nos autem in nomine Domini magnificabimus; iisdem igitur artibus Ecclesia non permanet, quibus humana imperia seruantur; si quid ampliùs subsidij non adesset, iam dudum Ecclesia corruisset.

XI. Quòd plura in dies à Romano Pontifice non declarentur, facit negotij arduitas; nec enim quicquam temerè definit; sed auditis doctorum hominum sententiis, & omnibus ritè ponderatis atque discussis; præsertim cùm multorum salus id postulat. Hinc tam graues sunt controuersie ad Sedem Apostolicam delatæ, quas hætenus definiendas esse non putauit, licèt multi apud sanctam Sedem instarent: duas illas celebres exempli loco indicare sufficiat, quarum prima ad rem immaculatæ Conceptionis Deiparæ, altera ad quæstionem de auxiliis pertinet. Cæterùm quòd putetis, neminem regno cælorum extorrem fore, quòd Ecclesiæ definitionibus non acquieuerit, erroneum est; quisquis enim Ecclesiam non audit, sicut Ethnicus & Publicanus nobis esse debet; neque in hoc infinitam sapientiam humanæ prudentiæ legibus circumscribimus, sed Christi verbis stamus, qui hanc iudicandi potestatem Ecclesiæ reliquit; si Ecclesiam parentis loco habetis, cur eius imperio non paretis? cur eius dictis derogatis fidem? si autem in ea matrem non agno-

scitis, in Deo Patrem non habetis; quid mirum ergo, si hæreditate excidatis?

XII. Omiseram, quod de Protestantibus habetis, quos in reformanda Ecclesia errasse, vltro fatemini, sed perperam statuta & credita, ab iis minime mutari, ne populus præteritum errorem agnoscat. O candidæ & probæ fidei homines! errorem agnoscunt, sed populi metu retractare non audent; hoc autem bonæ fidei & inculpatæ ignorantiae loco vobis erit: Dij meliora! de æterna salute agitur, quam sine recta fide consequi non valemus; errores sectæ vestræ agnoscitis, eosque eiurare, humanis tantaxat rationibus ducti, recusatis. Sed, antequam absolvam, repugnantia dicitis, errasse Protestantes fatemini; cum tamen subnectatis, eos profligata Tyrannide se in libertatem asseruisse; quæ, amabò, libertas, nouis errorum vinculis implicari? vera libertas filiorum Dei in vera fide & charitate non ficta posita est, qua libertate Christus nos donauit; sed vbi error est, vera fides esse non potest; de charitate vestra iam suprà dictum abundè, quòd Tyrannidem Pontificiam appelletis, inter solita vobisque familiaria conuitia reponendum est.

EFFVGIVM XXII.

*Ducitur ex insigni fidelium paucitate.*

**Q**ui igitur, inquit, diuina iudicia ex suo ingenio metiri audent, iis considerandum esse, ad quam insignem paucitatem, Ecclesiam

omnem redigant, & saluandorum numerum intra  
 quàm arctos limites restringant; quam tamen Ec-  
 clesiæ Christianæ, præ Iudaica, insignem fore am-  
 plitudinem, ex diuinis prædictionibus constet. Iam  
 verò si totus terrarum orbis in x x i v. æquales par-  
 tes dispertiat, quinque earum tantum teneri à  
 Gentibus de nomine Christiano notis, sex ab iis, quæ  
 Machometis impuram legem sectantur, tredecim  
 reliquas adhuc densis Idololatriæ tenebris esse ob-  
 sessas. Neque verò esse Gentes illas omnes, quæ ad-  
 huc hodie idola colunt, ita barbaras, hebetisque in-  
 genij, atque vulgò creditur, sed plurimas illarum,  
 ita esse excultas, vt quibusuis aliis nihil concedant,  
 neminem de eo dubitaturum, qui mores & inge-  
 nium Sinarum, Tartarorum, atque plurimarum alia-  
 rum gentium Indicarum perspexerit. Iudæos in-  
 hunc censum non venire, cum inter omnes dispersi  
 agant; fuisse eos quoque olim longè numerosiores;  
 & si fides sit Philoni historiam Legationis suæ ad C.  
 Caligulam Imp. contexenti, tanto eos numero extra  
 Syriam & Palæstinam, potiores vtriusque Asiæ, A-  
 fricæ, & Europæ vrbes, & vicos complures insedisse,  
 vt indigenis propemodum essent pares.

Quum igitur Christiani quinque tantum par-  
 tes orbis terrarum teneant, cauendum esse illis, qui  
 solis Romanæ Ecclesiæ, aut cuiuscunque alterius  
 coetus finibus, veram fidem & Ecclesiam circum-  
 scribunt, ne quid Donatistici erroris eorum senten-  
 tia sapere videatur; quumque rectè paucitatem  
 quorundam fanaticorum sibi solis Ecclesiæ nomen

arro-



arrogantium irrideant, ne in eadem absurda incidant; collato Catholicorum, aut Protestantium, aut Græcorum numero, non tantum cum reliquis omnibus, qui præterea Christiani audiunt, sed etiam cum iis, qui à sacris Christianorum alieno sunt animo, considerandum illis esse, si Africanos omnes, & patentissimas illas Abassinorum Ecclesias, si quidquid reliquum est in toto Oriente Christianorum, quorum ingens sit numerus per tot amplissimas Prouincias, longè latèque diffusus, si in ipsa Europa, Russiam omnem, Angliam, Scotiam, Hiberniam, Daniam, Norwegiam, Sueciam, deinde magnam Galliam, Germaniam, Poloniam, Hungariam, Belgicamque partem reiiciant, quid Ecclesie Christiane reliquum sit futurum, & quam parua sit futura particula, si ea cum reliquis comparetur.

Ipsos illos, qui se appellant Catholicos, ceu ab ipsa orbis Christianus dependeat, si plurimum ipsi concedatur, etiam post diffusam cum dominatu Hispanico in ytramque Indiam religionem Catholicam, vix tamen duas obtinere partes, de quinque illis, quæ à Christianis gentibus sunt inesse: magnam quidem esse amplitudinem prouinciarum Indiarum Occidentalis, sed ex iis, paucas integras Christiana fide esse imbutas; passim tantum portus & maritima teneri ab Hispanis: quidquid præterea est gentium in locis mediterraneis, & à mari remotioribus, aut nullis certæ religionis legibus teneri, aut more reliquorum Gentilium, solem, lunam & reliqua astra, aut etiam idola colere, tum etiam ingentes

tractus ab Anglis, Belgis, Suecis, atque Gallis reformatis esse occupatos.

In Orientali India, non magnos, si Goanam Insulam, & hinc inde vrbes aliquas & portus excipias, à Catholicis esse factos profectus; de Sinarum quoque regione plus iactari à Patribus Societatis Iesu, maioremque de ea esse famam, quam res se habeat: Iaponiam omnem iterum ad pristinam fœditatem rediisse; esse etiam Anglis & Belgis suas in vtraque India Ecclesias; tandem etiam vix quocumque tot homines barbaros in vtriusque Indiæ Provinciis è summa barbarie ad cultiorem vitam & fidem Christianam traduci, quot singulis annis, ex Italia in primis, Sicilia etiam, & Hispania casu à Turcis in captiuitatē abducti, sponte sua, eiurata religione Christiana, ad Machometismum transeant. Quamquam igitur magnus satis vniuscuiusque partis, si separatim considerentur, & in primis Catholicorum, atque Græcorum sit numerus, esse tamen eum minorem, cum ceteris omnibus collatum, quàm id Providentiæ Diuinæ videatur esse confor- num; omnibus præsertim illis Ecclesiis, à tanto iam tempore, & in primis Orientalibus, à Romana Sede seiunctis; ut vel longa illa duratione, à diuina providentia non videantur omnino improbari; appellationem nominis Catholici olim quidem contrapalantes quosdam cœtus, dispersasque hinc inde particulas à reliquis omnibus Ecclesiis, ritè & merito fuisse adscitam; nunc verò esse partis tantum nomen,

nomen, in qua illud propter Sedis Romanæ dignitatem præcipuè retentum est.

## PRÆCLVDITVR.

**E**cclesiæ Christianæ amplitudo ea est, siue in diuersarum nationum populorūque varietate consideretur, siue in vastitate regionum atque terrarum, siue in Christianorum multitudine, quæ Iudæorum Synagogam longo superet interuallo; vt vel inde diuinæ prædictiones euentu comprobata esse videantur; quamquam id temporis spectant, quo gentes omnes, & ipsi Iudæi ad Christi fidem conuertentur, fietque vnum ouile, & vnus pastor. Quòd Philo suorum Iudæorum immensum propemodum numerum extollat, non mirum, cum Christianos in suo censu complectatur, vt iam olim Patres obseruarunt, cum de suis Essenis loqueretur, quos certè Christianos fuisse, perspicuum est.

II. In vestro porro censu multa possem, saltem in dubium reuocare, si res ita postularet; multi enim negarent, mediam hominum partem Idololatriæ tenebris obsessam esse; nempe vastissimi terrarum tractus versus vtrumque polum, incolis adeò frequentes non sunt. Præterea quòd dicitis, in India Occidentali portus tantum & maritima ab Hispanis occupari, Historiarum monumentis repugnat, cum ipsi quoque maiorem mediterraneorum partem teneant. In Africa pauci sunt Idololatræ, nuli

li in

in Europa; Tartariæ pars cum Sinarum regno, Iaponicis Insulis, & modica Indiæ portione, Idola colit. Quòd habetis, ingentes tractus à Belgis, Batauis scilicet, in America occupatos fuisse, nonnulli ridebunt; expulsis enim Brasiliâ, quid amabò restat? In quo verò tractu Galli reformati, seu Calvinistæ suarum victoriarum fructu & lucro fruuntur, in mappa non inuenio, cum in noua Francia nihil possideant; Angli in ora Virginie aliquot tuguriola tenent; Sueci parum, aut nihil.

III. Quòd Ecclesiæ Græcæ ritus olim latius patuerit, quàm modò Latinæ, nō deerunt, qui negent: Goana insula rei Christianæ in India, modica pars est: apud Iapones fidem Catholicam atrocissimis persecutionum fluctibus agitatam fuisse, in confesso est, sed non sine vbere sanctarum palmarum fructu. Quid apud Sinas à Patribus Societatis hætenus actum sit, loquuntur libri, quos si legere tædet, breuem narrationem P. Martini saltem legite, in qua breuissimam quidem, sed accuratam singulorum euentuum seriem habetis. Quòd autem Patribus Societatis vanæ iactantiæ notam inuritis, nouum certè vobis non est; cum Hæreticis solemne sit, multa huic hominum generi affingere; habent Angli & Bataui in Indiis Orientalibus suas colonias, quod certè dolendum; illi enim Catholico nomini non parùm infensi, Catholicæ fidei propagationi non parùm hætenus obfuerunt. Quòd demum afferitis, tot saltem quotannis ex Italia & Hispania, ciurata religione, Machometis legem amplecti, quot à nostris

hostris ad Christi fidem conuertuntur , apertum mendacium est, quod fortè audistis in odium earum nationum, quæ nullos hæreticos admittunt.

IV. Sed demus hæc , admittamúsque ex x x i v. partibus, in quas totum terrarum orbem distribuitis , quinque duntaxat Christianis, & ex quinque duas Catholicis concedendas esse; sit ita , vt vultis, ac dicitis ; duodecima igitur totius orbis pars Catholicam fidem profitetur; an fortè modicum quid vobis videtur ? Mihi credite, quod de hac paucitate adeò conqueri, ac proinde vel ipsam Dei sapientiam & bonitatem, lite intenta, in ius quasi trahere ausi sitis, mirum omnibus accidet ; cùm enim adhuc sexta ferè orbis pars exploranda restet, vastissimi enim tractus in America boreali etiamnum latent, temperatæ zonæ australis, nihil dum ferè apertum est, si extremos Africæ & Americæ vngues excipiat, decima igitur pars orbis cogniti Catholica est ; & hoc parum videtur ?

V. Vix ego tantam rei Catholicæ amplitudinem adstruxissem, vtpote qui sciam, multos quidem vocatos ad fidem fuisse, paucos verò electos, diuino id testificante oraculo. Nec est, quòd nobis Donati errorem affingatis, à quo quantum absumus, Donatus ipse ab Ecclesia Romana damnatus testari posset. Fides est donum Dei, ad quod recipiendum, licèt naturæ viribus animum nostrum disponere non possimus , eos tamen obices, eaque impedimenta tollere valemus, quibus reuerà sublati, diuina gratia suum in nobis effectum longè faciliùs sortitur ;  
ad

ad hoc viribus & nervis opus est ; regnū enim cælorum vim patitur, & violenti rapiunt illud ; vix credi potest, quā passim sancti Patres Electorum paucitatem exaggerent ; cū semper is fuerit Ecclesiæ sensus.

VI. Quod demum ad divinam providentiam confugitis, cui consonum esse non videatur, quod tam pauci finem illum obtineant, ad quem ab ea homines destinantur ; per illam haud dubiè non stat, quod minùs omnes saluentur ; Deus enim vult omnes homines salvos fieri, si tamen ipsi velint ; & pro peccatis totius mundi clementissimus Servator sanguinem fudit, quod nescio an Protestantes & Calvinistæ vestri daturi sint ; Arminiani fortè inficias non ibunt ; in hoc autem errore Ianseniani ab Innocentio X. damnati sunt. Quod autem multi divinæ huic voluntati minimè obsecudent, sed Spiritui sancto resistent, ac vocantem sequi renuant, Deo imputare stultum est, per quem non stat, quod minùs, eius opitulante gratia, saluemur. Porro diuturnitas illa temporis errantes non excusat ; aliòquin Turcæ, immò & ipsi Iudæi hoc antiquitatis privilegio gauderent, quod absurdum sanè dictu est. Catholici demum nominis appellatio eadem semper fuit, quæ modò est ; semper enim eo donati sunt, qui veram Christi fidem profitebantur, & veræ Ecclesiæ, Romanæ scilicet, adhærēbant.

## EFFUGIUM XXIII.

*Ducitur ex eo, quòd prudentiores Theologi statuunt, Protestantes propter infidelitatem minimè damnatum iri.*

**P**Rudentiores quosque Theologorum Catholicorum statuere, si Protestantes æterna salutē excidant, eos damnatum iri, non quidem propter infidelitatem, sed quòd ex hac mortali vita nequeant excedere, Sacramentis omnibus ritè procuratis; quòd non possit ita facilè in cordibus eorum, tam valida excitari contritio, quæ commissa peccata deleat; quòd nemo sit, qui confitentes absoluat; quique confessis peccata sua salutarem iniungat, pœnitentiam; quòd corporis & sanguinis Domini nequeant fieri participes, quorum sumptione & usu eò ardentius ad res diuinas inflammentur; quam nemo sit, qui ea conficiendi habeat potestatem, deficiente in Protestantium cœtibus legitima ordinatione: Destitui eos, propter eandem causam, singulari virtute Chrismatis, quâ aduersus Satanæ insultus, instar fortium Athletarum muniantur. Quòd si igitur hæc saniorum Theologorum in Ecclesia Catholica sententia recipiatur, iam Græcam Ecclesiam res suas sibi saluas habere, nec quicquam in ea reperiri, quare possint Græci dici exsortes regni cælorum; neque enim nuda tantum nomina Sacramentorum ab eis retineri, sed etiam omnia & singula

*gula validè & legitimè in ea administrari & conferri.*

De Sacramento quidem Confirmationis posse fortassis à quoquam dubitari, quum à Synodo Tridentina definitum fuerit, eius ministrum ordinariū solum esse Episcopum; sed si quis vtriusque Ecclesiæ Græcæ & Latine consuetudinem perpendat; ut hæc non malè agat, quòd mori ab antiquo recepto insistat, neque intra Ecclesiæ suæ fines, nisi ab Episcopis hoc Sacramentum conferri patiatut; ita verò etiam Latinos non omnino damnare Græcæ Ecclesiæ consuetudinem, idem ius etiam presbyteris tribuentis. Accedere etiam quorundam è Soc. Iesu cum Episcopis Gallicanis concertationes, contra quos tuendū suscepserint, posse etiam à presbyteris, si opus sit, conferri Sacramentum Confirmationis, adeoque potuisse id ab eis præstari in Anglia. Quum igitur in Græca Ecclesia omnia Sacramenta legitimè administrantur; quum ritè validèque absoluant, & de legitimo eorum ministerio, atque sacerdotio res sit aperta, infidelitatis autem accusari minimè queant; causam nullam esse, quare Græcam Ecclesiam damnare quisquam debeat; quare etiam, qui in ea nati & educati sunt, non possint in eadem, saluà conscientia, persistere, & in eius communione vitæ finem expectare.

Qua autem ratione Græca Ecclesia Catholicæ membrum haberi possit, eadem tentandum esse, an non Protestantium quoque Ecclesiæ ad eam reduci possint. Primò igitur quin Baptismus in eorum Ecclesia



eclesia ritè validèque administretur, à nemine dubitari: matrimonium ab eis, omnium cōsensu, legitimè retineri, neq; enim si fortè par coniugum ab Ecclesia Protestantium ad Romanam redeat, iterum eos benedici; Sacramentum extremæ Vnctionis non esse ita necessarium, vt omitti nequeat; plurimos in Ecclesia Romana sine ea decedere, de quorum salute nemo dubitet; neque hodie ampliùs ad recuperandam sanitatem adhiberi; licèt ad hunc finem fuerit instituta. Potissimam esse controuersiam de Sacramentis Confirmationis, Pœnitentiæ, Eucharistiæ & Ordinis, quorum valor & efficacia à legitima Ordinatione dependeat; eam verò ideo tantùm negari Protestantium Ecclesiis, quòd non sint ordinati ab Episcopis, quos hodie habent Sacerdotes. Id verò non concessuros plerosque Anglos, qui ordinem Episcoporum retinuerint, quique asserant, suos Episcopos & Presbyteros ab Episcopis in Romana Ecclesia ordinatis, & puriorem deinde fidem amplexis esse consecratos; tantumdem esse dicturos quosdam in Sueciæ, Daniæque regnis.

Quid autem de cæteris, quos constet ordinatos quidem à Presbyteris, qui ab Episcopis cum Romana Sede coniunctis ordinem suum accersant, addè vt res omnis eò redeat, an Presbyteri à Presbyteris ordinari queant. Fatendum quidem esse, aliter passim fuisse obseruatum in vetere Ecclesia, aliud quoque in omnibus Ecclesiis Christianis antea obtinuisse, & fortassis esse institutionis Apostolicæ; in promptu tamen esse exempla quædam vetustissi-

morum Christianorum, ex quibus Presbyteris etiam hoc fuisse concessum constet; non posse ea aliter accipi, nisi in diuersum & alienum sensum verba torqueantur; esse eam disquisitionem tam ex Epistolis Apostolicis, quàm ex antiquitate Ecclesiastica impeditissimum. Quamquam igitur iam à tot sæculis aliter sit receptum, & fortè is ordo ipsa Apostolorum ætate cœperit, nondum tamen esse cuiusmodi, nullam esse omnino eiusmodi ordinationem, etiamsi modo & ritu non omnino licito fiat; statuendum enim esse, Deum non ideo subtracturum gratiam suam, perinde atq; de iis, qui per Simoniam irrepunt; emptisque & licitatis suffragiis, credi oporteat: si enim deinde populi & Cleri acceptatio & consensus accedat, suppleri à Diuina gratia, quod propter obreptionem illam profanam primò defuisse existimandum sit; quum enim nemini non constet, quòd Simoniz vitio etiam in Romana Ecclesia nihil sit communius, atque in iis etiam locis, quæ præ reliquis vti nomine sanctitatis eminent, ita etiam sanctimonia maiori stare debeant, etiamnum hodie, sed olim in primis nihil fuerit frequentius.

Cogitandum esse, quanta sit oritura confusio, quæ anxietas, vel potius desperatio, si propter, siue aperta, siue occulta Pontificum, Episcoporum, & Sacerdotum turpiter & per ambitum se sacris ingrentium crimina, pium & deuotum populum diuinâ gratiâ, quam Sacramenta conferant, nullâ suâ culpâ defraudari dicamus. Quòd si igitur valida sit, etiam apud Protestantes, ordinatio, iam etiam eamdem

dem cum Græcis eorum fore rationem; posse etiam pro Ecclesiis Protestantium excusandis hoc afferri, quod Tertullianum multi magni viri, inter quos Grotius, Rigaltius, aliique sensisse statuunt, posse etiam à Laico, si necesse sit, Eucharistiam confici; quò faciet Frumentij quoq; Exemplum apud Theodoretum & Sozomenum, casu ad Indos delati; deinde quòd Catholici etiam nonnulli Theologi statuunt, posse aliquem, si id vltima postulet necessitas, in fine maximè vitæ peccata confessum etiam à laico absolui.

## PRÆCLVDITVR.

I. **V**El vnum ex iis prudentioribus Theologis Catholicis appellare debuissetis; nullus enim, qui Catholicus sit, ita sentire potest; quis enim neget, hæresim, peccatum esse, illudque grauissimum, atque adeò ab æterna salute excludere? quis autem dicat, errores Protestantium & Calvinistarum inculpate ab iis teneri? esto enim nonnullorum ignorantia inculpata sit; quis amabò, id de omnibus dicere queat? quàm pauci sint, quos ignorantia inculpata excuset, primo & secundo libro fusè ostendi; vnde præcipuum, immò & vnicum huius Effugij ruit fundamentum: equidem, ut iam suprà monui, Protestantes & alij, qui ab Ecclesia Romana descuerunt, necessariis Sacramentorum nostrorum suffragiis carent; sed hic defectus ex primario illo fonte sequitur, errore scilicet &

schismate, cuius reos esse, in confesso est.

II. Porro inter Sacramenta, nonnulla sunt ad salutem necessaria, vt Baptismus, Pœnitentia, Eucharistia; sine Matrimonio facillè saluari possumus; immò vita cœlebs longè aptior & commodior est ad felicitatem obtinendam; extrema Vnctio, licèt reliquias peccatorum expungat, absolutè tamen necessaria non est; idem prorsus de Confirmatione dictum velim; quamquam hæc ad Christianam luctam, hominem non parùm roborat, atque confirmat. Sacra ordinatio ad Eucharistiam & Pœnitentiam necessaria est; nemo enim, nisi Sacerdos sit, aut Corpus Christi conficiat, aut pœnitentem in Sacramento Pœnitentiæ absoluat.

III. Græcorum Sacramenta, modè debita materia & forma à vero ministro adhibeantur, optima sunt; quis hoc neget? De Baptismo, Eucharistia & sacris ordinationibus dubium nō est; quamquam Russi & Moschouitæ maiorem vim aquæ, quàm par sit, calici infundunt, vt non paruum de sufficiente materia dubium supersit. Vtrùm Sacramentum Pœnitentiæ rectè administrent, valdè dubito, cum in eo parùm ab iis differant, qui perperam censent, institutum esse ad remissionem pœnæ, non culpæ: Confirmationis Sacramentum à simplici Sacerdote conferri posse, non diffiteor, sed ex delegatione Apostolica, quâ Græci cum careant, hoc Sacramentum rectè non administrent. Nec quidquam aliud Patres Societatis Iesu dixerunt, vtpote qui probè sci-

Epi.

Episcopum; delegari tamen posse Sacerdotem, cum plerisque aliis dixerunt, auctoritate scilicet Apostolica.

I V. Itaque cum præ cæteris, propter diurnos lapsus, Sacramentum Pœnitentiæ necessarium sit, esto, ipsi debito ritu & formâ illud administrent, deest tamen approbatio & iurisdicção; sine his enim Sacramentum hoc validum non esse Catholica fide tenemus: quòd autem iurisdicçãoe omni hæretici careant, extra controuersiam est. Sed, inquires, saltem in mortis periculo sacerdos quilibet absolueret potest; rectè, sed quàm multis extra mortis periculum Sacramentalis absolutionis beneficium conferretur? Igitur iam constat, eos duntaxat posse absolui, qui errore inculpato tenentur, & in extremo mortis periculo constituti sunt; quorum si vel alterum desideretur, Sacramentum irritum censetur. Vnde constat, quàm pauci huius beneficio gaudeant; raro enim accidit, vtramque conditionem simul esse coniunctam; quis autem illius Ecclesiæ miseram sortem non videat, in qua nemo, nisi inculpata ignorantia teneatur, atque immineat mortis periculum, saluari potest; ac proinde in qua nemo per se, sed per accidens, vt aiunt, saluus fiat.

V. Idem pro Anglis dictum sit, dum apud illos ministri rectè ordinati extiterunt; nunc enim vel nullus amplius apud illos est, qui ad sacros ordines à potestate habente promotus sit, vel si quis adhuc restat, inutilis est; nec enim Sacramentum Pœnitentiæ ipsi admittunt; vt neque ipsi protestantes,

& Caluinistæ; præterquàm quòd isti sacras ordinationes reiiciunt, nec vllum, qui rectè initiatus sit, habent, si fortè multos apostatas excipiamus; qui tamen & iurisdictione & approbatione carent, nec vllum adhibent sacrorum ordinum vsum, seu ministerium, cùm hæc Lutheri & Caluini dogmatis repugnent. Quòd sacerdotes à sacerdotibus ordinari velitis, inane est; cùm certum sit, sacerdotem ordinarium, saltem ministrum non esse, & quamquam delegari posse ad id muneri, vobis daretur, auctoritate scilicet Apostolica, vestros tamen delegatos nunquam fuisse, nemo ignorat.

VI. Exempla, quæ prætexitis, vel ficta sunt, vel cùm errorem contineant, exemplo esse non possunt. Quod pertinet ad Patrum loca, mihi credite, iam toties discussa sunt, vt res ista minimè refricanda esse videatur: alium sensum in iis esse dicitis, quàm eum, quem Catholici afferunt; pro locis sacre Scripturæ, quæ ad confirmandos errores vestros afferre soletis, eadem lis est; quis porro iudex in his controuersis, quem sanè in Ecclesia minimè desiderari supra euicimus. Vos talem sensum exponitis, quem nos Catholici legitimum esse negamus; quis porro nodum soluet? ille profectò, cui clavis scientiæ à Christo relicta est: Petrus scilicet, eiusque successores: & verò nisi aliquem iudicem in controuersis fidei habeamus, fides nostra, quæ certa esse debet, semper nutaret.

VII. Quod habetis de iis, qui ad sacros ordines simoniace promouentur, ridiculum est; vix vnus

ex millibus ita promouetur; si de beneficiis & dignitatibus Ecclesiasticis sermo esset, non diffiterer, nonnihil in eo peccari; quamquam enim maior pars sana est, fieri tamen non potest, quin tanta in multitudine nonnulli delinquant. Præterea, esto, aliqui ad sacros ordines simoniace promouentur, quid tum? peccant illi quidem; ordinatio tamen valida est; nec quisquam Catholicus hoc negat. Marcus Anton. de Dominis secus sentiebat, sed multi egregie illum refutarunt; ut Becanus, Floridus, &c. Sed hunc locum omittere noluiſtis, ut Pontifici aliquid conuitij aspergeretis; mirum est, quod Bullæ Iulij II. non memineritis, in qua damnatur & irritatur Electio simoniaca; sed de hac iam multa multi; vno ferè verbo nodum hunc soluo; nempe Deus nunquam permittet, ut is, cuius Electio irrita sit, ab vniuersa Ecclesia pro legitimo Pontifice habeatur; pro aliis dignitatibus Ecclesiasticis, nullum periculum est.

VIII. Mirum autem mihi accidit, quod caput istud ad eò vrgèatis, vestrorumque sacerdotum ordinationes exaggeretis; nullos enim Protestantes & Calvinistæ habent sacerdotes, quos è medio tollunt; præterea nullum Sacramentum Pœnitentiæ admittunt; frustra ergo sacerdotes essent, qui Sacramentalis absolutionis beneficium impertirentur. Factum illud Frumentij iam alij discusserunt, etenim vel fictitium est, vel errore fœdatum; præterquam quod ab Athanasio Episcopali charactere donatus fuit, & in Indiam remissus. Apud Tertulianum quod ipsi  
Z 4                      affin.

affingitis, non inuenio; & quamuis ita ſentiret, in hoc quoque erraſſe diceretur. Auctoritas Grotij & Rigaltij, in rebus fidei, nihili facienda eſt, vtpote ſuſpectorum hominum. Quod demum vltimo loco ſubnectitis, à laico, ſi id poſtulet neceſſitas, poenitentem abſolui poſſe, nemo iam Catholicus admittit; nempe in Trident. definitum eſt, huius Sacramenti ſolum ſacerdotem miniſtrum legitimum eſſe; ſi aliqui doctores ſecus ſenſiſſe videntur, de abſolutione à cenſuris intelligendi ſunt: quamquam inficias non eo, quin nonnulli etiam inter Catholicos, nimia ſentiendi licentiâ abutantur; non tamen eorum ſenſa probat Eccleſia; ſed ſi quando eorum libri ad cenſores deferantur, illico configuntur.

## EFFVGIVM XXIV.

*Ducitur ex conuerſione Barbarorum ad fidem  
Proteſtantium aut Caluinistarum.*

**I**D quoque conſiderandum eſſe, ſi quidem nonnullis in rigida illa & crudeli opinione perſeuerare placeat, quid futurum putent de gentibus illis, in America Septentrionali, aliſque prouinciis, verſus polum ſitis, ſi quæ ab Anglis, Belgis, Suecis, Danis, nam illæ oras aut coloniis inſederunt, aut nauibus frequentant, ad fidem quidem Chriſtianam, ſed ſicuti illi eam profitentur, ſint traductæ. Aut verò ſi Belgæ in Iaua maiore, aliſque inſulis, quas tenent, & vbi ſacras habent ædes, fortè Indos ali-



aliquos ad fidem Christianam perducant : an in hos quoque eadem sententia ferri debeat ? sed nullam eos aliam fidem cognouisse ; non patere Catholicis ad eas gentes aditum ; quin etiam, si pateat, & eò accedant, & fidem suam ipsis annuntient, nihil tamen esse, quo possint eas gentes convincere ; fidem, quam ipsis Angli, Sueci, Belgæ, prædicauerint, falsam esse, veram autem, quam ipsi eos doceant, nisi miraculis rem agant ; sed cum iis ita esse comparatum, ut aut nulla, aut rara fiant in illis oris ; quum frequentissima fieri dicant inter medios Christianos, qui de fide Christiana nihil dubitant, præter Diuinæ Providentiæ ordinem.

Illa autem argumenta, quæ Catholici aliàs soleant afferre pro veritate fidei suæ, quæque hominibus prudentibus, & eorum, quæ ad religionem Christianam spectant, gnaris, eam alterâ, quæ à Protestantibus recepta est, longè reddant probabiliorem, nulla ratione ab iis percipi posse ; adeò ut illas gentes vndequaque esse innoxias, & omnino salvas fore, fatendum sit. Quòd si siue Catholici, siue Protestantes Augustanæ Confessioni addicti, ideo quod Caluini partes plerique sequuntur, qui prouincias illas armis obtinuerunt, aliter sentire auint, eos in eadem absurda lapsuros, quibus impotentes nonnulli protestantium rabulæ sese deridendos omnibus præbeant, quum profani & absurdi homines non verentur tueri, omnes eas gentes, quæ in Occidente & Orientis arctois prouinciis, his postremis seculis, quotquot etiam in vtraque India populi,

tum auorum, tum noſtrâ etiam memoriâ, à Catholicis cum Romana Sede coniunctis perſuaſæ, fidem Chriſtianam, & Romanæ prorfus conſentaneam ſuſceperunt, ex vno errore in alium, & ex vna idololatria in alteram, haud multò moderatiorem incidiffe; nam & idem de illis gentibus ſtatuendum eſſe, ex vno eos errore in alterum, eûmque non minùs fatalem & gehennæ obnoxium delabi, quod non tantùm non ſit veriſimile, ſed etiam omnino falſum.

Iam verò illorum populorum, qui Lappiam, Sueciam, Norwegiam, Daniâ, Iſlandiam, Finlandiam, Liuoniam, aliâſque prouincias à Catholicis remotiores incolunt, eandem panè eſſe rationem, quæ ſit gentium, quarum antè facta fuerit mentio; quamquam illæ quidem olim Catholicam fidem fuerint amplexæ; illas autem, quæ ſunt Catholicis vicinioreſ, aut cum eis cohabitant, & panè quotidie cum illis agunt, vt Catholicæ fidei veritatem, ſi velint, facilè agnoſcere poſſe videantur, earum tamen mentem ita nihilominùs vitio primæ educationis eſſe corruptam, atque prauis, iſque præconceptis opinionibus, quas veluti cum lacte materno hauſtas, in ſuccum & ſanguinem denique verterint, imbutam eſſe, vt quamquam Eccleſiæ Catholicæ fides purior multò ſit alterâ, & verior videatur, eſt tamen moralis quædam impoſſibilitas, ſiue impotentia potiùs, vt perſpecta veritate errorem agnoſcant. Illas autem opiniones, à quibus animus veluti obduruerit, ita eſſe comparatas, vt ſi vana non ſunt,

sunt, & phantasmata, quæ mentem abripiunt transfusum, si *μορμολύχαια* non sunt, & terribilimenta quædam, fatendum sit, eos merito abhorrere à Catholicis.

Ne autem perspiciant, quæ in fundo latet, veritatem, id quidem fieri, tum prædicantium quorundam culpâ, qui concitent populum, siue studio, siue quòd & ipsi sint decepti, sæpius haud multò vulgo Hominum perspicaciores; tum ipsorum Catholicorum, non omnium quidem, sed quorundam tantum, quorum tamen sermones & actiones primo intuitu ita præferant, ut plurimum faciant ad Protestantes in sententia tam altè in animum demissa confirmandos. Posse quidem eos, si operam dent, neque affectibus indulgeant, ab illis inuolucris tandem animum expedire; sed quæ est summa & deploranda humani ingenij imbecillitas, tot esse, quæ obstant, ut frustra pænè sit omnis, qui suscipitur conatus; aliàs si rectè nôrint, quæ sit Catholicorum sententia, si neque diffidant iis, qui eam proponunt, omnes haud dubiè aut ei assensuros, ceu rectæ & veræ, aut saltem in medio eam relicturos esse; interea eos abhorrere à Catholica sententia, non quâ tali, sed quomodo illam falsò concipiunt; adeò ut haud absurdè dici posse videatur, eos in eadem adhuc esse communionem Ecclesiæ Catholicæ, quum se separauerint olim, & hodie adhuc alieno sint animo, à communionem illius Ecclesiæ, quam ipsi pravis opinionibus seducti, talem sibi falsò esse imaginantur, non verò ab illa, quæ verè est Catholica, quæque

il.

illos oberrantes in tenebris præconceptarum opinionum latet, quam si discussa mentis caligine, agnoscerent, eandem essent amplexuri.

Videri vtique, si quis rem omnem rectè excutiat, non tam de eo esse controuersiam, quid vel verum, vel falsum sit, sed quid pars vtraque statuat, quidue æquum sit, vel iniquum, & hoc tempore atque hoc rerum statu vtile & noxium. Fortassis dici posse, idem euenire Catholicis & Protestantibus, quod interdum soleat contingere diuersis viatoribus, ad locum in edito quidem colle situm, sed cuius prospectum turbidus aër, & cælum nubibus obductum visui eripuerit, diuersis itineribus contendentibus; quorum alij quidem rectè nōrint, quā semitā illic eundum sit, alij verò non satis de ea certi, eligant aliquam, quam eodem tendere putent; illos quidem certos esse, vbi, & in quo colle sita sit ciuitas, quam petunt; hos autem quia obductam caligine nubium cernere eam nequeunt, oberrare pænè incertos, vtrosque tamen tandem ad eundem locum peruenire; illos verò esse Catholicos, hos Protestantes.

## PRÆCLVDITVR.

- I. **C**Oloniæ, quas Angli & Belgæ in America Septemtrionali habent, adeò frequentes non sunt; oras quidem illas nauibus frequentant, vt pelles inde asportent; nullum enim aliud commercij genus cum iis barbaris intercedit.
- Quòd

Quòd autē gentes illas ad Christianam fidem traducant, haftenus in Europa vulgatum nō fuit: equidem Hiroquensibus ( natio est prae cæteris barbara , & nomini Christiano infensa ) arma subministrarunt, quibus tum præcones Euangelicos, tum Huronum gentem totam ferè Christianam penitus destruxerunt. Nihil dico de illustri religiosorum pugilum manu, qui cum Ignatio Azebedo Duce in Brasiliam irent, vt iis gentibus Christi nomen prædicarent, à Calvinistis intercepti omnes ad vnum interfecti fuere: sed hæc mittamus, quæ vix ad rem nostram faciunt.

I I. Demus autem, multos ex Barbaris ad fidem Christianam ab Anglis aut Belgis fuisse conuersos, sicuti illi eam profitentur, & sacro Bâptismate tinctos; scio, sacrum hoc lauacrum sua vi atque effectu minimè caruisse, ac proinde verè fuisse regeneratos, diuinâ donatos gratiâ & amicitia, quâ nisi deinde, admissâ lethali noxâ, excidant, certè non salui esse non possunt. Suppono enim gentes illas, quamuis hæreticorum errore imbutas, non propterea damnandas esse; cum hic error inculpatus censendus sit; vltro enim hoc damus; sed cum vix fieri possit, vt citra noxas lethales viuant, cum inordinatis corporis & animi affectibus sint assuetæ, certè vt remedio & salutari nostrorum Sacramentorum vsu penitus carent, ita non mirum, si æterna salute demum excidant.

I I I. Vbi verò Catholicis ad eas patet aditus, sæpe autem ac sæpius feliciter accidit, vt non ita pridem,

dem, cum ex tota Brasilia Bataui Lusitanorum vitute expulsi sunt, nihil reuerà facilius est, quàm eas cōvincere insinuatorum errorum; nempe ex iis ipsis principiis fidei nostræ, quæ vobis etiam cōmunia sunt, facili ratiocinio ostendi potest, quid erratis: nec exempla desunt in America Septentrionali; positis enim ac datis iis principiis, faciliè ostenditur, quid vel ipsa humana ratio postulat; nempe nisi certam illam ac viam fidei regulam Christus Ecclesiæ suæ reliquisset, fides nostra firma esse nequirit, vt ex iis, quæ suprà dicta sunt, perspicuum est. Hinc Iapones atque Sinenses, qui ea sanè ingenij acie pollent, quam in plerisque Europæis desideramus, nostræ religionis dogmata rationi valde consona esse comperiunt.

IV. Paucitatem miraculorum exprobratis; gratulor, quòd aliqua, saltem pauca agnoscatis; cum vel vnum sufficiat, vt secta vestra manifestè falsitatis arguatur; si enim nostra vera est, vestra falsa est, cum inter cætera fidei nostræ capita, illud quoque teneamus, vos scilicet errare, ac proinde hæreticos esse. Quòd autem verè sentiamus, vel inde constat, quòd aliquot saltem miraculis fidei ac religionis nostræ veritatem confirmemus. Miraculorum examen in Ecclesia Romana seuerum est; pauca enim illa sunt, quæ ab Ecclesia approbantur, reliqua piæ Catholicorum fidei relinquit. Præterea in India non adeò pauca miracula patrata sunt, vt dicitis; quid Xauerus, quid Barzeus, quid Anchieta, quid Ouiedus, quid plerique alij in hac parte gesserint, histo-

historiarum monumentis traditum; vos sultis consulite.

V. Gratulor deinde, à vobis agnosci argumenta nostra talia esse, vt euincant, nostras partes longè potiores esse. Quòd autem additis, ab iis gentibus percipi non posse, quibus Christi fidem prædicamus, pace vestra dixerim, falsissimum est; nempe illæ optimè capiunt, ac vestram vestrorumque cõtumaciam mirari satis non possunt. Equidem absurdi sunt illi, qui Catholicis idololatriam exprobrare non verentur; res trita est, & Tironibus nota; nec enim idola colimus, sed sacras imagines. Porro de Lapponibus, Norwegis, Danis, Islandis, Finlandis, Liuonibus, aliisque eiusdem generis idem iudicium esto; quisquis enim inculpato errore tenetur, huius causâ non plectetur, sed propter alia peccata, quæ non ita facilè expungi queunt, propter Sacramentorum penuriam, eorumque subsidiorum, quibus in Ecclesia Romana gaudemus, licet prædicta penuria à præfato errore quantumuis inculpato profecta sit.

VI. Quòd fidem nostram puriorem esse concedatis, accipio; quòd verò contumacia, & immoderatus erga præconceptas opiniones affectus errores vestros excusare debeant, nullatenus concedo: excutiant offusas menti tenebras, pacato animo, non perturbato, tanti rem momenti discutiant, cælestis luminis appulsum suis sceleribus non prohibeant, prædicantibus suis fidem detrectent, nisi suæ missionis literas exponant, explodant fabulas illas, quibus vt plurimum eorum pulpita ac templa personant;

nant: si qui fortè inter Catholicos, suos mores ac vitæ modum, cum vera fide minùs componant, ad fidem, non ad mores attendant, nec enim aliorum mores, nisi recti sint, imitari debemus. Porro si vita rectè instituta iis placet, non desunt apud nos luculenta exquisitæ sanctitatis exempla: sed, vt video, si quod vlcus est, importuna musca statim aduolat; nequè inter eà, quæ fieri non possunt, conuersio vestra recensenda est, cum multi passim ex vestris ad nos transeant; quòd autem hi faciunt, cur cæteri facere nequeant, certè non video.

VII. Deditus haftenus operam, vt probè nosceretis, quæ sit Catholicorum sententia, nec vllam vobis diffidentiae occasionem præbuimus; non tamen propterea assensi estis, nec dedistis manus; hinc fortè hoc nomine culpam prætexitis. Porro cum ab Ecclesia Romana, quæ Romana, Protestantes abhorreant, ab ea certè, quæ Catholica est, abhorrent; quæ enim Romana est, Catholica est. Et verò frustra alienum illorum animum prauis opinionibus, quibus seducti sunt, tribuitis, iisque errorum tenebris, quibus inuoluuntur; nempe illi errores voluntarij sunt, & crassi, ac proinde vitio vertuntur; & cum manifesta pertinacia coniunguntur. Quòd demum subiungitis, non tam esse controuersiam, quid verum aut falsum sit, quàm quid pars vtraque statuatur, palmaris profectò hallucinatio est; quis enim est, vel in his rebus Tiro, qui nesciat, quid teneamus, quid teneatis, & quænam sint controuersiarum nostrarum summa capita. Illa, quam à diuersis viato-

ribus



ribus ducitis, comparatio minimè quadrat; nempe illa, quam iniuistis, via non ducit ad vitam, sed ad mortem; vbi enim error est, vera via non est.

## EFFVGIVM XXV.

*Ducitur ex eo, quòd Protestantes materialiter duntaxat errent, itèmq; ex hominum imbecillitate.*

**Q**uomodocunq; igitur tandem considerent, siue Græci, siue Protèstantes, sed hi in primis, de Græcis enim plerique sentiunt multò moderatiùs, quin neque hæreticos verè, neque schismaticos esse volunt, nonnulli ægrè ferentes, paucorum culpam, qui Romanum Episcopum agnoscere nolint, omnibus imputari, etiamsi aliàs grauius errent; fatendum tamen esse, errare eos materialiter tantùm, adeòque etiam materialiter tantùm esse hæreticos, vt vocant, non formaliter. Solam formalem autem hæresim, nisi hæresis circa ea versetur, quæ necessitate mediij ad salutem necessaria sunt, ex communi Theologorum sententia, ab Ecclesiæ Catholicæ communione & vitâ æternâ excludere, quotquot eâ sint imbuti. Quum verò quis materialiter tantùm errat, hunc odisse minimè fas esse; neque enim Deum cum iis adeò rigidè, atque homines sibi vulgò persuadeant, acturum esse.

Considerandum verò esse, quantâ hominum Genus laboret imbecillitate; quàm procul sint re-

motæ à captû nostro res diuinæ; facilem esse in iis lapsum. Si stricto iure etiam cum Catholicis Deus agere velit, vix quemquam futurum, qui non materialiter hæreticus dici possit; quum enim vix quisquam ex sanctis Ecclesiæ Doctoribus, & antiquissimis Patribus, quorum plures etiam sanguine suo veritatem fidei Christianæ asseruerint, si scripta eorum consulas, quæ hodiernum supersunt, reperiri possit, qui non grauitè, sed tamen eo, quo diximus modo, materialiter errauerit, in promptu esse, quid de reliquis statui debeat. Euoluenda esse veterum scripta, repertum iri, quot inter eos fuerint Chiliastæ, quot Origeni assenserint, quot animæ & angelis corpus tribuerint, de Deo etiam dubij, quot animas beatas, Deum ante finem mundi non visuras senserint: hos esse errores multis communes.

Iam in reliqua Scriptorum turba vix quemquam esse, quem materialiter non errasse, probari possit, si omnium scripta excutiantur; plerosque è vulgo trahi tali aliqua superstitione, in quam natura sit prona; nunquam Caluinum tam durè scripsisse, quàm vulgus vulgò sentiat; vel si singulis etiam diebus audiant quempiam è Societate Iesu prædicantem, nullam esse maiorem sectam, quam Prædestinarianorum; hanc pænè omnibus è vulgo esse fatalem; quemque debere excutere conscientiam, & intimos animi sui recessus, animaduersurum, quantumvis Ecclesiæ iudicio suum paratus sit submittere, materialiter se tamen vnum, vel alterum grauem errorem animo habere absconditum; esse quosdam

erro-

errores, qui ita suauiter animum subeant, ut eos excutere haud minùs interdum difficile sit, atque fesso somnum: fatendum esse coram Deo imbecillitatem nostram, eamque summo Numini esse offerendam; illam confessionem Deo esse gratiorem, quàm superbam & ambiciosam aliorum sententiam, qui ex suo ingenio eam in alios ferant sententiam, quæ in illosmet ipsos statui debebat: reuocandum esse in memoriam illud Seruatoris; nolite iudicare, ne iudicemini: Ex his etenim positionibus constare, qualia sint, de quibus sit controuersia; nihil asseri à Protestantibus, quod detrahat honori diuino; ideo verò eos à Catholicis esse alieniores, quòd gloriam, quam Deus alteri nolit dare, etiam aliis communicare videantur; nullam aliàs esse controuersiam, quæ tam atrox dissidium mereatur.

PRÆCLVDITVR.

I. **O**Mnibus Græcis hæreseos & schismatis culpam non imputamus; scimus enim, multos esse inter illos, qui Græci ritus esse dicuntur, quatenus à Nestorianis, Iacobitis, Cophtis, & Armenis segregati sunt, quorum sincera & integra fides perspecta est, cum scilicet Ecclesiam Romanam agnoscant, & pareant Romano Pontifici; quin etiam inter Armenos plerosque esse Catholicos, fat scio: hæc autem iis, quæ suprà exposuistis, omnino repugnare videntur; nempe hoc loco ingenuè fatemini, non multos esse inter

Græcos, qui sint Schismatici, hoc est, ab Ecclesiæ Romanæ unitate separati, cum tamen suprâ Ecclesiæ Græcæ amplitudinem plus æquò amplificaretis; quatenus scilicet à Romanâ segregata esset; quò verò hæc inter se repugnantia tendant, non video.

II. Protestantes autem materialiter tantum errare, cui, amabò, persuadebitis; hoc iam non semel suprâ obtrusum est, sed pariter refutatum; cum errores illi humanæ duntaxat imbecillitati tribuendi non sint, sed obstinatæ malitiæ & pèruicaciæ, quam profectò nihil coràm Deo excuset. Inficias quoque non eo, quin multi nostrorum materialiter errent, ac nonnulli ex vulgo aliquot superstitionibus ducantur; sed pars longè maior non errat; cum ea duntaxat credat, quæ ab Ecclesiâ credenda proponuntur; porrò Ecclesiâ errare non potest, ne quidem materialiter. Fateor etiam, nonnullos ex sanctis Patribus errasse, nunquam tamen illi errores suos propugnarunt, vbi semel ab Ecclesiâ damnati sunt. Quod autem hac in parte ab Hæreticis opponitur, à Bellarmino, aliisque abundè solutum est; vos videritis, ne crambem recoctam apponere cogar. Et verò esset, quòd maiorem modestiam in vobis desiderarem; nec enim de sanctis Patribus tam acerbè, tam acriter scribendum erat: immò si quid dubiè ab iis pronuntiatum, in bonam partem & Catholicum sensum vertendum esset; sed hoc hæreticis satis solemne est, ut sanctos illos Diuini verbi interpretes malè excipiant; abstineo ab exemplis, ne operam ludam, cum triuiale sit.

III. Præ-

III. Præterea, esto, nostri quoque materialiter errent; eiusdem tamen cum vestris conditionis non sunt; cum certis polleant Sacramentorum subsidiis, quorum opera delictorum suorum veniam consequuntur, quibus tamen vestri penitus carent. Unde licet daremus, plerosque materialiter tantum errare, hoc tamen non facit, quin alia peccata, eaque nonnunquam graua admittant, quæ quomodo tandem expungere valeant, prorsus non habent. Porro licet res diuinæ humanum superent captum, nihil sanè de iis credimus, nisi quod diuina fides nos docet, in quo lapsus omnis immunis sumus. Scripta Patrum ab omnibus inoffenso pede percurrere nequeunt; immò non desunt, qui ex iis errandi occasionem acceperint; multi enim ignorant principia Theologica, quibus instructus sit oportet, quisquis ad SS. Patrum, præsertim dogmaticorum, lectionem sese accingit: hinc semidocti quidam erroribus magis obnoxij esse videntur, vt manifesta experientia testatur: eos Soli Martio haud absimiles esse dixerim, qui humores educit, sed non resoluit; sic ij difficultatum nodos inueniunt, sed cum soluendo non sint, iis impliciti manent.

IV. Vt cætera omittam, vnum sanè mirum accidit, quòd nulli scriptori, siue sacer, siue profanus sit, stylus vester pepercerit, nempe omnes erroris, omnes ignorantia arguitis; hanc scribendi licentiam erit fortè qui castiget. Quid Calvinus scripserit, satis scimus; nec quisquam hactenus, mihi credite, illius errores exhaust, sentina quædam inex-

hauſta eſt; apud Gualterium in tabula è multis pauca leguntur, ea tamen, quamuis alia decſſent, ſufficiunt, vt durè de illo loquamur; durè, inquam, id eſt, candidè & ingenuè in multis illum grauiter erraſſe dicamus. Prædeſtinatianorum ſectam vulgarem & frequentem eſſe, fruſtra licèt Ieſuitis refragantibus, & quâ voce, quâ ſtylo reclamantibus, per iocum, vt puto, dicitis; quaſi verò vulgus indoctum capiat rem prædeſtinationis, aut fati; quin potiùs probè intelligit, Deum, pro ſingulorum meritis, iſdem retribuere; immò ſecta illa iam pridem extincta eſt, ſed eam Lutherus & Caluinus excitauit, & Viſſerus quidam Hibernus ex profeſſo valde illuſtrauit, quem deinde Ianſenius ad eò fideliter ſequutus eſt, vt non modò in eius verba iurârit, verùm etiam totas illius libri paginas exſcripſerit; quod ſi quis negauerit, ad pœnam libri eum remitto.

V. Optimè monetis, vt quiſpiam accuratè conſcientiam excutiat; ſed id vobis omnino præ cæteris conſultum foret; nos ſanè multa in nobis quotidie plectimus, multa deſlemus, cùm tamen omnia iudicio Eccleſiæ ſubiiciamus; errare non timemus, cùm nullum errorem Eccleſia ſuo calculo donet. Præterea, quæ diuina ac certa fide tenemus, multa erunt haud dubiè, in quibus opinionum libertas permittitur, quarum aliquas falſas eſſe, quis neget; ſed huiusmodi errores circa res fidei minimè verſantur, nam quod reliquum eſt, Deus noſtris diſputationibus permittit. Eſt, quòd maximopere illam animi demiffionem laudem, quâ ducti imbecillitate

tem

tem nostram agnoscimus, & coram Deo fatemur; sed ubi mentis peruicaciâ ducti, Ecclesiæ parere recusamus, cui tamen parendum esse Christus edixit, huiusmodi confessionem fictam & inutilem esse, necesse est.

VI. Constantia fidei ambitioni & superbix ver-  
tenda non est; nihil mollius hac in parte agendum;  
sed pro vno apice, vel iota acriter pugnandum; & si  
opus sit, vita cum sanguine ponenda; Christi iudi-  
cio standum est, eum scilicet pro Ethnico & Publi-  
cano habendum, qui Ecclesiam non audierit: nos  
profectò auctoritate priuata neminem iudicamus,  
sed iudiciis Ecclesiæ & Concilij œcumenici adhære-  
mus, quibus haud dubiè damnati, & diro anathe-  
mate perculsi fuistis. Qualia porro sint ea, quæ nos  
inter & Protestantes controuertuntur, satis constat  
ex iis, quæ hucusque disserta sunt; cum primaria sint  
nostræ fidei ac religionis capita. Quod Protestantes  
nihil adstruant, quod honori Dei aduersetur, fru-  
stra iactatis; quis enim neget, Deum ab illo, debito  
priuari ac frustrari honore, qui eius verbis fidem de-  
tractat; qui legatos & ministros ab eo institutos  
minimè agnoscit; qui corpus Christi, Ecclesiam sci-  
licet discerpit & foedè lacerat. Nullam denique glo-  
riam alteri tribuimus, quæ soli Deo competat, cul-  
tum scilicet patriæ; quidquid enim affingitis, ridicu-  
lum est; nec idola vsquam colimus, nec Sanctis su-  
preum deferimus cultum, sed honore illos & ob-  
seruantia, vt Dei amicos prosequimur, cum Deus  
ipse honore dignos esse nobis significarit. Quod

tandem concluditis, nullam aliàs esse controuersiam, quæ tam atrox dissidium mereatur, dare non possum, cum de præcipuis fidei dogmatibus, immò de ipsâ fidei regula controuersia intercedat.

## EFFVGIVM XXVI.

*Ducitur ex ingeniorum diuersitate, quæ variat secundum nationes, climata, &c.*

**F**ieri non posse, quin oriantur variæ religiones, & sectæ variæ, si vel ipsam ingeniorum diuersitatem spectes, quæ variet, secundum nationes, provincias & climata; concordiam igitur retineri non posse, nisi sit consensus in pauca quædam, ad quæ credenda omnes æquè afficiantur; nam si plura sint, vix fieri posse, quin vnum atque alterum occurrat, circa quæ diuersos populorum affectus cernere liceat; ex qua diuersitate deinde ad schismata & sectas facilis sit transitus. Iis, qui rerum humanarum vicissitudines, & populorum naturas cognitæ habeant, id absurdum minimè videri; Gentes enim, quæ ad meridiem vergunt, pronas esse in superstitionem, non affici eas sacris, nisi in iis splendorem videant, & pompam profanæ similem; affici eas varietate rituum, etiam incognitorum, atque mysticis actionibus, Septemtrionales verò cum animo sint, præ reliquis, recto & simplici, simplicitatem etiam amare in sacris: iam olim, quum adhuc ignorarent fidem Christianam, obseruatam fuisse



fuisse hanc diuersitatem apud illas gentes. Quod si igitur, ut fieri saepe soleat, etiam animo non malo, sed amore proprii cultus, quo vnaquæque gens mirè afficitur, altera alteri suum magna contentione obtrudere conetur, ex illa antiperistasi, inflammatis odio animis, erumpere tandem dissidium, quod ita faciliè componi nequeat.

## PRÆCLVDITVR.

**S**Candala quidem esse, necesse est, nullum autem maius scandalum censetur, quàm illud, quod ab errorum & schismatum factionibus proficiscitur; at væ homini illi, per quem scandalum venit. Mira quidem est ingeniorum diuersitas, secundum diuersas nationes, quæ fortè ab ipsa educatione, non ab ipso cælo, vel solo deriuetur: nulla tamen natio est, ex iis scilicet, quæ Christianam fidem amplexæ sunt, cuius indoles singulari vitio ab eâ fuerit aliena, nempe ratio illa diuinæ auctoritatis communis est; & diuina mysteria æquè omnibus credenda esse videntur, immò & credibilia, si merum ingenium populorum spectes; quidquid enim discriminis intercedit, à diuersis moribus ortum ducit; nempe malè affecta & inclinata voluntas maximi obicis & impedimenti loco est, cum ab eâ pia motio, quam fides desiderat, omnino procedat; hinc haud abs re peccata & vitiosæ habitudines tenebræ vocantur, quod scilicet tenebras men-

offundant; hinc ergo diuersitas petenda est, non ab ingenio, aut vitio climatis.

II. Quòd in pauca res fidei contrahenda sit, vel cogitatu ridiculum est; quasi verò humana auctoritate & hominum consensione fieri queat, vt vel pauciora, vel plura à Deo reuelata sint. Quòd Deus vel multa, vel pauca reuelarit, non à nostra, sed ab eius voluntate dependet. Præterea non video, plura esse, quàm vt ea; diuina opitulante gratia, credere valeamus; Scriptura nobis communis est, modò quædam loca à vestris deprauata restituantur, & pauci libri, quos pro canonicis non habetis, admittantur; vnum restat, meo iudicio, viuens scilicet regula fidei, & controuersiarum iudex; in hoc si nobiscum aliquando conueneritis, omnis cessabit controuersia; immò illud præsertim necessarium est; cùm enim à diuersis ingenijs diuersa sit opinionum diuersitas, vt hæ componantur, iudicem esse oportet; quod quisquis non videt, omnino cæcus est.

III. Gentes ad meridiem vergentes superstitionibus addictas esse, ac splendorem in re sacra valde probare, dicitis; quid tum? hoc nō disputo; quamquam etiam apud vestros, superstitiones non desunt: sed esto; vobis auctor non sum, vt superstiosus, sed vt Catholici sitis. Porro Ecclesia Catholica superstitiones damnat: quid de iis nostri Doctores sentiant, minimè ignoratis: sed periculum est, ne sacros ritus ab Ecclesia institutos, pro superstitionibus habeatis. Fortè nostra ieiunia, & absti-

nen-

pentiam, corporis macerationes, cœlibem vitam, pias preces, sacram liturgiam, Ecclesiasticas vestes, imagines & cruces, dierum festorum celebrationem, sacras supplicationes, sacros psalmos & cantus, & alia huiusmodi superstitionum loco habetis. Sed quid vestrâ? homines laici estis, vix per semihoram id sacri pensi à vobis Ecclesia diebus festis exigit, ut rei sacræ interfitis; pauca per annum ieiunia indicit, dies aliquot festos, synaxim annuam; verbo dicam, nulla secta est, quæ plura suis non imponat atque præscribat: si enim Monachi in claustris hanc, vel illam vitam agunt, si canunt in choro, ieiunant in triclinio, orant in cella; si flagella, cilicia, aliâque id genus pia supplicia adhibent; si vestes, coronam, barbam, tali vel tali modo componunt; quid ad vos, quos nullus ad hoc vitæ institutum adstringit?

IV. Aliquis sacrorum splendor Deo semper placuit; quid in Veteri Lege præscriptum ab eo fuerit, non ignoratis; tabernaculi ac templi maiestas, summi Pontificis pretiosæ vestes, sacrorum vasorum ac reliqui sacri apparatus, pretiosa materia & exquisita forma, aliâque huiusmodi probant, pompam & splendorem illum sacrorum Deo haud ingrata accidere. Sed quo animo hæc à vobis dicantur, satis compertum; diuinus cultus apud vos merus obtentus est; res sacra parùm vobis cordi; cum proditore Iuda fortè dicetis: ut quid perditio hæc? non quòd res sacra vobis curæ sit, sed quia opes sacris vñibus & ministeriis destinatas inuolare velletis, de

hominibus Ecclesiasticis crebros miscetis sermones, iisque obloqui non cessatis : sed vt verum dicam, non homines, sed bona spectatis ; de altaribus parum solliciti, modò vestris laribus consulatis.

V. Quod spectat ad varios ritus, quid quæso vestra ? sacris administris hanc curam relinquitē ; quamquam Ecclesia Græca, quam paulò antè tot laudibus cumulastis, longè plures ac longiores, quàm Latina seruet. Simplicitatem Boreales vestri, saltem vt dicitis, in rebus sacris amant; rectè: quid quæso simplicius, quid expeditius, quàm sacra nostra ministeria ? Missa præter breuissimas preces, pauca tantum sacra Scripturæ verba, aliquot Psalmorum versus, breuissimam oblationis & consecrationis formulam habet; Sacramentorum vsus, saltem eorum, quæ omnibus conferri solent, vt Baptismus, Confirmatio, Pœnitentia, Eucharistia, extrema Vnctio, breui & simplici praxi continetur. Nec est, quòd antiperistafim illam exaggeretis; res ista huius generis non est; nec vobis quidquam obtrudimus, licèt quærere non dubitemus, cur tandem maiorum vestrorum mores, religionem, fidem ac legem deserere veriti non sitis, vt Lutheri, Caluini, Buceri, Zwinglij, aliorumque huiusmodi apostatarum doctrinam defenderetis. Quid porro ad hæc natio, quid Gentis Indoles, quid ratio climatis conferat, non video.

## EFFUGIUM XXVII.

*Ducitur ex eo, quòd restringenda sint ea, quæ ad salutem sunt necessaria, & maior libertas concedenda.*

**V**T igitur dissidia, quantum fieri potest, evitentur, restringenda esse, quæ necessaria dici possunt ad salutem, & concedendam maiorem libertatem, quam hæcenus Ecclesia Romana permittere voluerit. Circa ritus in primis & agenda, necessariò permittendam esse liberam cuique Ecclesiæ dispositionem; consideranda esse, quanta ex Tertulliano, Epiphanio, Augustino, Socrate, Sozomeno, aliisque scriptoribus Ecclesiasticis colligi possit rituum fuisse diuersitas, quam si hodie etiam sequi libeat, facilè componi posse haud paucas controuersias superiore sæculo exortas. In vetere Ecclesia maiorem fuisse pacem, quòd maior tum esset libertas; non tum integras prorsus provincias in schisma fuisse prolapsas; plerasque sectas fuisse erraticas, atque Swenckfeldianorum & Weigelianorum nostro tempore esse videamus, præcipua nostræ fidei mysteria oppugnantes.

De iis verò non disceptari nunc inter partes; si qui sunt, qui de iis etiam dubitare audent, dubium non esse, quin explodi debeant: ea autem, de quibus nunc partes contendant, primis quidem sæculis nunquam fuisse à quoquam adducta in controuersiam, siue quòd ea ignorarent, aut non ita crederent,

rent, & existimarent liberum esse & indifferentē, quid quæque Ecclesia sentiat. Ecclesiam hodie Christianam vel ideo multò esse feliciorē, quòd hodie atrocius dissideat de rebus non magni momenti, quàm olim, quum quæstio esset de iis, in quibus cardo rei totius versatus fuerit. Si maior concedatur libertas, fortassis sponte sua populum eo rediturum, quò maiorem partem inclinare videat; nunc verò videri persistere in sententia, non tam odio aduersæ partis, quàm quòd cogi nolit, compulsusque resiliat, & communi hominum vitio in contrarium nitatur.

## PRÆCLVDITVR.

**M**Aior aut minor, quàm sit, credendi libertas esse non potest; ut enim nec plus, quàm par sit, credere, ita nec minus æquo diuina fide tenere possumus; nempe ut Deo aliquid adstruenti fidem detractare non debemus, ita nec ei quidquam affingi debet. Maior igitur, aut minor credendi libertas esse non potest; cum id omne credere debeamus, quod Deus reuelauit, & nobis Ecclesia credendum proposuit, & nihil amplius; ab humana igitur institutione non pendet, sed à libera Dei voluntate, qui ad libitum plura, vel pauciora mortalibus significat. Quod spectat ad ritus, pauciores reuerà, aut simpliciores esse non possunt; de iis enim loquor, qui laicis competunt. Si quid enim Ecclesiastici aut Monachi singularis ritus adhibeant,

hibeant, in victu, vestitu, cantu, ac totius vitæ instituto; quid ad vos, homines laici? an oculus vester nequam est, quia illi boni sunt? si saccum, cilicium, flagella, ieiunia, aliâque id genus horretis, bene est; sed quid ad vos, si hæc alij sanctè adhibeant? hinc popularis parcœmia locum haberet; canem scilicet olitoris nec edere caules, nec pati, ut alij edant.

II. Sacramentorum usus, Pœnitentiæ præsertim & Eucharistiæ, facilior esse nequit; flagellationes ac pœnitentiæ publicæ, ut vocant, aliàs in quibusdam Ecclesiis præscriptæ, in usu amplius non sunt, quamquam eas nonnulli recentiores per fas & nefas restituere conantur. Præcepta verò Ecclesiastica pauca sunt & facilia; annua synaxis laxior nonnullis visa est; festorum indictio quædam tertij præcepti declaratio vel explicatio est: accedit, quod festorum celebratio remittendo animo ut plurimum, potius quàm divino cultui, maiori saltem ex parte inseruit. Pauca illa ieiunia per annum præscripta adeò facilia sunt, ut vix ieiunij nomen mereantur: accedit, quod tantula causa ab iis fideles eximit. Miror, homines, quibus propria salus cordi sit, de his minutiis conqueri, præsertim cum nulla secta sit, quæ suis longè gravius iugum non imponat. Naamani exemplū in hanc rem optimè quadrat; si alia maximè difficilia Ecclesia præscriberet, haud dubiè parendum adhuc esset; quid enim pro æterna salute fieri non debet? cum autem adeò facilia & pauca, scilicet laicis imperet, cur, amabò, parère recusatis?

III. Præ-

III. Præterea maxima nostrarum controuersiarum pars ad ritus non pertinet, sed ad fidei dogmata, ut patet ex dictis, in quibus Ecclesia nihil mutare potest: itaque fides prius vobis mutanda est, ac deinde, si ratio postulet, de ritibus facile conueniemus. Agnoscite supremum controuersiarum iudicem, Christi Vicarium, Ecclesiæ Caput, auctoritatem fallere nesciam in materia fidei & morum; admittite nostra Sacramenta, liberum hominis arbitrium, purgatorium, indulgentias, Sanctorum cultum, sacras imagines & reliquias, ea quæ sacramentalia vulgò vocantur; nolite facere Deum peccati auctorem; eiurate prius huiusmodi errores, antequam de ritibus ac cæremoniis agamus. In veterè Ecclesia, quæ maior pax extiterit, reuerà non video; semper enim fuerunt hæreses & hæretici. Quod dicitis, integras Prouincias in schisma non fuisse prolapsas, cum veritate minimè consentit, quis enim nescit, integram Gothorum gentem diu Arianam fuisse, immò, ut ait Hieronymus, totus ferè orbis terrarum se Arianum esse miratus est. Iam dudum etiam Græci, Armeni, Cophti, Abassyni ab Ecclesia Romana defecerunt. Porro nec ipsa integra Germania ab eadem desciuit; Anglia quidem tota defecit, sed quid causæ fuerit, non ignoratis; turpis causa turpiorem effectum post se reliquit.

IV. Quod verò indicatis, de fidei mysteriis controuersiam modò inter nos non esse, à veritate alienum est: de iis, quæ suprà attigi, disceptamus, quæ ad fidei mysteria omnino pertinent; & si illos  
omnes



Omnes explodatis, qui de iis dubitent, acta res est, conuenimus : sed verbis non stamus, expectamus facta. Quod nostrarum controuersiarum capita primis sæculis in dubium reuocata non fuerint, ut libere dicitis, ita vix probare poteritis : legite, amabo, vestrorum errorum & antiquorum parallela apud Gualterium in tabula. Sed esto, recte in iis fideles tum sentiebant, neque hoc maiori credendi libertati tribuendum ; nunquam enim cuique concessum, ea, quæ vellet, credere : equidem non diffiteor, multa deinde à Conciliis & Ecclesiâ declarata & definita fuisse, quæ antè minimè obligabant.

V. Res illas, de quibus disceptamus, non magni momenti esse dicitis ; sed vbi de æterna salute agitur, magnum reuera momentum est. Subtiliores quidem antiquorum hæreses extiterunt ; ut Arij, Macedonij, Nestorij, Eutychetis, Pelagij : at vestri errores, ut longè plures, ita non minores esse videntur. Quidquid enim sanctum est in Catholicorum lege, fœdissime violastis ; Deum, quem auctorem peccati facitis, & sacrificio priuatis ; Christum, quæ in Eucharistia deridetis, & pedibus calcatis ; Angelos, quorum pia ministeria negligitis ; Sanctos, quorum cultum & memoriam penitus abolere voluistis ; pias animas in purgatorio detentas, quas solitis suffragiis recreandas esse negatis ; Ecclesiam, quam miserè discerpere non cessatis ; Christi Vicarium, cui parere non vultis, cuius auctoritatem pessumdatis, addictos diuino cultui homines, quos acerrimè persecuti estis ; Sacramenta & sacramentalia, quæ reii-

B b

citis ;

citis ; diuinam gratiam , cui necessitatis legem imponitis ; libertatem hominis , quam è medio tollitis ; vno verbo , quidquid sanctum & sacrum est in Ecclesia , turpissimè fœdare tentastis ; & hæc parui momenti esse iudicatis ? Quis demum vos cogit ? hortamur quidem , monemus , inuitamus , nullius sanè commodi nostri , sed vestræ salutis studio ducti ; vbi , quæso , vis , vbi violentia ? Equidem nonnulli Principes Catholici hæreticos in suis Prouinciis esse non patiuntur ; sic vestri erga nostros Catholicos eodem modo se gerunt ; iure quidem illi , hi verò iniuriâ ; nempe æquum est , & è rep. vt Princeps noua dogmata in vulgus spargi non sinat , cùm religionis mutatio aliquam vt plurimum reip. mutationem conciliet ; iniquum tamen est , subditos populos ad nouam religionis formam à Principe adigi , nec antiquam maiorum fidem permitti.

## EFFVGIVM XXVIII.

*Ducitur ex eo , quòd à primariis Ecclesiis , quasi à Matrice , suborta contentiones propagata sint.*

**E**cclesiam omnem fuisse propagatam velut per colonias ex vrbe primaria emissas ; quæ ratione factum fuerit , vt omnes illæ eam urbem , à qua primùm fidem acceperant , magno honore & affectu prosequerentur , eiusque ritus & constitutiones interdum non admodum inuiti susceperent.

petent. Romanam in primis Ecclesiam, perinde atque olim Remp. Romanam, plurimum creuisse, emissis veluti in omnes Occidentis Prouincias coloniis, quibus sibi auctoritatem in eas asseruerit, & in officio haud difficulter potuerit continere. Idem factum à Græca, Syriaca, Ægyptiaca; inde haud aliter atque inter vicinas vrbes aut respub. fieri solet, sic inter æmulas Ecclesias, natas esse contentiones, iis alendis, quæ sitas ab hominibus concitatoris ingenij varias causas & occasiones, atque ea, ad diffidia fouenda, in medium allata, quæ aliàs haud magni essent momenti.

Cùm autem quæque Ecclesia matriçi suæ adherere consueuerit, si matricem quædam inuadat contentio, eam protinus propagari in subiectas Prouincias, quæ temporis diuturnitate ita demum inualescat, vt transeat tandem in odium, quale quondam fuit Romanos inter & Carthaginenses, & hodie Hispanos inter & Gallos; certè non aliam esse rationem diffidij, quod à tot sæculis, Græcos inter & Latinos viguit. Quemadmodum autem dubitandum non sit, quin Deus facilè ignoscat Gallicis & Hispanis, insito quodam odio inter se diffidentibus, ita etiam existimandum esse, Deum Opt. Max. non tractaturum durius Græcos & Latinos, quoniam par sit ratio.

## PRÆCLVDITVR.

- I. **F**ateor ab Ecclesia Romana totum Occidentem fidem accepisse; sed nego, hanc fuisse

causam diffensionum, quæ deinde Romanos inter & Græcos extiterunt; immò manifestæ veritati repugnare videtur; quis enim nescit ambitionem Patriarchæ Constantinopolitani schismati ortum dedisse, à cuius tamen Ecclesia nulla colonia emissa fuerat; sed cum in ea ciuitate Imperatores manerent, inde auctoritatem spiritualem, vt vocant, Patriarcha sibi arrogare voluit, vnde Princeps ipse temporalem ducebat. Hic fons & origo mali; si enim sedes Imperij Romæ fuisset, Patriarcha Constantinopolitanus primatum illum Ecclesiæ nunquam ambiisset: sed cum Imperatoris Episcopus esset, Romano Episcopo subiaci indignum ratus, altare contra altare erexit, & schismati causam dedit; rediëre idem Græci ab eo tempore, vt iam obiter indicaui, sed aut gentis indoles, aut mala corruptorum hominum fides fecit, vt rursus ad vomitum redirent.

II. Quo verò fructu ac euentu, miserabilis illius Ecclesiæ status & forma testatur, nempe cum aliàs Græcia mirabiliter floreret, tum literis, tum sanctimoniâ, tum etiam armis, ac rerum gestarum gloriâ; nunc obscura iacet, ignorantia errorumque tenebris inuoluta, sine literis, sine virtute, sine vlla nominis famâ: ingeniosos homines nobile illud solum non alit amplius, nec strenuos, nec sapientes; obmutuit illa eloquentia; amplissimæ ciuitates dirutæ ac desertæ, & frequentissimæ olim regiones nunc maximâ incolarum penuriâ laborant. Itaq; Ecclesia Constantinopolitana aliarum matrix non fuit, licet  
aliæ

aliæ Orientis Ecclesiæ ipsi deinde adhæserint, ob rationem suprâ expositam, quod scilicet in ea ciuitate caput imperij esset. Facile autem concesserim, homines concitatoris ingenij schismati occasionem præbuisse, ambitionis studio ductos, quales haud dubiè fuerunt Photius, Sergius, Michaël Cerularius, aliique deinceps qui successerunt.

III. Porro cum de primatu ageretur, ac certo & indubitato controuersiarum iudice, nec non plerisque diuinæ fidei dogmatis, res satis magni momenti fuisse videtur. Comparatio illa ducta à Romanis & Carthaginensibus, itémque à Gallis & Hispanis, futilis est; & nisi me mea opinio fallit, vnicus ac singularis huiusmodi effugiorum scopus est, vt euincatis, iurisdictionem Ecclesiasticam humanæ, non diuinæ institutionis esse; ac proinde Ecclesiam à Spiritu sancto non regi, ac dirigi, sed politicæ prudentiæ rem esse; à Romano Pontifice supremam illam auctoritatem vsurpatam, quam à Christo nullatenus acceperit. Sed res profectò secus se habet; digitus Dei est hæc, nec caro & sanguis hoc reuelarunt, vt patet ex dictis. Vno verbo, satagite, quæso, rerum vestrarû, & Græcos sinite, ac existimate, horrendum esse incidere in manus Dei viuentis; extra Ecclesiam salutis viam non esse; Petro eiusque successoribus Regni cælorum clauis creditas; sine fide Deo neminem posse placere. Frustra causari vos inculpatam ignorantiam, quis hoc credat de vobis perspicacissimis hominibus; frustra etiam Ecclesiasticorum mores, quos certè imitari non debetis, si

corrupti sunt, sed fidē, quæ sana est, amplecti; Gallos inter & Hispanos de fide non controuerti, secus verò inter Latinos & Græcos, Romanos inter & Protestantes; hinc comparatio manifestè claudicat.

## EFFUGIUM XXIX.

*Ducitur ex ea libertate, quæ fuit in lege natura.*

**I**Nsignem illam, inquiunt, hominum duritiem alienam maximè esse ab eo tempore, quo nondum lex aliqua scripta & lata erat, sed quo solà lege naturali gentes omnes tenebantur, atq; Deum venerabantur, quemadmodum eius potentiam ex visibilibus operibus poterant colligere. Hoc temporis spatium bis mille annos excedere, quo scripta, aut tradita diuinitus lege quadam genus humanum fuisse adstrictum non constet: habuisse fortè aliqua tradita à maioribus, quæ obseruarent, quorum tamen obseruationem necessariam fuisse, seu à Deo ipsis impositam, dici non possit; occurrere eiusmodi in veterum Rabbiorum scriptis, quæ ante Legem à Moyse latam, quin etiam ante sancitum cum Abrahamo pactum, obseruata fuisse tradant. Qui igitur Deum coluerint, vti ex lumine naturali cognosci potest, & abstinerint à grauioribus peccatis, quæ ipsa recta ratio vnumquemque docet, ei aduersa esse, eos haud dubiè potuisse æternam salutem adipisci.

Illam autem naturalem de Deo cognitionem  
non

non esse ita accuratè accipiendam, atque ea humano ingenio, cùm vires omnes intendit, excoli potest, & quemadmodum fortè Suarezius eam in Metaphysicis exposuerit, sed quomodo capi potest à recta ratione, vti ea non in hoc, vel illo homine præstans & excitata, sed vti in omnibus communiter reperitur. Cùm enim Deus clementissimus omnes homines velit saluos fieri, medium etiam, quo æternam salutem assequi debeant, ita oportere esse comparatum, vt obtineri ab omnibus possit: hanc igitur notitiam fuisse diffusam per omnes gentes, neque tunc aliud quidquam ab iis fuisse requisitum. Viam, qua ad æternam salutem perueniretur, tum non vni alicui genti, ad quam cæteræ se aggregarent, fuisse alligatam, sed vti lex illa naturalis omnibus sit communis, ita etiam viam illam omnibus gentibus fuisse communem. Neque tamen statuendum esse, Deum tum adeò fuisse rigidum, quin multa humanæ imbecillitati indulserit, quæ cùm Deum, vt est, concipere non possit, sub diuersa aliqua & sensibili ratione, diuinam maiestatem colere cœperit. Excogitata tum fuisse à prudentibus symbola quædam, ex quibus homines rudiores, cùm sibi conceptum aliquem de Deo formare nō possent, diuinam maiestatem, eiusque operationem colligerent, eaque signa passim fuisse proposita, & verum Deum per ea adoratum fuisse.

Id nisi asseratur, in periculo fore, ipsorum Patriarcharum, Thæræ in primis, & initio quoque Abrahami salutem: Iacobum diu cum Labano fuisse

se versatum, & ipsius filias duxisse vxores, quamquam sœtas eadem ratione Deum colere. Credendum tamen, hanc labem infirmitati humanæ condonasse, præsertim cum apud multos, quid illa symbola significarent, obliteraretur, aut illis non satis esset notum, & cultum aliquem ipsis signis inciperent deferre, vti apud rudiores inter Christianos videamus, cultu aliquo ab iis affici imagines, sine relatione ad prototypum, aut alios ab iis committi errores, in symbolicis Dei, & SS. Trinitatis picturis. Cum autem hæc naturalis Dei notitia & cognitio fugiendorum, quæ rectæ rationi sunt contraria, paulatim densis tenebris in animis hominum, per totum terrarum orbem obducerentur, & iam vel ipsa signa symbolica, sine relatione ad id, quod denotarent, diuino cultu afficerentur, astra etiam & signa cælestia, tum homines ipsi ceu Dij colebantur, multa etiam existimarentur esse licita, quæ à recta ratione manifestè sunt aliena, tum cœpisse paulatim viam sterni ad gentem aliquam peculiarem ex omnibus secernendam, quæ certis diuinitus instructa legibus, reliquis exemplo esset.

Igitur Abrahamo accessisse primùm peculiare traditiones à Deo ipsi commendatas, quibus tum fuerit via parata ad legem, quam Deus per Moysen posteris eius, populo suo electo, tradere constituerat: Moysis autem tempore, cum totus orbis densis idololatriæ tenebris esset immersus, placuisse Deo, ad immunem populum suum à contagio vicinarum gentium præstandum, peculiaribus cum adstringere  
re le-



re legibus, quibus ei non tantum via ad salutem æternam commonstraretur, sed etiam tota resp. per omnes partes, & membra ordinaretur. Hunc igitur statum sub lege, ab eo, qui erat ante legem, fuisse diuersissimum; in priori, ingentem fuisse libertatem; hinc omnia adstricta etiam ad certas politicas & forenses leges; quotquot igitur se aggregassent illi cœtui, eis fuisse necessitatem impositam, se illis legibus subiiciendi, easque seruandi, atque obediendi iis, quos Deus custodes illarum instituerat; & potuisse hoc haud difficulter fieri, quod gens esset vna, neque multarum Prouinciarum Domina.

Eam seruitutem durasse per multa sæcula, donec constituto tempore, venerit à Deo promissus Seruator, qui sublatis legibus omnibus iudicialiis & caremonialibus, vni illi genti propriis, restituerit primam illam libertatem, reuocatâ solâ lege morali, atque naturali de Deo notitiâ, additâ tantum fide in Christum, pro nobis incarnatum, passum & mortuum, & in distinctas in diuina essentia personas; rediisse tum propemodum eum statum, qui fuerat ante legem, & fidem illam à Christo annuntiatam, factam esse omnibus populis communem; tum etiam vti Seruator Iudaicas illas forenses & caremoniales abrogauerit, ita etiam alias eiusmodi leges singulares nullas condidisse nouas; sed quidquid ad constitutionem alicuius cœtus pertinet, & ad formam aliquam cœtus illi dandam, quidquid etiam ad reliquas omnes externas leges;

Id fuisse relictum libertati hominum, eamque fuisse necessariam, quod propaganda esset religio Christiana per totum orbem, in tot diuersissimorum ingeniorum populos, & nationes, in tot regna, principatus, & resp. diuisum.

Vbi igitur leges principales ad salutem ducentes, vbi morales saluæ mancant, quamquam aliæ adsint nãui aliqui, quamquam sint ingentia dissidia circa constitutionem Ecclesiarum, vti ea non ob sint saluti, ita neque vnitati & paci inter se retinendæ debere obesse. Sed cogitandum potius, quæ æquitate homines pios & prudentes vti necesse sit, ne tot hominum myriades, quæ ante latam à Deo legem, in sola naturali notitia Dei, & fortè obscura quadam & confusa de futuro aliquando Seruatore cognitione vixerunt, ad tartara detrudant; eadem nunc quoque vtendum esse, ne omnes pænè Christiani, non tam propter vitam malè actam, quàm propter fidem non rectam, æterna salutè, per Christum parta, mutuis suis contentionibus excidant.

## P R Æ C L U D I T V R.

**H**Æc, quæso, quid ad rem? parùm sanè abfuit, quin omnino reticerem; sed ne quid per fraudem à me omissum esse dicatis, vel hoc nomine, inuitus licèt, adduxi. Multa autem ex iis, quæ assumitis, falsa sunt; nonnulla dubia; aliqua probabilia. Quid in lege illa naturali actum sit, præter ea pauca, quæ in Genesi legimus, non  
con-

constat; quæ religionis forma fuerit, qui ritus, quæ maiorum traditiones, qui libri, quod remedium infantibus aduersus maculam originis adhiberi solitum, de iis omnibus, ut ea fuisse certissimum est, ita qualia fuerint, omnino incertum, ac proinde ea discutere prorsus inutile; quod enim apud veteres Rabbinos legitur, anilis fabula est. Fuisse autem aliqua à maioribus tradita, quæ isti à Deo acceperant, necesse est; alioquin Deus eorum saluti non satis prudenter consultum esse voluisset; ac proinde iis fuisse adstricta; huiusmodi autem sunt recta fides in Deum, patriæ cultus, aliquod sacrificij genus, in Melchisedech & Iobo luculenta rectæ fidei ac diuini cultûs suppetunt exempla.

II. Quod verò dicitis, notitiam Dei naturalem ad salutem sufficere, nemo reuerà Theologus admittet; ex hac enim operationes supernaturales, ut vocant, sequi non possunt; immò sine diuina gratia à peccatis lethalibus abstinere non poterant; hæc autem ut plurimum aliquam cognitionem, seu cogitationem supernaturalem, saltem quoad modum, ut vocant, supponit. Cum autem illi peccassent, nullum ad expungendum peccatum, ac veniam obtinendam, suppetebat remedium, præter perfectam contritionem, ac dilectionem Dei supernaturalem; quod reuerà qui neget, nemo est, modò saltem rem hanc intelligat. Si enim cognitio Dei naturalis sufficeret, cur fides adeò necessaria esset? cur sine illa homo Deo placere non posset? cur ad Deum accedens.

dens necessariò credere deberet? cur fides totius meriti principium esset?

III. Porro licet Dei cognitio, ad salutem necessaria, supernaturalis esse debeat, adeò tamen distincta & clara necessariò non requiritur; crassa est & valde confusa in nonnullis, sat scio; Deus enim suam gratiam diuersis hominum ingeniis facilè accommodat, vel attemperat; his maiora, minora illis infundit lumina. Quòd omnes homines saluos esse velit, voluntate scilicet antecedente, vt vocant, & quodammodò conditionata, id est, modò ipsi velint, rectè dicitis, & in hoc gratulor, quòd à Luthero, & Caluino discedatis; ac proinde singulis ea media præparet, quorum scilicet capaces & patientes sint, quæ reuerà si adhibeantur, æterna salus obtineri queat; multi autem ea media non adhibent, ac proinde non saluantur; licet ea adhibere, in eorum potestate positum sit: illa tamen notitia naturalis, vt subnectitis, sufficiens medium non erat, vt patet ex dictis; & multa alia ab iis hominibus Deus exigebat, rectam scilicet fidem, amorem, cultum, &c.

IV. Nulli autem genti æternæ salutis via ita vnquam patuit, quin aliis etiam pateret; & lex illa diuini cultus, quæ fidem & charitatem supponit, semper ad salutem omnibus gentibus (de adultis loquor) necessaria fuit; nec quidquam, quod per se malum esset, Deus hominum imbecillitati indulgere potuit; nec enim Deus volens iniquitatem est. Illa sensibilibus ratio, sub qua Deus coli potuit, modò symbola

illa illa ad Deum, ut prototypum, referantur, per se mala non est; quamquam symbola illa adhibita fuisse, non constet; & eadem facilitate negetur, quâ asseritur. Quod aliqui Patriarchæ ante Abrahamum à recta fide deflexerint, verisimile est, & fortè ipse Abrahamus initio; sed quid inde? quasi verò ex prauis parentibus, sancta soboles oriri non possit; cuius sanè rei innumera in sacris paginis habemus exempla.

V. Labanum excusare, quid iuuat; quasi verò Iacob inter infideles integram fidem seruare non potuerit, & ad eam uxores suas conuèrtère. Quis autem dicat, impiam illam idololatriæ labem à Deo infirmitati humanæ condonatum fuisse, atque permissam; ab his profectò Christianus abhorret animus. Diuinatis autem, ne quid acrius dicam, ubi dicitis, à Deo Moyse legem ideo traditam fuisse, quod illa naturalis Dei notitia tenebris obducta esset, & oblitteratum, quid illa symbola significarent; hæc, inquam, sunt mera somnia; Deus enim temporum momenta ponderat, ac destinatis ab æterno temporibus se & sua mortalibus aperit. Cum Adamo, Enocho, Noëmo, Abrahamo, Iobo satis familiariter egerat; præter alios, quorum sacræ paginæ non meminerunt; Moyse deinde peculiare leges tradidit, præter diuinam, iam quidem antè latam, non tamen adeò distinctè expressam; ad hanc omnes omnino tenebantur, licèt Moysaica omnes non adstringeret; nec Synagoga Iudaica totam Ecclesiam complectebatur, quod vltro fateor.

V. Vbi

V. Vbi autem Seruator venit, primam illam naturæ legem minimè restituit, vt perperam dicitis; sed longè nobiliorem instituit, Christianam scilicet & Euangelicam, quam gratiæ vocant, propter vberiorē affusæ gratiæ appulsum. Ecclesiam suam ædificauit, & eam nouis Sacramentis, nouo sacrificio, nouo ministrorum genere, sub Petro supremo Vicario, nouis præceptis Euangelicis, nouis consiliis, nouo testamento instructam esse voluit; eamque vniuersalem & Catholicam, quæ non Iudæos modò caperet, sed omnes omnino populos complecteretur. Equidem Iudæos ab antiqua Lege liberauit, exceptis tamen diuinis præceptis, vulgari Decalogo, vt vocant, contentis; cùm enim Iudaica illa sacra figuræ essent, & vmbra Legis Euangelicæ, certè vbi lux affulget, expungitur vmbra; vbi veritas apparet, figura inutilis censetur; vbi, quod promissum erat, exequutioni mandatur, pacti chirographum rescindendum. Libertatem quidem Christus attulit, non quòd nos à seruitute Iudaica liberârit, à qua Iudæos duntaxat exemit, sed à peccati & diaboli iugo; hac enim nos Christus libertate donauit, cùm Dei filios esse voluit, quotquot eum receperunt; & Principem mundi eiecit foras, qui fœdissimam tyrannidem in toto orbe terrarum exercebat.

VI. Falsò verò subnectitis, à Christo reuocatam fuisse noticiam illam Dei naturalem, cùm diuinam fidem nobis reliquerit, iis scilicet diuinis arcanis reueratis, quæ antiquis reuelata non fuerant. Quis autem felicem hunc legis Euangelicæ statum, eundem

dẽm cum illo, qui ante legem fuit, esse dicat? Quis enim illas tenebras cum multiplici diuinæ fidei lumine, quo Christus suam Ecclesiam perfudit (est enim lux mundi, quæ omnem hominem illuminat) quis, inquam, tenebras illas, cum tanta luminum v̄i comparet? quis obscuram noctem, cum serena dies, quis inania quædam & rudia sacra, cum nostris Sacramentis, ac totius rei sacræ mysteriis, quibus in Ecclesia gaudemus? Quod autem dicitis, nullam à Christo conditam legem, adeò falsum est, vt refellere pudeat; considerate, amabò, quod vos errores vestri abduxerint; nulla per vos lex Evangelica, nullus Christianorum cœtus, nulla Ecclesia, ac proinde nulla religio; nemo hætenus hæreticus eò venit audaciæ, vt tam horrenda, tam impia, tam blasphemata effutire ausus fuerit.

VII. Quoties, amabò, Christus Ecclesiæ meminit, ouilis & gregis, agnorum & ouium? cui, amabò, gregem suum credidit, clauēs regni celorum tradidit, facultatem soluendi atque ligandi commisit? quid Apostolos facere iussit, quid prædicare, vbi præcepta, vbi consilia, vbi responsa? Omnia igitur libertati hominum minimè reliquit; legem suam tulit; iugum & onus suis subditis imposuit, illud quidem suaue, & hoc leue; computruit enim à facie olei, hoc est, multiplicis gratiæ accessione longè facilius redditum est. Porro leges principales ad salutem necessarias à Christo accepimus, nec vllum nœuum, qui sit contra fidem, aut mores, tolerat Christus; nulla vnitas, nulla pax, sine fidei;  
legis,

legis, & Ecclesiæ unitate. Nec quisquam est, qui dicat, omnes illos, qui ante legem vixerunt, æternis cruciatibus addictos esse, quorum multi haud dubiè salui fuerunt, propter rectam fidem in Deum, ac vitam rectè compositam. Christiani similiter tum propter sinistram fidem, nisi errore inculpato ducantur, tum propter vitam malè actam æterna salute excidunt; si vel alterum desit, salui esse nequeunt, sæpe autem recta fides cum mala vita coniuncta est, rarò tamen bona vita, cum sinistra fide.

### EFFVGIVM XXX.

*Ducitur ex eo, quòd omnia ita sint comparata, ut abstinentium sit à rigidis censuris.*

**Q**Uum igitur omnia ita sint comparata, abstinentium esse à rigidis censuris, quibus fecundis hætenus partes assueuerint, quieti verò & tranquillitati ab omnibus studendum, atque decretoriam sententiam aliquando in diuino iudicio, à summo & clementissimo Deo esse expectandam, in cuius iudicio, vti nemo iustificari possit, quocum Deus iure agere, & delicta omnia voluntatis ad rigidum examen vocare velit: ita etiam omnino credendum esse, pari æquitate, & haud dubiè maiore, Deum etiam errores intellectus reuocaturum esse in examen, quò facilius homini est, illa vitare, & magis arduum animum penitus expedire. In illa igitur Domini & Seruatoris nostri Iesu Christi



Φιλανθρωπία esse acquiescendum, & interea in hoc mundo, quantum fieri possit, pacem cum omnibus esse colendam.

## P R Æ C L U D I T U R.

I. **A**B iniustis censuris abstinendum esse, vltro fateor; à iustis tamen, post Ecclesiæ & legitimi iudicis sententiam, abstinere non possumus, nec debemus. Ecclesiæ iudicio standum est, quod cum diuino semper consentit, nec anxij expectare debemus, quod iam tenemus; vox Petri, vox Christi, vox Ecclesiæ, vox Dei est. Iis porro consentire non valemus, qui Deo non consentiunt, qui Ecclesiam non audiunt, ac proinde Ethnicorum & Publicanorum loco habendi. Pacem & tranquillitatem Ecclesiæ non ipsi perturbauimus, sed vos vltro ab Ecclesiâ desciiuistis, & sacram illam vnitatis fibulam rupistis, quâ corporis Christi membra copulantur: quid ergo nos quieti & tranquillitati studere iubetis; nisi adsit fidei vnitas, nulla pacis vnio intercedere potest.

II. Errores intellectus si crassi & voluntarij sint, perinde atque alia delicta, Deus ad rigidum examen vocat, præsertim si cum obstinatâ pertinaciâ errores illi coniuncti sint. Decumana præsumptio est, errores vestros diuinæ bonitatis ac Φιλανθρωπίας obtentu, eleuare ac minuere: Deus, mihi credite, non irridetur. Nec est, quod infirmitatem humanam prætexatis, quæ in alio potius delictorum genere timenda est, quàm in hæresi & infidelitate; nempe pro hac magnis animi perturbationibus aut motibus non a-

gitamur. Hinc contrarium penitus sentio, scilicet fore, ut Deus peccata infidelitatis longè graviùs ac seueriùs puniat, quàm simplices carnis lapsus, v. g. quod certè inter morales Theologos nemo erit, qui neget; hinc ab Ecclesia seueriùs huiusmodi peccata castigantur.

## C O N C L U S I O P A R Æ N E T I C A.

I. **Q**uidigitur restat, præclusis omnibus Effugiis, nisi ut tandem ad Ecclesiam redeatis, Viri Clarissimi; disputatum satis: altercationes odia potiùs nutriunt, quàm mentes illustrent; illà vanæ gloriæ aurâ omnes, saltem ut plurimum, ducuntur, ut vinci pudeat. Itaque, quod hætenus tot scriptorum ac librorum volumina in lucem edita, tot concertationes, tot congressus obtinere non potuerunt, id ferè diuinæ gratiæ beneficio ac Spiritûs sancti impulsu consequuti sumus; nondum sanè rediistis, nec deditionem fecistis; nutare tamen, & quasi de deditione agere cœpistis; macti animo, vocantem Deum auscultate, diuinis gratiæ motionibus obsecundate: quid vos moratur? Vestra fides vobis suspecta est, nostræ firmitas ac veritas vobis perspecta; pauca sunt, quæ displiceant, eaque nullius momenti, & mera adiuncta, quæ ad rei substantiam non pertinent; esset, quòd viri prudentes aliquid in vobis desiderarent, si propter accidentia, ut vocant, substantiæ ac totius rei iacturam faceretur.

II. Iam conscientiæ stimulis acti estis, salutem vestram

vestram in tuto collocare; vox illa cordis interior, quæ vos compellat, ad reditum & resipiscentiam vos hortatur; pulsat & vellicat Deus cordis vestri fibras; ut vos tandem excitet. Durum est vobis contra stimulum calcitrare; de imminente periculo Deus intrinsecus vos monet: quid, amabò, obsurdescitis? Nihil amplius excusationis prætexere poteritis, nec bonam fidem aut inculpatam ignorantiam causari; cum iam vobis religio inculsa sit, & vestræ causæ magnopere diffidatis.

III. Quidni maiorum vestrorum exempla vos moueant, quorum integram fidem antiquis historiarum monumentis consignatam habetis? Quantâ ipsi pietate, quo affectu & animo erga Ecclesiam Romanam fuerint, tot ab iis relicta monumenta testantur, tot sacræ ædes conditæ, tot Monasteria instituta, tot Nosocomia constructa, & annuo censu instructa, tot viri sanctimoniâ illustres, doctrinâ eximij, tot Imperatores de Ecclesia bene meriti: nullus sanè est Germaniæ, Belgij, Angliæ tractus, in quo huiusmodi antiquitatis vestigia non extent.

IV. Quid porro vos tenet? an fortè pastorum vestrorum cura? sed lupi sunt rapaces, suis commodis intenti, sibi consulentes, non gregi; præterquàm quòd iis sunt moribus, saltem ut plurimum, qui vobis exemplo esse nō possunt. Deinde quis nescit, maiori saltem ex parte, transfugas esse ac Monachos apostatas, qui ciurata fide, ne scelerum poenas luerent, ad vos transierunt: miseret me vestri, ita me Deus amet. An fortè salutem vestram iis creditis,

qui suam non curant; qui sibi nequam est, aliis bonus esse nequit.

V. Omitto infaustum Patriarcharum vestrorum nomen; cogitate, quæso, ac seriò apud vos reputate, an Lutherus & Calvinus Petro Christi Vicario antepponendi sint. Vtriusq; laudes & Elogia suprà iam perstrinxi; hoc loco non repetam, ne vobis insultare videar, quod tantum abest, ut faciam, quin potius maximo vestræ salutis ac prosperitatis desiderio teneri me sentio. Sed mirum mihi semper accidit, qui fieri posset, ut prudentes & cordati viri, quales vos esse intelligo ( nec enim factiosos quosdam compello, qui religionis obtentu tumultus excitant ) duos sacerdotes apostatas Romani Pontifici anteferre non vererentur.

VI. Tanta fidei vestræ ac dogmatum varietas est, ut certi ac tuti esse minimè valeatis. Fides illa, quæ nutat, dubia est, ac proinde humana, non verò divina; sed hæc nutatio ad constantem situm inclinat, & mutationem desiderat. Nutare in fide prudentis hominis non est; quum illa duntaxat fides tenenda sit, quam certam esse constet; si autem certa est, minimè nutat. Alia, quæ caduca sunt, dubia & incerta manere, parum profectò interest: at salutem nostram dubiam esse, quoad eius fieri potest, vir prudens minimè patiatur.

VII. Quis autem non videt, quanti sit, Catholicorum partes sequi, & fidem nostram amplecti; in quo sanè nulla iactura fieri, sed maximum lucrum sperari potest; nempe apud vos etiam in confesso est, quem.

quemlibet in Ecclesia Romana saluari posse; cum tamen nos, in vestra secta, neminem saluum fore credamus, adultum scilicet, nisi fortè quispiam inculpato errore teneatur, & pro admitta lethali noxa, contritionis actum eliciat; quod quàm rarò accidere possit, iam suprà dictum est.

VIII. Itaque extra Ecclesiam Romanam, nullum lucrum sperari, & maximum damnū, post mortem, iure timeri potest; in ea verò, nullum damnum timeri, sed maximum lucrum, & bonum sperari. Imprudenter igitur quispiam fecerit, si ab Ecclesia deficiat; salutem suam, hoc est, rei summam, manifestò periculo & aleæ committat; in Ecclesia Romana omnia sperare, nihil timere possum, modò cætera consentiant; extra Ecclesiam cuncta timere, nihil sperare; hinc omnia consequi, nihil perdere; illinc verò nihil consequi, omnia perdere; summa igitur stultitia est, ab Ecclesia desciscere.

IX. Nec est, quòd inconstantia & leuitatis nomen ac probum timeatis, nempe mutare in melius, sapientis est; parentes vestri, qui ab Ecclesia discesserunt, iustam hanc causam afferre poterant, ne à recta ac sibi à maioribus relicta fide, & lege deficerent. At vos, qui vobis conscij estis erroris, & pessimi statūs, in quo viuitis, nihil sanè est, quod à mutatione deterrere queat, quam nemo prudens vitio vobis vertet, sed potiùs summæ laudi. Quis enim eum non laudet, qui errore comperto, ab eo declinat, & cognitam veritatem vtrò amplectitur.

X. Quid porro vos morari possit, non video;

non diuitiæ, quas retinetis; quæ tamen, si pro æterna salute relinquendæ essent, melius collocari non possent. De honoribus nihil dicam, quid enim homini honorificentius accidere possit, non video, quam illud vitæ institutum amplecti, in quo verus Dei cultus habetur; quo Deum nobis demereri possumus, ac diuinam nobis amicitiam conciliare; ac proinde illud effatum optimè in nos quadrat: *Nimis honorati sunt amici tui Deus*; nempe inde veræ honoris gloria deriuatur. Accedit, quòd, si opus esset, mundanum illum honorem cuius floccifacere debet, ut æternam felicitatem consequatur.

XI. Nec vobis luculenta desunt exempla; nulla est ferè familia nobilis in Germania, ex qua aliquis ortus non sit, qui ad Ecclesiam redierit. Palatina Domus Eduardum nobis reddidit, Saxonia Lauemburgicum, Hassiana Langranium; Wittemberga & Nassouia suos dederunt: Ex Brandenburgico sanguine, ac Brunsvicensi nonnullos inter Catholicos habemus; Holsatia Rantzouios ad nos remisit. Quid de Suecia dicam, cuius inclyta Regina, abdicato regno, & hæresi eiurata, fidem Catholicam profitetur.

XII. Mirum porro accidit, eò Germanos ac Septemtrionis Principes venisse, ut vel Caluini, vel Lutheri sectam amplecterentur, quæ Principibus non mediocriter aduersatur, ac Democratiam totis viribus promouet. Ab exemplis abstineo, ne iam obductas cicatrices refricare videar: Mirum quoque accidit, quomodo ab Ecclesia Romana descuerint, in qua tantum Monarchiæ studium, tantus in

Monar-

Monarchas affectus, tanta Principibus gratificandi cura.

XIII. An fortè aliquot præcepta Ecclesiastica animos vestros à nobis abalienant? pauca ieiunia vos terrent? festi dies per annum indicti non placent? soluere decimas graue est? aperire in Sacramentali Confessione peccata, durum vobis videtur? Sed quid hæc præ salute ac felicitate æterna? Si ieiunare noxium est, Ecclesia facillè vos eximet; Dies festi, vt iam indicaui, relaxationi animi potiùs, quàm diuino cultui seruiunt; Decimæ in iura Principum aut aliorum laicorum passim transierunt; Sacramentalis demum Confessio animum ita tranquillat, vt illa duntaxat conscientiæ stimulos obtundere valeat.

XIV. Quid ergo diutiùs vos tenet suspensos? optima parens Ecclesia vos dudum expectat, manus vobis tendit, brachia explicat, viscera & sinum aperit; non pœnas parat, nec fulmina cudit, sed gratulabunda occurret, ac rebelles suos, immò rebellionis immemor, filios suos charissimos amplexabitur; errantem ouem hilari in ouile reducet; perditam drachmam lata inueniet; & prodigum filium, qui perierat, exultabunda recipiet. Votis optimæ parentis morem gerite; reddite vos Matri & Deo, immò & vobismetipsis; saluti vestræ consulite, quam in Ecclesia duntaxat, nusquam aliàs inuenietis.

XV. Cæterùm, si dum vestra præcluderem effugia, aliquid fortè paullò acrius dictum excidit;  
ignosci-

ignoscite, quæso; malus certè animus non fuit, neque mens sinistra; testis enim est mihi Deus, quomodo in visceribus Christi vos amem, quantoque vestræ salutis desiderio teneri me sentiam. Faxit Deus, ut tandem aliquando illud tempus adsit, quo ex omnibus, saltem qui in Europa Christiani sunt, fiat vnum ouile, & vnus pastor. Hæc mea sunt vota & desideria, quibus si vestra conuersio accesserit, nihil est amplius in hac mortali vita, quod desiderem; contentus moriar, ubi vos, ut par est, viuere ac credere videro. Hoc vnum interim à supremo rerum moderatore Deo importunis precibus petam, ut mentes vestras cælestis luminis appulsu perfundat, & corda efficaci excitet motione, ut tandem eiuratis erroribus, in Ecclesiam admitti, ibique veram Christi fidem & legem profiteri valeatis.

*F I N I S.*

Omnia ad maiorem DEI gloriam, & Ecclesiæ Catholicæ incrementum.





# Corrige.

Pag.

- 6. v. 11. argumentis, *adde.* armatus.
- 9. v. 9. argumenti rem. l. vim.
- 13. v. 6. terminetur, l. determinetur.
- 25. v. 4. possit. l. possiat.
- 62. v. 12. cuius, *adde.* operâ.
- 64. v. 2. subsunt, l. subest.
- 97. v. 3. à fin. perspicuum, l. perspicua.
- 105. v. 1. animales. l. animalia.
- 113. v. 20. & ab alia adstruuntur, l. & ab vna reiiciantur,  
quæ ab alia adstruuntur.
- 118. v. 13. abhinc annis, l. paucis abhinc annis.
- 143. v. 4. concedere. l. Deus concedere.
- 188. v. 5. facultates. l. difficultates.
- 213. v. 16. armorum. l. annorum.
- 245. v. 13. recepta. l. reperta.
- 295. v. 15. abrogatâ. l. arrogatâ.
- 316. v. 7. varium est. l. vanum est.
- 326. v. 20. Deum. l. Reum.

*Journal of the American Statistical Association*

How do you feel about the results?

1294.481390, 1.41.30.1390, 2, 35

$\frac{1}{2} \log \left( \frac{1 + \sqrt{1 - 4\alpha}}{1 - \sqrt{1 - 4\alpha}} \right) = \sum_{n=0}^{\infty} \alpha^n$

1. *Staphylococcus aureus*

Dr. J. J. Thompson, Jr.

Supp. Ser. 1, 1964, p. 10, fig. 2.

[illegible]

1. The first step is to identify the problem or question that needs to be answered. This involves understanding the context and the specific requirements of the task.

... and ...

1. *Staphylococcus aureus* (100%)

Suppose that  $\mathcal{A}$  is a  $\mathcal{C}^*$ -algebra, and let

2016 年 1 月 1 日

• *Journal of the American Statistical Association*, 1997, 92, 1013-1026.

<sup>1</sup>6218097; J. C. ... 21.4.1.1.1.1.

Figure 12.10. *Inds. 21-22, 2004*

*[Faint handwritten notes at the bottom of the page]*

[illegible]





9-1-1

